

國學基
本叢書
明詩紀事
八

書叢本基學國

事紀詩明

(八)

輯田陳

行發館書印務商

時至天啟。極人恣睢。毒流海內。國之元氣。斲削無餘。思宗適乘其阨。亦思救弊扶衰。而性猜識闇。罔別黨
舊。雖以高陽之偉略。長洲之碩學。不能久安於位。而烏程。宜興。武陵之徒。竊居政地。妬賢嫉能。政亂俗偷。
天殃民怨。秦之大盜起而乘之。海內鼎沸。亦有智略之帥。英毅之夫。洞胸抉腹。碎腦馘元。而莫之或救。余
錄啟禎之詩。先忠節。次遺逸。一以伸正氣。一以黜忝竊。而科目之士。夫。乃夷而後之。其中未嘗無賢明之
士。牛毛麟角。節長棄短。觀者自得之也。論者謂明之亡。由於黨禍。乃歸罪於東林。復社之徒。嘻。何其慎也。
夫東漢之亡。亡於寺人之禍。而黨錮乃興。明之亡。亦亡於閹人之孽。而東林。復社。乃顯。陰陽戰而霆碎電
流。風水激而波涌濤飛。邪正攻而黨人義憤節立。暨弘光偏安江左。支持殘局。而閹黨猶思翻局。以底於
亡。繁霜板蕩之詩。所以怨也。在昔漁洋與竹垞論選明詩。謂不宜略遠詳近。以今日而溯朱明年。將三百
亦云遠矣。余搜採明末諸家。補詩綜之闕漏。於斯集尤亟致意。然未敢言備也。宣統辛亥仲春。黔靈山樵
陳田。

明詩紀事辛籤目

卷一

陳子龍三十八首

曹學佺三十二首

卷二

孫承宗十三首

孫傳庭四首

高名衡五首

張銓一首

傅梅二首

鹿善繼三首

南居益一首

尹伸四首

傅宗龍一首

畢拱辰三首

蔡道憲三首

宋玫二首

盧安世一首

朱萬年一首

張秉文一首

楚煙一首

黎弘業一首

馬如蛟一首

周而瀉一首

盧象昇一首

謝璉一首

卷三

范景文五首

王家彥一首

馬世奇五首

周鳳翔一首

許直一首

陳良謨一首

金鉉一首

卷四

劉宗周三首

卷五

馮一第 一首

呂維祺 五首

李士標 二首

倪元璐 二首

吳麟徵 一首

凌義渠 四首

吳甘來 一首

申佳胤 一首

汪偉 一首

劉理順 一首

黃道周 十八首

徐石麟十首

夏允彝一首

睦明永一首

黃淳耀十九首

侯嗣曾二首

侯玄演二首

王士和一首

卷六

史可法一首

袁繼咸一首

黃端伯四首

徐汧一首

萬元吉二首

彭期生一首

徐爾毅一首

夏完淳十一首

睦本一首

黃淵耀二首

侯岐曾一首

王與胤二首

左懋第一首

郝彪佳二首

王若之三首

楊廷麟二首

劉同升三首

馬懋功三首

吳應箕十五首

金聲一首

江天一一首

麻三衡六首

沈壽堯一首

楊文聰十一首

孫臨六首

錢棟三首

魏耕五首

錢梅一首

楊廷樞一首

卷六下

韓上桂四首

林說一首

文震亨五首

張秉純一首

許士楷一首

李之椿一首

項禹揆一首

黃周星四首

卷七

黎遂球十二首

鄭露十三首

陳子壯十六首

陳邦彥三首

梁朝鐘三首

卷八

朱繼祚一首

張肯堂一首

馮京第一首

陳函輝六首

吳鍾巒一首

林尊賓一首

卷八下

吳易五首

萬發祥一首

楊永言一首

李待問一首

石隆一首

張家玉一首

張國維一首

張煌言五首

錢肅樂一首

詹兆恆一首

楊文瓚一首

林洵一首

楊文薦一首

溫璜一首

梁于涖二首

林帽三首

凌駟一首

卷九

何騰蛟一首

瞿式耜一首

張同敞一首

郭之奇四首

范文光一首

揭重熙一首

李含乙一首

梁若衡一首

鄺鴻一首

朱實蓮一首

邱懋樸一首

鄔昌期一首

馬士升一首

蔣勸善一首

譚先哲一首

尹思民一首

唐誼一首

謝如珂一首

卷九下

王錫堯二首

徐孚遠二首

路振飛一首

堵胤錫一首

章曠三首

李長祥一首

戴重十首

錢邦芭三首

卷十

邢昉五十五首

錢澄之二十首

吳嘉紀三十六首

王翊二十七首

卷十一

✓ 屈大均四十首

陳恭尹三十四首

陳子升三十首

卷十二

彭孫貽二十八首

馮班五十五首

紀映鍾二十四首

卷十三

顧炎武十九首

王夫之四十二首

陸世儀十六首

陳瑚九首

卷十四

明詩紀事 辛籤目

陳忱二十四首

余懷三十一首

卷十五

杜濬十四首

陶澂十九首

卷十五下

胡承諾二十六首

卷十六

徐枋六首

巢鳴盛一首

方授二首

李成憲一首

李確六首

談遷七首

傅占衡二十九首

費密二十五首

董樵十二首

萬壽祺二十二首

沈壽民四首

李世熊十六首

王錫闡一首

黃澂之五首

李雲龍八首

文祖堯一首

周岐三首

林時益二首

夏古丹三首

張蓋九首

周蓼卹二首

戴笠二首

卷十七

姜琛七首

王嗣翰一首

黎延祖一首

張若化一首

陳孝威一首

戴本孝四首

方以智十三首

魏禮七首

徐夜十首

薊過庭二首

韓畱六首

彭士望十一首

朱士稚二首

姜垓三首

王嗣乾一首

黎彭祖一首

張若仲一首

陳孝逸一首

戴移孝三首

方其義三首

王光承二首

梁以枏二首

姜安節二首

張可仕一首

嚴調御二首

嚴敕五首

卷十八

黃學謙五首

文震孟一首

蔣德璟二首

文安之一首

蕭士瑋五首

倪嘉慶一首

喬可聘一首

王烈一首

梁以樟九首

姜實節四首

張可度二首

嚴武順二首

吳馴一首

陳仁錫一首

郭都賢一首

馮元颯一首

金肇元一首

黃宗昌二首

何萬化一首

梁元柱一首

齊心孝一首

秦綱五首

何楷一首

熊開元一首

郭紹儀一首

劉在朝六首

李模一首

區懷瑞二首

卷十九

呂大器四首

于穎一首

龔士驥八首

曹荃一首

姚孫渠一首

王鳴玉一首

黃景昉五首

孫晉一首

陸澄原一首

陸錫明一首

黃文煥一首

賀鼎二首

黃光一首

高斗樞二首

周鏞一首

吳承燧一首

林銘球一首

謝宗一首

姚思孝一首

冒起宗一首

李奇玉一首

薛案十一首

陳天定一首

李世奇一首

許豸一首

黎崇宣一首

吳國琦一首

楊士聰一首

汪國士一首

陶汝籍十首

漲明弼二首

卷二十

文德翼二首

朱芾煌五首

劉侗一首

凌世韶一首

張允掄一首

關士琦二首

潘世澄一首

黃日乾一首

余颺十首

許承欽一首

秦鏞一首

莊元宸一首

錢朝彥一首

康范生一首

張琚一首

曾異撰一首

卷二十一

湯來賀一首

來集之一首

徐芳三首

吳中蕃十二首

郭萬完一首

王傲通一首

劉道開三首

姚宗典一首

宮偉鏐一首

倪長圩一首

費經虞一首

羅策一首

萬曰吉六首

單恂二首

高承鋌五首

張璵二首

趙炳龍一首

周嬰一首

李國相一首

錢默一首

張若羲一首

包壯行一首

李實一首

周損五首

蒙正發一首

卷二十二

張溥一首

楊彝一首

朱隗二首

陳宗之十八首

張澤一首

魏沖一首

潘一桂二首

梅朗中五首

趙相如二首

祝之至二首

吳驥二首

米元佃四首

張采一首

顧夢麟六首

顧杲一首

葉襄七首

周立勳三首

許元功四首

王潢二首

蔣臣一首

許振光一首

俞南史二首

方文十首

葛芝二首

賀裳四首

劉城十五首

卷二十三

聞啓祥二首

陸圻四首

夏縉七首

韓曾駒四首

陳梁一首

李寅二首

祁鴻孫一首

卷二十四

徐白一首

吳德操一首

趙司直二首

賀燕徵七首

沈自然四首

朱一是十七首

卓人月二首

趙韓一首

韓繹祖六首

錢士馨一首

俞汝言三首

萬時華十三首

馬猶龍八首

徐世溥十三首

余正垣一首

王猷定十首

李奇一首

舒忠讜一首

湯開先二首

陳晝一首

卷二十五

于奕正五首

王袞七首

嚴首昇四首

莊祖誼三首

趙士喆十二首

伍瑞隆二首

宋璉一首

劉湘客一首

卷二十六

吳惟英二首

張怡十首

劉文炤二首

祁班孫四首

劉孔和九首

茅元儀二首

常延齡一首

陳震一首

陳斌一首

卷二十七

王時敏二首

金俊明六首

崔丹二首

歸昌世二首

顧樵三首

文枬一首

周祚新一首

張颿四首

項聖謨一首

金遠一首

胡長庚一首

余杰六首

李肇亨三首

陳洪綬十三首

龔賢六首

歸莊一首

徐繼恩二首

楊補二首

呂潛十首

周容一首

蕭雲從一首

卷二十七下

許友六首

魯得之一首

徐柏齡一首

朱奩一首

汪珂玉二首

張穆一首

來蕃三首

卷二十八

張綱孫十三首

沈謙十三首

柴紹炳四首

孫治二首

朱鶴齡四首

顧夢游五首

董說十三首

魏學伊四首

湯傳楹四首

繆永謀十二首

胡山十一首

韓洽十首

吳騏十首

毛晉二首

曾燦十一首

胡介七首

邱世望十首

韓純玉三首

魏允枏三首

徐開任三首

吳懋謙十三首

李煒六首

錢謙貞五首

姜廷梧二首

王啓茂四首

陸嘉淑二首

黎祖功二首

卷二十九

王屋一首

陳衍二首

蔣之葵六首

周箕九首

爰丹生四首

張彥之二首

徐崧五首

錢光繡二首

東蔭商二首

陸繁昭二首

鄭階四首

陳祚明三首

顧艾一首

王履和二首

麻三雍一首

吳一元一首

何絳三首

梁槿一首

岑徵二首

易訓一首

英上一首

梁可瀾一首

庾樓一首

趙焯夫二首

梁觀一首

凌泉八首

楊時暹二首

凌潞庚四首

陳宏裔七首

季良眉一首

楊麓一首

孫模二首

卷三十

李標一首

葉珍一首

孫纘祖二首

蔣國榮一首

蔣平階一首

計孺一首

黃輔一首

叢一蘭一首

范廷瓚一首

吳道約一首

黃世康一首

林璟一首

王之梁一首

鄧右符一首

璩一麟二首

李振聲一首

駱雲程二首

朱文心一首

卷三十一

潘陸二首

范路七首

陳確一首

馬鑾二首

楊焯二首

周薰卿一首

方沂一首

覃獻籙一首

黃文星一首

盧傳來一首

戴于庭一首

張玉成一首

吳爲霖一首

湯燕生三首

湯濩二首

吳時德三首

張光啓一首

陸啓滋一首

史玄六首

顧有孝一首

雷士俊四首

王廷璧一首

蔣人一首

孫爽一首

錢肅潤四首

朱國漢七首

陳三島二首

譚雅一首

王萬禛一首

車以遵一首

張致中一首

張杉二首

趙渙一首

周安一首

李沂四首

談允謙四首

王巖二首

蔡仲光三首

丁之賢三首

徐晟二首

盛斯唐二首

方祖兆一首

楊炤一首

蔣之翹三首

路澤農一首

屠曠一首

李生乾一首

徐篤一首

何蔚文一首

何大成一首

陸來三首

卷三十二

華淑二首

王彥泓二首

何述皋一首

徐錫祚二首

林雲鳳二首

薛始亨二首

程奎一首

李麟友一首

楊連吉一首

葉有馨一首

徐濟忠一首

邵濂二首

陳鴻五首

張維二首

錢孫艾一首

秦徵蘭十二首

王邦畿三首

吳淹一首

吳濡三首

劉永滋一首

王璉一首

楊靜一首

程廷橈一首

錢秉鐔一首

方穀一首

卷三十三

吳用鈇一首

鄧祥麟一首

劉昌運一首

閃知愿一首

陳啓相一首

劉元祥一首

楊誌一首

周書一首

程梧一首

程九皋一首

齊程一首

彭堯諭一首

陳濟生一首

黃翼聖四首

談亮一首

卷三十四

傅爾元一首

侯涵二首

蔣易二首

石可璽七首

沈叔竑一首

徐象婁一首

顧超八首

李潛一首

魏應星一首

李瀚二首

苗君稷一首

王承之五首

顧在觀一首

沈祖孝二首

閔鼎一首

李景福一首

邵似歐二首

潘問奇五首

張養重二首

章人鳳一首

王貴一二首

程岫一首

明詩紀事卷十八

庚籤

朱之蕃一首

之蕃字元介南京錦衣衛人萬曆乙未第一人及第授修撰歷諭德庶子少詹事進禮部侍郎改吏部贈禮部尚書有奉使稿四卷南還雜著一卷紀勝詩一卷落花詩一卷

列朝詩集元介出使朝鮮盡卻其贈賄鮮人來乞書以貂參爲質妻裴顧返厚盡斥以買法書名畫古器收藏遂甲於白下無聲詩史元介楷法敏速腕際有神寫山水得米襄陽梅花道人標韻竹石兼東坡與可之妙

桃花鴿

半林斜日數家煙流水冷冷意悄然山犬不驚機事少暮鴉飛盡野雲閒羞投定遠懷中筆笑悟維摩病裏禪爲向青帘探酒價何妨一醉晚風前

湯賓尹一首

賓尹字嘉賓宣城人萬曆乙未第二人及第授編修歷中允諭德庶子遷南國子監祭酒有睡菴集二十八卷

南中春詞

田按嘉賓宜黨之魁與東林爲難萬歷辛亥富平孫尙書丕揚掌察典黜嘉賓等士論快之嘉賓以制舉業名天下詩非所長
常日春風長板橋。琵琶細語撥檀槽。一從騎鳳蕭郎隔。著處花飛怨伯勞。

孫慎行一首

慎行字聞斯武進人萬歷乙未第三人及第授編修歷中允諭德庶子少詹事遷禮部侍郎乞歸起禮部尙書謝病歸以論紅丸遣戍甯夏未行以赦免起故官協理詹事不就廷推閣臣甫入都卒贈太子太保諡文介有玄宴齋集

靜志居詩話要典三案羣切齒者挺擊則朝邑王侍郎移宮則應城楊忠烈紅丸則文介也平居研精易學吟詠不甚留意其觀元祐黨人碑有感作云誰知黨人籍翻作褒忠碑曠世相感今古同然矣

見宋黨禁有感

誰知黨人籍翻作褒忠碑千秋感尙爾一時豈無知朱紫從來眩邱山尙可移聖朝恩澤久朝論幸無訛

劉一燦一首

一燦字季晦南昌人萬歷乙未進士選庶吉士授檢討遷贊善歷洗馬諭德庶子祭酒少詹正詹遷禮部侍郎進本部尙書兼東閣大學士參預機務加太子太保改戶部進文淵閣大學士加少

保。改吏部。進武英殿大學士。加少傅。兼太子太傅。進中極殿大學士。加少師。福王時。追諡文端。有文端集。

將謝病歸豫章有懷東湖別業

三載牽纓絨。浮名滯一身。頻勞江國夢。空逐帝京塵。園墅新蕪滿。圖書舊業貧。白雲慚有約。回首重傷神。

王維儉一首

維儉。字損仲。祥符人。萬歷乙未進士。除濰縣知縣。徵授兵部主事。削籍爲民。起光祿寺丞。遷本寺少卿。歷順天府丞。大理少卿。以僉都御史巡撫山東。遷南兵部侍郎。改北。復改工部。有土損仲集。

列朝詩集。損仲敏而好學。通籍六載。御批罷官。終神宗之世。二十年不起。好古書畫器物。不惜典衣舉息。家藏鑿周鼎。夔龍夏彝。皆一時名寶。客至。焚香淪茗。商略經史。賞翫古物。竟日獻酬。無一凡俗語。爲人疏通軒豁。口多微詞。評隲藝文。排擊道學。機鋒側出。人不能堪。亦坐是爲仕路側目。與余定交良久。一日。時賢畢集。徵漢書某事。具悉本末。指其腹。軒渠曰。名下常有虛士乎。損仲詩。清婉而近於弱。留心宋後三史。苦宋史煩蕪。刪定成書。吳興潘昭度鈔得副本。今損仲家圖籍。盡沈於汴京之水。未知吳興鈔本云何也。

書影。吾邑王公半菴。好收藏三代銅玉器。常得漢玉觥。爲世所未有。因以寶觥名齋。予得交令嗣雁澤。在吳門市上。得公詩文各一卷。予爲序而鐫之。以歸雁澤。公詩文皆不苟件。矜慎自娛。故所存不多。然亦無不足傳者。

集岩亭王孫東墅

明詩紀事 庚籤 卷十八

二四二七

小妓宮羅窄。名花綺幕張。晴絲牽酒盞。飛絮戀箏床。改席臨階碧。登臺望野蒼。芙蓉處處是。乞取緝秋裳。

蔡復一三首

復一，字敬夫，同安人。萬歷乙未進士。授刑部主事。歷員外郎中。乞歸。改南戶部。再改北兵部。出爲湖廣參政。遷按察使。歷湖廣、山西布政使。以右副都御史巡撫鄖陽。改貴州。加兵部侍郎。總督貴州雲南湖廣軍務。贈兵部尚書。諡清憲。有遜菴集十七卷。

靜志居詩話：景陵之邪說行，率先倒戈者蔡敬夫也。其駢體亦不脛自入。亡友漢陽王亦世最賞之。然以詩論，嘗取彼而舍此矣。

田按：敬夫醉心鍾譚，摩擬酷肖。五言時有佳句，如戰者評泉史，餐花訂食經，官味秋雲薄，鄉心夜雨多，蛾眉生易妬，駿骨死方憐，岸幘親魚鳥，移尊就薜蘿，病後危看影，窮邊怯問途，水鳴不知處，林翳自生煙，微鐘催上月，投鳥沒蹄雲，閒身惟受屐，病眼漸妨書，土膏鬆菜甲，風語滑倉庚，未嘗不可節取也。

端午後一日寄鄧玄度

節物太關人。始知身入楚。楚客負楚遊。事過空追撫。六日鶯花間。騷魂無處所。書從玄夷來。猶挾岫嶺雨。所缺岳樓詩。君爲重遊補。一讀一冷然。湖山天仰俯。嘉辰乃當茲。續歡徵綠醕。子瞻改重陽。中郎展端午。今曩託深心。明月在湘浦。

至東莊

先暑遂孤往。風軒俯碧流。溪聲如帶雨。雲氣自然秋。密樹行相引。鳴禽坐見酬。雖無河朔飲。一靜肺全瘳。

分水關

雲散千林。蔭蘂花。馬頭孤月挂。籐斜。行人不忍揚鞭過。未出閩關。猶是家。

蕭近高二首

近高字抑之。廬陵人。萬歷乙未進士。授中書舍人。擢禮科給事中。屢遷刑科都給事中。出爲浙江參政。進按察使。病歸。起福建按察使。遷浙江布政使。召拜太僕卿。歷通政使。遷工部侍郎。引疾去。起南兵部。添注侍郎。不赴。被劾落職。崇禎初復官。有九生三草續草。

送人之湘潭

迢迢楚水隔煙波。把酒臨歧意若何。衡雁一聲秋色遠。白雲七十二峯多。

劉無垢文學南歸

易水東風變柳條。紅亭折贈馬蹏遙。江南三月花如綺。君在螺湖第幾橋。

范允臨二首

允臨字長倩。松江華亭人。萬歷乙未進士。授南兵部主事。改工部。歷郎中。出爲雲南僉事。遷福建參議。有輸寥館集。

列朝詩集長倩意匠浮動墨瀋橫飛未嘗以琢句鑿績爲工如雪山池中甄沘女歌聲柔頓能使清淨五百仙人皆心逸不自持。

靜志居詩話先生筆精墨妙揮毫落紙與董尙書爭工晚築別業於天平山之陽彈絲吹竹選伎徵歌江表望爲神仙中人又得佳耦唱和傳鈔片楮比於珊瑚之鈎范氏家藏遠祖唐時告身尙在文正忠宣諸老手澤猶新義田長以振窮宰木未嘗改列清門百代四姓遠不及也。

謁靈澤夫人廟二首

蜃闕蛟宮枕激湍。湘簾暮捲浪花寒。秋風一夜巴陵雨。腸斷歌聲咽木蘭。
蠹粉椒塗生網絲。溼雲涼露冷空祠。鴛紋翠袖流塵暗。猶似深宮望履綦。

陸錫恩一首

錫恩字伯承。平湖人。萬歷乙未進士。除萬安知縣。入爲刑部主事。歷員外。有雙鳧草。傳書堂集。
靜志居詩話。伯承不耐判牘。放情山水間。自號夢蝶居士。又號癩丈人。又號癡丈夫。年四十二。自撰癡志而殞。詩頗澹雅。

黔筑道中

叢厓何所有。犵狔與狔獷。領袖尊盧鬼。獐豸避紫薑。市開巖虎兔。醕老鬪蝨蟻。漢法那能律。居然侈夜郎。
賀燦然一首

燦然字伯關。平湖人。萬歷乙未進士。授行人。遷吏部主事。歷員外。有六欲軒、五欲軒集。

遊龍井寺

石磴迴盤盡日過。仙林寶刹迴嵯峨。緣階井溜通泉乳。繞殿花香罨薜蘿。野鶴下時秋色靜。山僧臥處白雲多。南屏選勝無如此。坐對煙霞一嘯歌。

高承祚一首

承祚字元錫。松江華亭人。萬歷乙未進士。選庶吉士。授檢討。有知古堂彙。

龍井道中

祇樹開新徑。籃輿自在行。盤空紆鳥道。幽籟雜松聲。花雨天邊落。危泉樹杪傾。催詩如有意。頭上片雲橫。

袁時選二首

時選字無擇。鄞人。萬歷乙未進士。除遂溪知縣。遷南刑部主事。

電白卽事

經行神電路。客劍正蕭蕭。海氣晴飛雨。沙田低受潮。種榕成野蓋。編竹補殘橋。向晚還多阻。悲風起泐寥。

哭屠長卿先生

風流曾遣俗人猜。幾擲千金散草萊。幸舍無魚人欲去。翟門有雀客空回。雨昏黃犢穿荒塚。月冷青娥罷舞臺。玉樹柘枝今譜盡。到頭薤露爲誰哀。

甬上耆舊集。無擇少有才。工於詩。屠長卿一見賞之。嘗曰。吾身後文章之事。當屬無擇。長卿沒。無擇爲詩哭之極哀。

呂克孝一首

克孝字公原。青浦人。萬歷丁酉舉人。除如臯教諭。遷國子助教。歷大理司務。轉都察院。擢工部郎中。有媿翁詩草。

過田叟

我欲驅黃犢。移家傍屋東。但容茅蓋頂。先爲築牛宮。

張應申一首

應申字維貞。東莞人。萬歷丁酉舉人。有二酉山房草。

怨別

虎門中斷暮湖賒。萬頃銀濤捲雪花。人事風波有如此。勸君休唱浪淘沙。

胡震亨一首

震亨字孝轅。海鹽人。萬歷丁酉舉人。除固城教諭。歷合肥知縣。遷德州知州。不赴。改定州。擢兵部員外。有赤城山人稿。

櫛李詩繫。震亨管輅輯唐人詩集。旁鈔法苑雲笈及名山之志。而臚列爲唐音統籤一千卷。又有祕冊彙函。海鹽圖經。續文選。

文獻通考纂靖庚盜鑿錄。今海虞毛氏書。皆所編定者也。震亨才識奧博。家多藏書。三百年來。吾郡學者屈一指云。
田按。康熙中。聖祖命輯全唐詩。以孝轅唐音統籤爲底本。統籤凡一千二十七卷。全唐詩僅九百卷。蓋統籤收道家章呪釋氏
偈頌。多至數十卷。傷於冗雜。全唐詩芟除之。琴籤皆論詩之語。亦去而不錄。故爲卷止此。又攷其譌誤。補其缺失。始爲完帙。然
孝轅以一儒素而蒐羅浩博如此。則其創始之功。亦不可沒矣。

午日小飲口占

梅雨纔晴幾日餘。又看海熟薦黃魚。嘯殘姑惡麥秋過。落盡女貞花事疏。老矣難充醫國艾。歸歟冷笑殺
身蝨。眼前只箇菖蒲醜。合爲年光一破除。

明詩紀事卷十九

庚籤

趙秉忠一首

秉忠字季卿益都人萬歷戊戌第一人及第授修撰歷中允諭德庶子少詹事遷禮部侍郎加太子賓客進本部尙書贈太子太保有嶼山集十二卷

題畫

萬里同雲四野寒。閉關僵臥笑袁安。短衣高笠過橋去。尋得梅花帶雪餐。

邵景堯二首

景堯字熙臣象山人萬歷戊戌第二人及第授編修遷左諭德有邵太史集

倪勸彭姥詩萬諭德少有才名與甬上楊守勤等結社賦詩號浙東十四子

聞甯夏起變二首

一自通關市。春防鼓角閒。黃雲迷漢戍。白羽過秦關。綱紀秋塵裏。朝廷旰食間。羣狼遂銷滅。邊事恐成艱。

遂有西征議。仍將北伐同。平時多厭武。衆亂敢稱雄。遠戍沙塵黑。孤城烽火紅。不須憂爾輩。授鉞有元戎。

顧起元六首

起元字鄰初。一字太初。江甯人。萬歷戊戌第三人及第。授編修。歷南國子司業。諭德。右庶子。南國子祭酒。少詹。遷南吏部侍郎。改北。諡文莊。有嬾真草堂集五十卷。

田按。太初留心鄉邦文獻。集中金陵名賢詠六十篇。自勳舊名臣。至韋布繙流。綴以四韻。歷括生平。又著客座贅語。詳述金陵故事。可與王兆雲烏衣佳話。周暉金陵瑣事並傳。

按察副使顧公瓌。陳元舉嘗曰。顧英玉嗜酒。類狂。閉關則狷。

觀察意多忤。厭與人周旋。傲骨未可紉。羣口飛刺天。拂衣歸故廬。曲突晨無煙。凝塵時滿席。空歌酒隱篇。

奉新令陳公芹。子野雅志。樂石嘗一爲令。善寫竹詩。字奕奕。奄有江左風流。

陳公江海客。晚號神仙宰。華髮臥天台。盪胸弄雲海。絳冕非所志。紫芝行可采。寒梢寫鵝谿。孤興固有在。

太學生盛公時泰。仲交跌宕不羈。倚馬萬言。好賓客。戶外之屢常滿。畫竹石枯木蒼然。映人。

盛覽牂柯彥。龍章信悠曼。衍以窮年瀟灑送日月。筆倒三峽流。理窟何勃率。玉樹埋土中。朱華一朝歇。

雪浪大師洪恩。洪恩風期俊爽。議論灑。動人。詩字有晉唐風流。

恩公實散聖。俊氣邁寥廓。當其獨往時。肯受梵網縛。遊戲衍三車。矯若雲中鶴。世眼多所謀。徒爲智人謔。

商飆館蔣廟西南

蔣帝祠西白石壇。商飆高館盡彫殘。年年猿鶴空相怨。一路青山碧樹寒。

暑風亭清涼寺是後主題

深谷樓臺六月中。坐披單袷御微風。汲來玉井寒如雪。不道高歡避暑宮。

何如寵三首

如寵字康侯。桐城人。萬歷乙未進士。戊戌殿試改庶吉士。除編修。歷中允。諭德。庶子。國子祭酒。遷禮部

侍郎。奪職閒住。崇禎初起。吏部侍郎。進禮部尚書。兼東閣大學士。參預機務。累加少保。改戶部尚

書。進武英殿大學士。福王時。贈太保。諡文端。有後樂堂集。

田按。太保晚居金陵。近體詩和平蘊藉。與謝子喬相近。

江行將至金陵作

風靜春江一鑑開。天低兩岸萬峯迴。人煙漸向津樓起。雨色遙含浦樹來。六代山餘龍虎勢。千秋人去鳳凰臺。居然帝業思豐鎬。誰是西京作賦才。

自述二首

羅雀門誰擢雪航。自非支遠卽求羊。茅峯夜枕丹爐煖。攝頂春筇藥路長。蠲疾舊持觀鼻偈。讀書重搆印

跌宕世間出世無他願。聊遣餘生一味忙。
枯菀誰知雨露恩。看花榮瘁悟朝昏。微疴自便翻辭藥。熱客原疏不署門。弔古每思嚴瀨好。貽謀應讓寢
邱尊。歸田娛老惟圖史。免記平泉誤子孫。

周如磐二首

如磐字聖培。莆田人。萬歷戊戌進士。改庶吉士。授檢討。歷中允。諭德。庶子。南祭酒。少詹。遷禮部侍郎。加太子賓客。進本部尙書。東閣大學士。參預機務。加太子太保。進文淵閣大學士。贈少保。諡文懿。有澹志齋集。

田按。天啓五年。輔臣缺。詔推老成幹濟者。少保以年老。未三月卽乞歸。未出都而卒。雖與丁紹軾。黃立極。馮銓並推。於闈黨無所染。詩亦朗秀。

過分水關

嶺雲開峭壁。躡履駐斜曛。形勝東西坼。風煙楚越分。半山泉落澗。平野樹生雲。不是棄繻者。休教關吏聞。
吳城懷古

姑蘇城下刺蘭橈。卻憶吳王古市朝。香輦路邊春寂寂。館娃宮外草蕭蕭。千年往事空嗚鳥。半夜疏鐘自落潮。明發不堪回首處。暝煙秋雨過楓橋。

熊廷弼一首

廷弼字飛百江夏人萬歷戊戌進士除保定推官入爲工部主事擢浙江道御史以聽勘歸起大理寺丞擢兵部侍郎兼右僉都御史經略遼東罷歸起原官進兵部尙書兼右副都御史兵潰棄市傳首九邊崇禎中諡襄愍有性氣先生集

湖北詩徵傳略先生經略遼東過黃梁祠題句云諺道三綱與五常從來箇箇說黃梁只因遺下先生夢誤盡人間瞌睡郎碧迹未乾而豐碑在望黃陂吳柏陽御史魏客黨也其子惇寬卽碑陰題一絕云題詩勒石氣何雄轉眼黃梁又夢中兵尙未來關已入這回瞌睡正朦朧

田按熊芝岡袁元素皆一時邊才一以門戶傳首一以猜主致戮所謂自壞萬里長城也國欲不亡得乎

過恨者關

兩年關上路三度病中過衰爲沙場早愁緣世網多逐臣甘糞土舉國驚風波涕泣三朝事馳驅敢惜他

鄴漢五首

漢字遠遊建昌新城人萬歷戊戌進士除浦江知縣改秀水內黃徵授御史出爲山東副使改浙江進參政遷山東按察使歷昌平道通州兵備道擢右僉都御史巡撫順天以忤魏闡遣戍鎮遠崇禎初放還有留夷館南中紅泉大旭山房芙蓉樓澠水等集

大泌山房集遠遊詩博大豐贍

玉茗堂集。遠遊詩。情無泛濫。藻有餘輝。

列朝詩集。遠遊自序。謂十歲喜誦唐人詩。年十五始學詩。生長寒素。衣食多累。三十成進士。州縣爲勞。徵拜御史。謝絕人徒。悉取毛詩楚騷。下逮三唐。細閱而深思之。神明默識。霍然悟汗。乃知我明諸公之學古人。都在形骸之外。去之所以更遠。王李旣廢。流派各別。狂瞽奔逐。實繁有徒。孝豐吳稼澂詞林老宿。見楚人而大悅。盡棄其學。而學焉。予厲聲詞禁。乃止。遠游當王李末流。楚人崛起之會。欲箴砭兩家之病。而集其所長。其志則大矣。旋觀其詩。體貌豐縟。音節繁會。長篇極意鋪陳。而持擇未得其體要。今體取材尖巧。而剝搜未脫其皮毛。可與掉鞅時流。或未能方軌先正也。

靜志居詩話。遠遊詩。敦琢而出。頗近俞養長。何无咎二山人。微嫌鬱轆耳。然勝楚人之味多矣。

師範演繁。鄧漢明萬歷中。巡按雲南詩云。地控雙關金碧。雲開兩迤東西。盈尺海波瀾瀾。四時草色淒淒。峯頭半起雲彩。江曲初生月牙。蘆岸荻洲相向。碧雞山下人家。細雨斜拖白練。春風自翦紅羅。感此驚心澗淚。故園歸去如何。沙木和邊月。白。花橋關下雞鳴。風遞一聲晝曉。星殘幾點松明。注云。滇俗。瀘水處皆稱海子。呼雲爲雲彩。初生月曰月牙。畫角爲晝曉。松炬爲松明。拖白練。烏名。翦紅羅。花名。沙木和。花橋。關皆地名。

田按。遠遊長篇敘事。惻惻動人。有次山香山遺意。高陽孫文忠公三十五忠詩。有詠鄧中丞云。按。薊能修守。能名威繼光。中丞來訓練。我武頓惟揚。揮羽習鷄鷄。投鞭驅虎狼。如君凋落盡。誰復問封疆。其爲名流痛惜如此。

武定變

朝登武定城。暮宿抵羅次。有何龐眉叟。遮車泣訴事。問叟何所苦。問叟何所覲。叟耄復健忘。憶一不記二。往者萬歷初。邊守幸康乂。守令咸得人。民物鮮札厲。伍伯不到門。什一有恆稅。斛米纔十錢。半鎰易一醉。龜貝自轉輸。工價集駢坵。相歡太平人。但供角觝戲。嗚呼廿載間。乾坤一幽閉。中丞文且武。抵掌談封拜。

羽檄豈虛來。兵革靡甯歲。忍以百萬命。而快一人意。忍白千里地。而希茅土賜。守臣本蝨賊。中璫甚狂獪。此輩執袴子。況彼糞除隸。咆哮而負嵎。逢者鮮不噬。不忍因民怨。奈何虎冠吏。一夫敢倡難。餘孽竟昌熾。訛傳寇初集。頗遭守者詈。黽勉授殘甲。垂頭望睥睨。蜂涌圍已合。蟻薄城遂潰。巷戰力不敵。免胄期殞碎。烈烈金與王。闔門竟死義。宛轉蛾眉女。慷慨丈夫氣。泣抱黃口兒。牽挽及姊妹。相繼付烈燄。義不汗賊鎖。草間苟求活。羞彼郡都尉。難撲燎原火。易乘破竹勢。中丞文且武。小醜曾蒂芥。下令城中外。毋得輒引避。按堵第如故。已定退賊計。賊來如風雨。剝膚患孔亟。晨興牙門啓。支武咸就位。寇賊在門庭。請問計安出。中丞噤無語。汗流手顫悸。但云烏合衆。不久當自退。城外鼓盈天。城中哭震地。賊徒皆重鎧。踉蹌錯其臂。每聞得漢兒。刀腹必洞刺。刳腸絳樹枝。烏鳶下爭食。尸積雲津橋。血流滇海澨。中丞非不武。空拳安可試。登樓望賊徒。懔然思所畏。或用緩賊謀。姑爲好語慰。彼賊若罔聞。瞋目仍攘袂。惡詬至不堪。左右皆沮隗。甘受城下盟。竊發虞姦細。犒用十二牛。文錦先皮幣。甚紫織成衣。黃金鉤落帶。銀印龜形鈕。本自上方製。名器敢輕假。曾謝挈餅智。賊衆始拜舞。觀者猶惴惴。賊來荷戈入。賊去駝金回。何對切可憐窈窕孃。抑作犬羊配。虜獲動無算。男婦必累騎。輜重百里間。縣縣行不絕。此芮切羆賊固驍悍。小勝輒忸怩。餘制切中丞文且武。開門悉精銳。擊歸伺其怠。小醜安足殪。但聞攀牆看。誰將一矢遺。去聲夷民舊部落。府主新儀衛。前歌後有舞。送歸刺史廨。昭昭漢日月。幾向蠻天墜。忍死幸須臾。延頸王師至。焚香拜馬首。雙頰如雨淚。不意溝

整軀復覩漢旌幟。感激活我恩。人持一筍餌。長踞主帥前。帥聞乃大諍。怒聲吼如雷。立命三軍士。居此圍城中。盡與賊句結。吉諂切從賊有顯戮。任其所斬刈。軍士擁向前。兩手捽其髮。方味切舉刀便欲斫。觀者但睜眦。叩頭連乞命。我輩有何罪。爾輩實無罪。是爾命盡日。而至切昨傳中丞令。首開購級例。重賞不踰時。以此競趨利。搜賊無所得。失利且有害。頭顱許借我。誰能別真僞。老幼聞此言。號擗淚盈眦。生既無門控。死當訴上帝。駢首就鋒刃。流血如泉沸。次第列功狀。報捷日三四。中丞啓捷書。抵掌大稱快。催軍益前進。功多賞亦倍。傳教諸將營。努力功名會。今年殺諸賊。金印如斗大。當取懸肘後。急擊慎勿失。武吏初切天網恢恢布。多殺神所忌。逆賊既就俘。將吏亦被逮。糜爛同一理。誰逃百六阨。烏懈切叟昔有三子。諸孫繞膝嬉。酷經喪亂來。並無髻鬣嗣。田園既蕪沒。居室遭焚燹。親友凋殘盡。生理迷所寄。人皆羨高年。高年有顛顛。歎息老叟語。停鞍重歎歎。去聲召變良有初。妖象著爲鐸。町疇作戰場。噫嘻豈偶值。

王崧樂山集。土司志。萬歷三十五年。武定土酋鳳阿克之亂。有鄭舉者。阿克之馬頭也。阿克馬頭四十八人。惟舉富於財。武定知府陳典。舉吏也。假廉訪收禁舉。舉置金魚腹饋典乃已。已復收之。如是再四。舉惡其無厭。與阿克號召諸夷反。典不爲備。曰。夷虜何能爲。會典赴會城。阿克連江外土兵。大舉入寇。陷武定。指揮金守仁。千戶王應爵。男婦四百五十餘人。俱執義死。千戶梅應時等戰死。阿克擁推官白明通直抵省城。明通進公移。請以典之冠帶印信給賊。不許。肆焚掠。索印甚急。鎮撫不得已。緹印與之。始歸。立阿克爲知府。未一月。破一府三州四縣。巡按鄧漢慎之作武定變詩。讀之者流涕。漢新城進士。中丞謂陳川賢。守臣謂黔國公沐觀中。瑤謂鎮守太監某。金王謂金守仁。王應爵。都尉謂白明通也。諸人釀禍流毒。饒倖平賊。猶復論功。漢先

已疏陳其事。詩更痛切言之。時劄父右都督昌祚已老。恨劄與用竇比。貽害滇南。亦疏論失事狀。而都司張名世殺平民冒首功。詔速用竇及劄。與名世。陳典。白明通俱下獄。仍起昌祚鎮滇。劄除名。餘皆論死。用竇以十七年巡撫經理緬事。頗有規模。一旦變起蕭牆。束手無策。身填牢獄。人皆惜之。舊志稱其用兵如神。平阿克功。進都御史。卒。予諡蔭。蓋未究其始終也。

行部池東道中雜述

客行倦徂暑。中道正病渴。傍睨清冷水。快意思一啜。路人急搖手。執勺未及咽。細辨啞泉字。隱隱見題碣。我意不無疑。強復忍其渴。此口在人身。宜納固有節。末俗矜名論。胡爲但譟聒。諄語恆似冒。直諫本爲訐。不聞大庭內。市井爭瑣屑。根株寢廣引。聲勢巧虛喝。錙銖較勝負。何異鼠鬪穴。安得飲此泉。永結讒夫舌。宇宙復清謐。斯人免狂齧。賦詩擬采芩。從此亦囊括。

新第落成謾賦

鍛鑪依柳下。瓢杓挂林中。水爲臨池黑。泉因洗藥紅。留詩招隱士。作賦問天公。咄咄終何事。將尋植杖翁。

姚安道中

山霧四塞煙霏微。林深箐密行人稀。蜻蛉川北日初霽。弄棟城頭雲亂飛。映水鳧茈故寂寞。迎風雀麥相因依。故鄉節候誰復記。五月南中猶袷衣。

詔獄初上蒙恩削籍仍行推問感事

元陰四塞日無輝。久矣堅冰識禍機。幸免西州名士恥。甘蒙南部黨人譏。爰書一代關衰盛。實錄三朝有是非。舊事不堪重省記。慶陵遙望淚霑衣。

陳邦瞻九首

邦瞻字德遠。高安人。萬歷戊戌進士。除南大理評事。遷工部員外。改南兵部。進郎中。出爲浙江參政。歷福建按察使。福建。河南布政使。以右副都御史巡撫廣西。進兵部侍郎。總督兩廣軍務。兼巡撫廣東。召拜工部侍郎。改兵部。贈尙書。有荷華山房摘稿六卷。

田按尙書督粵。阮海寇不得逞。在朝疏言。客氏既出復入。何解人言。不愧一時名臣。官南評事時。與曹能始輩結社賦詩。牧齋謂賓朋過從。名勝延眺。搢紳則臧管叔。陳德遠爲眉目。及麥浙藩。搜訪明初高楊。張徐集重刻之。可稱好事。集中七律綿邈麗密。詩綜不錄茲體。豈未見全集耶。

署中獨坐志感二首

莫問行藏事。心知吾道非。休官計未可。將母願多違。江海迷歸夢。風霜變客衣。白雲迴首處。秋雁正南飛。自笑疏狂客。空餘懶病身。肯論官不調。轉愛食長貧。遊冶隨年少。悲歌向酒人。久知非我事。高枕任風塵。

山居秋思

樹杪西峯一點青。章江時泛錦江舲。城頭雨暮留高閣。湖上天空見草亭。萬里偶題詞客句。千秋猶識少

微星山川不共風流盡。落日煙波思轉冥。

以事赴省舟中作

楚天回首正茫茫。留滯誰能念子長。孤枕不堪風雨夕。扁舟況在水雲鄉。家人占鵲浪傳喜。客子聞猿已斷腸。應是窮愁雙鬢切。朝來飛入鏡中霜。

長安秋懷

平生落魄寄江湖。客裏逢秋興不孤。公子西園邀玉笋。美人漢浦贈明珠。中年懷抱頻飛動。往事風流更有無。到處青絲驕白馬。憑誰調笑酒家胡。

歲暮書懷

歲暮蕭條滯故邱。飛鴻落木總生愁。自緣將母羞微祿。敢謂爲郎歎倦遊。病後心情隨髮短。窮來身世傍雲浮。不知篋裏龍泉劍。河事崢嶸尙斗牛。

署中懷曹尊生并寄

湖干秋色似瀟湘。歲晏懷人意轉傷。黃葉下時山署冷。白雲歸處海天長。高城聽角悲殘月。江閣看鴻怨夕陽。亦信長卿能傲世。未應遊倦薄爲郎。

人日

人日江城獨望時。澹雲寒雪正流姿。登高作賦仍爲客。用韓公城南事對酒停杯有所思。金縷欲傳香閣勝。梅花誰寄草堂詩。自憐歲月驚雙鬢。漸遣青銅有素絲。

獨居

飛鴉何處唳。夢破霜天曙。殘月逗寒窗。窺人不肯去。

黃汝亨十首

汝亨字貞父。仁和人。萬歷戊戌進士。除進賢知縣。徵授南工部主事。改禮部。歷郎中。出爲江西僉事。遷參議。有寓林集三十八卷。

懶真草堂集。貞父詩晉宋之陶。謝唐之王孟。

恬志堂集。貞父詩。虛明妙湛。別出靈手。

田按。貞父詩。刻意摹古。思清而詞雋。

短歌行

樂往悲來日居月諸。髮不勝心。倏忽馳駒。馳駒奈何。慷慨以歌。品庶馮生。賢者憂多。得意一時。失意一時。來亦不悲。去亦不悲。逝川無窮。高山虞傾。夷光嫫母。明鏡寄形。胡爲擾擾。營身後名。芳蘭自折。膏火自煎。益之損之。孰知其然。優哉游哉。聊以永年。

奉壽胡元敬先生五秩詩并序

元敬先生仁質義問。楷模州壤。有太丘長者之風。不佞爲之心折久矣。而乃辱其令子休仲謬而論交。休仲廣覽典墳。冥搜玄素。踔行卓朗。鳳冠士羣。蓋慈明元方之倫也。先生有子。結爲大年。何羨乎喬松彭聃哉。今年秋。先生行年五十二三。親朋願起爲壽。而先生方戚然慈闈。亦會某在瑩。瑩之中。玄黃觴豆。非所以將在禮。無容無文。中情所懷。文之不可以已也。播之颺之。倡以短述。駕言西河渚。遙望南山岑。峩峩青雲表。下有叢桂林。孤秀結靈區。玄鶴鳴在陰。彼美胡公彥。仁以爲己任。鳳偃矯不衰。有雛揚其音。研文證名理。履道懷玄心。誼古可躡往。辭英將無今。嗟余蕪陋質。剖心諧壺簪。棄捐世俗好。入室援雅琴。傷余遭薄祜。慶子情方深。微辭薦不腆。聊以志所欽。

六月帷中諸生讌集靈鷲山

林木已浹爽。山雨頓無暑。方來喜得朋。宴坐足嘯侶。酬對有玄風。周還中懿矩。綺筵發高倡。禮席間法語。釋彼域內戀。暢此尊中醕。杯行再斟酌。燭刻復延佇。黯黯夜光微。沈沈晚雲貯。躑躅下山坂。蒼茫窺島嶼。情劇深懷來。時止詠歸去。短履紛縱橫。高枕任爾汝。

登秦駐山

東遊不可見。西望亦悠哉。亂鳥蒼溟合。遠天紅日開。雲間聊弭節。松際一登臺。萬古雄心盡。沙鷗自去來。

懷抑之司理

催芳春聿暮。懷人書亦來。飛花渡流水。嘯鳥上高臺。江漢眇難越。浮沈浪自猜。山空人語隔。遲日冷莓苔。

新嘉驛亭

結陰深驛舍。卽與世喧分。小澗偏沈日。孤亭亦貯雲。藤蘿秋與寂。林響暮還聞。不覺移時坐。銜杯半入醺。

金山寺果公淨業菴是馮開之祭酒所題

江上袈裟地。山陰淨業菴。憑虛通杳靄。俯檻挹寒潭。破衲流雲護。殘經落月參。重來學士座。玉板出香龕。

宿蓮華菴

是菴禁酒

暮山看不極。轉徑得清涼。霄漢一峯紫。雲泉衆木芳。淨觀惟佛火。高臥是繩床。不作攢眉苦。相依蓮社長。

過吳門金玄朗故居玄朗客死

飲馬橋西舊酒徒。到來門巷已荒蕪。譚天不復聞鄒衍。罵座何緣有灌夫。老去壯心銷客夢。生成俠骨葬江湖。長林豐草悲歌盡。明月闔門泣夜烏。

吳門金玄朗快士也作移家六首索余投贈

成佛敢希靈運。臥遊自託少文。動操高山流水。冥坐疏鐘白雲。

黃起龍一首

起龍、字應興、莆田人。萬歷戊戌進士。授行人。擢南吏科給事中。

山行

錦樹霜凋楓葉斜。赤城霞起武陵花。沿溪行到無人處。翡翠銜魚上淺沙。一作吳文潛詩

鄧雲霄一首

雲霄、字玄度、東莞人。萬歷戊戌進士。除長洲知縣。徵授南戶科給事中。出爲湖廣僉事。遷四川參議。改湖廣。降陝西僉事。改廣西。進參政。有浮湘、燃桂、漱玉齋、百花洲、越鳥、竹浪齋、紫煙樓、鏡園、解叟等集。

四庫總目：雲霄作冷邸小言。論詩以妙悟爲宗。自然爲用。集中詩多仿王孟之音。而醞釀深厚。則未及古人。

秋江蘆花歌

蘆花兩岸堆成雪。旅客懷歸心欲絕。輕棹如浮剡曲舟。開尊似坐瑤池月。年華隨水向東流。蘆荻無心亦白頭。正苦征鴻偏怨夜。翻憎絡緯競吟秋。蘆花飛去如蓬轉。鄉路微茫水深淺。村童莫更捲笳吹。恐惹邊風入柳枝。

范鳳翼二首

鳳翼、字異羽、南通州人。萬歷戊戌進士。除灤州知州。改順天教授。歷國子助教。遷戶部主事。改吏

部。歷員外。謫長蘆運判。遷工部主事。進尙寶司丞。本司少卿。大理寺丞。皆不赴。削籍爲民。崇禎初。復官。福王立。拜光祿少卿。不起。順治十二年卒。有勳卿集二十八卷。

吳應箕留都見聞錄。通州范異羽尙寶以民變居南。好客不倦。而工書善詩。談吐有蘊藉。所謂風流儒雅亦吾師也。

征途

歲晚疲征途。籃輿載歸夢。野風吹又醒。明月勞相送。荒村燈火微。遠寺鐘聲動。投宿僧寮中。所忻酒盈瓮。亦適園分韻。

非關名遂乞江湖。纔到中林塵事無。除卻買花沽酒外。爲他雙鶴辦漁租。

邱禾實一首

禾實字登之。新添衛人。萬歷戊戌進士。改庶吉士。授檢討。歷贊善。諭德。遷庶子。有循陔園集十二卷。

田按。黔人入翰林。迴翔清署。荐歷坊職者。自登之始。舊記荒略。於登之歷官不能詳。余得萬歷戊戌會試錄履歷。爲補其缺。登之頗好事。於里中佳山水。搜剔得之。爲作遊記。憑虛洞其一也。今并錄其詩。

憑虛洞

懸崖到處鑿鴻濛。恐有秦人寄此中。見說渡頭楓葉落。年年秋水似桃紅。

阮自華一首

自華字堅之懷甯人萬歷戊戌進士除饒州推官改福州遷南刑部主事改順天教授歷國子助教遷戶部主事歷員外郎中出爲慶陽知府考察罷官起邵武知府有霧靈集

列朝詩集堅之爲人跌宕疏放好從學佛者遊嗜酒爲長夜之飲爲理官時直指行部扶醉入謁甫下拜嚙啞狼藉噴汚直指衫袖遂至露章晚爲郡守不視吏事賓客滿堂分簡賦詩遨遊山水間稱風流太守嘗大會詞客於凌霄臺推屠長卿爲祭酒絲竹殷地列炬薰天宴集之盛傳播海內復爲直指所糾而罷堅之記誦輿博摺摭富有漢魏樂府至枚李古詩無不撫擬自謂超于鱗而上之其實無以相遠也七言古今詩製績綦組乏抑揚頓挫之致覽燕中都邑之勝自三殿迄虎圈豹房作七言今體詩百篇君子尙其志焉

靜志居詩話堅之詩不求工君子誦詩論世甯舍詠懷堂而取霧靈也

落第客塞下代盧龍諸將寄京洛相知

朔氣厲高秋將軍洗鐳鏤勞雲出塞暗疲馬傍人愁風色侵重鎧霜威折丈矛貴人能作賦何不自封侯

曹徵庸一首

徵庸字遠生一字平子平湖人萬歷戊戌進士辛丑殿試除延安推官入爲大理評事遷刑部主事歷

員外郎中出爲汾州知府有冰雪軒集

費元祿轉情集吳滋曰落花詩海內作者無論數十家曹平子詩云不分香泥深一尺好教絲幘護千重已知豔色移新韻尙

情迴風點故衣。褪粉牛痕憐日尺。離枝一寸卽天涯。十里輕塵隨燕蹴。一春如夢倩人猜。二十四番寒尙峭。高樓人病又今宵。芳樹舊痕猶在眼。玉人新恨正從頭。鄧遠遊詩云。美好分無長久日。摧殘翻惜未開時。恨不帶將長命縷。若爲吹上合歡裙。班姬忍淚題紈扇。卓女多情詠白頭。乍同故主沈曾井。可惜蛾眉逐馬嵬。過此徐孀空作態。爾時衛玠亦言愁。東風一任吹多少。颯鳥徒勞說短長。若比宮人初入道。那由去婦復還家。總是情根銷未盡。一枝留得供盟壘。陳元明詩云。一種飛花千種恨。倩誰爲破許多愁。長門月落空勞賦。團扇秋來但有詩。下淚未歌河滿子。無言空對息夫人。又駁駁欲度驪駒前矣。橋李詩繫。遠生詩。哀涼曠蕩。多出塵之想。靜志居詩話。汾州詩品超逸。誦之如哀梨脆棗。大是爽人。

送魏仲雪南湖詞

一秣兼葭淡不窮。筆床遙住水雲東。夜深白露兼紅葉。飄入秋風艇子中。

沈孝徵一首

孝徵字永思。海鹽人。萬歷戊戌進士。除工部主事。歷員外郎中。出爲河南副使。有玄暢閣集。

元夜宮詞

琉璃瑣盡中天色。蘇合油薰別殿香。六院盡翻新曲奏。柘枝斜倚御袍黃。

徐良彥一首

良彥字季良。新建人。萬歷戊戌進士。除婺源知縣。改溧水。徵授御史。出爲福建參議。遷山東副使。

入爲尙寶司少卿。歷大理寺丞、右通政。擢右僉都御史。巡撫宣府。以忤崔呈秀遣戍五溪。崇禎初。起南大理卿。遷工部侍郎。

江上聞笛

笛聲起江樓。怨入長江水。因風寄遠心。不知誰家子。

方承郁一首

承郁字伯文。莆田人。萬歷戊戌進士。除歙縣知縣。遷南兵部主事。改工部。有關洛紀遊草。

同夏正甫宿莎蘿坪

邱壑應憐我。茲行喜共君。竹聲孤嶂雨。松影半龕雲。鐘晚香林寂。泉清別澗分。蕭然澄萬慮。正可浣塵氛。

董應舉一首

應舉字崇相。閩人。萬歷戊戌進士。除廣州教授。遷南國子博士。就遷吏部主事。改北。歷員外郎中。遷南大理丞。歷太常少卿。太僕卿。遷右副都御史。進工部侍郎。有董崇相集十六卷。

東南嶠外詩話。侍郎遊樓霞句云。石膏欲上天。半爲佛所據。初讀之。但詫爲奇語耳。後余官江南。乃知爲實景。惟此十字寫得出耳。

秋日尋孔雀菴澗上人

林深不辨徑。積葉翳寒泉。屋角留殘日。秋階童獨眠。問師何所去。遙指隔江煙。夕磬無人發。林中聞暮蟬。

何棟如一首

棟如字充符。一字子極。無錫人。萬歷戊戌進士。除襄陽推官。以忤監稅繫獄。削籍歸。起南兵部主事。遷太僕少卿。充軍前贊畫。以事下獄。遣戍滁陽。崇禎初復官。有南音攝園稿。商音徂東草。

夏日感興

玄冥變炎暑。冷雨夜浪浪。乾坤陰氣塞。陽精久韜藏。天心有翻覆。此理何茫茫。嗟哉夸毗子。戀彼熠燿光。誰知叩角者。悲歌慨以慷。

倪尙忠一首

尙忠字世卿。浦江人。萬歷戊戌進士。除順德知縣。遷吉安同知。有居雲鳴籟醉吟等集。

飲戚家園

園倚青山麓。亭開綠水濱。鳥聲能喚客。花氣欲留人。酒擬高陽醉。詩翻大歷新。相攜明月下。不數曲江春。

劉時俊一首

時俊字夢敍。富順人。萬歷戊戌進士。除廬江知縣。改桐城。吳江。徵授南刑科給事中。出爲福建僉事。謫湖廣按察司知事。遷行人司副。歷尙寶司丞。進太僕少卿。

賦別

浮雲起天末。白日何荒荒。置酒臨高臺。悲風逐我翔。念我飄零客。與子暫相將。子去我且留。慷慨激中腸。請爲別鵠吟。四座慘無光。願言崇令德。關山遙相望。

謝廷讚一首

廷讚字曰可。金谿人。萬曆戊戌進士。除刑部主事。以論建儲削籍。光宗時。追贈尙寶卿。有玉馬軒。步邱綠屋遊霞繼亭等集。

田按曰可與兄友可妍精選理。然不能名家。以直諫著。

朱長倩初度

年少佳公子。翩翩擬過秦。僊人王子晉。此日是前身。

李春熙一首

春熙字皞如。建甯人。萬曆戊戌進士。除太平推官。降徐州州判。遷雲南推官。改肇慶。入爲刑部主事。改彰德推官。遷南戶部主事。進郎中。有元居集九卷。

月夜登九華

行入九華麓。片片雲霞集。絕壑抱仙源。石門流水急。

劉世教一首

世教字少彝。海鹽人。萬歷庚子舉人。官閩清知縣。有研寶齋集。

相逐

盤輿相逐莫愁家。絕勝江干問浣紗。可似折殘依霜柳。若爲重對白門花。行雲故合聞歌駐。織月偏宜照舞斜。翻訝鐘聲長樂近。忍教新旭散林鴉。

王嗣奭一首

嗣奭字右仲。鄞人。萬歷庚子舉人。官涪州知州。有密娛齋集。

徧陽道中

去歲傷秋潦。洪波尙淼然。翳桑栖水蛤。廢里過江船。澤國人煙外。飢民驛路邊。明霞餐不得。淚眼向高天。

顧雲鴻二首

雲鴻字朗仲。崑山人。萬歷庚子舉人。

馮舒懷舊集。朗仲爲人清介特立。少而讀書。以四几周其身。堆書及棟。埋頭其中。累月不出戶。憶予童子時。就家塾。君過先府。君話竟日。見予讀左氏傳。指首簡爲言。先經起義。後經終事之說甚詳。是時君鬚髮已白。形骸蕭然。出物外。如在目矣。

還山

早得滄洲趣。今償歧路辛。風塵清噩夢。天地乞閒身。白水徵新約。青山泥故人。此中堪自主。吾始得吾真。

卽事

山腰未雨雲先溼。湖面無風水自波。一覺虛齋人事少。重陰高樹晚涼多。

明詩紀事卷二十

庚籤

張以誠一首

以誠字君一松江華亭人萬曆辛丑第一人及第授修撰歷中允遷諭德有酌春堂集十卷

田按君一南安太守弼四世孫有送同年佐南安詩云儂家王祖守茲鄉至今祠宇梅花傍以弼守南安有遺愛也

淶水曲

香煖金隄時。湛淡春塘溢。已送行臺花。復倒高樓日。

王衡七首

衡字辰玉太倉州人大學士錫爵子萬曆辛丑第二人及第授編修有緱山先生集二十七卷

唐時升三易集辰玉詩超然埃壚之表

婁堅學古緒言辰玉少喜爲詩初若不拘拘而卒與之合要歸於刻露駿發非苟然也

高出三吳集辰玉詩清新潔淨踴越激楚而韻和情芳卒歸諸雅

龍性堂詩話辰玉不以詩名袁小修日記稱於極樂寺中見辰玉題壁二律中有雪中鳥乳分齋鉢月下僧歸及梵鐘又寒燈

明詩紀事 庚籤 卷二十

二四五九

貝葉翻香蠶。春樹橋花坐語。爲佳境。又稱其臨池道媚妙絕。知名下無不可也。

田按。江陵以鼎甲私其子。辰玉自有才。非然修等倫也。辰玉萬歷戊子領順天鄉試解。出黃葵陽之門。時太倉居政府。言者攻之。亦牽連以走。太倉與趙汝師齟齬。汝師氣節蓋世。佇登揆席。太倉尼之。葵陽附和太倉。幾幸以進。兩敗俱傷。可歎也。辰玉越十年始登第。有詩云。彩雲重擁玉階前。朱繭雙懸御墨鮮。偶爾功名三語合。如聞姓字六宮傳。價從駿骨枯中貴。色借蛾眉怨裏妍。顛倒十年京國夢。一時回首杏花韉。未能忘情於十年不字也。辰玉才品。在當時可與屠長卿伯仲。

王罔伯君子亭中觀射

朝來較騎城西場。驛弓在臂矢在房。麤牙未轉軍士散。走向王家看射堂。射堂西風樹索索。人面生冰馬毛薄。綠繡蒼頭釋棚坐。鞞鞞才官抱鞞躍。餘勁飲石猶激昂。神臂當弦故前卻。青天白羽相蕩磨。欻然一點銀錢落。提錢上堂聲氣揚。鳴鉦伐鼓稱兇觴。大呼酒瀝壯士膽。翻飛走馬誇身強。鷓鴣脂瑩孟勞綠。龜龍金錯昆吾黃。二矛重喬舞頓挫。曼胡十隊趨低昂。義烏健兒勇投石。淮南劍客技奪場。老拳納袖半甲子。今日未能禁拍張。等閒不肯賭勝負。與君慷慨論興亡。憶昔旌旗滿寓縣。腥風夜挾鯨鯢戰。紛披半海樓船兵。痛哭登陴兒女面。幕前干櫓造次增。市中卒伍倉皇變。吁嗟爾汝兵燹餘。辛苦東南眼中見。幾年來臥戰鼓。意氣虛鬱六鈞弩。赤手難投都護營。熱心暫走向書府。尚書世受龍虎韜。大兒昂藏參馬曹。盾鼻文章賤于土。蟠胸甲冑光如刀。桑弧未了男子事。銅柱敢許書生標。君看此輩辦賊否。誰爲將之東射潮。

登北固

悠然眺平楚。暝色自江來。石有三分恨。煙銷六代才。暮城星火雜。斷壁雨風開。猶記題封字。沈吟日暮回。

詠非幻上人詩清能沁骨。漫賦以贈。

大內蓮花

西山青落影娥池。仗外芙蓉入照時。薄雨未消初日暈。晚風欲語向人枝。六宮香粉流紅膩。三殿浮涼湛綠漪。的的夜舒人不見。集靈臺畔露華知。

賦七澤漁人

水國秋清墜露濃。漁舟點點亂芙蓉。釣裘七澤誰圖畫。種橘千頭已素封。魚信拍潮江氣白。鷗羣弄雨暮煙重。汀洲誰意蘆花棹。聽瑟湘潭第幾峯。

夏日園居酬問伯

五陵裘馬厭經過。乍可書關隱薜蘿。歲月不來看燕去。茶蘼開到奈花何。青天樹逸銅駝闕。細雨煙深白鷺蓑。盡說牆東堪避世。漁樵滿眼笑風波。

送王崑崙遊五臺

歌馬先參柏子禪。白頭行腳趙州緣。無端故國兼葭夢。又在邯鄲酒市邊。

曾可前二首

可前字退如石首人。萬歷辛丑第三人及第。授編修。有且孺堂集。

袁宏道瀟碧堂集。退如詩清新微婉。不以儻傷其氣。不以法撓其才。

田按。退如與雷何思步趨公安中郎。所謂函蓋合而水乳契者也。

悶坐報蔡宏甫館長至亟返非也戲寄

風翻芍藥兩三花。細雨新晴早放衙。卻笑兒童虛擁帚。蔡經容易到人家。

送客

麤麤隄柳拂車塵。一向西川一向秦。路過鄉園應繫馬。瀟湘春色正愁人。

熊明遇一首

明遇字子良。進賢人。萬歷辛丑進士。除長興知縣。徵授禮部主事。擢兵科給事中。出爲福建僉事。遷陝西參議。召授尙寶少卿。歷太僕少卿。右僉都御史。兵部侍郎。拜南刑部尙書。改兵部。有綠雪樓集。

偶讀邊報各賦九塞一首錄一

漢武英雄略。羌胡兩截分。玉關連斥堠。張掖變耕耘。茶莢通西遠。軍書直北殷。龍堆天外外。豺虎自爲羣。
甘肅

鄭以偉一首

以偉字子器。上饒人。萬歷辛丑進士。改庶吉士。授檢討。歷贊善。諭德。庶子。少詹事。遷禮部侍郎。忤

瑞歸。崇禎初。起禮部尚書。兼東閣大學士。入參機務。贈太子太保。諡文恪。有靈山藏集。
裴君弘西江詩話。文恪有靈山藏集。靈山在廣信城西北。有七十二峯。高七千餘丈。文恪詩云。靈山七十二。面面生奇峯。如琢亦如削。或開玉芙蓉。

田按。明代閣臣。類出翰林。文恪優於詞章。而稟賦非其所長。嘗曰。吾富於萬卷。窘於數行。章疏中有何況二字。誤以爲人名。擬旨提問。帝駁改始悟。自是詞臣爲帝所輕。遂有館員須歷推知之論。而閣臣不專用翰林矣。

題鯉洋

鯉洋堪入龍眠畫。更恐幽深圖不窮。菰蒲釣艇雨聲外。橘柚人家煙影中。經年憶此江水綠。有客未返山花紅。京邸裁書寄小院。庭柯無恙子將東。

雷思霈二首

思霈字何思。夷陵州人。萬歷辛丑進士。改庶吉士。授檢討。有百衲閣。歲星堂集。

鍾惺隱秀軒集。先生嘗自云。不泥古學。不蹈前良。自然之性。一往奔詣。

列朝詩集。何思與袁氏兄弟善。當公安掃除俗學。沿襲其風流。信心放筆。以刊落抹撥爲能事。而不知約之以禮。

春興

消得天廚書幾緘。朝朝騎馬看煙嵐。三年半在香山寺。十月曾探滴水巖。滿井北游春淡淡。渾河西上石巉巖。松風獨愛陶貞白。官是蓬萊最後銜。

蝦蟆培

袁崧怪石驚三峽。陸羽茶經品四泉。如此江山須領略。及秋吾欲賦歸田。

劉永澄二首

永澄字靜之寶應人。萬歷辛丑進士。除順天教授。歷國子學正。遷兵部主事。有練江集八卷。

田按。靜之留意當代典章。凡名臣言行。大曹職掌。九邊阨塞形勝。兵農錢穀之數。靡所不究。會雷震郊壇火。詔具修省事例。晉江李廷機。搆宗伯事。靜之晉江所取士也。因奏祀曰。災異下詔。必求直言。自漢唐宋以及我祖宗。未有改也。茲一切報罷。中外傳之。史冊載之。謂清時有防口之禁。甚非美談。昔憲宗皇帝卽位下詔。求言之意。稍未懇切。當時輔導非人。識者樂有遺議。後萬安劉吉爲相。惡聞人言。災異詔中。不及朝政。鄒汝愚疏論之。炳烈千古。然則寒謬譎之門。務容容之福。豈盡人主規璫哉。臣下或不能無過耳。故爲老師報主計。無如請老師開言路者。晉江得書默然。歸德沈相國雅知靜之。嘗咨以出處之際。靜之答曰。君子處小人之道。莫備於易之夬。有以君子陽附小人。而徐圖其後者。爰之若濡是也。有以君子顯斤小人。而不避其害者。象之揚庭是也。從前之道。爲曲爲隱。狄仁傑行之於張昌宗輩。從後之道。爲直爲顯。張九齡行之於李林甫。二者操術不同。其

爲君子一也。夫君子豈不樂渾厚包容。以成無競之風。勢不可耳。故君子雖不逆小人之詐。而必不肯墮小人之奸。雖不屑倖以博名高。而亦不肯混泯以晦己志。清議直筆。雖有俟於將來。心術隱微。自當暴於天下。若徒泥用晦之智。期微罪之行。卽乞身未必得。而天下萬世。安能遺其迹而盡諒其心哉。然此時又非不欲去之患。不得去之患也。非勇退之難。退而不失其道之難也。我朝劉文靖謝文正及近日王山陰。皆侃侃諍諍。退不踰時。趙蘭溪則病疏累數十上而不獲請。豈前三君子見知之淺。而蘭溪結主之深哉。三君子能苦口犯顏。而蘭溪不能故也。進退之機。亦可見於此矣。當時以爲名對靜之讀書。根極底奧。尙友今古。考覈精密。每觀往事。如身臨其際。反復精思。國事清議。多所維持。於海內賢不肯。洞析無遺。原心脫迹。稽弊防微。無弗先幾曲中。卽邊徼亭障。江海豪猾盜賊。咸具得其主名。與其根株巢窟。惜年三十七而卒。不究厥用。天下惜之。

宿文起竹隴齋中

濟勝元無具。尋幽只爲君。千峯天半起。一榻竹邊分。密樹傳清籟。虛堂宿野雲。廿年稱道義。不在細論文。

楊村

樹裏橫植出。沙間蔓草斜。秋聲高入雁。河勢曲盤蛇。場稼億千束。溪茅三兩家。望中無限意。數點覓林鴉。

楊師孔二首

師孔字願之。一字冷然。貴州衛人。萬歷辛丑進士。除山陰知縣。遷戶部主事。改順天教授。降昌平學正。遷國子學正。進工部主事。歷員外郎中。出爲雲南僉事。進參議。遷浙江參政。有秀野堂集。

王思任季重集。冷然有問梅射虎。避暑聽泉。壓香澤畔等詩。而題之曰秀野堂集。大抵清貴落字。高古決格。華亮取響。岑孟錢。

劉之倫也。

黃汝亨寓林集。冷然胸中。饒有勝情。瀉之筆端。佳句自集。殷璠所云。神來情來。嚴滄浪謂盛唐諸人。惟在興趣。豈不然哉。露書。楊冷然詩十種。皆清新有韻。

田按。冷然詩。瀟灑出塵。不染當時氣習。

由長陵至西山作

一官能有暇。數日踏花行。對酒寫山意。逢僧問寺名。風驚松鶴夢。潮靜木魚聲。爲避遊人跡。雙柑獨聽鶯。
馬底過秦處百里

客程愁馬底。風磴許猿知。路仄溪流折。峯高日上遲。崩雲飛化石。倒樹寄生枝。猶有秦時鳥。傳聲故自奇。

俞彥二首

彥字仲茅。一字容自。上元人。原籍太倉萬歷辛丑進士。授兵部主事。歷員外。遷光祿少卿。謫夷陵知州。遷南兵部主事。有近□樂府。

靜志居詩話。少卿擬樂府。自南北朝入。亦是解人。第篇幅稍長。輒未合古。此韓退之所云。不造其堂。不躋其蔽者也。

金陵詩微。少卿謂隆慶以後詩文。如四目蒙俱。九頭妖鳥。惟詞則染指者少。猶不失本來面目。王阮亭云。少卿寫無可如何之。況可謂非非想。僕嘗與鄒程村論近代詞人。斷當以少卿爲當行第一。

田按。仲茅樂府。得張文昌。白太傅遺意。

賣兒謠

長者子。與我麀。盈數升。攜兒歸。兒別母。抱兒嘯。出門去。牽父衣。母先絕。父斯須。死亦不惡。君不見官府催租烈於火。今年不死飢。明年催租來殺我。

戰雒南

戰雒南。一餒十千數。已多餒。多賊多君奈何。莫學中都窮罪弁。借人頭顱說征戰。莫學南州猛使君。掩人勞動誇功勳。驅民爲賊何太易。千尺流丸下便地。驅賊爲民何大難。兩落上天泉歸山。

陳勳三首

勳字元凱。閩人。萬歷辛丑進士。除南京武學教授。就遷國子助教。改戶部主事。進本部郎中。遷紹興知府。未任卒。有元凱集四十卷。

四庫總目。勳爲鄭善夫外曾孫。其辦香有自。故雖無傑構。而尙有典型。

朱國禎湧幢小品。元凱謝病歸。終日扃戶卻掃。嘗一至烏石山。聞客聲卽走。談佳山水。心輒動。畏客輒不往。其友董見龍嘲曰。世皆如子。直須以環堵爲天地。卽日月山川。皆爲空設矣。大笑不爲意。指庭間花石瓦水盆曰。豈非吾之五嶽江湖耶。其意趣如此。雖不出戶庭。日搢搢筆硯間。有以自遣。其拈筆造次必擇言。不爲近語。詩入唐人室。字與畫皆精妙。人資貴之。
田按。元凱詩語蘊藉。似其爲人。

夏日齋居

明詩紀事 庚籤 卷二十

端居深結夏。水木澹清光。雨外坐微月。空中聞好香。事緣身病減。懶與世情妨。那復除諸累。逍遙咏老莊。

將北行留別徐惟和

將行對酒復聽歌。況值征鴻雪裏過。歧路自傷爲客久。離情偏覺故人多。楓林回首山當驛。柳色驚心春渡河。誰念素衣今盡染。風塵歲月恐蹉跎。

雞鳴寺

秣陵佳麗憶當年。縹緲城邊得梵筵。雲捧法輪依帝座。樹浮香閣出人天。三春花雨江南思。六代精靈日暮煙。半醉遊人山下去。啼鳥垂柳白門前。

徐禎稷四首

禎稷字叔開。松江華亭人。萬曆辛丑進士。除刑部主事。歷員外郎中。出爲夔州知府。遷四川副使。致仕。起浙江副使。有餘齋集。

解志居詩話。叔開清門廉吏。比於胡威父子。其在夔府。寄書家中。附詩云。寄語機雲山水下。出山仍似在山清。蓋入蜀之後。詩尤深婉。如千盤白鷓雲中路。三暮黃牛峽口船。臥閣秋雲生白帝。登臺春雪和巴人。雲邊古堞三千雉。花裏春城十萬家。水白盟塘聞榜檣。雨晴赤甲見桑麻。入春江勢疑吞郭。一雨山光盡到樓。天末雁稀秋色盡。山家橋熟夜霜清。新霽雨後盟塘路。獨雁風前故國心。俱瀟灑出塵。

松風餘韻。先生未刻詩。有荆華館草。白雲草。望華亭草。皆自作小序。而屬陸古塘訂定者。余從裔孫某處錄而藏之。摘句如寺

古雲藏樹。天晴山到樓。一亭含樹石。四面受湖山。海霧平吞月。江風小作波。草閣茶煙細。蘿關鶴夢深。不堪江上離人夜。偏是天涯好月時。暮景畫船回棹處。好風歌閣卷簾時。千里烽煙連野燒。三更戍鼓亂砧聲。雄圖已盡碑猶在。仙島無書鶴自回。皆小長蘆詩話所未及。

秋夜

悔別青山入帝都。西風苦雨憶江鱸。徒聞金幣輸中帑。欲問麟鳳半五湖。戎馬頻年生瀚海。商羊六月沼東吳。清秋燈火渾無賴。擬草持盈帝鑑圖。

春寒

不見一花發。坐令三月殘。長風飛亂雨。滿意作春寒。

白帝城

白帝雄圖盡。遺宮草樹荒。數間香火處。曾是灑西堂。

聽西內鼓樂吶喊

水殿仙韶徹帝都。六龍飛處動山呼。太平天子方行樂。何事監門欲獻圖。

馮奕垣一首

奕垣字弱璧。南海人。萬歷辛丑進士。改庶吉士。授湖廣道御史。贈光祿少卿。

思鄉

細雨軒窗溼。微風枕簟涼。夢魂不知遠。夜夜到家鄉。

董光宏一首

光宏字君謨。鄞人。萬歷辛丑進士。除刑部主事。歷員外郎中。出爲河南僉事。歷參議。副使。參政。陝西按察使。江西布政使。入爲順天府尹。遷大理卿。加兵部侍郎。致仕。有秋水閣墨副九卷。

彭城弔古

曠望寒雲故壘平。亂山迢遞入荒城。前朝蹟認魚龍國。霸略雄分草木兵。飛雨似留歌楚淚。濁河猶帶戰秦聲。古今不盡興亡恨。落日啼鴉總是情。

蔡善繼二首

善繼字伯達。烏程人。萬歷辛丑進士。除莆田知縣。改香山。入爲工部主事。遷員外。改南兵部。出爲泉州知府。遷福建副使。歷廣東參政。湖廣按察使。進湖廣布政使。改福建。有去去齋集。

送心厂上人攜經入峩眉并柬石機師

無住禪心到處安。一囊經卷一蒲團。三春茗雪花初放。五月峩眉雪尙寒。途路似從天上去。山河應傍掌中看。不嫌塵海重攜錫。慧遠東林席未殘。

弔孫太初墓

采菊攜椒薦一卮。挂瓢堂近隱君祠。寒雲長護青山骨。老衲猶藏破壁詩。人爲紫芝仍娶婦。天教伯道竟無兒。還丹不死終難信。絕代風流是我師。

袁懋謙一首

懋謙字吉卿。豐城人。萬歷辛丑進士。改庶吉士。授兵科給事中。有虎溪詩選。

蘇雲卿祠

浮雲何澹蕩。空水足留連。一夜東湖雨。春蔬綠可憐。鑿坯辭後載。抱甕想前賢。寂寞高風遠。疏楊起暮煙。

宋燾一首

燾字岱倪。泰安州人。萬歷辛丑進士。改庶吉士。授浙江道御史。以疏救姜士昌。謫平定州判官。天啓初。贈光祿少卿。有青嶠居草。

自適

卷幔對竹林。塵空絕餘想。池水照天青。意與孤雲上。

孫光裕一首

光裕字子長。嘉興人。萬歷辛丑進士。除建昌知縣。改固始。徵授御史。遷南光祿少卿。有廉善堂集。

述警

遼陽烽火接燕都。一望凄然塞草枯。盱食漫勞諸相國。秋風驕殺五單于。黃沙磧裏無遺竈。青海源頭有斷弧。自是先王征戰地。鬼燐夜夜泣菰蘆。

王元翰一首

元翰字伯舉甯州人。萬歷辛丑進士。改庶吉士。授吏科給事中。改工科。降刑部檢校。再降湖廣按察司知事。遷工部主事。冠帶閑住。有凝翠軒詩。

南郊雨中別陶不退

送爾從茲止。臨歧不忍分。窮途期共立。薄宦復離羣。野水幾平樹。前山盡沒雲。艱危如得句。早付片鴻聞。

蕭丁泰一首

丁泰字吉南。漢陽人。祭酒良有子。萬歷辛丑進士。除行人。遷兵部主事。歷員外郎中。出爲浙江參政。歷陝西按察使。遷山西布政使。改陝西貴州。

江城夜泊

舍楫傍高城。殘燈欲二更。深杯不成醉。獨坐有餘清。水落蛟龍墊。沙寒雁鶩驚。隔江何處寺。隱隱度鐘聲。

侯正鵠三首

正鵠字仲鵠。鄆城人。萬曆辛丑進士。累官漢中知府。有亦詠草交聲集。

戲贈人得姬

武陵溪畔女。學貼漢宮黃。隔岸桃花語。教儂若個粧。

歷下送客

一樽酒盡灤門孤。城上遙啼隔水烏。落盡渚蓮人不在。西風愁殺大明湖。

寄張瑞陽

買醉胡姬日未曛。夢回猶惜暗湖雲。山城夜雨梅花綠。拾得春來好贈君。

明詩紀事卷二十一

庚籤

徐光啓一首

光啓字子先。上海人。萬曆甲辰進士。改庶吉士。授檢討。歷贊善。諭德。超擢少詹事。引疾歸。起故官。擢禮部侍郎。以忤魏忠賢落職。崇禎初復官。加太子賓客。進本部尙書。兼東閣大學士。入參機務。加太子太保。贈少保。諡文定。加贈太保。

田按。文定通籍後。從西人利瑪竇講天文。歷算。火器。盡其術。若逆知三百年後有西學入中國之效。然猶講求國家兵機。屯田。水利。鹽筴。諸政。非盡棄其學而學也。通變而不失其常。君子於文定有取焉。

題陶士行運甓圖

典午朝臣鮮尙實。競以曠達相矜誇。媿媿玄談未終席。紛紛胡騎亂如麻。白玉塵尾黃金埒。甕間酒龍聲嗑嗑。誰使神州陸沈者。空復新亭淚成血。於時獨有陶荊州。卓爾不逐頽波流。高齋晝夜百瓴甌。勞身苦骨時屹屹。心知鳩毒是懷安。肉緩筋驚成何益。誰爲點染圖中史。炯炯神明薄毫楮。披圖再四忽自喜。瘦骨棱棱髮上指。

傅淑訓一首

淑訓字啓昧。孝感人。萬歷甲辰進士。除濮州知州。改澤州。遷工部員外。歷郎中。出爲平陽知府。歷山西副使。陝西參政。四川按察使。入爲太僕少卿。坐楊漣姻家削籍。崇禎初起。順天府尹。累遷戶部尙書。

玉泉山

湖上歸鴉去雁。湖中芙蓉朝霞。全畫瀟湘一幅。楚人錯認還家。

李待問一首

待問字葵孺。南海人。萬歷甲辰進士。除連城知縣。改沙縣。清江。徵授禮部主事。改吏部。歷員外郎。中遷太常少卿。以僉都御史巡撫應天。進戶部侍郎。巡撫鳳陽。召拜戶部尙書。贈太子少保。諡忠定。有松柏軒稿。

黃金臺

碣石荒臺古。悠悠傷客心。馬應酬白骨。士亦戀黃金。落木殘秋色。高城隱暮陰。燕山多俠氣。千載一遺音。

黃儒炳一首

儒炳字士明。廣州順德人。萬歷甲辰進士。改庶吉士。授編修。歷中允。諭德。庶子。遷南國子祭酒。就

遷吏部侍郎。改北禮部。再改吏部。有影木軒集。

秋經景州董子祠

秦火初殘道已孤。壁經遺緒未全疏。百年禮樂逢明主。三策天人識鉅儒。歲遠芳蘋供故里。秋高落日照平蕪。招賢東閣成何事。偃蹇王門有大夫。

楊鶴一首

鶴字修齡。武陵人。萬曆甲辰進士。除雒南知縣。改長安。徵授御史。引疾去。天啓初。起太僕少卿。擢右僉都御史。巡撫南贛。未任。忤魏忠賢除名。崇禎初。召拜左僉都御史。進左副都御史。拜兵部右侍郎。總督陝西三邊軍務。進兵部尙書。加太子少保。逮下獄。戍袁州。卒。復官。追加太子少傅。

寄懷張子達伯仲

澤畔相思夢卜居。故人兄弟近何如。林邊黃葉供新賞。屋裏青山好著書。江口月明猿嘯夜。荆門霜落蟹肥初。再來剡曲堪乘興。畏爾淹留逼歲除。

吳應琦一首

應琦字景韓。桐城籍。休甯人。萬曆甲辰進士。授太常博士。遷御史。歷大理寺丞。進本寺少卿。遷南大理寺卿。

滇回住峽山山莊

數峯相對澗流長。萬里歸人滿鬢霜。舊壘燕來巢未改。新疇雨過稻生秧。苦吟賴有陶潛酒。薄宦原無陸賈裝。六詔風煙身歷遍。如今邱壑任徜徉。景韓以巡按至滇

趙彥復二首

彥復字微生杞人萬歷甲辰進士累官湖廣副使有趙微生詩選

靜志居詩話微生牽絲作宰不以簿書廢吟詠晚輯李獻吉何仲默王子衡孟望之薛君采高子業劉子素張助甫謝茂秦凡人之詩目曰梁園風雅而以已作附之以爲獻吉籍本扶溝聚族於斯婚嫁於斯長子孫於斯營邱墓於斯非梁人而何君采之先出自偃師而隸武平赤籍茂秦爲趙王客因卜居子孫遂留不歸鄴志載在流寓故亦入選中州之文獻得存其略焉

隱園

曲沼瀼森木。虛堂帶遠星。座窮非馬辯。閒譜種魚經。流水何勞駛。歸雲不用停。怪來幽意足。終日戶常扃。

卜居泉上因感先君子有山水之癖

渚陰石浪靜春蕪。一葦橫塘興不孤。開徑但饒修竹好。爲溪得似浣花無。閣雲遠納層層岫。苑柳平分面面湖。幾載樵山與漁水。那堪腸斷夜臺烏。

朱之臣二首

之臣。字無易。儀衛司籍。成都人。萬曆甲辰進士。授大理評事。遷戶部主事。歷員外郎中。出爲德安知府。歷湖廣副使。井陘道參政。遷江西布政使。有梅龍集。

曉行

風泉竹露微茫溼。林影花光漸次真。一幅郭熙好山水。坂田新著耦耕人。

漫興

置身才與不才間。略似莊生物外閒。惟有鄉心消不盡。春來頻夢大峩山。

戴九玄二首

九玄。字玉汝。一字大圓。新昌人。萬曆甲辰進士。除棗強知縣。改臨安。會稽。文安。遷都察院經歷。進工部員外。有工部稿。匡山社集。酒人游。饑驅草。陸沈集。落花吟。聽鷗亭稿。懷玉集。

妻君弘西江詩話。大圓詩。如蟬聲驟路雨。馬首衝河煙。更深雙鬢白。吟斷一燈青。客好殊難有。官閒豈異無。約客嘗蝦菜。聽人唱竹枝。呼鷗與爾爲閒伴。繫馬同君是散曹。亦倚句也。

田按。玉汝詩。音節殊亮。不染當時習氣。

元日

一官闕下已三年。郎署浮沈只自憐。飽羨侏儒徒索米。醉騎款段也朝天。別來剩有歸山夢。不去貧無儼

舍錢移得梅花寒未吐。知他何處占春偏。

送張懋葵兵備池陽

帝鄉遙帶大江濱。開府西南控制分。官舫去來三峽雨。牙旗披拂九華雲。楓林踏社聞歌鼓。荻港防秋撤戍軍。閒向昭明臺上望。一潭煙水日初曛。

鄧澄一首

澄字子德。建昌新城人。萬歷甲辰進士。選庶吉士。改御史。出爲湖廣僉事。有大隱堂、清雅堂、東園等集。

黃孝子投塔詩

載籍遠乃行。耳目近常略。孝子死爲母。至今猶寂寞。當其畢命時。神感塔斷桷。睜睜目不瞑。煢煢魂安泊。觀者環如堵。鄉鄰驚錯愕。爭傳爲黃長。黃竺其邨落。母疾久不愈。醫藥靡所託。念身爲母生。舍身爲母藥。一片血心誠。異代當揚摧。老夫筆諸篇。以俟采風俗。

樊良樞一首

良樞字尙植。進賢人。萬歷甲辰進士。除□□知縣。改仁和。遷刑部主事。歷員外郎中。出爲雲南副使。改浙江。有三山、二酉等集。

滕王閣懷古

層樓睥睨漢家壙。百二關河帶礪封。鹿放西山回萬乘。劍衝南斗化雙龍。沈煙極浦通朝磬。濺水空潭激夜舂。最是秋江漁笛好。數聲遙和翠微鐘。

西江詩話。明太祖平陳友諒。嘗幸南昌。開宴滕王閣。命諸儒酣飲賦詩。翼日。存恤窮民。放友諒所蓄白鹿於西山。詩中頸聯指此。

李若訥一首

若訥字季重。臨邑人。萬歷甲辰進士。累官參政。有五品稿、四品稿、楊花詩。

雲

忽作紅翠生。映山復涵水。盈盈散何方。但見層陰起。

王家植一首

家植字木仲。濱州人。萬歷甲辰進士。改庶吉士。授編修。

登琅琊臺

臺上秋風俯大荒。側身東望思茫茫。島邊蜃氣結朝市。雨後鯨波落晚涼。南去樓船懷越絕。西來輦道自秦皇。雄心寂寞空千載。海上何人有禁方。

戴耆顯一首

耆顯字令微桐城人萬歷甲辰進士授禮部主事有杭河集

題邢山人卷

尋真無遠近一塵聊溷迹。悟澹未云遙。得趣良可適。近市寡囂塵。入室靡交謫。蘊此霞外情。道彼區中責。中唐鬱遐眺。憑城望南陌。平楚隱連岡。高雲綴危石。欣賞付長嘯。觀化忌踟躅。夙契苟莫違。悠悠遂朝夕。

劉士驥一首

士驥字允良禹城人萬歷甲辰進士改庶吉士授檢討有蟋蟀軒草

田按允良舉南宮出曾太史可前房太史在闕夢李于鱗來謁曉得允良卷遂取焉可前與公安同派操歷下之戈者也乃因子鱗而錄允良亦一異也

送寒泉上人

空門無住著來往偶隨緣。客路白雲遶。禪心明月懸。聞鐘尋野寺。洗鉢向寒川。想到東林下。天花落法筵。

李之世六首

之世字長慶新會人萬歷丙午舉人除瓊山教諭遷池州推官有圭山副藏北遊草剩水山房漫稿南歸稿雪航草家園稿水竹洞草朱厓集小草泡菴草不佳菴草息廬詠

顧嗣協岡州遺稿。長慶工詩善書。問作雲林山水。皆清絕可愛。

田按。長慶詩。蘊藉無喧囂之氣。頗近宋人。

遊郭塘村題壁

歷險乘危倦復登。尋幽那有幾人曾。澗橋忽斷遙攀樹。土屋將欹巧礙藤。楮葉壇邊搗社鼓。豆花棚下晒魚罾。農談真覺塵心盡。愧我移家遠未能。

迴龍菴訪僧

古岸沙崩路已漫。清川流水對潺潺。人從荒落見殘寺。僧帶斜陽歸故山。爲愛榕陰遮徑密。偏憐鳥語伴經閒。蘭橈只在官橋外。問我來時過幾灣。

厓山弔古

汴。杭回首卽荒濱。三徙逢厓事竟真。天地有靈應一涕。風波垂死泣孤臣。何來赤手堪扶國。卽去黃冠亦誤身。還是中華千古地。長風吹雨洗腥塵。

冬日書懷

氣至寒林慘不舒。蕭然宴坐得真如。耗磨轉覺雄心盡。簡懶全於世法疏。一艇爲家將鶴往。三冬無事帶經鋤。過逢半是邱中侶。多暇還參種樹書。

雷陽道中

原莎莽莽盡荒阡。遙指孤城百雉懸。新水乍生潮帶瀟。危樓一望海連天。空聞疲卒防春戍。幾見流民墾石田。數十年來豐樂土。風光強半不如前。

種茉莉

堪嫁江梅賸水仙。藜藜香雪鬪芳妍。女郎編綰鬆鬆髻。卻道眞珠不直錢。

越其杰七首

其杰字自輿。一字卓凡。貴陽人。萬歷丙午舉人。歷夔州同知。擢四川僉事。遷霸州兵備副使。以事論戍。起充爲事官。監軍鳳陽。福王立。以右僉都御史巡撫東萊。改撫河南。南都破。尋卒。有薊門、白門、橫槩、知非、屢非諸集。

楊文驄洵美堂集。卓凡詩。鑿腎嘔肝。雖極刻劃。而淳澹淵雅。歸於自然。

黔詩紀略。開府辭耽佳句。當放退多閒。其詩殆無日不作。就所詣而論。律詩勝於古詩。五言勝於七言。吳滋大編其遺集。附摛句一卷。古句如幽緘借竹開。吟緒仗花引。風未碧瀾輕。雨餘塵迹盪。故使意偏失。甯關眉不修。空江坐夜深。靜聽流雲響。隔石細聽泉。泠泠如三歎。若得玉人憐。平生亦不寂。對衆發良言。十人九不樂。並清迥有餘味。律句五言。如自經多難後。只想一身閒。程蓮春草綠。意在晚山青。老去仍憂國。春來又別家。長因得忘處。便作息心觀。五更生百念。千里況孤身。避亂人人苦。除生事。事輕。心中無一事。岸上有千峯。花月夙心在。雪霜今鬢殘。客簡同僧靜。山秋似水清。遠念書雖達。知心夢可通。旅客雨猶出。

愁人晝反眠。七言如今日。對君疑是夢。去年願我恐非人。關心事匪飲能遣。得意人惟詩可招。味每在世俗醜醜之外。
田按。卓凡苦心吟事。存詩近萬首。惜爲鍾譚派所束縛。然其獨詣處。亦彼法中之錚錚者。

知人

自古英雄目。成敗兩不疑。若祇泛然惜。知不如不知。推解豈不厚。此恩猶覺私。

論詩

學問聊爲借。聰明反欲捐。悟來方自得。妙處不能傳。水月光無著。池塘夢偶圓。要知好消息。多在靜閒邊。

冬月宿友齋

亦在人寰裏。獨無塵事牽。自添焚麝火。看汲煮茶泉。靜夜觀空坐。高齋聽雪眠。心靈多畏役。並欲廢遺編。

夏日閉門

竹密巧辭日。花遲遙戀春。惜惟閒不學。好是宦仍貧。世外應酬簡。靜中消息真。松風涼午夢。誰識善藏身。

春暮看花

深閉閒庭念歲華。屐痕今始踏晴沙。豈知約客先儲酒。反在他人後看花。似畫江山徒付夢。如僧蹤迹不思家。傷離強制筵前淚。畏聽離羣獨噪鴉。

訪友

閒移居在碧溪潭。夏日攜詩獨往尋。微映松筠饒有致。不藏洞壑自然深。誰云道念原存默。未必仙人盡廢吟。商榷旣投相視笑。階前時下一幽禽。

夜坐

塵務日相侵。夜深喜默坐。耳根漸覺靈。葉底聽秋墮。

明詩紀事卷二十二

庚籤

成基命一首

基命字靖之。後避宣宗諱。以字行。大名人。萬歷丁未進士。選庶吉士。授編修。歷洗馬。少詹事。遷禮部侍郎。兼太子賓客。改掌南翰林院事。以忤魏忠賢。落職閒住。崇禎初。起吏部侍郎。拜禮部尚書。兼東閣大學士。參預機務。加太子太保。進文淵閣大學士。贈少保。諡文穆。有雲石堂集。

冬至朝天宮習儀

內丈宵移做碧壇。嵩呼聲肅晚生寒。灰蘆應律欽周政。綿蕞成儀習漢官。煙擬御爐香裊裊。響移宮漏珮珊珊。近臣未識天顏喜。極目彤雲捧露盤。

韓日纘一首

日纘字緒仲。博羅人。萬歷丁未進士。改庶吉士。累官南禮部尚書。諡文恪。

雪中過東林寺

橋下溪聲急。微茫亂遠鐘。半山雲壓寺。深院雪欹松。澗落何年瀑。煙藏幾處峯。靈山緣未了。他日許相從。

何南金二首

南金字許卿。泰興人。萬歷丁未進士。除莆田知縣。有悲華館、十笏齋集。

楊廷撰一經堂詩話。許卿五律。工於起勢。如山中晚步云。忽覺一林寂。幽巖鳥定初。秋夜獨坐云。落月一聲笛。蕭然秋思生。西湖泛舟至南屏云。亂水疑無地。湖南忽有峯。

望湖亭獨酌晚歸

千山萬山落日低。渚禽恰恰衝人唬。菰蘆葉暗煙漲浦。楊柳風來浪拍隄。上方僧定塔鈴起。遠港月照漁燈稀。習家池頭更何似。枉殺山翁醉似泥。

秀州道中

落日湖田浪平。湖頭人歌採菱。朝來欲作風雨。一片菰蒲水腥。

鄒維璉三首

維璉字匪石。瑞州新昌人。萬歷丁未進士。除延平推官。徵授南兵部主事。改北。歷員外郎中。改吏部。以劾魏忠賢被論削籍。下吏謫戍施州。崇禎初。起南通政參議。就遷太僕少卿。擢右僉都御史。巡撫福建。以忤溫體仁罷官。召拜兵部侍郎。遘疾不赴。有願學編、宦遊草、友白草、友歐草、導噫草。

田按：匪石劾忠賢疏，與楊大洪同時上。大洪杖死，匪石僅謫戍思州衛，幸矣。崇禎時，起撫福建，不究其用，時論惜之。

雪後富陽舟中別戴章甫之會稽兼致其兄玄趾

逢君君又別，把酒暫爲歡。小陸才如此，元方弟未難。探奇過禹穴，弔古憶秦觀。寄語山陰客，扁舟興已闌。

侍御朱密所先生見招賦贈

臥病山中白髮新，當年諫草獨批鱗。都門舊識花廳史，聖主能寬骨鯁臣。勝日東皋遊屐遠，丹衷北闕夢魂親。拂衣未許成長往，幾度徵書起釣綸。

塞下曲

日落孤城暮角哀，寒衣未授朔風催。那堪隴水聲幽咽，流向征人枕上來。

潘潤民一首

潤民，字用霖，貴州前衛人。萬歷丁未進士，改庶吉士，授禮部主事，歷員外郎中，出爲廣東副使。歷四川、河南參政、廣東按察使、雲南布政使，病歸。起雲南副使，就遷布政使。有味澹軒詩集。

詩紀略：朗陵有味澹軒詩。朗陵子馴，驥孫德徽，曾孫奕，快，玄孫文芮，文苞。來孫曉，景孫以澂，以溶，仍孫桐，傳七世十二人，皆有集藏於家。

田按：吾黔以風雅世其家者，首推潘氏。余輯續黔詩紀略，七世十二人詩集，皆得錄之。

雜詩

明詩紀事 庚籤 卷二十二

二四八九

吟罷倚修竹。醉餘盤古藤。補巢妨墮鳥。解網縱飛蠅。靜室發孤磬。晚窗明一燈。諸緣俱淡盡。擬作在家僧。

周泰時一首

泰時字孟嚴。金壇人。萬歷丁未進士。累官雲南布政使。

遊碧玉巖

碧玉巖春氣煦。曳杖愛閒行。酒面風吹醒。詩腸澗洗清。野麋同適性。山鳥自呼名。爲赴僧房約。幽雲出洞迎。

徐鳳翔一首

鳳翔字君羽。江甯人。萬歷丁未進士。除閩縣知縣。擢戶部主事。

寄俞仲茅

對酒忽不愜。思君意若何。鄉愁因雨積。詩夢入秋多。何日辭圭組。終年隱薜蘿。青溪垂釣侶。好爲製漁蓑。

趙嶠一首

嶠字子函。一字屏國。盩厔人。萬歷己酉舉人。

列朝詩集。子函家有傲山樓。藏書萬卷。所居近周。秦漢唐故都。金石名書多在焉。西安預宮碑林爲最。時跨一蹇。挂偏提。搦工。攔楮墨以從。每遇片石隻字。坐臥其下。親爲拭洗。椎榻裝潢。復爲疏記其後。援據考證。略仿歐陽公。趙明誠。洪丞相三家名目。石墨鐫華。自謂窮三十年之力。多都玄敬。楊用修所未見也。遊終南。九嶼城南。作訪古遊記三篇。三輔。五陵。長楊。下杜。遺文故事。歷歷如指掌。

莊河村主人

落日牛羊嶺上村。誰開三徑召王孫。山容似黛斜侵檻。水字如巴曲到門。野客行藏無揖讓。田家賓主有盤樽。欲將谷口煙霞色。並向桃源洞裏論。

賈必選一首

必選字徒南。一字直生。江甯人。萬歷己酉舉人。除戶部主事。遷員外。謫九江經歷。遷桂林推官。入爲南工部員外。遷郎中。

方山宿定林寺

緩步尋詩去。山光入定林。竹煙生澗細。松月到門深。暫憩高僧榻。聊抽隱士簪。夜涼鐘磬寂。猿鶴助高吟。

張慎言二首

慎言字金銘。陽城人。萬歷庚戌進士。除壽張知縣。改曹縣。徵授御史。以劾馮銓。銓屬曹欽程論劾。誣盜庫銀。編戍肅州。崇禎初。起故官。歷太僕少卿。太常卿。遷刑部侍郎。以事落職。召拜工部侍郎。遷南戶部尚書。就改吏部。掌右都御史事。福王卽位。命理部事。加太子太保。致仕。流寓蕪湖。宣城。聞國亡後。疽發於背。戒勿藥。卒。有泊水齋集。

靜志居詩話。尙書雖歷崇階。傾心下風雅之士。聞詩人陳昂捫屨布卦。卒窮以死。語所知曰。自今入市門。見竇榮備皆宜物色。

之。恐有如白雲先生其人者。嗚呼。今人論撰述。率先揆其仕路之通塞。以定文字之佳惡。取舍由茲。分焉。江河日下。安得聞此長者之言。

白層昌容安齋蘇談。藐山之園曰泊水。余一日同沁涓。首聞二楊公在藐山座請泊義。藐山曰。未閱水經乎。余曰。正以水經爲疑耳。水經沁水一名泊水。公園倚沁濱。以泊命名。恐誤。藐山曰。吾止知爲泊。不知泊也。因顧二公。二公皆以泊爲是。余疑二公所讀同出一本。詢之果皆彰德趙邸本。非南本。余曰。泊取及意。又潤也。泊則水之止而不動者。三公皆誤矣。呼取南本正之。皆作泊。後賁聞更其里爲泊。而藐山迄不能改。長公坦之序其詩。又曲爲之辭。何若易以泊字爲典。

田按。沁水源出涅縣。今考戴。趙輩校水經注。沁水卽涅水也。不從泊與泊。較爲有據。

秋杪有懷沁涓

園廬相望水縈洄。歸思紛紜未易裁。得句偶先分韻往。聽松每約過溪來。抗言在昔夷將惠。握手於今王與裴。細雨雙鴻秋寂寂。懷人千里有孤臺。

田康字將禮南海兼盡東南之美

羨君仙舸漾輕霞。君到江南正落花。花霧撩人春欲醉。江煙迷岫日將斜。竹枝渡水驚新響。白苧隨風憶浣紗。更向六朝芳草路。莫愁湖外問誰家。

楊嗣昌一首

嗣昌字文弱。武陵人。尙書鶴子。萬歷庚戌進士。除杭州教授。遷南國子博士。累進戶部郎中。引疾

歸崇禎初起河南副使進參政移霸州再移山海關擢右僉都御史巡撫永平山海諸處拜兵部侍郎總督宣大山西軍務以憂歸起兵部尙書改禮部兼東閣大學士入參機務兼掌兵部事特旨督師加太子少保太子少傅師屢敗不食卒於軍追進太子太傅有地官集

田按武陵閣於用人勇於任事拮据行間以死亦可哀也詩頗染竟陵流派

三石澗

選勝就三石周遭衆木參中仍瀉寒澗名久蝕精藍伏谷虎晨去隔沙漁夜談霜林與霞壁襯取夕陽酣

文翔鳳一首

翔鳳字天瑞西安三水人萬歷庚戌進士除萊陽知縣改伊陽洛陽遷南禮部主事改吏部歷員外郎中出爲山西副使遷光祿少卿有南極篇皇極篇東極篇等集

列朝詩集天瑞詩離奇寡兀不經繩削馳騁其才力可與唐之劉叉馬異角奇鬪險

靜志居詩話學有異端詩亦有異端文太青王季重是已

暮入登州

遠山微剩黛近島澹留青海若收城市蛟人掩戶庭宿雲如待曙歸汐解藏靈日母東巡至余將攝太甯

王象春三首

象春字季木。濟南新城人。萬歷庚戌進士。除上林苑典簿。遷南大理評事。歷工部員外。改兵部。再改吏部。進郎中。有問山亭詩五卷。濟南百詠一卷。

列朝詩集。季木於詩文。傲睨輩流。無所推遜。獨心折於文天瑞。季木尤以詩自負。才氣奔軼。時有齊氣。抑揚鏗抗。未中聲律。余嘗戲論之。天瑞如颯波句。具諸天相。能與帝釋戰鬥。遇佛出世。不免愁宮殿震壞。季木則如西域波羅門教。邪師外道。自有門庭。終難皈依正法。

池北偶談。從叔祖季木。考功跌宕使氣。常引鏡自照。曰。此人不爲名士。必當作賊。嘗奉使長安。飲於曲江。賦詩云。章曲。杜陵文。物盡。眼中多少可兒填。其傲兀如此。

書項王廟壁

三章既沛秦川雨。入關又縱阿房炬。漢王真龍項王虎。玉玦三提王不語。鼎上杯羹棄翁姥。項王真龍漢王鼠。垓下美人泣楚歌。定陶美人泣楚舞。真龍亦鼠虎亦鼠。

靜志居詩話。萬歷中年。詩派雜出。季木自闢門庭。不循時習。雖引關中文天瑞爲同調。然天瑞支離。未免邪徑害田矣。未若季木之無戾羣雅也。題項王廟一篇。比於謝參軍鴻門作。更覺遺鍊。亡友穎川劉考功公馥亟賞之。幾於唾壺擊缺。此非邪師外道之傳也。

不落夾

慈甯宮裏佛龕叢。瑤水珠燈照碧空。四月度供不落夾。內官催辦小油紅。

劉蒼愚酌中志略。四月初八日。進不落夾。用葦葉方包糯米。長可三四寸闊一寸。味與粽同也。

古夫于亭雜錄。明故事。四月八浴佛日。賜百官不落夾。案萬歷中。慈聖李太后宮中。祀九蓮菩薩。四月供不落夾。先從祖季木考功詩云云。蓋故事。供佛後。卽賜百官。不始萬歷也。

白雪樓

荒草深埋一代文。蔡姬典盡舊羅裙。可憐天半峩眉雪。空自頽樓冷暮雲。

居易錄。李滄溟先生身後。最爲寥落。其寵姬蔡。萬歷癸卯年七十餘矣。在濟南西郊。賣胡餅自給。叔祖季木考功見之。爲賦詩云云。滄溟清節可知矣。

馬之駿二首

之駿。字仲良。新野人。萬歷庚戌進士。授戶部主事。歷員外郎中。降廣德州同知。遷應天通判。改順天。復官戶部主事。遷員外。有妙遠堂集四十卷。

列朝詩集。仲良與兄時良並有時名。而仲良尤爲秀發。與鍾伯敬同時。稱詩。仲良持論。欲極其才情之所之。恣其意匠之所經營。情景筆墨之所種。慨遠救鋪陳叫囂之病。近離淒清寒苦之習。不屑寄伯敬籬下。伯敬以其非同調也。亦推而遠之。少年盛氣。腸肥腦滿。多詩酒酣暢之致。鮮師友鏃厲之功。其最契合者。吳門王留。新安汪逸。相與馳騁角逐。往而不返。以故時調狎出。學古不純。風格時患蕪累。波瀾未見老成。天不假年。未見其止。良可惜也。

書影。張蔡居曰。明詩四變。爲海內口實者七人。秦。齊。吳。豫。各一。楚。獨居三。然初變而李何。再變而王李。不失爲盛也。變而公安。竟陵。晚矣。吾豫當初變時。一人起而左右北地。鏗金戛玉。至今踴厲詞壇。王。李樹幟。公安。矮杆。豫。獨不與。不欲與也。竟陵時。新

野馬仲良同伯敬起家庚戌進士。自造新聲。借吳門亦房唱和。其詩抉鐵性靈。鮮警秀異。足以移易一世。王馬之名。宜與鍾譚並。乃世唯口鍾譚。不及二氏。則爲仲良者。不幸而詩不播於天下。爲風氣所歸。抑幸而不列變中。反得免世詆訶耶。

靜志居詩話。仲良才頗縱橫。微嫌圭黍未合。

宣和王磬歌爲祠山道士作

瑤琨出水水寒膩。昆吾刻作宣和字。哀音射波龍子颯。如訴東京夢華事。殿前衮衣方羽衣。翠旂黼座丹碧輝。靈素大言請羣后。三山鸞鶴同雞飛。此時宮懸俄一叩。洞庭地窄鈞天漏。胡塵馬潼捲地腥。不上血斑上土繡。玉質至脆石至堅。物理堅脆爲壽年。峻嶒良嶽盡奇石。銷鋒飲鏃成飛煙。古冰瑩然反長久。似出宮姬配非偶。垢衫綈腕強提攜。憶著安妃玉奴手。蒼梧花鳥悲暮雲。南枝兼失冬青墳。空山猿哭斑狸臥。時復一聲裂煙破。

伏枕

伏枕梅簷過柳衙。北湖又復負荷花。門因謝客全無籍。身欲稱僧尙有家。七尺向攔同草木。三生知久痼煙霞。餘年儻遂幽棲志。剩我清湍舊釣槎。

王志堅一首

志堅字弱生。一字淑士。崑山人。萬歷庚戌進士。授南兵部主事。歷郎中。遷貴州僉事。不赴。改湖廣。

有香嚴室草

列朝詩集。淑士讀書最爲有法。先經而後史。先史而後子集。其讀經。先箋疏而後辯論。讀史。先證據而後發明。讀子。則謂唐以後無子。當取說家之有裨經史者。以補子家之不足。讀集。則定秦漢以後古文爲五編。尤用意於唐宋諸家碑誌。援據史傳。據探小說。以參覈其事之同異。文之純駁。

河間道中雜興

朝來百騎盡如龍。趙女齊兒一隊中。席帽長衫渾不辨。只教銀鐙露雙弓。

區龍貞一首

龍貞字象先。廣州順德人。萬歷庚戌進士。累官滇南道。有滄浪洞集。

曹署感事

中丞累詔援榆關。節鉞長隨塞外頒。南國十年輸稅盡。北庭何日羽書閒。荒城笳落秦時月。絕島屯高海上山。自聽秋風鈴鐸響。幾將封事過曹班。

鄭之文一首

之文字應尼。南城人。萬歷庚戌進士。授南工部主事。歷郎中。出爲真定知府。有遠山堂錦硯齋集。
列朝詩集。應尼公車下第。薄遊長干。曲中馬湘蘭。負盛名。與王百穀諸之爲文字飲。頗不禮。應尼。應尼與吳非熊輩。作白練裙雜劇。極爲譏調。聚子弟唱演。召湘蘭觀之。湘蘭爲之微笑。定襄傅司業清嚴訓士。一旦召應尼。跪東廂下。出銜袖一編。擲地。數

之曰。舉子故當爲輕。蛺蝶耶。收以覆。楚。久之。乃遣去。應尼舉進士。傅公爲北祭酒。介余往謝。適公一笑而已。應尼官太守。免歸。余作長歌寄之。有曰。子弟猶歌白練裙。行人尙醉湘蘭墓。應尼亦次韻相答。是後寂不相聞矣。

金陵元夕篇

朱樓隱軫薄層霄。綠水縈隄蕩畫橋。十里香風吹紫陌。一年明月始今宵。今宵無處無簫鼓。佳麗名都較得數。美酒留連拚十千。少年歡笑惟三五。三五年時二八游。箇儂無賴逐風流。香輪寶勒紛填巷。翠竹紅燈擁上樓。樓前九陌連三市。中有侯家通戚里。千蝶春星舞袖翻。九枝夜閣歌鐘起。歌舞惟應此夕陳。魚龍百戲競爭新。銀花絳樹開千丈。佛火神燈照百輪。花燈在處如人好。半醉筵前看鮑老。何客燈前到可遲。何人花下歸能早。花下燈前出畫裙。衣香一路暗氤氳。不知南陌人如月。且道東門女似雲。雲移月墮歡難歇。虬水丁冬霜漸咽。郎心尙逐紫騮嘶。妾意先留烏舅舌。歸去燒燈總不眠。含情脈脈定相牽。餘宵冷焰留紅燭。明日芳塵拾翠鈿。

陳玄藻一首

玄藻。字爾鑑。莆田人。萬歷庚戌進士。授行人。遷禮部主事。歷江西。廣東參政。遷貴州布政使。乞歸。召拜禮部侍郎。有頤吟集。

露書。陳爾鑑詩。如虢國夫人。不須脂粉。而色笑婉麗。

姚園客入燕留酌

涵江碧水靜娟娟。宅在橋西得趣偏。燕市悲歌纔一醉。龍潭修禊已三年。同袍與子秋初冷。乙夜留人月正圓。劇飲何須規厚祿。冷曹亦剩俸餘錢。

譚性教一首

性教字生伯。萊蕪人。萬歷庚戌進士。累官陝西副使。有黃雪山遺稿。

千佛寺贈李山人

有客過擔簦。高名是李膺。獨籠雲外鶴。來就海邊僧。白社千日酒。青山七尺藤。知君多遠興。俠骨自峻嶒。

吳伯敷一首

伯敷字同文。一字季布。宣城人。萬歷壬子舉人。

秋夜簡同社

蕭瑟西風吹敝裘。小窗燈火獨夷猶。殘砧草閣三更月。細雨楓林一夜秋。華髮漸看天地老。青山不共古今愁。中原舊盟多零落。好與滄江狎野鷗。

明詩紀事卷二十三

庚籤

吳姓一首

姓字鹿友。興化人。萬歷癸丑進士。除晉江知縣。改維縣。徵授御史。以忤魏忠賢削籍。崇禎初起。故官。歷大理丞。左通政。擢右僉都御史。巡撫山西。乞歸。起兵部左侍郎。協理戎政。進禮部尚書。兼東閣大學士。以命督師逗留。遣戍金齒。福王立。赦還。復官。國變後。卒於家。有嘉遯堂集。

潭村守歲

歎息餘生今尙存。幽吟終歲閉柴門。一年虛過惟殘夜。萬事難酬是舊恩。落落異鄉驚白髮。幢幢短燄照青樽。停杯未覺春風入。愁向孤村說故園。

李孫宸二首

孫宸字伯襄。香山人。萬歷癸丑進士。政庶吉士。授編修。歷中允。庶子。少詹事。侍讀學士。遷禮部侍郎。進本部尚書。贈太子太保。諡文介。有建霞樓集。

啓禎兩朝遺詩。先生以優柔之韻。抒穩順之詞。純古淡泊。蘊藉深美。

舟過張曲江丞相墓

山下春江走濁流。山邊丞相古墳留。天然怪石供香火。風遞仙韶到寢邱。陵谷豈知人代改。蘋蘩空薦粵江秋。低徊此際懷風度。擬挾晴霞訪十洲。

虎邱

西邱日落坐氤氳。吳越山川掌上分。霸氣已荒金虎迹。江濤猶壯水犀軍。離宮雨歇餘芳草。別墅春殘起暮雲。獨有生公臺畔石。吳儂長日醉紅裙。

方震孺一首

震孺字孩未。壽州人。萬歷癸丑進士。除沙縣知縣。擢湖廣道御史。巡按遼東。被逮下獄。擬大辟。以皇子生暫免。崇禎初得釋。起廣西參議。擢右僉都御史。巡撫廣西。有孩未先生集十六卷。

小山嗣音先生忠義奮發。出於肺腑。既遭憂患。彌耽禪悅。故其詩沈摯瑩澈。

田按。天啓時。被逮諸君子。多下鎮撫。而孩未獨下法司。諸君子皆以忤聞。故禍尤烈。孩未僅忤聞黨。故禍稍緩。而猶得幸免也。其詩多紀時事。言之沈痛。貫索悲風。吹白虹。老臣嚼指灑遺忠。紀楊大洪畢命之時。夜半嚼指。血書一百二十七字。付獄卒顏。是夜白虹貫索也。獄裏靈根數不逢。六賢連臂化長虹。紀六君子先後死鎮撫獄。獄中產黃芝一本。大如盤也。青燐落日王孫血。白月橫空帝子魂。紀流賊屠襄城也。斂鐵九州雞鑄錯。潰灘羣盜正如毛。紀楊嗣昌主撫。致流賊橫行也。

獄中逢趙君金吾世茂

此地胡爲聚，相看一愴神。深驚前路險，更覺故人親。拙計羞明主，餘生厭小臣。斛山精氣在，儻許作比鄰。
金吾秦人，與斛山先生同里。

葉燦一首

燦，字以沖，桐城人。萬歷癸丑進士，改庶吉士，授編修。遷南國子司業，歷中允、庶子。天啓末，削籍。崇禎初，起少詹事，兼侍讀學士，加禮部侍郎。累遷南禮部尚書，追諡文莊。有《天柱》、《南中》、《廡下》、《讀書諸集》。

寄題朱太常園林

碣石滄江借不難，千章萬个碧琅玕。花間白墮青絲舫，郊外籃輿紫籙冠。礙日樹交晴欲暝，當窗瀑射晝長寒。相逢莫怪如泥醉，齋禁歸來禮數寬。

白正蒙三首

白蒙，字爾亨，南通州人。萬歷癸丑進士，除行人，有大夢齋集，吹劍篇、燕中草、征西草。

田按：爾亨詩，意取凌厲，但傷直遂而少涵蓄。

山行雜詩

山水相趁逐，辛苦不復論。鐘聲出林莽，古寺幽可捫。重崖壓僧屋，蔓草縈層軒。宿雨寒松楸，薄煙散朝暉。

涓涓澗底泉。歷歷空階喧。清冷愜心賞。灑然忘塵煩。

成都懷古

杜老迹大奇。嚴公骨自俠。載酒日相過。不冠時亦接。登床未爲忤。入幕情更愜。感知有餘卷。而乃云欲殺。送盧少藎司訓淮陰。

一官仍吏隱。正馬出皇州。落日送君去。淮陰我舊遊。有詩能弔古。無事可尋幽。俸薄饒沽酒。高歌俯濁流。

齊琦名一首

琦名字越石。桐城人。萬歷癸丑進士。官紹興知府。有慕韓草。

飲米仲詔古雲山房

積想淇園勝。良宵快此尋。蟾光淹暝色。石氣散秋陰。顛合三生具。交從一往深。不知朝市裏。別自有雲林。

方大鉉一首

大鉉字君節。桐城人。萬歷癸丑進士。官戶部主事。有塞蘭館集。聽峽齋草。

泊牛渚

江上秋風夕。蘆邊獨客舟。雨檣棲斷港。野火射寒流。醜酒懷高詠。宮袍憶舊遊。夜深雲霧散。白月滿滄洲。

王應熊二首

應熊字非熊。巴人。萬歷癸丑進士。選庶吉士。歷官詹事。以憂歸。崇禎初。詔拜禮部侍郎。進本部尙書。兼東閣大學士。參預機務。以言官論乞休。再詔忤旨。許歸田。福王立。改兵部尙書。兼文淵閣大學士。總督川湖雲貴軍務。戰敗。遁入永甯山中。卒於畢節衛。有涵園集二十卷。

田按。應熊與周延儒。溫體仁。朋比。相業不足言。國變後。歿於行間。君子猶節取焉。

書太暉觀道士卷二首

青牛道士去不反。黃鶴仙人迹又陳。獨坐花宮消浩劫。等閒滄海已成塵。
湘獻王園晝不開。秋風桂子落牆隈。白頭老卒藏遺像。龍種當年事可哀。

周京三首

京。字寤西。沂州人。萬歷癸丑進士。官禮部主事。有賁園草。吳越遊草。金城集。

田按。寤西弔古之章。頗饒興趣。

叢臺弔古

高秋凌雉堞。云是古叢臺。宇宙一俯仰。英雄俱草萊。窺秦心未死。分趙意何哀。惆悵精靈歇。西風四面來。

鄴中

叢臺朝繫馬。漳水夕停舟。霸氣風煙盡。河聲日夜流。山雲時欲雨。關樹易爲秋。獨有前朝月。依依鄴下樓。

琅琊塚

禾黍蕭蕭晉代宮，尙餘高塚臥秋風。新亭幾許神州淚，盡入荒煙一望中。

俞琬綸一首

琬綸字君宜，長洲人。萬歷癸丑進士官衢州，西安知縣。有自娛集。

感病柱

幽香發叢桂，秋半以爲期。今年節序早，怪爾獨開遲。遲遲不須較，終然亦遲萎。及此正開際，折取戒童兒。夜半風雨作，每旦無晴曦。繁花惜狼藉，衆葉亦紛披。此猶坎壈人，憂患復干之。植物尙如此，人生安足悲。

陳繼儒明詩選：君宜少有才名，成進士，行宦越中，未幾病歸，臥疾南城，書蘇秦如扇頭，乃感柱病詩也。墨妙精絕，不幾時成長逝矣。此蓋其詩識也。

蔡文第一首

文第字及甫，新昌人。萬歷乙卯舉人。

對琴圖

琴絲欲斷清晝長，闌干竹靜燃花光。美人幽襟若秋水，無限瀟波流入湘。

羅賓王四首

賓王、字季作。番禺人。萬歷乙卯舉人。官南昌同知。有散木堂獄中草。

靜志居詩話。季作罷官歸。築哭斯堂於里門。或怪其誕。然方其佐郡。欲率師勦王。居恆慷慨。好談天下事。及陷身犴獄。志不少挫。詩歌多憤懣之詞。亦奇士也。

冬日送廬山人入桐廬訪孫明府

河梁此爲別。風雪入年殘。況問彭郎渡。還歸嚴子灘。青山空向老。江水至今寒。寄語桐廬宰。窮交自古難。

寄懷黃逢永。久客吳越。

江南二月時。花發滿棠枝。故國開將遍。遊人多未知。雲山何處盡。歲月自遷移。莫遣春風裏。年年馬首吹。

李定夫下憲獄寄之

自分難逃網。聞君復禁門。千金何用俠。七尺且酬恩。末世親知薄。時難友誼存。詰朝誰後死。先爲一招魂。

哭黃湘卿諸義士

一笑轅門日又昏。英雄能有幾人存。誰云市井多亡賴。自昔屠沽肯報恩。藏血有時終化碧。漆身何處認歸魂。餘生漫後須臾成。泣向西風孰可論。

錢士升一首

士升字抑之。嘉善人。萬歷丙辰第一人及第。授修撰。歷中允。南少詹事。遷南禮部侍郎。召拜禮部

尚書兼東閣大學士參預機務加太子太保進文淵閣大學士以疏忤旨引疾致仕國變後七年卒有賜餘堂集十卷

入直詩

深宮衡石論章奏綸閣推敲費論思子夜漏深纔罷直門官猶報是申時

棗林雜俎嘉靖以來票擬顛首揆餘旁睨而已萬歷之季疏多留中福清葉向高德清方從哲相繼首揆嘗閒坐終日福清曰安得票一疏全我體乎天啓間事繁福清及蒲州韓爌間迭次輔票一二宜興周延儒始分票計疏若干析以爲常晨入夕出拮据不遑閣例不宿人申刻散班崇禎初遂燃蠟更餘堂吏猶循故事高呼申時錢登菴詩子夜漏深才退食門官猶報是申時

劉榮嗣五首

榮嗣字敬仲曲周人萬歷丙辰進士授戶部主事改吏部歷員外郎中出爲山東參政歷布政使入爲光祿卿遷順天府尹拜戶部侍郎以工部尚書總督河道下獄死有半舫集

虛世淮尊水園集簡齋詩體莊氣和思苦韻澗具有蕭蕭馬鳴悠悠旆旌楊柳依依雨雪霏霏之意

列朝詩集敬仲爲人淹雅讀書好古爲詩用意沖遠自謂迥出時流德州盧德水篤好而深解之句銓字注以爲獨絕唐人之鑄買島宋人之宗涪州無以過也余在請室與敬仲游處踰年敬仲取往復次韻之作都爲一集名曰錢劉唱和詩敬仲詩操南音不類河北僮父亦可異也

古夫于亭雜錄曲周劉半舫尚書詩有雅裁題蘭亭卷云永和之上已逸少以千秋余夙喜誦之不以虛字損其佳也

靜志居詩話。尙書銜命治河。時駱馬湖潰。運道填淤。乃創挽河之議。起宿遷至徐州。別鑿新河。分黃水注其中。以通漕運。計二百餘里。費金錢五十萬。邳州上下悉河南故道。濬之尺許。皆沙。掘之爲河。經宿沙落。河坎復平。迨引黃入。波流迅疾。衝沙而下。往往成淤。明年。艘至駱馬湖。濱流適平。運丁惟賴入漕。不賴由新河。尙書雖躬督之。諭以軍法。尚有入新河者。舟輒膠。於是南給事中曹景參上疏。特糾落職提問。下獄論辟。獄未解而卒。朝野之論。以尙書河渠之任。本非所長。皆誤信門客之說。用違其才。爲可痛惜。其後駱馬湖復潰。舟行新河。人頗稱便焉。至其詩格卑卑。未能遠與古人方駕。

田按。尙書詩格不聳耳。而憂時傷懷。有蕭瑟闌成之感。

游淨業寺

溪過人人影。林開事事幽。萍光分酒綠。波色與雲浮。禮設非因我。機空亦有鷗。如何相約久。今日始同遊。

病中雜詩

種蔬聊學圃。斷酒欲爲僧。抱病官如葉。資身材倚藤。通宵千里夢。四壁一篝燈。念友增予愧。言歸尙未能。

寄懷張聖標金吾

誰將空谷寄閒身。念子悠悠白髮新。調募累年兵愈弱。徵輸滿地國方貧。可能高臥吟梁父。仍恐私憂累

杞人。若問近來朋友事。依然騎馬踏京塵。

憑欄

高樓秋氣正蕭森。罷酒憑欄且獨吟。何處吹簫催暮雨。有人孤策倚荒林。癖如米芾差存石。懶似嵇康併

廢琴早已投閒吾計得。入山何必更求深。

寄懷聶章羽

惆悵天邊一雁遙。朔風獨立影蕭蕭。生平畏事思緘口。近復貪眠懶折腰。悔不當年安鄙賤。卻憐垂老愧漁樵。歲寒倍憶邱樊好。羨爾身名共寂寥。

彭汝楠二首

汝楠字伯棟莆田人。萬歷丙辰進士。除會稽知縣。入爲禮科給事中。累官兵部侍郎。贈尙書。

關陔詩話。譚木名列東林。疏劾魏璫。中引趙高鹿馬爲諭。忠賢大恚。矯制奪職。崇禎初。起爲少司馬。以流寇猖獗。議剿。與當國者不合。乞歸。關岸圍於南郊中。有煙鬢閣。情依樓。蕉聲館。剩水居。棹聲閣。搖碧齋。密庵。玉照臺。且止臺。湧香廊。浮山舫。橘園。荔徑。雲來榭。見山亭。隱花閣。寸草庵。壺天。懋庵。諸景。董文敏爲作圖。諸名流俱有題咏。鐫之珉石。幾與輞川爭勝。又有岸圃花志。柯無瑕爲寫生。極天然之趣。優游綠野十年。先甲申一歲卒。其子士瑛。年甫總角。朱瘡岡攻興化時。結壯丁爲內應。斬關納之。爲山寇王士玉所戕。黃轂弔以詩云。司馬有賢兒。功成灑碧血。可謂不墜家聲矣。

賦得春水滿四澤

孤村積雨霽。野水漫磯頭。蕩漾遊鱗樂。澄空遠嶼浮。落花迷斷岸。飛鳥趁輕舟。倚檻長吟罷。春光潑眼流。

寄黃友寰花潭別業

繞坐山迎客。過橋水應門。潭光邀倦翮。林影飲清樽。草長迷花徑。沙崩出石痕。晚晴催句好。農務自村村。

謝士章九首

士章榜姓陳字含之。普安衛人。萬歷丙辰進士。除增城知縣。遷南刑部主事。歷員外郎。中出為重慶

知府。累遷參政。有計偕。笑玉軒。退食軒。秋似亭。羅浮。七星巖。燕臺。懶雲。郢中。巴音等集。

田按。含之性耽吟事。淡於仕進。其在增城。於衙齋構秋似亭。取唐人詩。秋光有似宦情薄之意。自作宦况詩云。春和看檣事。公暇辦詩逋。懷歸云。高元偏投忘。疏狂已性成。松風官舍夢。蘿月故園情。仙吏瓊淦醉。幽人谷口耕。買山儲薄俸。已識主恩宏。轉比部郎云。偶聞驚馬新移廐。自笑蜣螂又轉丸。恬靜之意。見於哦咏。詩有十集。莫子偲輯。黔詩紀略。不能舉其名。余從廠肆購得。為之喜而不寐。明代黔中詩人。以謝君采為稱首。含之生於天末。不染當時氣習。與君采同。詩品亦在君采之次。

宦况

宦海最風塵。猶堪宦海濱。時令增城地腴禾兩稔。天煖氣長春。魚蟹饒供饌。江山儘媚人。歸來雖未賦。五斗不

知貧。

偷閒二首

無端青鬢改。未老宦情闌。直道艱微祿。清名勝大官。菊松三徑遠。天地一杯寬。莫笑陶潛嬾。浮雲著眼看。誰容官散誕。我以病消閒。清俸堪儲藥。芳醪可駐顏。硯田經歲蕪。詩草倩人刪。不解移文意。孤猿嘯北山。宦中思故鄉親友。

帶孔頻移鬢欲皤。藤床蠶臥病維摩。春過二月杯多少。官歷三年俸幾何。縱藉琴尊消冗俗。何如嘯傲寄

煙蘿碧雲未閉桃花洞。爲我先裁小綠蓑。

金陵除夕

貰得屠蘇薦酒卮。家人且作客中嬉。曹無法律繩嵇懶。地有江山縱楚壘。多病長卿猶竊祿。食貧陶令又添兒。閑愁歲事同除盡。領取陽春律管吹。

聞鶯

竹樹陰陰水一灣。閉門何異住深山。青蘿斷隔世情遠。白鶴渾如人意閒。漉酒近花巾葛潤。敲詩過徑屐痕斑。不知何處鶯聲好。趁我銜杯到耳間。

五月報轉比部郎

雨夏靈霞室欲瀾。杜門書史伴閒官。偶聞鶯馬新移廐。自咲蜚螭又轉丸。宦套難隨時樣改。酒腸仍似舊年寬。長翰端合滄溟老。背負青天何處搏。

臨池

練裙堪試筆。不若寫黃庭。曰得雙鵝廩。無官亦不貧。

春江

晴花臨水發。幽鳥逐雲飛。閑卻江波綠。無上釣人磯。

方孔炤一首

孔炤字潛夫桐城人萬歷丙辰進士除嘉定知州改福甯人爲兵部員外歷郎中以忤魏忠賢削籍崇禎初起尙寶卿以右副都御史巡撫湖廣主剿賊忤楊嗣昌繫獄用薦復官督山東軍務命甫下而京師陷歸隱十餘年卒有中丞集

井中鐵

崇禎末吳門凌井得鄭所南書

連江鐵函書似漆吳門凌井一旦出沈埋一十三萬日羣鬼嘶叫風雨溢男兒之血本不死蛟龍盤護千年紙罨栗場中羽變徵咸涸淚激三江底淚無端江且乾防江不難防心難丸泥難塞圓通關天使井水澆人間至今首陽麓不生周草木此語歌之古今哭

劉鐸一首

鐸字我以廬陵人萬歷丙辰進士授刑部主事歷員外郎中出爲揚州知府忤魏忠賢坐大辟死忠賢敗贈太僕少卿有來復齋集

橫雲山入史囊鐸爲揚州知府有才藻憤魏忠賢亂政作詩書僧扇有陰竊國事非句偵者得之聞於忠賢倪文煥者揚州人也素銜鐸遂嗾忠賢逮治之鐸雅善忠賢子良卿事獲解許還故官良卿從容問鐸曩錦衣往逮索金幾何曰二千金耳良卿令錦衣還之其人怒日夜伺鐸隙言鐸繫獄時與囚方震孺同謀居間遂再下獄會鐸家人有夜醮者參將張體乾誣鐸咒咀忠賢刑部尙書薛貞坐以大辟忠賢誅貞體乾並抵罪鐸贈太僕少卿

馬當大風

倒峽羣龍鬪。騰空萬馬嘶。江神太無賴。索我篋中詩。

方大任一首

大任字玉成。一字逢吉。桐城人。萬曆丙辰進士。除元城知縣。擢廣西道御史。以忤魏忠賢削籍。崇禎初起官。遷右僉都御史。巡撫山海關。進右副都御史。巡撫順天。有霞起樓詩草。

送靈岳上人之九華

吾聞九華勝。九十九芙蓉。問爾從今去。高眠第幾峯。泉聲清萬慮。雲影伴孤蹤。應念迷津客。風塵事事慵。

陳熙昌一首

熙昌字當時。南海人。萬曆丙辰進士。除平湖知縣。擢吏科給事中。以劾魏忠賢削籍。崇禎初復官。貶太常少卿。

東湖雜詩

乍浦瀛壖曲。遙連蘆瀝場。迎船桑葉綠。繫纜菜花黃。塔影開初地。鐘聲落上方。孤城非鐵甕。先事慎隄防。

靜志居詩話。乍浦孤城如彈丸。倭寇入犯之衝。經國者不置重兵於其地。綢繆戶牖之謂何。陳公作宰在太平之日。先有隱憂矣。余嘗過其地。登湯山。山舊有塔。寺僧持疏募重建。余極語縣令己之。蓋洋船望見塔。易指點入口之路。不可不深慮也。

吳尙默一首

尙默字以時涇人萬歷丙辰進士除義烏知縣擢御史進太僕少卿謫承天知府遷湖廣副使歷按察使進布政使有秋水居集

白帝城

孤城三峽口古廟野蒿中赤甲連雲白瞿唐浴日紅金湯夔國固壁壘漢時雄憑弔猿聲裏遙天杳斷鴻

魏浣初一首

浣初字仲雪常熟人萬歷丙辰進士累官廣東參政

馮舒懷舊集仲雪少爲詩喜袁中郎晚好湯養仍余竊笑之君因自祕不以示余每謂人曰若家詩法與我異愧不得當也晚而讀白傅集頗得其意

不如還獨坐擬白

新詠從今歇陳篇莫更刪縱饒凌鮑謝曾不救飢寒驅使愁花鳥雕鐫苦肺肝不如還獨坐枯伴蠹魚殘

林枝橋一首

枝橋字陽仲新會人萬歷丙辰進士除當塗知縣徵授禮部主事改吏部歷員外郎中以忤魏忠賢奪職崇禎初起故官出爲湖廣參議進福建副使以事謫官起貴州參政進按察使有白鶴山

房集

病起

壁上枯桐久不彈。青山蕭瑟水空瀾。欲尋個裏荒寒意。只在稀微秋樹間。

孫朝肅一首

朝肅字恭甫。一字功甫。常熟人。萬歷丙辰進士。除刑部主事。累官廣東布政使。

張良

子房似好學。報讎何激烈。千金買力士。誤椎副車折。託術雖或疏。秦政膽已裂。人生貴立志。立志在明節。漸離筑中鉛。荆卿七首血。成敗不足論。肝腸朗於雪。

黃聖年三首

聖年字逢永。番禺人。萬歷戊午舉人。除當陽教諭。

田按。逢永自號大藥山人。詩特清婉。

秋

忽覺空階下。涼颿到葉聲。似乘殘雨入。時喚一蟲鳴。楚曲青蘭怨。吳衫白苧輕。所思千萬里。蕭颿最關情。

賦得秋閨月和家兄

長安一片月。飛向畫樓前。影共寒衣薄。愁將破鏡懸。淒清看枕簟。明白夢關邊。莫是征夫苦。秋風急上弦。

答子明人日作

幾夜青陽雨。都霏紫陌塵。最憐春作客。空惜日爲人。漂泊曾誰問。鶯花只自親。今朝落梅處。定有翠眉顰。

沈德符六首

德符字虎臣。一字景倩。秀水人。萬歷戊午舉人。有清權堂集。

列朝詩集。自王。李。人。學。盛行。吳。越。間。學者。拾其殘瀋。相戒不讀。唐以後書。而景倩獨近搜博覽。其於兩宋以來。史乘別集。故家舊事。往往能數陳其本末。疏通其端緒。家世仕宦。習聞國家故事。且及見嘉靖以來名人獻老。講求掌故。網羅放失。將勒成一家之言。以上史館。惜其有志而未逮也。

靜志居詩話。李廉粟生異質。日讀一寸書。所撰萬歷野獲編。事有左證。論無偏黨。明代野史未有過焉者。其詩甯取公安。竟陵。欲盡反歷下。鄒。瑯。之弊。故多豔字。側辭。雲。嵐。星。碎。未免病於才多也。

田按。景倩有與譚友夏夜話詩云。予幼習楚人。中道得伯敬。示我玄對稿。序者曰。譚柄。抗論卑時賢。齒少氣獨橫。最戒傍門人。位置須堅定。欲還真大雅。必斥僞先正。斯語吾堪師。一笑歲寒訂。二子世楷模。藝林作司命。歷下與鄒。瑯。一朝廢不競。蚤逝悲鍾期。朱絃絕高聽。之子獨雄視。萬夫稟號令。其傾倒鍾。譚如此。惟其早歲博綜。漁獵詞藻。與鍾。譚之專尚枯槁。鏤刻肝腎者。微別。余戲謂清權堂稿一編。著色竟陵詩也。

穀雨日抵家

襯日魚鱗水。烘人卵色天。久晴貪穀雨。新火活茶煙。夜讀僭兒塾。春耕老墓田。浪游頻計左。益悟杜門賢。

杪秋閱稼

孤學違時路每窮。敢因智叟笑愚公。生天孟顛元難佛。早世終軍未免童。老去計應依馬磨。寒來辭又祝牛宮。農場新滌漁菴舊。匡坐斜陽說歲功。

天啓宮詞四首

保姆天家自不貧。酬勞偏罄累朝珍。也知漢武非英主。回顧猶勞郭舍人。衣冠上道盡纒囚。麗景門中例見收。龍比已知非俊物。何妨一日付來侯。萬方輻輳助雕甍。觀闕巍峩壯帝京。趙鬼不須重誦賦。柏梁未燼建章營。六宮救淚但吞聲。後命何須罪有名。鉤弋競傳尸解去。聖人依舊戲昆明。

李衡二首

衡、字虎門。章邱人。少卿。開先孫。萬歷戊午舉人。有虎門遺詩。

春日甯忠門過訪山莊

與客花林坐夕暉。春殘花事未全非。垂楊隔澗傳鶯語。野菜成叢引蝶飛。取醉何妨付酒薄。嘗新剩喜子魚肥。一邱一壑誰營得。落魄鷄山老布衣。

同金丈六侯、夷門劉羽可飲元明西村。偶以事先歸。卽景有作。

山頂微微見雨痕。半山隱隱溼雲根。秋虹去地無數尺。落日穿林凡幾村。醉共眠時松下榻。笑相別處竹間門。閒園四壁秋燈影。還照疏花落酒尊。

徐人玉一首

人玉，字玉如，莆田人。萬曆戊午舉人。官兗州同知。

初秋卽景

幽徑寂無塵。花覆青苔上。一夕涼颼生。瀟瀟蕉雨響。

袁崇煥一首

崇煥，字元素，東莞人。萬曆己未進士。除邵武知縣。擢兵部主事。超擢僉事。監關外軍。授甯前兵備道。進副使。再進參政。按察使。擢右僉都御史。巡撫遼東。進兵部侍郎。乞歸。起右都御史。視兵部添注左侍郎事。進兵部尙書。兼右副都御史。督師薊遼。加太子大保。坐法死。

田按：思陵多疑。果於殺戮。元素之誅。所謂自壞長城也。明之不振。有以夫。

南還別陳翼所總戎

慷慨同仇日。閒關百戰時。功高明主眷。心苦後人知。麋鹿還山使。麒麟繪閣宜。去留都莫訝。秋草正離離。

丁乾學一首

乾學字天行宛平人萬歷己未進士改庶吉士授檢討以忤閹奪官崇禎初贈侍讀學士有擁膝齋集比樂堂稿

閨怨

盧姬何事最縈懷人去遼西不易回獨倚小樓弄長笛聲聲吹出玉關來

高道素一首

道素初名斗光字明水一字如晦更字玄期嘉興人萬歷己未進士除工部主事歷員外郎中以督造桂府殿傾論死有景玄堂詩集

諍志居詩話水部才思筆人不以格律自拘古今詩皆超詣五律尤爲長城當桂藩分建奉命將作南方卑溼薄櫨甫新大磗亟事丹堊水部力爭不得既而雷震柱傾吏譖周內遂罹顯戮聞者寃之

湘江道中寄內

輕帆短楫泝煙波疊渚迴洲奈遠何一路客程吟裏見十分秋色病中過江通漢水晴偏綠山入湘雲晚更多何處思鄉腸欲斷楚妃祠下聽吳歌

吳麟瑞一首

麟瑞字思玉海鹽人萬歷己未進士除常州推官徵授南禮部主事改吏部歷員外郎中出爲湖

廣參政、歷江西副使、按察使、布政使、以右僉都御史巡撫偏沅、有哀鴻、秋蟀等集。

宿弘覺寺

晝登白雲梯、夜就雲中宿、歸雲隨孤僧、冉冉入岩谷、江月遲未上、清譚屢呼燭、一枕足幽夢、滴露響秋竹、

姚希孟二首

希孟字孟長、長洲人、萬歷己未進士、改庶吉士、授檢討、忤璫被論、削籍、崇禎初、起贊善、歷庶子、進詹事、以忤溫體仁降少詹事、掌南翰林院、有公槐、響玉、棘門、沆漉、秋旻、文遠、循滄、丹黃、薇天、松瘦、伽陵、風吟等集。

黃道周漳浦集、嘉靖初年、議臣驚起、文章之道、散於曹僚、王弇洲、李歷下爲之歸墟、萬歷初年、閣臣驚起、文章之道、復歸詞林、李大泌、姚吳門爲之歸墟、先後數十載間、軌軌相差、而堂室一致、予不及事大泌、雅交於吳門、天下所爲震起雲蒸、嶽舉海噓、文行宗表、無有先於吳門者矣、先生安步措辭、宏擊亮質、韓蒲州見之而有王佐之稱、劉南昌因之而有人龍之歎、何香山几、以遜齊年、文滿持陶陶而要永夕、至其位不及於文、何年不登於王、李、麟、姜、鳳、傷、天下共歎、

啓禎兩朝遺詩、先生詩、春容雅麗、有館閣風度、

靜志居詩話、逆案將定、思陵發建祠稱頌諸流、申命內閣詳閱、限以數日、確議來奏、輔臣難之、求助於文毅、文毅中夜不寐、周步堂中、其客周生進而問公、公語之、故生日、某於七年中、逆知魏、客之必敗、以詔附諸臣、分別其罪、自謂無遁情、公取而權衡之、可乎、公覽之、擊節稱善、次日、進於輔臣、皆以爲當據之入奏、生、吳江人、或曰、秀才永年、安期、或曰、永年之弟、永言、安仁也、爰書既定、天下咸服、凌遲處死者二人、擬斬者二十五人、充軍者十一人、贖徒一百三十一人、冠帶閒住者四十四人、雖有漏網、

然吞舟之魚鮮矣。

講筵口號二首

正字班隨綈几旁。濃濡湘管辨鍾王。而今宸翰無勞正。只請綸扉進請章。
俯躬翔步磬便旋。憑几探書送御前。手把牙籤分句讀。不知身在五雲邊。

雷躍龍一首

躍龍、字伯鱗。新興州人。萬曆己未進士。累官禮部尙書。

玉溪雜興

一望菰蒲楊柳。萬家煙雨樓臺。江南何處相近。桃葉渡口歸來。

明詩紀事卷二十四

庚籤

張懋忠二十首

懋忠字聖標。一字念堂。肥鄉人。以廕敘錦衣衛官。中萬曆己丑武進士。累官都督。有元聲。式道。城陰。河東。疾除。樸石。旅食。庚草。雪談。索米。艾燮。北道。交變。益睡。放言。楚音。皇仁。存柳等集。

方震孺報恩錄。張念堂都督。余舞象時。從朱汝修扇頭。見其送李小侯詩。中有海畔春雲溼畫旗之句。以爲七子中人也。頃乃於獄中識面。奇絕。

田按。聖標爲大司馬學顏文孫。以廕敘錦衣衛起家。旋中武進士。儒雅好文。與俞養長。梅萬金。楊伯翼輩往還。天啓中。魏忠賢矯旨杖工部郎萬蠟。聖標監杖。羣閹蹴踏燼。聖標止之曰。留人受杖。以是忤忠賢。尋攜拾他事。下聖標於獄。崇禎初。得釋。聖標詩學少陵。五言清挺。明武將稱詩者。郭登。張元凱外。得聖標而三。選家多未採錄。余得聖標客乘二十八卷。亟登之。

張良

吾子任國讎。蕩產如棄屣。盛氣試狙擊。授圯乃長跪。功成非本志。託辭不強仕。令譽上雲衢。布衣誠足矣。

王通

明詩紀事 庚籤 卷二十四

五湖雲擾後。云誰究絕學。仲淹負道資。識力一何卓。祇多千時策。議者半純駁。中說擬宣尼。濁世此先覺。
司馬光

溫公振正學。一洗熙豐弊。出民水火中。庶乎臻康濟。未能竟厥施。遐邇爲雪涕。小人如蔓草。因春上塔砌。
柳宗元

可愛柳柳州。構思最清核。一語不輕措。烜烜光簡冊。韓質而柳文。柳蹶而韓適。三復龍城篇。依附慎所擇。
火酋寇臨洮。襲殺裨將李聯芳。輩警報狎至。

欲語秋陲事。洮州不忍聞。淒風吹斷角。殘燒斂斜曛。白馬安西將。朱旗太乙軍。封侯何足齒。戰死卽殊勛。
送王問伯

長安花爛漫。彩筆不勝酬。奕世青緗富。禰心白社投。雲霄懸仕版。雨雪命仙舟。春日山園臥。王珣業虎邱。
懷叔氏靈長時臥病里中

一訊平干使。憂心急暮春。分攜朱序變。阻絕白雲重。消渴同司馬。相關有仲容。月林清不寐。意外入晨鐘。
再懷叔氏

豁達如君少。悠悠臥滄南。誅茅更蔣詡。苦思一柅譚。雁字雲空白。霜楓日就酣。夜眠頻起坐。情極好誰堪。
歸客

蕭蕭遠歸客。攘攘暮秋情。骨肉相將使。河山歷覽明。路長宵始食。鄉近雨還行。看取岩棲穩。能無作此生。

贈趙藩蘇右史

家世雄曹濮。髯公倜儻聞。右史鬚長及腹。自稱岱髯。恩波吳季重。辭藻沈休文。貧更延賓客。閒宜嗜典墳。勝遊過帝子。

銅雀繪春雲。右史善丹青。

雨

磴折孤亭出。村迴碧澗交。弱雲常在壁。狂燕不歸巢。晴望頻虛擬。秋懷未易拋。緘書驚候雁。天遠念同胞。

送唐祈遠孝廉

春黯花無幸。邊沙日日風。客情當送遠。時事只書空。快泛春江綠。驚傳塞火紅。安危言路重。迴首念乘驄。

祈遠美承先生仲子。

嘉陽謁恆嶽廟同戴使君

蕭颯秋風大陸哀。使君同病且徘徊。側身迢遞王程遠。刺眼青葱嶽色來。護石雲霞更旦暮。集靈宮闕鬱崔巍。何時北谷重搔首。恆水盈盈杖底迴。

白溝河

浩浩清沙散夕暉。孤舟欲渡界河微。無端烽火論前代。滿目燕雲指近畿。玉座天南終自遠。翠華漠北竟

難歸。不堪細數康炎事。雪涕縱橫塞草腓。

聞霽

久客何心挈酒壺。深山六月長藤蕪。透迤關道開三晉。次第朋簪問五湖。晴際晚峯雲日逗。雨餘新水郭門孤。年來留滯侵蓬鬢。落落平生愧遠圖。

沈廷玉招飲新第

城隅隙地起重臺。臺上丹樓逼漢開。愛客壺觴分日至。應時花石蔽江來。賦歸自覺趨朝懶。選勝人傳賭墅迴。明發相思在何處。大河秋色雁鴻哀。

聞笛

山椒返照入雲黃。一片愁心古戍旁。橫笛莫吹楊柳曲。只今戎馬暗西羌。

容舸三首

欸乃初聞病半消。雲林東下莽蕭蕭。月斜人散蒹葭冷。夢在平于第五橋。穆家口西煙水鄉。柳疊蘆艇接微茫。輞川遮莫詩如畫。占斷漁村不姓王。吳歛初歇發齊謳。野月西沈入柁樓。輕撥琵琶四絃急。不知誰是白江州。

劉綈一首

縉，字省吾，南昌人。用廕爲指揮使。遷雲南迤東守備。進遊擊將軍。以平緬功擢副總兵。兵諫，謫遊擊。遷廣西參將。移四川，擢總兵。以事降副總兵。尋充禦倭總兵官。進都督同知。改四川。錄平播功。進左都督。召爲左府僉書。與杜松、李如柏、馬林四路出師。兵敗戰死。天啓初，贈少保。

師駐虎牢

東逐西馳歲月深，凱旋駐馬漫開襟。三巴戰壘龍泉出，六月烽煙雁字沈。關塞自憐餘白髮，廟堂誰爲暴丹心。良弓烏盡應無用，緩整漁竿釣海濔。

鄧子龍二首

子龍，字武橋，豐城人。應募累功授廣東把總。遷銅鼓石守備。歷浙江都司。擢參將。進副總兵。尋被劾歸。朝鮮用師，起原官戰死。贈都督僉事。有橫戈集一卷。

王士禛皇華紀聞：子龍隆萬間名將，援朝鮮戰死。平生善書，喜吟咏，可與戚繼光、陳第並傳。

登飛山

南來倚劍上岩臺，滿眼烽煙坐裏消。西望六百八十穴，我欲一埽歸天朝。

金雞橋

短甲輕兵入武鄉，西風吹首鐵衣涼。大幽山下無情水，笑問金雞舊戰場。

喬一琦一首

一琦字伯圭上海人萬曆癸酉武舉人以薦授遼東廣甯衛守備進鎮江遊擊隸都督劉綎軍兵敗投崖死天啓初贈都督僉事

松風餘韻伯圭天才絕世於書無所不窺所爲詩賦古文詞皆警奇超軼尤長書法多龍蛇飛動之勢

長干行

聞說瞿塘水風濤八月多郎舟歸未得音信近如何

張可大一首

可大字觀甫其先孝感人世襲南京羽林左衛千戶中萬曆辛丑武進士授建昌守備歷浙江都司劉河遊擊遷廣東高肇參將改浙江舟山加副總兵擢都督僉事僉書南京右府事出爲登萊總兵官以勤王功進都督同知再進右都督孔有德兵變登州城陷投繯死贈特進榮祿大夫太子少傅諡莊節有真州婁江電白舟山白下牟子駛雪齋等集

平水閘碑銘有序

舟山水閘傾圯久矣余於丁巳歲捐俸而新之數載以來土膏滋而斥鹵變洪濤抑而魚鼈甯萬頃皆同一方底定民享樂成式歌且舞用紀成事系之以銘

奕奕舟山。東海之陽。溝洫弗治。同於漏觴。我思古人。能化瀉鹵。趙國在前。白渠繼武。爰出囊金。厥工鳩只。既築既堅。如墉如砥。蓬萊之野。安期之鄉。原田膺膺。流水湯湯。彼磬有時。繕修勿替。託管陳詞。敢告津吏。

杜文煥五首

文煥字峻武。延安衛人。原籍崑山。由廕敍歷延綏遊擊將軍。累進參將。副總兵。擢延綏總兵官。坐罪戍邊。起甯夏總兵官。改鎮甯遠。進右都督。特命提督山陝臨甯總兵。剿撫流寇。坐罪下獄。用薦起故官。尋謝歸。闖賊逼畿輔。加太子太保。統兵入援。福王立南都。以原官僉書中府。提督京城捕務。進少保。少師。兼太子太師。國變後。歸原籍崑山卒。有太霞洞集三十二卷。

棗林雜俎。宜興再召都督杜文煥。日章趨其家告曰。相國聞命例疏辭。而今事亟。寇敵交訌。勢不兩顧。其關繫在松山之師。稍有蹉跌。大事去矣。相國疏辭。即宜附密奏。撤師松山。回守關門。蓄力併銳。猶可支也。若待相國入朝而圖之。度紆程三四月。則松山鑿矣。關門豈能獨禦哉。上待相國厚言之必聽。幸速爲計。宜興漫應之。殊不置意。及入朝。東師果潰。而九塞之精銳盡矣。都督以語吳駿公。深川追歎。日章博通經史。二氏善。五七言律。

田按。萬曆中葉以後。專閫將帥。以能詩名者。有杜文煥。蕭如薰。史稱隆慶後。款市既成。烽燧少警。蓋下視鎮帥爲外府。山人雜流。乞朝士尺牘往者。無不鑿所欲。蕭鎮威繼光。有能詩名。尤好延文士。傾貲結納。取足軍府。如薰亦能詩。士趨之若鶩。賓座常滿。妻楊氏。繼妻南氏。皆貴家女。至脫髻珥供客。猶不給。軍中患苦之。如薰莫能卻也。一時風會所尚。諸邊物力爲耗。識者歎焉。文煥詩尙初唐。其序初唐詩云。約句準編。傑如綺繡。發言揚韻。妙合宮商。此文章之變。魯詩道之妙。端也太霞洞集。五言近體。頗有藻韻。時與薛千仞。何无咎。俞養長。林茂之。諸人倡和。不如蕭之好事也。蕭有杞子珊。胡顯。關山翡翠峯之句。爲人傳誦。附

見於此。

和陳守相元夜之作

銅鑪不警夜。寶馬競嬉遊。鼓角驕胡舞。笙簧豔越謳。尊傾千日酒。燈簇萬星毬。藉甚昇平樂。鼇峯曉未收。

明妃祠

好事者誰子。明妃亦有祠。玉顏如昔否。青塚至今疑。只合誅婁敬。何須殺畫師。啁啾林雀啞。如和道中詞。

過天甯寺訪朗公禪師步望之韻

結侶參禪榻。聞師轉法華。金輪迴地軸。碧落散天花。樹古推僧臘。燈明續慧霞。機鋒方妙合。莫訝夕陽斜。

再登虎邱慈公留悟石軒酌新茗

重遊虎邱寺。步步踏林花。鐘梵香雲地。旗槍穀雨茶。禪心參白石。輒語接丹霞。簫鼓催人劇。紅塵去路賒。

毛女峯

秦皇空好道。白首未通玄。毛女緣何事。紅顏便得仙。

安國賢一首

國賢字養卿。福州左衛。應襲指揮使。有轂音。白雪二集。

送徐與公之金陵

江皋草色別魂銷。才子南征訪六朝。河上遊人青雀舫。樓頭歌妓紫鸞簫。交遊到處多相識。文藻同聲總可招。臨發不堪懷舊侶。故園松菊待逍遙。

邱坦一首

坦字長孺。麻城人。萬曆中武進士。官參將。有度遼集。楚邱集。南北遊草。

無題

亂山深處且停驂。村酒雖渾亦共酣。日落棠梨花樹下。一聲布穀似江南。

明詩紀事卷二十五

庚籤

陳昂七首

昂字爾瞻。一字雲仲。莆田人。世稱白雲先生。有白雲集七卷。

鍾惺秀軒集。白雲先生陳昂者。莆田黃石街人也。自隱於詩。獨與馬公子用昭善。先生詩所謂自天亡我友者。卽其人也。莆田中倭城且破。先生領妻子奔豫章。織草屨爲日不給。繼之以下。泛彭蠡。憩匡廬山。觀陶令之蹟。皆有詩。已入楚。由江陵入蜀。附僧舟備鑿以往。至亦輒備於僧。遂偏歷三峽。劍門之勝。登峨眉焉。所備僧輒死。反自蜀。寓江陵。松滋。公安。巴陵諸處。至金陵。姚太守稍客之。給居食。久之。姚太守亦死。無所依。賣卜秦淮。或自榜片紙於扉。爲人備作詩文。而閩人林古度與其兄懋者。過其門。見所榜紙。突入其室。問知爲莆田人。頗述其平生。一扉之內。席牀缶竈。敗紙退筆。錯處其中。檢其詩誦之。是時古度雖年少。頗曉其大意。稱其一詩。輒反面向壁。流涕嗚咽。至於失聲。其後每過門。輒袖餅餌食之。輒喜。復出其詩。泣如前。居數年。竟窮以死。其子倉皇出覓棺衣。昇之中野。古度兄弟急走索其集。得先生手書五言今體一帙。其自序略云。昂壯夫時。尤嗜五言。第家貧無多古書。得王右丞卽誦讀。右丞得杜工部卽誦讀。工部聞取其所中規中矩者。時或一周旋之。又時或一折旋之。含筆腐毫。研精殫思。今觀其五言律七百首。則先生所學所得。實錄實際。盡此數言矣。論曰。明自有詩。而二三君子者自有其明詩。何隘也。畫地爲限不得入。自矜紳士大夫詩的。有本末者。非其所交遊品目。不使得見於世者多矣。況老賤晦辱之尤如陳昂者乎。近有徐渭。宋登春。皆以窮而顯晦於詩。詩皆遜昂。然未有如昂之窮者也。予嘗默思公穢屢賣卜。備鑿備書時。

胸中皆作何想。其視世人紛紛籍籍。過乎其前者。眼中皆以爲何物。求其意象所在而不得。吾友張慎言曰。自今入市門。見賣菜傭。皆宜物色之。恐有如白雲先生其人者。甚矣有激乎其言之也。

馬之駿妙遠堂集。有明以來。詩之窮無如先生者。飢寒喪亂。窘辱悲苦。種種皆備。有人之所未有。而情性足以副之。吾無以覩先生。獨見其手鈔原本。波畫枯硬。如燥枝斷蚓。而綴補篇彙。無一字苟則。先生之挫名憤世。所自託於不可知之人者。爲計且遠也。

田按。白雲集孤迥清峭。稱其爲人。袁中郎識徐青藤。鍾伯敬推陳白雲。可謂孤情絕照。

步西林寺外

僧家論真素。爭羨永禪師。翠谷一以憩。清風耿所思。菴荒虎迹出。塔敗鶴巢危。惆悵西林路。藤蘿礙接離。

尋玉桂山避暑

燒春未易沾。酷暑應思避。散髮入幽林。解衣挂空翠。花間鳥語添。山頂鐘聲墜。消受冰谿風。徐徐涼夢寐。

與許處士同過故空公山院

昔與許玄度。同心事法師。一朝解蛻後。滿地落花時。苦路從風埽。松門爲雨欹。不堪舊行者。相送出山籬。

甘露寺步秋月潭夜深歸峯頂半峯菴僧房

秋月潭將暝。扶筇安適從。偶隨歸嶺鳥。遂遇隔谿鐘。徑密強千轉。崖高過百重。上方更盡到。漸漸白雲封。

夜泊

此地知何處。扁舟繫小亭。孤村低臥水。野屋大於瓶。卻少犁鋤樂。尙餘鋒鏑腥。白頭萬里客。仰愧老人星。

長干與二三小兒散步
小兒相聚樂。喧共野禽喧。采藻臨溪澗。看碑到寺門。尙寒三月景。微霽六朝村。帶有慵書物。花陰買綠樽。

步丁堰
不負生平癖。山嘉景遂嘉。澗行逢白石。谿渡拾青霞。犬吠三竿日。鶯嘯萬樹花。此間如卜隱。先近賣漿家。

吳鼎芳十二首

鼎芳字凝父。吳人有披襟倡和集。

列朝詩集。凝父爲詩。蕭閒簡遠。有出塵之致。與范東生刻意宗唐。刊落凡近。有披襟倡和集行世。嘗與東生及予游茗溪。泛碧瀨湖。入夾山漾。往返二十日。風清月白。苦吟清嘯。僅得七言絕句一首。其矜重自愛如此。後羅染從釋氏法。爲高僧。以終。凝父與葛震甫稱詩於兩洞庭。皆能破除俗調。自豎眉目。震甫晚自信不篤。頗折入於鍾譚。而凝父享亭落落。迥然塵埃之外。震甫自負才大。以爲入佛入窻。無所不可。竟不免墮修羅藕絲中。凝父修聲聞辟支果。雖復根器小劣。後五百年。終不落野狐外道也。

田按。凝父詩。刻露清新。明詩之晚秀者。

柳浪溪

山。青。秋。雨。後。人。坐。秋。風。裏。平。沙。下。鷺。鷗。簌。簌。動。蘆。葦。夜。半。明。月。光。漁。舟。弄。空。水。

靈源寺夜期朱雲從不至

美人雲壑期。禪宮夜無閉。林光忽如拭。碧月生雨霽。空色映潭心。天香出巖際。山童汲澗響。野鶴時一唳。幽意寄晨鐘。遙遙自相遞。

泊北固山下

夕陽江色遠。艤棹潮初退。獨客吟清秋。沙鷗冷相對。水氣上城根。風聲隱巖背。漁舟載煙火。撐入菱菱內。開戶

開戶見清旭。茲晨欣偃息。前山夜來雨。蒼翠猶滴瀝。松際待歸雲。花邊跂幽石。時有會心處。嘯鳥破孤寂。虎山菴答蔣十

偶坐已夕照。徘徊夜復深。西岑見新月。墮露聞松林。覺有幽人來。隔窗動微吟。

歸湖上

西風吹箬笠。無恙舊江天。白鳥飛破水。青山移近船。晚晴楓葉外。秋冷荻花邊。泊處堪遙指。柴門生野煙。寄趙凡夫

十里寒山路。香風正采茶。偶隨樵客去。一到隱君家。細語生清月。閒心託片霞。別來湖水闊。秋色上蘋花。向夕

日落荒塍外。天清古渡頭。丹楓飛一葉。秋色在漁舟。

月夜山中

山空春不知。雪霽夜猶冷。月上寺門開。一犬吠松影。

西湖竹枝詞

家家水葬綠楊隄。寒食寒煙奈鳥噓。白骨浪淘誰是主。年年花落段橋西。

弔蘇小小

塵消豔粉問遺碑。松柏西陵起暮思。留得蓮衣秋水上。半陂寒影弔鸕鷀。

送景周王孫還豫章

採菱歌斷雁初聞。一幅離帆趁夕曛。前路贈君秋色好。大江煙月小孤雲。

葛一龍十一首

一龍字震甫。吳人。國子生。入貲除雲南布政司理問。有尺木齋、修竹編、筑語等集。

列朝詩集震甫入貲爲郎。久次選人。困於無資地。吳橋范質公典選。識其名。異而問之。曰。得非吳下詩人葛震甫。人呼爲葛髯者耶。乃得就選。除雲南布政司理問。正嘉之際。洞庭蔡九遠爲清綺之詞。頗自異於文。祝諸賢。以爲獨絕。震甫聞而說之。刊落翦刻。欲追配於百年之上。已而年漸長。筆漸放。楚人譚友夏之流。相與尊奉之。浸淫徵逐。時時降爲楚調。可爲一喟也。

田按。震甫矜奇。尚不至如九遠之誕。詩如斷港絕潢。時逢佳境。

送范東生之滇南

相念亦已苦。卻於離處逢。江聲撼獨往。客路趣殘冬。天盡山忽起。瘴開雲復重。館人蠻語接。計口給新春。喜聖僕至。

秋陰

爲約每無憑。今宵喜得朋。片雲波上宅。殘雨夢中燈。春冷花如病。齋清客當僧。看山不待霽。把臂入煙層。西爽忽自晦。不知朝與昏。井上半殘葉。湖中無遠村。桔槔幾日罷。農牧相過存。雲淡一如水。野風吹到門。秋晚石湖作。

舟泊處憶季昌稱孫同覺公疑父

豁然十數里。一帆生雨西。蘋花如欲雨。日暮不堪攜。漁戶徧新郭。僧田帶越溪。依依爲別處。橋畔柳陰低。野泊原無定。依稀識舊曾。店開煙市柳。船纜月溪藤。細雨生春漲。殘尊了夜燈。往時同泛客。誰似一瓢僧。酬劉師蕃過訪。

懷王永啓先生

有客懽呼入。山童識舊知。相逢還自憶。爲別幾經時。露白酒香早。橘黃書到遲。僑居隔林巷。一過一如期。城均萬綠隱。樓紅滑滑鶯聲細。雨中養療儘堪銷。暇日歸心不待起。秋風茶香東道須名柄。山水西冷得。

寓公過嶺梅花開一徧。喜無他訊累書空。

雨中九日賦得徧插茱萸少一人

蕭蕭颯颯動秋菰。風雨登臨事有無。佳節又來催綠酒。故人相問隔黃壚。氣昏小閣僧鐘冷。影斷江門客雁孤。滿著茱萸不堪把。只看霜色上頭顱。

宿吳門

市聲喧盡響風湍。篝火青青照夜寒。歸到江城猶是客。兩山殘雪夢中看。

舟夜憶梅

白日山中三百樹。一樹一杯曾遍看。今夜孤舟練川雨。瓦瓶篝火折枝寒。

立春前一日懷山中

四日新年一日春。新春還是舊年人。山中有屋何常住。逢著梅花便結鄰。

范汭八首

汭字東生。烏程人。有范東生集四卷。

露書。范東生詩。如楊柳當風。孺孺有態。

列朝詩集。東生徙居吳門。鑿池種竹。攻苦讀書。沈酣唐人之詩。諷詠其清詞麗句。苦吟精思。寢食盡廢。引洞庭吳凝父爲同調。

務盡刊甘醴。厚獻酬傭僱之詞。視餘子蔑如也。輯全唐詩千餘卷。胠手瘳足。迄無甯夕。咯血以卒。年四十有四。凝父手定其集。而爲之序。曰。方東生苦吟時。收視返聽。馳情結思。不傍古。不緣今。不拘律。不適偶。一字不妥。寸心幾嘔。自簡鍊以至純粹。若繡錦未組。不異恆絲。及綵綯之具。鍼巧之飾。文章炫然。然後知爲神於法者也。

靜志居詩話。東生詩才。嫻雅如靈犀結佩。可以辟塵。方之孟揚。尤兆諸君。覺尤騰拔。
田按。東生詩。琢句練字。無浮音。無佻態。於七子未習。袁鍾流派。均無所染。

訪趙凡夫廬舍

無路覓君去。亂峯雲若屯。嵌空巢樹杪。鑿石沼山根。古帖從兒搨。新詩與姊論。閒門臨拱木。蒼翠自朝昏。
過武陵懷龍觀察

去指黔鄉近。回瞻楚甸遙。郡門臨白浪。驛路疊青霄。積雨寒初霽。長煙溼未消。征鞍停不可。無賴是今朝。
望茅山殘雪

華陽望不極。縷縷晴煙生。斜日半山雪。照人巾烏清。漸融仍合沓。近晦邈空明。強載筇輿去。搖搖人外情。
贈楊孝父

清時有隱者。自汲還自耘。翳然茅屋上。一片堯時雲。

滇中詞三首

秀海海邊葭。秋滇池池上雲悠悠。人心恰似此中水。一道南流一北流。

鴛鴦浦綠水如苔。鏡裏人家向背開。五月鸞僮劒雲去。三冬熨女擔花來。迤西之西天一涯。四時長有三春花。青帘颭處客沽酒。五歲女郎能數肥。

西家

蛾眉不掃鬢雲斜。含怨含情未破瓜。背倚曲闌花一樹。春光多少屬西家。

李能茂十首

能茂字允達。東陽人。知府學道子。有卑邇亭稿。武林倡和集。友疴山房集。

弇州山人續稿。允達詩以才氣勝。五七言古尤更奇絕。若五言得意時。翩翩建安矣。

吳之器藝書。能茂詩。七言如千花南浦吳娃醉。獨樹西陵越客過。平林夜火漁舟出。極浦秋聲雁陣移。五言如駿骨時名重。羊腸世路艱雨勢滄江動。秋陰大麓長。路通秦望北。山斷禹陵西。皆雄健有作者聲。

田按。允達服膺濟南。弇州專講氣格。而才力自健。有拔劍悲歌之氣。年三十餘而卒。可惜也。

再寄胡元瑞

落日下空山。狐兔交行迹。陰風動地來。荒草蒙昏色。中原幾萬里。莽蒼不可識。汗血紫驂駟。矯捷過飛翼。遭時甫多艱。躑躅原野側。天雞三四噓。樽桑破微碧。長往豈復羈。時來難再息。朝發東海墟。暮憩崑崙澤。貽斯惟武

蘭蕙揚芬芳。託根污泥塗。生質本自潔。內貞外不濡。寄心在浩蕩。叢累強支吾。芥草蔓華階。雨露滋榮敷。

貴賤非所較。徒以信區區。物理率互虧。怨尤以爲愚。造化豈異培。久近意固殊。淹沒百歲身。千載常斯須。

俠客篇贈萬生

俠骨峻嶒雙眼碧。結束翩翩自顧惜。生好橫行不可當。片語風波坐相索。酒間絲竹調未終。擁妓忽過章臺中。豪華厭據七貴席。揮霍不數五陵雄。吳鉤灼爍霜紋錯。披髮悲歌意氣作。彎弓白日獵燕山。走馬清秋戲宛洛。回看世事但悠悠。黃金如山不復留。食魚偏輕彈鋏士。匕首羞藉將軍頭。路旁冠蓋紛若水。往來結客聲名起。當筵肝膽真一擲。七尺報恩向誰死。

養疴

數身成百折。指口定三緘。峻骨時名重。羊腸世路艱。病愁生白髮。窮淚落青山。別作生涯計。茅廬傍佛巖。

雨夜

朔雲猶浩浩。苦雨竟漫漫。急峽魚龍鬪。平沙雁鷺團。林聲先暮澀。嵐氣雜秋寒。惰骨兼沈病。飛蓬久不冠。

贈盧將軍洪秋

寶匣飛霜玉鹿盧。雄心曾復按邊圖。趨朝曉露侵金甲。入幕晴絲點繡弧。萬里鯨波消郡國。九關虎隊翼神都。豈應好武將軍事。爲奏饒歌出塞無。

酬李彥宏見和覺明寺寒夜之作

南山亦有被裘翁。黯淡清秋句最工。垂老名從高隱得。和歌身在酒狂中。逼除暮雪深齋外。回首寒雲大澤通。若道憐才誰解意。可知憔悴更相同。

從軍行三首

繞陣旌旂聲似雷。黃雲一騎射雕回。古來枉費孫吳法。別有將軍破虜才。材官都護盡橫戈。天子修邊按劍過。直北風塵衰草色。一時金鼓下交河。玉關西去莽蒼開。鐵甲雕弓陣陣排。戰罷不知歸路遠。霜天齊上李陵臺。

吳兆十首

兆字非熊。休甯人。有金陵、游閩、豫章、武林、姑蘇、東歸、廣陵、溪上、南遊等稿。

曹學佺石倉集。非熊古詩學謝靈運。沿及盧騷。近體類岑嘉州。字句尙覺實。余愛其未落韻時。散吟如援聲。令人淒絕。筆精。非熊能詩。而質日甚。游江湖十年。落魄不能爲歸計。有詩云。谷口鐘聲度嶺微。嶺頭風氣散朝暉。江山處處通鄉路。只是遊人不得歸。可謂深於貧者矣。

列朝詩集。非熊少警敏。喜爲傳奇詞曲。游少年場。推爲渠帥。萬曆中。遊金陵。留連曲中。與新城鄭應尼。作白練裙雜劇。譏嘲馬湘蘭。青樓人皆指目。有樊川輕薄之名。已而自悔。改弦爲歌詩。撫倣初唐。作秦淮鬪草篇。新安詩派。尸祝太函。肥臆相尙。不解爲何語。臧晉叔。曹能始。見而擊節。遂流傳都下。而能始於非熊尤相得。偕遊閩中諸山。及武夷。匡廬。九華。復還白下。其爲人率真自放。好窮山林花鳥之致。捉鼻苦吟。貴游雜坐。竟日調詠。不知有人。久之。別能始歸新安。作東歸詩。已而復出遊。訪故人於

嶺南客死新會。非熊詩評者謂其有二種。早年穠華婉至。中歲清真瀟灑。大要沈酣於六朝。唐人而傳之以性情。幹之以風調。工力並深。興象兼會。雖與能始同調。翦刻鏘鏘。意新理慤。能始似有間焉。能始序其詩。以爲古詩學靈運。沿及虛駱。近體學岑嘉州。字句少實。固宜其知之而未盡也。新安閔景賢采輯明朝布衣詩。推著上吳允兆爲中興布衣之冠。以予論之。親炙則孟揚。遜聽則非熊。庶無愧於此評。要當與千古共定之耳。

蠶尾續文。非熊五言。其源出於謝宣城。何水部。意得處時近之。七言自秦淮鬪草篇而外。頗無可采。靜志居詩話。非熊清而能麗。綺而不靡。最見賞於石倉。其風調亦相儷。

田按。非熊以秦淮鬪草篇得名。萬曆末。詩家長篇。如徐興公玉圭行。鄭翰卿牛生行。林初文蛾眉篇。徐惟和帝京篇。俱有盛名。要不如非熊此篇爲最。牧齋推程孟陽與非熊爲明一朝布衣之冠。阮亭亦無異議。康熙中。汪洪度合二人詩刻之爲新安二布衣集。余謂非熊尙非孟陽敵。若謂二人爲明布衣之冠。更當置孫太初。謝茂秦輩於何地。無怪乎啓後人之訾議也。

春日留別柳陳兩諸社友

金陵風雅地。新亭送別所。飲餞悽已陳。江湄舟尙阻。雲樹含遠思。春山起別緒。征人戀故歡。舟子逐前侶。雲黯層城深。風轉孤帆舉。草積白鷺洲。花落梅根渚。嘉月子眷余。芳訊吾希汝。落日川之曲。悵望澹無語。

秦淮鬪草篇

樂遊苑內花初開。結綺樓前春早來。春色染山還染水。春光銜柳又銜梅。此時芳草萋萋長。秦淮女兒多閒想。閒想玉閨間。羅衣正試單。芳艸入戶吹帷動。巧鳥當窗攪夢殘。因嬌麗日長千道。相戲相耍鬪芳草。芳草初齊。茸茸沒馬蹏。芳草遠如霧。望望迷人步。將綠將黃不辨名。和煙和霧那知數。鳳凰臺上舊時

基。燕雀湖邊當日路。結伴踏春春可憐。花氣衣香渾作煙。誰分遲遲獨落後。誰能采采不爭前。嬋嬋桑間路。佳期何暇顧。悠悠秦淮水。遠道不遑思。空生謝客西堂夢。徒怨湘娥南浦離。未鳴鷓鴣先愁歇。乍囀倉庚正及時。正及時。愁先歇。密取畏人窺。疾行妨薜滑。入深翠溼衣。緣高香襲襪。寧若將何爲。束芻欲待誰。茜紅猶勝頰。黃白卻慙肌。薜荔裁衣安可被。菖蒲結帶豈堪垂。盈匊盈襜羅衆芳。蛾飛蝶繞滿衣裳。蘭皋借作爭衡地。蕙畹翻爲角敵場。分行花隊逐。對壘葉旗張。花花非一色。葉葉兩相當。君有麻與泉。妾有葛與藟。君有蕭與艾。妾有蘅與芷。君有合歡枝。妾有相思子。君有拔心生。妾有斷腸死。羸歸若个中。輸落阿誰裏。相向無言轉自愁。芳垆過雨忽疑秋。別本辭根何倚託。傾青委綠滿郊邱。雖殘已受妍心惜。縱賤曾經纖手摘。芍藥多情且自留。蘼蕪有恨從教擲。人生寵愛幾能終。人心安能採時同。繁愁結念尋歸逕。接珮連裙趁晚風。情知朽腐隨泥滓。會化深螢入幕中。

真州江口望金陵

遠望何氤氳。棹歌風靜聞。情含極浦樹。魂逐渡江雲。草短鵝能數。沙乾鷗可羣。河橋將別酒。猶憶把羅裙。

正月十三夜同王若觀伎用來字

倡樓羅薦開。急管促行杯。花氣衣香奪。蟾光燭燄回。舞飛雕砌雪。歌落綺窗梅。不盡橫陳態。猶期三五來。

金陵客舍同江永叔吳建伯作時建伯臥病

旅館夜沈沈。涼風吹客心。殘燈垣樹影。微雨禁鐘音。以子病吟苦。兼余秋思深。離家纔幾日。江郭又聞砧。

送陳大理德遠奉使還端州

離亭別酒雁嘯嘯。星使何年帝里逢。歸路馬寒廬岳雪。驛樓人夢秣陵鐘。城臨錦水方迎櫂。家在荷山不廢農。惟有禰生狂似舊。嗟君去後復誰容。

無題

花暗橫塘有路通。斷腸箴送畫橋風。鴛鴦祇宿雙生樹。鸞鳳那棲半死桐。楚峽雲歸芳夢散。秦淮月在故樓空。別來聞說新粧束。學得蛾眉幾樣工。

留別朱道安徵信伯仲遊閩

章門一別欲何從。閩越溪山路幾重。麋鹿難馴隨野性。水雲無定任遊蹤。海晴峯出窺雙鬢。雨後灘高過九龍。徒有離魂繞江樹。東湖明月上藍鐘。

西湖子夜歌

南峯望北峯。如歡又如儂。何當雲霧合。兩峯作一重。

登天臺峯

蘿磴松崖幾百層。猿攀魚貫始能登。昨朝望處今宵歇。巖下雲埋入定僧。

楊承鯤十二首

承鯤字伯翼。鄞人。國子監生。有西清閣詩草。

屠隆白榆集讀伯翼近作。如吸日月之華。秀爽欲絕。僕纔觀海內作者。語工者格卑。氣勁者味短。尙纖儻則乏風骨。吐胸臆則傷體裁。作如牛毛。合如麀角。每得伯翼詩。便驚異寶。

甬上書齋集。伯翼年十五。六爲諸生。沈嘉則一見奇之。曰。今日建五丈旗。當以楊生居吾前。所謂獬豸難與爭鋒也。因作戲贈楊伯翼詩。呼爲德祖。以是有重名。嘗以年家子謁王弇州。見其行卷。絕驚賞。伯翼默然竟別去。退與人言。王先生博大心慈。客持片楮求譽。輒津津不休。卽孺儒賈豎。人人謂王先生知己。僕尙容廁其間耶。伯翼文章高妙。詩于五言律更爲長城。

靜志居詩話。伯翼論文。謂先民有作。穀率存焉。不入穀率。雖工無當也。論詩厭博王李。謂暗中摸索。知爲今人之詩。惟誦之不類今人。而不蹈古人之迹。斯善矣。譬如學書然。方其心摹手追。必盡肖古人。及其成也。不必盡肖乃成家。可稱知言者也。

田按。王元美贈伯翼詩云。愛讀西清草。新詩果自清。吐來珠照夜。琢就玉連城。禮樂從先進。文章畏後生。亦知楊德祖。不忝漢簪纓。推挹甚至。萬曆中葉以後。世以王李爲口實。若伯翼者。庶可以議王李。而不至流爲鍾譚之鬼趣也。

江邨

圭華長林下。江邨落照間。夕風常滿樹。秋雨不繙山。捃拾歲時晏。謳歌稼穡艱。芙蓉涼更發。朝暮損紅顏。

度阿育王嶺

去去盤雲轉。高高望海行。到山千澗響。入谷萬花明。邱壑夢常往。煙霞疾未成。興來還不淺。翻劇子規鳴。

佛迹

嶙峋石氣蒸。殿場久無僧。仄徑盤雲入。荒碑覆雪崩。泉飛陰磴蘚。花落佛衣藤。始悟生生理。玄心已似冰。

天井寺

萬壑趨天漢。千盤到寺門。遠山存殿古。小姓見僧尊。想望真龍窟。尋常紫氣屯。來朝上五井。霜日看雷奔。

越客

遂作三年客。能無一字傳。長安自有月。銀漢不通船。老客甯忘越。春鴻欲度燕。卽看大隄柳。歸思正如煙。

桓溪晚歸

落葉谷風起。山寒白日徂。秋風動寥廓。人語入菰蒲。澗險鳴泉亂。林高晚燒孤。前峯斜照出。昏黑徧栖烏。

送百穀歸姑蘇

到來董子國。歸去闔閭城。世路有吳越。交情無死生。百穀以弔張大司馬至鄞風高江氣紫。霜落海潮青。別後遙相憶。頻更月旦評。

紀事

青天日如赭。亭午一星明。不敢論玄象。私心想太平。

小山偶然作

煩惱世情終不休。欲投空谷轉夷猶。寒苔古石深溪路。種樹人歸樹已秋。

江樓

酒幔風帘十萬家。門前流水是桃花。吳鹽似雪來供饌。越女如雲去浣紗。

雪曉懷西清田舍

松暗泉明澗道崩。洞門寒色掩枯藤。朝來茅屋無行路。雪壓幽厓第幾層。

讀慧上人東嘉草

新詩讀罷意俱閒。煙海蒼茫去不還。應笑桓溪老居士。碧窗終日夢青山。

吳敏道十八首

敏道字日南。寶應人。萬曆中貢生。有觀槿、白雲、折麻、月舫、竹西、水影堂等集。

弇州山人續稿。日南詩辭旨清麗。神采流暢。發端必工。尾結必適。隆萬之際。灼然巨擘也。

田按。日南詩清俊灑落。古今體俱入格。選家多未見收。亦珊瑚之遺珠也。

子夜歌二首

郎向湖南去。昨日纔歸來。東風知儂意。吹動羅幃開。

儂有白頭吟。曲短調自高。雪花綴瓊樹。好看不堅牢。

竹枝詞

妾家紅樓江水邊。樓前日到上江船。問人問得郎消息。郎到家時月正圓。
妾家住。在錦江旁。錦江流水入瞿塘。吾儂只愛錦江好。瞿塘風波愁殺郎。

采蓮曲

朝采蓮。暮采蓮。木蘭爲楫沙棠船。翡翠珠簾挂兩邊。青娥皓齒嬌且妍。吹洞簫。擊盤鼓。歌聲未歇雙起舞。
霧絹冰縠風前舉。游龍驚鴻何翮翥。南湖去。北湖回。三十六湖明鏡開。湖水流入杯中來。人生不樂何爲哉。君不見玉繩漸低西月頽。

鷓鴣行

鷓鴣乎。鷓鴣乎。爾形不祥。爾聲胡惡。胡爲乎朝登柏梁之臺。暮宿平津之閣。巢阿之鳳遠避之。青瑣紫微俱落莫。卓囊彈擊滿中朝。豈能容爾鳴嘒嘒。鷓鴣飛入故山去。浮雲不蔽萬年樹。萬年樹下吹玉簫。還迎鳳凰歸舊巢。

至日楊貢士見訪

暖氣浮葭動。晴雲逗水新。喜逢南至日。得見北來人。笛奏關山月。衣沾京洛塵。梁園行授簡。莫歎馬卿貧。

送濟菴禪師還東嶽

僧來自南海。別去指東峯。破衲兩三片。閒雲千萬重。楓江寒落影。花徑暮留蹤。遂有皈依念。如聞煙際鐘。

夜自范莊回支川作

雲蹤無定在。來往此溪頭。月照袁洪渚。詩成謝朓洲。遠村惟辨樹。淺水不勝舟。煙際重回首。知君尙倚樓。

懷郭次甫

只在江心寺。盈盈不可呼。梅花一歲盡。鴻雁尺書無。春色似相惜。焦山莫太孤。願因新月吐。贈爾摩尼珠。

春日過高郵訪龔憲部

經歲不相見。停雲詩思多。春風來幾日。吹綠五湖波。一舸能乘興。中園堪養疴。娟娟畫省月。光滿碧山蘿。

海陵登望海樓

久客不勝思。哀歌劍忍彈。故人能載酒。天地此憑欄。風笛山城暮。霜旌海戍寒。當筵重慷慨。頻按切雲冠。

秋興

烏鵲棲方穩。鳴雞喚瘦筇。月低穿石樹。風裊渡溪鐘。世事元甘拙。詩情未覺慵。自然眠不得。非是感秋蛩。

黃質山寄詩因答

美人居近館娃宮。采采寒香曲徑通。明月總憐千里共。暮雲真擬一尊同。吳儂江上丹楓葉。楚客山中青桂叢。玩世興情俱不淺。肯因搖落怨秋風。

宿鐵塔寺無塵上人方丈

濟水灑灑繞古寺。下馬先浣塵土容。白雲一片老釋子。青天九級金芙蓉。客久已是厭苦海。睡熟不聞鳴曉鐘。遠遊竹杖化爲鶴。明日留之殿門松。

姑孰

馬上春風繫玉瓶。遠遊正不礙沈冥。故人亦有當塗宰。客子重過姑孰亭。橋影江天搖水碧。塔陰山寺落空青。滿城白紵歌仍好。一樹梨花倚醉聽。

秋日寄武昌故人

別後頻看月。秋來未得書。武昌江上柳。應似故人疏。

夜歸

夜景何蕭寥。川原莽迴互。山僧相送歸。月在西村樹。

俞安期二十六首

安期初名策。字公臨。更名後。改字羨長。吳江人。有琴琴集四十卷。

列朝詩集。羨長巨目。鼻魁。顏長身。狀貌如河北僧父。與之談。盱衡抵掌。意氣勃如也。少客於龍君揚。受國士之遇。君揚被讒。入楚。愍之。遣戍永安。又入豫章。遂之。與楚人丁元甫爲意氣之交。元甫歿。厚遇其子。海內歸義焉。羨長嘗以長律一百五十韻。投贈王元美。元美爲之傾倒。已而訪汪伯玉於新安。訪吳明卿於下雒。皆與結社。後門章布。頗依諸公以起名。才氣蠶涌。晚亦知厭薄其窠臼。而聲調時闕出。不能自禁也。

靜志居詩話。美長之名。由元美、明卿、伯玉而成。詩亦兼綜三家。原本李獻吉。長於襯祭。賦景有餘。言情不足。如入隋苑觀剪綵花。青紅碧綠。非不爛然奪目。卽而視之。於根株總不相附。

田按。美長才筆縱橫。選聲練格。俱准古人。雖依元美輩以成名。其詩未必盡受羈勒也。明卿、伯玉之才。去美長遠甚。美長安肯俯就。惟貧士依人。不得不稍爲假借。論者乃以此爲嘗議。何所見之不廣也。

同陶懋中使君自樊口赴江夏抵洪山作

晨榜截洪濤。午轍改遙野。墳壙岸善崩。斷續雨頻灑。官道鮮有蕩。山容亦無冶。扶攜徒衆驚。揭厲淫潦瀉。猿愁風篠扶。蛟奔土膚赭。仰脅旣升危。折行屢經下。濁泥辨去蹤。觸雲誤來者。行止附同懷。慰勞愜清擘。夕寐偃頽館。朝餐卽荒社。合并展衾裯。遞代更輿馬。委形故所忘。爲恭諒非假。遠矚情迴復。微吟意宣寫。豈茲旅途艱。而遣歡悵寡。撫物領賞心。超超息蘭若。

楚行詠古二首

得志則皋夔。失時亦龍蛇。胡爲屈大夫。栖栖欲懷沙。發辭吾所師。述意良足嘉。遠擬殷三仁。俯仰多隱嗟。賈生計大事。實有治安才。所乏葆光德。而令絳灌猜。出傅扼所志。弔屈申微哀。承塵上鵬鳥。憂生亦何哉。

丁南羽畫維摩說法圖贈以長句

維摩昔家毗耶城。說法思爲衆生利。辯才居士稱無雙。了義法門明不二。當年願長康。每傳其像留雁堂。張繡僧探陸徽探效之差可方。復有孫尙子。亦傳行變空門裏。吳道子道程遜繼之頗相似。瓦棺甘露壁俱毀。定水聖

慈復崩圯。靈光飛散成雲煙。粉彩沈淪入泥滓。更兼祕本久不傳。丁生創出遙齊肩。神手疑懸造化力。慧眼應破天人權。越嶠空青武昌綠。齊宮執素吳江縠。毫端現界忽三千。色裏看身還丈六。諸天旣雜沓。萬國何繽紛。天女天花散若雨。龍神龍部歸如雲。問難文殊若賓主。仙音似共迦陵吐。隱几真看示病容。彌天偏入莊嚴土。人人諦聽繞縈迂。法力變現成須臾。室中坐乞燈王座。鉢裏食傳香積廚。嘗聞爲此畫。每向中天昇。幾年工巧殫神明。一時瞻禮生歡喜。應知盡力施丹青。只欲邀人出生死。俞居士。丁畫師。前身同住香海水。偶然並出青蓮池。只今宛在阿閼國。神通遊戲相追隨。

白嶽贈別慧月天人歌

高高白嶽神。僊廬紫庭綠。宇開帝居。萬峯合沓擁珠闕。白靈趨走朝琅輿。琅輿珠闕光相射。有美翩翩聿來下。天人瞥見行天門。羽士爭看迎羽駕。曳玄服。飄華巾。步丹宮。謁絳辰。誰信毗城散花女。只疑帝所彈璫人。自言身是謫居者。家臨大道通車馬。羞廁東園桃李間。肯赴西陵松柏下。花間樹下虛可憐。春來秋去能幾年。任是學歌兼學舞。爭如事佛還事仙。故衣拋卻黃金縷。稽首皈依梵王土。江上曾投曼室師。關中曾禮香嚴主。今來問道陟名山。寶函玉檢探雲關。詎隨鳳史吹簫去。也乞浮邱授樂還。聽者何紛紜。望之俱歎息。遼絕上宮要。旋整東歸軾。歸時應報女伴知。從今勿復忌蛾眉。謫期暫在桃葉渡。化身終去蓮花池。舊事繁華總堪悔。滄桑旦夕頻遷改。石城女子甯久留。臨春美人復安在。卽遣豔曲傳人間。何似幻

身辭苦海。

沅江雜述

甕子空舸入。舟師徙岸過。牽江人力盡。栽石鬼工多。風氣非全古。華音已半訛。向西聞小梗。羣盜尙橫戈。

計辰州光父同登郡齋後山卽事爲贈

吾愛辰陽守。看雲獨遠心。人長放衙去。山與閉門尋。磧石空階伏。廚煙一壑深。誰能郡齋裏。日夕臥青林。

澧上逢林元琳止宿因託寄聲龍君超

天地行寥廓。哀歌亦自勞。思投武陵住。直作枉山逃。石鼎青精餌。糟牀玉乳醪。誰家留醉客。千日臥蓬蒿。

雪後寄王仲房

積雪山城霽。長煙旅望開。君家隔蒼莽。我馬病崔嵬。茶事鋤雲罷。漁歌出浦來。桃花東郭酒。春事候登臺。

宿雙嶺菴

聖水臨階定。祇林截嶺開。雨冰龍子出。嘯月虎俚來。喻法高移座。繙經小築臺。梵音中夜發。誤作海潮迴。

龔子勤自嘉興守擢參浙省駐節金嚴奉寄

部內江山是奧區。定搜遺事歷崎嶇。雲林叱石逢僊客。星瀨披裘問釣徒。大有土風書越絕。能無歌詠憶吳歊。故鄉寥落扁舟客。浩蕩鷗羣在五湖。

吳姬年十五爲馮元敏賦贈內人

吳姬十五嫁前谿。樂府翻成手自題。持檝揚歌津吏女。上堂挾瑟侍中妻。花藏寢室流蘇暗。山擁粧樓翠黛齊。每起校書臨鏡早。催人不恨汝南雞。

聞周國雍以順慶守擢建昌兵備進平西南夷遙寄二首

總爲征蠻事武功。翻從化蜀借文翁。深浮黑水蒲江盡。懸度青天棘道通。箝馬全教歸漠北。竹王那許擅南中。乘邊更欲開新郡。露布先飛入漢宮。渡瀘無復瘴紛紛。詞藻長飛五色雲。帳下新聲橫吹笛。馬前雕管檄蠻文。搜荒暫借青羌卒。清壁深移赤甲軍。自分書生疏劍術。卻思長揖遠隨君。

寄周國雍使君於蜀郡

嘉陵新領虎符年。循吏西來事已傳。神雀郡門長自下。石犀江岸老仍眠。天橫雲漢孤城上。山擁岷嶓臥閣前。不藉王褒供筆札。中和輸爾賦新篇。

塞上四首寄汪司馬伯玉先生

塞垣高築切雲霓。烽燧驚聞斥堠迷。未遣漢師犁漠北。浪招虜騎牧關西。三秦士女移旃帳。百二河山入鼓鞮。更說洮州損諸將。可容無罪問羌氐。

佛牙每說迎西域虜道長。聞借肅州誰遣單于通右臂。遂煩飛將射旄頭。六師塞外難憑險。五郡河西獨
隱憂。縱馬放牛非往日。居延龍勒早防秋。

夜傳蠡幕寇西涼。朝輦金繒委朔方。既有羣胡看太白。甯勞諸市貢飛黃。江南輓粟輸垂盡。塞上屯田事
太荒。今日乘邊休浪議。安危須問趙平羌。

先皇套賊未曾搜。竊土犁田古夏州。千帳依憑元內地。幾人憂患自西郵。虛誇積甲齊熊耳。誰議稱兵飲
虜頭。會牧昨聞通外援。可堪肘腋據旃裘。

玉照亭

鳴曲孤亭抱影斜。林梅迴繞玉光華。巡檐近擁三珠樹。捲幔高懸四照花。肯學漢粧非主第。不教羌笛在
鄰家。玲瓏帶雪仍堪鑒。宛坐雲中七寶車。

寄周國雍憲長於臨洮

榆城絕域晝蒼茫。白日陰陰隔隴長。雪後旌麾秋逐虜。雲中燎火夜搜荒。桃花東道來天馬。木葉西山見
玉狼。不耐因君懷出塞。笛中新曲奏伊涼。

李善徵憲使備兵湖北賦贈

荒雲夷部拓千山。版籍新開洞壑間。土俗已非三戶楚。衣冠漸出五溪蠻。塚邊樹色巴蛇斷。廡裏桃花笮

馬閒獨有犁庭西北議，無人重出玉門關。

登夕佳樓因寄丁元父兄

縹緲飛樓載酒過，異鄉搔首一悲歌。高沙北郭情偏近，佳氣西山夕更多。濫有虛名歸草莽，動隨詩興隔關河。美人南浦遙相憶，獨雁春江怨綠波。

勞勞亭與所知敘別

長河落廣庭，酌酒溼秋星。出戶輕生死，藏名託醉醒。一言曾夙昔，百感豈飄零。朋好從茲別，山川信所經。亂雲高進屐，大澤莽揚舲。巖石臨圻白，湍流入峽青。懷沙悲楚客，倚竹見湘靈。風土還徵記，鄉音欲改聽。清芬紉岸芷，赤實采江萍。畏路元輕犯，遙心不自甯。懷親愁日短，憶友悵雲停。縱使身仍在，勞勞似此亭。

水月洞

洞戶引江流，南下清瀾瀾。月過影孤沈，潛蚪抱珠起。

東濠雜興

日斲青精炊飯，雨芟綠草編蓑。老合爲農石戶，貧甯貸粟監河。

代送中使織袞還朝

織罷冰綃進御歸，鮫人水國暫停機。自憐不及吳蠶老，一吐新絲上袞衣。

明詩紀事卷二十六

庚籤

柳應芳五首

應芳字陳父海門人有柳陳父集四卷。

露書柳陳父詩如田舍翁暴作封君舉止生澀。

列朝詩集陳父僑居金陵住城南之杏花村近瓦官寺舊京最僻地也爲人和雅美鬚髯修容止衡門兩版非力不食往還惟曹能始林茂之三四人他無所詣作詩不輕出語每行街市低頭沈吟悠悠忽忽觸人肩面不自覺也嘗語人作一律詩必還魂數十番方得意愜其矜慎如此廣陵詩人有盛名推陸無從沿梁七子流風不克自拔陳父名不及之篇什亦寡與會清發翦刻常言自可使無從卻步此論實自余發之白下談詩者無異議焉。

書影陳父無子一女適程君慎先于歸日以所刻詩板爲奩具時謂愈于普人繫羊牽犬也。

田按陳父詩細膩清切牧齋稱其矜慎有以也。

別車福州

孤舟將北渡轉轉切歸心衣積他鄉淚琴操故土音山長催日暮江暗結秋陰回首閩南路思君一水深。

題陳蓋卿溪上居

明詩紀事 庚籤 卷二十六

二五五九

晚歲家溪上。蕭然林下風。栖雲山向夕。寫月水承空。岸折長橋落。城臨小市通。看君忘出處。將老一邱中。

正月十七夜宴李太保西第

正元望後宴平津。羅綺初筵入早春。盤馬鬪車纔罷夜。殘燈剩月尙宜人。梅花落到歌前緩。柳葉開經勝裏新。不信金吾仍放禁。歸時看取六街塵。

豫章朱芾斯宗侯逸園雨中宴別屠太初之南海羅敬叔之武昌李林宗之白下孫泰符之劍江歐陽于奇之毘陵予還廣陵

滿堂遊子歎飄蓬。無數離羣細雨中。飛蓋西園因卜夜。挂帆南浦待分風。豈知江海經年別。不見關山去路同。他日相思非一水。尺書何處寄春鴻。

咏美人梅花對鏡

香奩妝欲罷。移照梅花前。徘徊兩孤影。抵死鏡中憐。

何白三首

白字无咎永嘉人有汲古堂集

列朝詩集无咎幼時爲郡小史龍君御爲郡司理異其才爲加冠集諸名士賦詩以醺之爲延譽於海內遂有盛名能書善畫畫史會要无咎詞賦擅名山水得方壺筆意清老可尙竹石亦最煙潤

靜志居詩話。汲古堂集原亦出於七子。頗與俞養長相近。

哀江頭

飛雲渡口西風急。津吏停橈刺船立。始陽公子方垂髻。掩抑依依向余泣。爲言阿父守南康。雙旌五馬爛生光。甯知廉吏反成罪。諸孤藐爾身淒涼。父昔驅車到公府。蒿目日詢民疾苦。化行遠邇期月間。不圖遽坐中官禍。中官權稅來江州。譏征會歛深誅求。大旗卓天天爲愁。峨艦壓江江不流。長江日高一丈五。傳呼奏樂頻搗鼓。于闐寶帶刻麒麟。大內金牌畫飛虎。秃袖監奴紫繡衣。銳頭惡少青絲組。長官俛首不敢言。何況區區商與賈。左右濫用水衡錢。夜椎肥牛朝擊鮮。張弓挾彈仰天射。鳥飛不近潯陽天。游徼關頭弛巡邏。忽傳商客偷關過。駕風遠逐到南康。中流繹斷官船破。十人失水九人墮。飛濤適值長鯨餓。水中叫援呼州民。州民舉酒翻相賀。貂璫見說生狂嘖。自謂奉書督國課。璽書統轄及守臣。有事守臣當我佐。州民袖手誰使然。民之凶獷誰之故。父謂爾璫勿怒嘖。爾曹腰領無容剗。關津有地稅有經。越境猶然鬻泉貨。而曹之死天死之。豈得吾民有連坐。貂璫搥牀怒不止。謗牘蜚誣抗明旨。御批緹騎出燕京。檻車夜達南康城。南康城外達城內。江水湯湯流哭聲。母憐此別異。南北誓願相隨同。死生。父云一身尙難保。豈能攜汝增伶俜。夜闌掩泣已憔悴。阿父據牀方假寐。燭輝無燄雨潏潏。阿母遂作無聊計。平明呼母唯空牀。甯知阿母懸高梁。阿父見母死。拔血裂中腸。兒女見母死。恨不從母亡。闔城聞母死。擗踊咸如狂。中有

但夫人八十鬢髮霜。開我東閣廂。著我素羅裳。倉皇備牲醴。命僕舁黃腸。親爲視殮含。三繞母尸傍。抗聲慟爲絕。陰霾四塞天無光。錦衣敦迫難久俟。薄俸那能具行李。父老吞聲爲醢金。商賂通衢眞方軌。三日得鑲三百餘。空城大小隨行車。呼天遠徼一千里。道傍聞者咸嗟吁。天王明聖臣當戮。詔發秋曹先繫獄。一物終回造化仁。六幽竟藉陽光燭。不分生還見故鄉。驚看兒女錯成行。短衫紫鳳半零落。小子呼爺能透床。夜闌秉燭獨疑夢。悲喜交并轉沈痛。幾回呼母母不聞。嘔血撫棺惟一慟。孤臣九死輕一毛。天心未寤生何聊。愁聞稅監益驕恣。豺狼滿道人蕭條。

橫雲山人史稿吳寶秀字汝珍浙江平陽人萬歷十七年進士二十六年爲南康知府湖口稅監李道橫甚寶秀不與通會漕舟南還乘北風揚帆直入湖口道欲權其貨遣卒急追之舟覆有死者道卽遣爪牙吏持牒捕漕卒寶秀拒不發道大怒明年正月飛章劾寶秀及星子知縣吳一元青山巡檢程資阻撓稅務詔俱逮治給事中楊應文等請下撫按公勸大學士沈一貫吏部尙書李戴國子監祭酒方從哲等交章爲言俱不報寶秀妻陳氏慟哭偕行寶秀不可乃括餘貲及簪環得銀三兩許付其妾曰夫子行以爲路費夜自經死寶秀至京下詔獄大學士趙志舉上言臣困臥牀褥間聞中外人情洶洶皆爲礦稅一事聞寶秀逮繫時其妻投環自盡闔郡號呼幾成變亂事關民生向背宗社安危臣不敢以將去之身隱默而不言星子民陳英者方廬墓約儒士熊應鳳等走京師伏闕訟冤乞以身代於是撫按及南北諸臣論救者疏十餘上帝皆不省一日司禮田義彙諸疏進御前帝怒擲之地義從容拾起復進之叩首曰闕臣跪候朝門外不奉處分不敢退帝怒稍平取閱閣臣疏命移獄刑部皇太后亦聞陳氏之死從容爲帝言至九月與一元等並釋爲民歸家踰年卒初南康士民建祠特祀陳氏後改建合寶秀祀之天啟初贈太僕少卿賜祭錄其一子。

溪翁行

溪田犂确河田沃。瘦土民勞沃土樂。河田多收十斛餘。年年不肯全輸租。溪田收薄少生計。刈薪賣穀完新稅。春來月出不聞歌。昨朝社飲無人醉。溪翁相羨河田豐。家家甕酒珍珠紅。

淮陽歸興

窮秋征馬出扶桑。五夜流烏入建章。土木再煩將作匠。詔書頻拜羽林郎。山連豐沛今湯邑。江繞濡須古戰場。安得漢庭長孺輩。令渠一臥治淮陽。

林世璧一首

世璧字天瑞。閩人。參議炫子。有彤雲集。

靜志居詩話。天瑞爲龔祭酒用卿女婿。嘗從婦翁游鼓山。分韻賦詩。時天瑞已醉。詩成題壁。有眼中滄海小。衣上白雲多之句。坐客皆歎以爲不及。徐惟和詩云。閒尋老衲叩禪堂。墨跡淋漓滿上方。一自題詩人去後。白雲滄海兩茫茫。蓋爲天瑞作也。覽彤雲集終卷。才雖敏而調實庸。

詠燭

弄影還驚月。開花不待春。夜深屏幃裏。偏照綺羅人。

斯一緒二首

一緒字惟武東陽人有懷白山房稿。

娶書一緒詩格精使事後忽悟一切去之與寄超然。

金華詩錄萬歷戊午惟武與徐伯陽暨秀良陳大字章無逸吳賜如諸人爲八詠樓社惟武實爲盟長。

塞下曲

草別故園綠路經窮戍寒。天山從此雪萬里正漫漫。帶甲宵難夢聞笳曉未殮。裁衣休准舊俠骨半銷殘。

浣紗石

人去邨銷采葛歌。浣紗溪畔憶流波。越臺吳苑俱荒草春色依然到苧蘿。

方堯治一首

堯治字翁恬蘭谿人處士太古孫。

多雨

荆楚原多雨蕭蕭五月秋。支床無好夢覽鏡有深愁。性已同麋鹿名應混馬牛。避人長散髮吾道屬滄洲。

商家梅一首

家梅字孟和閩人有種雪園詩選五卷。

隱秀軒集孟和稱詩二十年取材多用物去假途遠富有日新。

列朝詩集孟和少爲詩饒有才調已而從鍾伯敬遊一變爲幽閒蕭寂不多讀書亦不事汲古鑑心役腎取給腹笥低眉俯躬。

目笑手語。坐而書空。睡而夢噩。呻吟咳嗽。無往非詩。殆古之詩人所謂苦吟者也。
田按。閩人之傾心鍾譚者。前有蔡敬夫。後有商孟和。孟和詩較有情致。

到白門同友夏坐茂之齋頭話別

暫得清談到夜分。逢遲別促思紛紛。庭前一片高梧影。明月來時卽似君。

王醇三首

醇字先民揚州人。

列朝詩集。先民弱冠善詞賦。陸無從。李本甯交相引重。意不屑也。遊長安日。醉市樓。挾妓走馬。人求讖面不可得。會麻大將軍。閱將士。先民輕裘快馬。馳突演武場。引弓破的。矢矢相屬。擊雙劍飛舞。雲忽如崩雪。大將軍降階執手。欲舉以冠一軍。先民笑曰。家本諸生。聊用遊戲耳。讀其集。深情孤詣。秀句錯出。

田按。先民五律頗近鍾譚。古詩時能穎出。

題馬姬湘蘭所畫蘭竹卷

寒映秋芳數枝玉。冰綃宛是湘江曲。能使湘靈愴別魂。瑤瑟泠泠怨秋綠。霓裳奔月留難住。錦衾紅燭生愁緒。墨花化作秦淮雲。猶向粧臺日來去。

吳門送劉元博遊楚

芹芽淺淺江綠深。江南畫船載楚心。因君余夢瓜州渡。期君水宿夢相遇。梁間敝笥江底魚。三年意密見

面疏寫與苦歌伴千里。峽夜嘯猿疑在紙。

贈林羽仲

業廢歸無定。年衰見屢難。詩名半生過。客舍幾移安。少已深邊策。貧聊就幕官。西風翦江郭。猶有故人寒。

薛岡二首

岡字千仞。鄞人有天爵堂集。

甬上耆舊集千仞年八十集其生平元旦除夕詩爲一卷起萬歷庚辰至崇禎庚辰福建林茂之敘之身爲詞客六十年名重天下亦盛事也。

庚辰元旦

日挂鳳樓端。新年事改觀。可矜臣罪薄。不測主恩寬。望赦心徒費。回天責已完。諸公有笑口。踴躍試辛盤。

華清宮

繡嶺出煙村。宸遊迹尙存。離宮何處是。流水至今溫。輦路年深廢。峯巒幸後尊。空餘一片月。猶似照朱門。

吳夢陽一首

夢陽字允兆。歸安人有射堂詩鈔十四卷。

列朝詩集允兆好吟詩。詩不就。竟夜不交睫。苦思刻鏤。必得當而後已。

靜志居詩話。牧齋列朝詩諡嘉定程孟陽曰。松圓詩老。謂能照見古人心髓。若親炙古人而得其指授。歎爲古未有。新安閔景

賢輯明布衣詩。推歸安吳允兆爲中興布衣之冠。是皆阿其所好。不顧千秋之公。是公非。以余觀二子之作。以政則魯衛。以則曹檜。陳詩者不廢。斯幸矣。

田按。允兆詩誠如竹垞所譏。孟陽清俊之作。集中不知凡幾。竹垞與允兆同譏。斯所謂良驥與駑駘同阜。公是公非安在也。

湖上同晉叔嘿孫作

心賞無過杯酒間。良朋難合復追攀。重尋往事渾如夢。好藉清談一解顏。秋杪細聽將墮葉。月斜猶傍未沈山。請看臨別蕭蕭影。幾度殘鐘拂曙還。

米雲卿二首

雲卿字君夢。湖廣人。或云汴人。徙家蘭溪。後徙居歸安之埭山。

筆精。君夢有山居詩。極幽人之致。

列朝詩集。君夢少有才名。薄遊南北。落落不遇。其摺閱詩云。十年湖上社。雙屐柳東山。有子擬難教。無家老不還。亦可見其老懷也。

田按。孫太初秦人。或云蜀人。米君夢楚人。或云汴人。選家莫得其詳也。據黃居中增筆精云。君夢在南中贈其二律。是嘗身與唱酬者。居中云。君夢生於汴。徙於婺。卒於茗。當可據。君夢有詩云。歸心長路阻黃河。亦可爲汴人之證。

楊柳歌送唐仲秩

江南二月時。楊柳絲華滋。高臺不知數。臺邊千萬樹。縈隄夾岸相映新。搖曳朱門翳美人。翠樓絲絲爭媚。

日黃鸝樹樹學。嗚春不住高。飛金梭亂擲流黃機。又如織女織初斷。千絲萬絲紛歷亂。旋作東郊一片陰。雨中淺淺煙中深。迤邐七。谷步障。纏綿縷帶結同心。青綃步障大道傍。同心縷帶春風香。佳人玉笛青樓遠。公子金羈白日長。旗亭百座空中曉。嫩葉柔枝互繚繞。碧玉蛾眉怎鬪妍。小蠻腰肢徒裊裊。君不見楚王宮裏花盈盈。千容萬態學未成。春心不死怨猶在。只今盡逐東風生。灞陵橋。章臺路。異代風流那得顧。章臺舊日花如雪。灞陵古來多送別。眼前景物不得將。何以贈君天一方。好向枝頭惜顏色。莫待傷心秋草黃。

春日途中口號

行役日復日。奈何歧路長。春泥滑馬足。芳草斷人腸。日落野煙合。花開村店香。吳姬似相識。招客酒壚傍。

秦鎬一首

鎬字京。汝南人。有頭責齋詩。

靜志居詩話。袁小修序頭責齋詩。有云。今人字皆兩字。而京字獨一字。自東漢以下無之矣。然漢以降。如顏之推字介。李暹字雲。劉乾字天。羅靖字禮。房玄齡字喬。顏師古字籀。張巡字巡。孫晟字鳳。李絳。徐倫字堅。毛欽字傑。正難悉數也。

冬夜見新月

霜天約略一鈎斜。半挂平蕪半遠沙。照向兩鄉偏是缺。不知圓處落誰家。

石沆一首

沆字灑仲。如皋人。有白雲居士集二卷。

列朝詩集灑仲爲詩。陶冶性情。蕭疏閒放。雅以寒山擊壤自命。吾則以爲古之香山。今之江門也。

有懷

遠村幽壑獨徘徊。雲護柴扉雪護苔。盡日溪邊倚枯柳。白鷗何事不飛來。

周應辰一首

應辰字斗文。鄞人有綠莊詩采。

田按。斗文師余君房。君房別號農丈人。斗文自謂生平苦學。得農丈人之牛。自號農牛。其詩亦襲君房之體。

下第後送薛元璞

忽忽不得意。秋風又送君。路知雙目近。情作一年分。人影留殘照。山光隔片雲。歸期如可俟。此去莫論文。

戎玠一首

玠字孟常。鄞人有蜀游草。

曲溪

村煙生晚翠。野水聚空潭。雞犬逢人倨。桑麻著雨甘。漁歸燈破暝。僧定衲棲嵐。得近前溪泊。泉聲答夜談。

虞伯龍一首

伯龍字公普，鄞人，有擔簦集。

昭代選屠公，善佳句，骨以耽詩瘦，情因縱酒狂，薄俗無青眼，長才自白眉。

明妃曲

生小入建章，垂死埋沙漠，不怨主恩輕，還悲妾命薄。

張正蒙一首

正蒙字子明，江甯人，有蓬蒿集。

列朝詩集：子明世居通濟門外之贅灣，臨河結廬，柴門晝閉，帶索拾穗，未嘗俯仰於人，年踰九十，隱淪終老。

冬日閒居

僻居心遠矣，閉戶日蕭然，一水帶寒月，孤村幕夕煙，貧惟尊酒在，詩豈衆人傳，卻憶蒙莊子，冥搜內外篇。

程伯陽一首

伯陽字師道，休甯人，有小樵山人集。

新都秀運集：師道家貧，賣藥自給，詩多漫興，而沈思者自入法。

白岳雪中送惠光上人還福田

山中一夜雪一尺。山鳥無聲斷人迹。石楠倒挂天門開。飛磴虬盤樹杪來。怪爾老僧不暫住。凍雪千峯獨歸去。寒風吹衲踏瓊瑤。肩上蕭然只一瓢。紫霄巖前一相送。鐵杖敲殘松鶴夢。重來結社是何年。澗上桃花紅又燃。

孫友篋一首

友篋字伯諧歙人。

新都秀蓮集。伯諧好神仙。山居獨行。洞籟在佩。不顧俗諺。飄然自怡。其詩任性放吟。懶於祖述。間有合作。便越凡情。若行看水流去。坐期雲飛還。我家老梅花。開到第幾樹。行人欲問前朝事。翁仲無言對夕陽。皆稱佳句。

過程學士墓

野水空山拜墓堂。松風溼翠洒衣裳。行人欲問前朝事。翁仲無言對夕陽。

孫名由一首

名由初名凡。字公路。蘇州嘉定人。有張公路詩集。

靜志居詩話。公路居平世而好習兵。其家產僮僕以避徭役。可稱知幾之士。蓋先唐。裴程。李四子稱詩。而學文於震川者。

夏日田家

風過林花落。雨餘溪水渾。飛雲停不去。低回戀幽軒。夕陽下平楚。遠樹見漁村。四體弗勤動。興言愧鹿門。

應臬二首

臬字仲鵠鄞縣諸生有楚遊烏溪詩草

甬上耆舊集何无咎云仲鵠詩如波面淪漣青壁映帶

閉戶

閉戶松鱗老臨渠竹粉香偶然來野衲小語及空王日永修茶具年衰訂睡方窮山渾自了焉敢傲羲皇

姚少師影堂

有自題
偈語

冀北江南事已非禪機未了說戎機止聞智者師黃石曾見功臣著衲衣杉翠溼空春欲老砌塵凝席客來稀一參偈語低徊久颯颯靈風動素幃

何璧一首

璧字玉長福清人

靜志居詩話玉長任俠見知於黃陂張濤張後開府遼東將疏薦以布衣拜大將會罷鎮乃止濤卒入楚哭之遂以病死亦矜奇之士也寄友詩云士到出山誰不賤術惟游世最難工足當阮生之泣矣

金陵寄沈千秋

挾策干時任轉蓬壯夫曾悔學雕蟲荒年有客愁炊桂薄俗何人惜鑿桐士到出山誰不賤術惟游世最

難工。長安官道原如髮。只有狂生歎路窮。

汪樞一首

樞字伯機。鄞人。有存俟篇。

甬上耆舊集。伯機蕭散工詩。治別業曰泡園。作園居詩六十首。徐興公題其卷曰。疏作風清。逸同雲上。田按。伯機早春詩云。貧家無歲事。贏得看梅花。可謂清絕。

一邱

頭白令身閒。行隨倦鳥還。春生栽朮地。水漫釣魚灣。剡竹通遙澗。刪松露小山。一邱高臥穩。無夢落人間。

諸葛鯨一首

鯨字君騰。一字騰甫。蘭溪人。寄籍西陽宜撫司。爲諸生。貢入太學。有漫遊雜稿。黔中集。問華子集。

四溟詩話。諸葛騰甫。渝城人。日東李給事。前聯詞意並佳。天造奇景。宛如披四川圖。使人興不可遏。但神馳於夢寐耳。其詩附後。訪舊來何晚。輕帆落驛亭。江迴劍外白。山擁漢中青。萬里逢人日。孤城感客星。知君懷諫草。翹首望明廷。騰甫別號問華。諸葛武侯四十二代孫。

小莊卽事

春樹縱橫繞白沙。清溪流出幾人家。自嫌睡起渾無事。且向空庭掃落花。

盛鳴世三首

明詩紀事 庚籤 卷二十六

鳴世字太古鳳陽人國子監生有谷中集三卷

列朝詩集太古詩翦刻鮮淨措置清穩盡削常調實爲一時之儔如烏曠白門夜月上一樓霜錢郎復生何以過此
靜志居詩話太古五言圓潤貼妥其源出於耶士元

送臨江蘇太守

五馬夾朱輪。驛途不動塵。問山廬嶽近。領郡虎符新。吏冗詩難廢。民稀俗易淳。江花迎路發。十月待行春。

夜過凌方弦山齋

十里到孤村。柴門下夕曛。霜鋪平野月。鍾斷隔溪雲。病骨逢秋健。清言忘夜分。自君多祕術。猿鶴已成羣。

贈曹鳳岡

仙才多玩世。況復幕官閒。鶴養空庭樹。雲栖傍閣山。酒干官長禁。詩乞野人刪。爲有延徐榻。相期數往還。

姚旅二首

旅初名鼎梅字園客莆田人

露書作詩須有警語未經人道方能傳遠若拾人牙後已披之華何足奪目余有元日江行詩春聲得野雀歸意競江鴻不道
芳年改還添衰髮中自謂無所蹈襲矣然唐太宗首春詩寒隨窮律變春逐鳥聲開劉長卿元日詩律變滄江外年加白髮中
則余向作總不出古人範圍矣安得佳

列朝詩集園客苦吟詩不多作

靜志居詩話。園客放浪湖海。綴拾舊文。露書一編。頗存軼事。其評騭一時詩家。遠比散器之。近繼王元美。

瑯琊道上

魯酒猶堪醉。瑯琊奈可栖。荒村花不笑。殘日樹含淒。城郭黃沙外。人家古墓西。唯餘霜月夜。烏似白門颯。

辟支巖

選勝藤蘿更上攀。龕岩一點翠微間。江城作斗蹲平地。海水如雲貼遠山。茶竈堪消今日福。酒杯仍值野僧閒。同遊幽僻同猿鳥。不到昏鐘不肯還。

李坡一首

李坡一首
堧字公起。鄞人。有盟鷗集。

甬上耆舊集。公起生卽。雙父喪。號慟五日夜。水漿不入口。咽枯而嘶。乃更啞。縱觀先世遺書。不問寒暑。性好客。郵筒走天下。四方學士大夫。樂趨之。具賓主以案。相通以筆。有問奇者。載紙以往。輯里中記載。名甬東軼事。撰述甚多。舍傍有斐園。竹波軒。青蘿閣。諸勝。與客遊處。好學之外。淡然他無所嗜。翻若口耳爲煩也。曹能始嘗合華亭。唐仲言爲二異人傳。仲言贊而工詩。通古今。公起以目誦。仲言以耳讀。兩君誠千載異人也。

寄曹能始少參

聞道浮山勝。水松十二株。華堂背北郭。曲榭瞰西湖。閒蒔三山藥。高懸五嶽圖。金屏花外擁。小小侍呼盧。
董小雙李小蘇
俱閩中名妓。

唐汝詢二首

汝詢字仲言松江華亭人有編蓬集十卷後集十五卷

列朝詩集仲言五歲而瞽父兄抱膝上授以三百篇及唐詩無不成誦旁通經史能爲諸體詩箋注唐詩援據賅博亦近代一異人也嘗過余山中酒間誦子虛上林諸賦杜白諸長篇鏘金戛玉琅琅不遺一字留校杜詩時有新義如解溝壑疏放之句云出於向秀賦稽志遠而疏呂心放而曠亦前人所未及也仲言之兄汝諤篤嗜王李之學仲言童而習之故其於詩未能超詣蓋亦雲間流派如此

靜志居詩話詩人形累者孫伯融跛偶武孟張節之謝茂秦眇視希哲枝指何仲默禿筭其他不可悉數至唐仲言無目李公起啞耳聾兩君乃能勤於箋述不廢吟咏是難能也

八月二六日攜諸兒過吳逸一山齋夜集

田禾滿野正高秋命楫將雛偶出遊逸興不緣微雨盡晤言偏愛小亭幽垂垂菊葉黃將拆颯颯楓林絳
欲浮暫一持螯便歸去重陽猶苦獨登樓

折楊柳

昔攀垂柳唱陽關柳復垂絲君未還惟有楊花易飄蕩隨風吹得到陰山

邢大道三首

大道字性之洪洞人諸生自號少鶴山人有白雲集二十四卷

田按曹能始合李埈。唐汝詢爲二異人傳。埈。汝詢賢。二人皆能詩也。少鶴山人邢性之。狗瘦丈人也。張五鹿稱其首與几齊。足不及地。客見之胡盧而笑。顧亦能詩。以山人邀遊王侯公卿間。余錄其詩。可增爲三異人矣。

三月八日重遊廣勝寺

野水村橋路不迷。十年幾度到招提。依巖鶴宿松長好。隔岸鶯鳴柳半齊。林草自香充佛供。塔雲無恙護禪棲。東風不負山靈約。歲歲何妨到杖藜。

送雷廣文擢長沙別駕之任

別駕榮名綰綬年。河梁話別轉悽然。官程莫惜長沙遠。宣室甯忘賈誼賢。凭案夏雲高嶽麓。褰帷秋色滿湘川。懸知公暇延詞客。郢上何人白雪篇。

寓彌勒菴

客到長安不上書。蕭條行李寄僧居。經翻石閣香銷後。句就松門鶴下初。帝里風煙秋色暮。天涯霜雪夢魂虛。竹床蒲椅聊棲息。歸去青山有故廬。

王嗣經一首

嗣經字曰常。本姓璩。上饒人。

臺城懷古

湖山迤邐接亭皋。前代遺踪有石壕。腸斷覆舟山下路。年年春草似青袍。

王伯稠二首

伯稠字世周。崑山人。有白虹集二十卷。

弇州山人續稿。世周樂府尤長情事。歌行奇逸。七言律絕瀟灑。

王奉常集。世周詩淡宕豪逸。

追昔感事二首

欲醉胡姬耐笑看。駝酥千盞不辭乾。忽雷抱向青樓月。撥出涼州夜雪寒。
射虎屠龍意氣豪。縱橫年少見吾曹。老來夢斷長安事。落日撈蝦傍小舸。

鍾恠二首

恠初名恬。字叔靜。竟陵諸生。僉事惺弟。有半蔬園集。

香祖筆記。叔靜詩絕有風骨。不肯染竟陵習氣。古詩如大將雖自貴。少小爲奴隸。男兒不殺賊。不應死邊城。近體如桐新春後

葉。竹正午時陰。皆佳境。

田按。叔靜詩不離竟陵氣習。阮亭所述。蓋其一體耳。

贈林茂之

不惜頻將過。交情病裏深。桐新春盡葉。竹正午時陰。筆墨延余坐。冰霜識子心。支床憐弱骨。藥餌互相欽。

初秋在聖修中孚齋中

新秋十日易爲涼。風遍閒樓只一床。階疊薛文緣集雨。菊存花事待重陽。話深兄弟相需夜。機息禽魚各有鄉。遠水長隄疏密柳。鐘聲落處見蒼茫。

葉之芳三首

之芳字茂長。無錫人。有雪樵集。

弇州山人續稿。雪樵子詩。氣完。是以句工而不累篇。調諧。是以篇工而不累格。

列朝詩集。茂長以能詩出遊人間。好使酒罵坐。鄒彥吉與之同里。繆相延重。而心殊苦之。知其人亦豪士也。

虛籟堂

嗒然子綦臥。心與靈區忘。不知寥廓中。清籟如笙簧。耳之忽無聲。下見澄潭光。

迴梁

青陂迴復直。朱梁曲帶斜。波底見人影。藻間明日華。藤花夾岸落。風吹上別槎。

花津

谷口流鶯亭午聞。春深潭上氣氤氳。武陵仙路尋難入。千樹桃花萬疊雲。

田按。虛籟堂。迴梁。花津。乃安茂卿西林三十二景之三景也。西林擅林沼之勝。王弇州有記。

游及遠三首

及遠字元封莆田人有小竹林草

露書余從子巽卿卒於秣陵游元封哭以詩有九原有路君先到酒伴詩朋次第來之句蔡君豪戲之云君兩人皆高陽酒徒君當先去次年元封下世詩竟成讖

蘭陔詩話元封爲益藩上客與同里姚園客吳元翰黃元鞅皆預金陵詩社

再別雲南養正宗侯

祖帳重爲別河橋春欲殘垂楊依岸綠暮雨過江寒老客飄零慣危途去住難多君能解劍拂拭帶霜看

去妾贈夫

賤妾出門去含悲當告誰落花難上樹逝水無還期燈盡催機杼香銷戀總幃可言君意變自歎妾容衰

殘燈

夜漏斷還續燈花開且落應識含羞容滅光進羅幕

沈野一首

野字從先吳人有臥雪閉戶燃枝榕城諸集

列朝詩集從先爲人孤癖寡合下籬賣藥雖甚飢寒人不得而衣食之也曹能始見其詩激賞之延致石倉園題其所居之室曰吳客軒好飲每夜半大呼索酒矜重其詩徘徊吟賞自能始徐興公兄弟外不輕示一人能始常嘲之曰半夜號咷常索酒

一生獨操自園詩，亦可想其風致也。

寒食

驚心芳草上河橋，雨後推窗見柳條。廚下從來煙火少，不知寒食是今朝。

露書姑蘇沈野作寒食詩，徐燾賞其語，往訪之。及近閨門，重門已閉，進退不得，因於簷下坐一夜，沈因是得名。

王野一首

野字太古，歙人，有覺非齋詩，嬰餘稿。

列朝詩集：太古遊于金陵，不輕謁人，貴人慕其名，訪之累數刺，始一報謁。蹇驢造門，稱布衣王野，投刺徑去。晚年詩頗爲竟陵熏染，竟陵極稱之，爲評騭以行世。

金城禪院

林巒殘雪霽，淨土獨游頻。鳥似忘機客，山疑入定僧。靈花飄不盡，古木自無春。坐悟衣珠在，空經累劫貧。

汪禮約三首

禮約字長文，一字士垓，鄞人，有長文遺詩一卷，四明游籍一卷。

甬上書舊集：長文中年謝客，坐臥一小樓著書，雖妻子不得見。垂二十年，少工書，樓上偏置靜榻，筆於左，偏開一穴，下置容五石大缸，每一詩成，書紙熟視良久，輒手取接之，投穴中，積歲時缸滿，好事者爭取之，稍傳布人間。

田按：長文遺詩清迥無俗格，四明遊籍蓋與沈嘉則酬唱者，濡染其習，稍涉俗韻。

獨立

漸少區中累。蹉跎歲暮天。煙霞常引疾。犬馬欲忘年。山課松楸稅。園收芋栗錢。寥寥一生事。獨立意翛然。

偶作

嘿嘿竟何意。栖栖常避人。乾坤存一壑。風雨過三春。錦帶慙居士。青山作外臣。衡門有尊酒。長日傍松筠。

歸望山茨有作

秋陰自寥廓。況復遠林歸。一水孤舟入。高天亂葉飛。江雲晴稍薄。山日晚猶暉。何事東溪上。行吟老竹扉。

費元祿二首

元祿字無學。鉛山人。有甲秀園集二十八卷。轉情集二卷。

田按。無學詩。小有才致。習與陳眉公。周方叔遊。故所著轉情集。不離二人窠臼。

聚景園

江山無恙黍離哀。宋主巡遊有故臺。紅粉六宮俱是夢。翠華萬乘幾曾來。芳原花石歸新主。異代園林集上才。申使不歸陵寢變。官梅今作野梅開。

汨羅

二水紆迴弔屈亭。荆門渺渺浪冥冥。離騷宗社憂同姓。放逐江潭怨獨醒。芳杜涼風寥曲渚。木蘭秋露飲

寒汀欲招楚些蛟龍窟。蕭颯楓林兩岸青。

逸希韓一首

希韓、章邱人。

山居

老性習成懶。日高開戶遲。破囊惟貯藥。活計只工詩。竹影搖山色。花香入酒卮。流光不少待。催我鬢成絲。

吳孟堅一首

孟堅、失其名。莆田人。

田按。孟堅遊章巖詩。見費無學轉情集。無學稱孟堅賦才雄偉。行麗精深。博敏蓋才士而淹鬱終者。莆田又有藍翰卿詩云。名踪安可窮。去去勿復辭。不愁人行懶。甯無衰歇情。誰令志不舍。長與古今愁。高煙白日寒。千秋長不虧。游媚性所拙。慙悲甯可裁。鑿已固已省。狗物亦難任。勞思不能寐。感物愁逾昨。湯羲仍稱其憤切怨幽。當令稽謝掩泣。羲仍贈翰卿詩云。不謂嶺海內。乃有淵雲出。推挹甚至。吳藍二生詩。選家未錄。余亟登之。

游章巖

千仞峯頭一振衣。青天歷歷踏斜暉。醉來爭拾金光草。騎得茅龍帶月歸。

朱應龍一首

應龍、字舜夔。一字近臣。鄞人。有東籬樂府。

明詩紀事 庚籤 卷二十六

二五八三

靜志居詩話東籬與沈明臣葉太叔盧溥齊名號明州四傑乘月飲海上大醉爾死其短歌行云皎皎月明駕言宵征唯君之故不遑自甯說者以爲近於讖也

短歌行

人生幾何樂少憂多彼逝者日如江如河一解當以謠莫如心勞何以忘憂唯有松喬二解我思故人在河之瀕欲往從之渡涯涉津三解皎皎月明駕言宵征唯君之故不遑自甯四解桂楫蘭舟泛彼中流今夕何夕載酒遨遊五解臨風鼓瑟中心弗鬱弗鬱者何所懷非一六解黃鵠高翔日遠故鄉徘徊中道風雲激揚七解忘其高水忘其深智哉古人實獲我心八解

嵇元夫二首

元夫字長卿歸安人有白鶴園集

贈天機上人

高僧修道處精舍與人遠樹密松關暗溪深石徑微巖扃青靄接澗戶白雲歸塵累何能斷從師此機息

立秋日蘆溝送新鄭少師相公

單車去國路悠悠綠樹鳴蟬又早秋燕市傷心供帳薄鳳城回首暮雲浮徒聞後騎喧乘傳不見羣公疏請留三載布衣門下客送君垂淚過蘆溝

靜志居詩話。長卿父編修世臣。嘉靖辛丑分校禮闈。高文襄出其門。長卿少年簡傲。獲罪嘉興。某推官坐死。文襄營救獲免。招入都。執其手語朝士曰。此天下才也。及文襄去位。乘牛車出國門。欲日始有馳傳後命。長卿之詩。蓋紀其實也。一時傳誦。謂陽關三疊。河滿一聲。無此淒楚。

吳紹奇一首

紹奇字叔甫。桐城人。有撫松集。

秋晚山寺

手攜藤杖入林巒。藥碗芝房次第看。竹徑野煙迷鳥路。寺門秋水狎魚竿。芙蓉浥露花全放。躑躅因風葉半殘。箕踞一尊懷欲遣。恐驚搖落不成懽。

吳鑽一首

鑽字汝震。鄞人。

漫興

戶外澄溪漲綠波。煖風約水動新荷。竹根稚子千頭出。昨夜前山雷雨過。

張振藻一首

振藻字去華。松江華亭人。

田按。去華詩見張懋忠客乘。

明詩紀事 庚籤 卷二十六

二五八六

呈張師聖標

山盡重關迴。霜高萬草枯。適當閒戰馬。豈爲塞飛狐。末路懷終切。清秋病未蘇。直憐歸隱計。緩急古人無。

明詩紀事卷二十七

庚籤

孫鎮十四首

鎮字甯之掖人。

瀋音集。王西樵曰。甯之擬古樂府。得其聲情。自是絕技。五古秀挺。七言歌行跌宕有氣。王貽上曰。甯之五言頗學漢魏。三謝。然自是盛唐佳境。時有桀驁之氣。浮動眉宇。七言放歌。雜之杜陵。幾難復辨。至擬古樂府等作。古曠奧衍。斑駁陸離。直與北地抗行。惜其長轡未騁。而芳蘭早凋。令天假之年。吾未測其所至也。

田按。于麟擬古樂府。爲世口實。自後齊人如于無垢。公孝與皆有緒論。以于麟好古釣奇。不能自爲一詞。至譏爲探赜騰籟之間。乃藝林之根蠹。學人之路阱。甯之生後于麟。乃能爲古樂府。古直蒼涼。自以爲今人作古語。終不似。斯其所以爲似也。近體摹倣少陵。時有奇句。選家錄明詩。無有知甯之者。王西樵教授萊州。編瀋音集。乃取甯之詩而論次之。世無西樵。如甯之者。亦埋沒於荒煙蔓草而已。

隴頭水

隴頭水。一南一北。流連四下。五步一歎息。十步一徘徊。嗟我行人。心胡以南。身胡以北。當風激波。淚下纍纍。酌彼隴水。山上傾澆之。使爾南不得南。北不得北。請與諸君鼓隴胡。我心我身兩分徂。上方依希主知

之。

擬古善哉行七解

驚風飄日奄忽沈山徘徊四顧壯士摧顏我懷殷憂悽愴無歡俯視流波涕泗洑瀾一昭昭明月陰雲四起晦跡窮山探歌芳芷寶鼎中燔奇服外緇芳香暗投誰復知矣二鼓鐘嘈嘈不如雅彈醇醪烹炙尙思綺紈金碧絳錯志在麻菅澹泊自然可以忘餐三世態反復悠悠莫測我伊有懷夜不能息引領關河慙無羽翮吐氣慷慨懼爲人識四地迴天高安有通津蹉跎久別特達無因積怨成疏緣困含辛可當奈何委望慈仁五碁壘惟傾寵極無恩古有忠誠鮮復得完瓦礫見收而棄瓊璫仰望參商悲何可言六夙駕焉薄于遊于盤六龍飛輿出入雲端俯觀下都憂心晻晻元膏玉液徒勞苦艱七

田橫島

賢豪無近圖列俠羞人下所輸隆準公逐鹿先得者豈惟齊田橫不能保宗社其徒五百人安不逃之野王侯如浮梗身世等飄瓦仗劍盡從之血流海波赭漢庭何耀煌如此高義寡萬古懷英聲臨風淚堪把

幸臺

晚登古臺上北風何蕭蕭海空蜃樓滅天廣蓬山遙漢武昔愛仙巡遊此招要稅駕當利城山川莽來朝行幄豈不華勢欲凌雲霄安期不可待龍顏亦已凋霓旌變浮煙笳鼓散鳴潮地古池館盡年深碑版消

如何千載下。雄名喪輕飄。龍去不再還。烏噉夜寥寥。惟有舊時月。依然滿山椒。

大珠石室

巍巍大珠山。其高逼星斗。衝擊聞波潮。豁爽見陵阜。白日落海上。青天挂峯首。劃然古石室。元冥何代剖。時時雲霞出。夜夜風雷走。古來棲真仙。藥室留石臼。如何縛塵纓。不見長年叟。我欲棄家遊。不知終得否。

出香山寺登南嶺下大澗晚投碧雲寺作

策杖躡南嶺。表裏望畿甸。愛此山川佳。行歌不知倦。雖無絲竹陳。頗有魚鳥翫。積翠來遠峯。白雲下長澗。偃臥春草間。好風時微扇。出谷天地開。轉徑松蘿換。煙深鳥雀集。山暝牛羊散。返照竟千里。都城如白練。的的桃李明。爛爛襟袖變。返策投珠林。鐘聲入雲漢。趺坐對菩提。恍如登彼岸。

行役二首

朝發任邱城。夕過淇水渡。落照下遠空。長楊夾廣路。水流日不返。人去亦不顧。長歎問僕夫。蒼茫古隄暮。纍纍一古塚。云是扁鵲墓。歲久荆棘生。野荒狐兔聚。悲風自天來。搖落西郭樹。日行兩舍餘。動我千百慮。何當解天刑。游仙謝巾屨。

薄海多曠野。晚入蕪城臺。冥冥孤館閉。颯颯寒風來。停車謝候人。獨坐心徘徊。瓦燈照素壁。蟋蟀吟空階。命僕沽市醪。一酌心懷開。醉來藉草臥。倏忽雞聲催。悠悠出郊郭。四望何悲哉。平原人迹稀。惟見蒿與萊。

况復年歲饑千里。但黃埃苦樂大地偏。民生信可哀。

曉起簡伯韶

醉眠簾光曙。絺衣聊試展。長嘯振松風。地偏欣迹散。依林坐理髮。還向清冷盥。潤淨華藻生。山明白雲捲。嚶嚶好鳥鳴。垂垂露珠泫。危峯落匡床。殘花覆苔蘚。念子澹蕩人。獨居誰爲遣。浮世無長生。何爲不遊衍。載酒攜素琴。經過病堪免。

徐爾行自青州來視余病。病良已。館庇意山房。旬月迫欲歸。作歌贈之。

去年冬走長安城。長安飛雪燕山平。王侯見士如見鬼。黃金爲寶文章輕。歸來閉戶渴欲死。林間病骨相支撐。徐郎驅馬青州道。高談七發雄風生。病夫起坐感離別。寒暄數語形神清。我悟浮生破千古。虛名恥與時人爭。徐郎持杯勸我酒。醉我不覺參斗橫。殘月入城銜柳色。白雲出岫和鐘聲。斗水不足活長鯨。閒情可結沙鷗盟。徐郎不住欲何往。世態乾坤兩骯髒。君年四十老書生。我今多病頭顱長。遠離重逢知得否。況乎死生如返掌。臨歧強飲數百杯。眼看落日沈高臺。揮鞭一語不能出。海邊雁斷天風來。

宿樊桐以早春遣興詩見示漫賦答之

生理何聊賴。淒其一病身。石橋煙報柳。山路鳥噓春。琴酒多妨俗。詩書卻誤人。莫言名利事。一醉落烏巾。

羣盜

殺氣生羣盜，妖氛失漢旌。黃巾橫四野，白日閉孤城。守吏無人色，蒼生有哭聲。恐煩東郡顧，垂望正含情。

秋懷

黃金臺畔草蕭蕭，碣石宮煙鎖寂寥。市駿代非遺骨盡，談天名在古人遙。平沙落月迷寒雁，荒塞征蓬走夕飈。今日悲歌徒感慨，英靈千載不堪招。

乾光殿西苑

漢家西苑接朝陽，飛闥天開倒日光。十丈珠簾垂錦繡，千年鐵檜老風霜。彤庭夜月懸鳩鵲，紫閣晴雲遶鳳凰。誰道御容深不見，鶯花猶得近君王。

陸弼六首

弼字無從，江都人，有正始堂集。

四友齋叢說：余見扇頭詩有云：「匪有魚腸堪借客，世無狗監莫論才。」余極愛之，以爲近代之詩，亦難得如此者。後題名曰陸君弼，後訪陸，乃江都人歐崙山弟子也。

盛明百家詩：陸客詩瀟灑精爽。

列朝詩集：無從老爲學官弟子，自髻鬣至老，治博士家言，伊吾與吟哦，併日分夜不少廢。又好博涉，多所撰述。廣陵爲南北孔道，結納賢豪長者，其聲藉甚。趙爾巖當事，議修正史，請徵故知縣王一鳴，故通判魏學禮，太學生王穉登，生員陸弼，入史館纂修。未上而罷。年七十餘乃卒。無從稱詩，起嘉靖末年，推尊王弇州，幾欲鑄金頂禮。弇州絃平生文字四十餘人，顧不及無從。久

之海內爭抨擊王李無從亦心動悔其少作而迄不能改也王承甫評正始堂集曰戊辰以後多染時調乙未以後乃爲隨無從詩人謂承甫前評爲確而後評未必允也

田按無從才調翩翩俊語疊出雖染指弇州尙不至如牧齋所譏

立秋前一夕夏成席上觀吳姬薛素素挾彈戲因賦長歌贈之

華堂殘暑雨失驕。輕颺颯颯吹絺袍。主人開宴呈百劇。鸞簫羯鼓聲嘈嘈。吳姬座上薛靈芸。文俠風流迴絕羣。酒酣請爲挾彈戲。約束青衫聊一試。微纏紅袖袒半構。側度雲鬢引雙臂。侍兒拈丸著髮端。迴身中之丸并墜。言遲更疾恰應手。欲發復停偏有致。五步之內態橫生。曲折回旋皆可意。珠抵金投未足憐。檐鶯幕燕驚相避。須臾收繳立徘徊。月上雕軒客未回。絲停竹罷催紅燭。更將談謔送行杯。蘭溪胡生爲我友。百藝稱卿不容口。獨傳彈射妙當年。相逢卻在燕臺邊。將軍曾鑄黃金埒。薛時爲李征蠻所鑿細馬輕弧態轉便。長安道上多游俠。若箇經過不住羈。此時爲賦春江曲。寫徧卿家小樣箋。

桐江舟中逢吳明府

春水浙西船。相逢意氣憐。白雲談塵外。芳草鬢絲前。地是桐君隱。官同茂宰賢。姓名堪自愛。莫藉衆人傳。

禪智寺送月上人歸黃山

長蘆初問法。歸去暢玄宗。一衲空山裏。孤雲何處逢。寒潭獨夜月。秋雨舊房松。回首茱萸路。相思隔暮鐘。

秋日懷龐學博

蕭蕭一徑入秋苔，束帶時愁長吏催。
旅食又看鴻雁至，家書常共荔枝來。
花邊小几聽禽坐，竹裏孤琴候客開。
千載賦成傷不遇，白頭誰惜董生才。

贈吳姬薛素素

纓絕鈿遺漏欲分，留髡送客意何勤。
酒闌明月生瓊樹，坐久流螢點繡裙。
子夜歌來猶是夏，巫山夢去總爲雲。
羞將錦字傳哀怨，清磬長依貝葉文。

贈金陵馬姬

杏花屋角響春鳩，沈水香殘懶下樓。
翦得石榴新樣子，不教人見玉雙鈎。

鄭琰四首

琰字翰卿，閩人，有二陔詩稿。

西樓集：翰卿塞上諸稿，音調道備。在王維、李頎雁行。

徐渤榕陰詩話：鄭翰卿工七言，少遊邊疆，集中多悲壯語。如馬邑吹笳烽子急，雁門獵火健兒歸。霜色欲將關樹折，河聲如帶戍樓奔。砂磧到天歸馬小，朔雲連海遠鴻低。劍戟已銷兵後火，欄樓猶泣戰時瘡。磧上陰雲連塞黑，關前落日帶沙黃。亂山獨馬嘶殘月，遠磧離鴻叫曙霜。胡騎分營來漢塚，蕃河流水到秦川。讀之有封狼居胥之志。

列朝詩集：翰卿豪於布衣，任俠，遨遊閩中，詞館諸公爭延致之。高文典冊多出其手，每閉閣不聽出。翰卿笑曰：吾具有鬚眉，安

能作三日新婦。悒悒悶死。遂跳之金陵。新安富人吳生。廷居幸舍。以上客禮之。翰卿醉。輒罵主人。呼爲錢磨。吳與其兄構訟。疑翰卿泄其陰事。文致捕置京兆獄。竟瘐死獄中。

靜志居詩話。翰卿詩名藉甚。與致超。七言近體。全得力於唐詩鼓吹者。

田按。翰卿好作狹斜遊。工於言情。邊塞之篇。尤推豪唱。

哭李大將軍

十萬旌旗染血丹。招魂夜夜哭桑乾。殘兵來拾中郎印。野鳥飛登上將壇。金獸鎖門嚴鼓角。石麟窺塚葬衣冠。至今唵答騎胡馬。猶是將軍舊戰鞍。

汪懋忠七十從軍之燕

千金紫馬百金裝。白首窮邊烈士腸。一雁正來君又去。二毛雖短劍還長。燕臺馬死崩寒日。易水魂歸哭夕陽。筋力尙堪三日戰。牙旗秋捲塞雲黃。

春日卽事

荷葉田田柳葉齊。女郎何處唱銅鞮。春衣隊遇頻嘶馬。社酒人歸盡鬪雞。二月杏花三日雨。千山杜宇一聲嗁。年華逐漸東風去。腸斷虹橋小苑西。

春日西湖卽事

蘇小門前柳帶煙。煖沙晴日水如天。杏糜供作宜春酒。榆莢分爲買笑錢。垂柳綠遮騎馬路。落花紅襯釣

魚船杜鵑不解遊人意。催盡韶光又一年。

曹子念一首

子念名昌先。以字行。更字以新。太倉人。有集十卷。

王衡維山集。以新詩聲格氣韻。大抵步趨弇州先生。

列朝詩集。以新。王元美甥。所謂近體歌行。酷似其舅者也。爲人倜儻。重然諾。有河朔俠士之風。

除夕袁中郎縣齋守歲

江左平疇白浪遙。賃春空寓伯通橋。蓬門歲計羞藜糝。花縣春情惜柳條。梳髮鏡中霜易買。寄愁天上雪難消。流光不爲浮生住。挑盡寒燈夜倍迢。

裴邦奇六首

邦奇字庸甫。聞喜人。有巢雲集八卷。

田按。庸甫詩。語新而調適。自是布衣之後。

寄題海峯蘭若

聞道幽栖處。山房傍水潄。鶴盤青嶂遠。僧臥碧蘿深。海月低禪榻。天風送梵音。西遊定何日。蘆葉渡江心。

五日獨酌寫懷

明詩紀事 庚籤 卷二十七

白髮新年長。青山舊業貧。旅懷驚節序。客計老風塵。草閣偏無暑。蒲觴別有春。醉鄉淹日月。誰是獨醒人。
夏宴彩雲洞

洞天何爽塏。溽暑得清涼。雲液傾尊綠。松風拂袖香。花開河朔宴。人醉午橋莊。樓外簫橫玉。翩翩下鳳凰。
雨坐

驅暑開松閣。鈎簾對石屏。凱風吹細雨。長日落空庭。鷗泛沙痕淺。龍歸水氣腥。塵纓都濯盡。逸興寄滄溟。
龍樹峪

踏磴扳蘿深復深。春山無處不登臨。雲盤鳥道青冥上。雨挂虹梁白晝陰。松外石壇留鶴跡。洞中山鬼作龍吟。酒酣欲擬登高賦。萬里風煙壯客心。

過呂岫雲綠井莊

巖居相訪嘯煙霞。草樹遙連石徑斜。綠酒同傾陶令宅。青山重眺謝公家。牕雲曉拂千竿竹。池水秋鳴兩部蛙。便欲從君歸舊隱。西風垂釣白鷗沙。

聞龍一首

龍字隱鱗。鄞人有行藥吟。幽貞廬詩草。

甬上耆舊集。隱鱗生有至性。五歲喪母。哭聲感路人。以憶母華生長齋。性愛佳山水。以父在所出未嘗踰百里。惟遊四明山。曾

過旬日。屠長卿有言。鑑水。隱鱗作天際。真人想。其風格可見也。

靜志居詩話。隱鱗以孝友德性聞於鄉里。初不以韻語自負。然其近體頗閒整。特少警拔耳。

訪豐吉甫

兄弟爭高臥。風煙各杜門。綠尊忘歲月。白眼睨乾坤。壁挂魚腸劍。竿挑犢鼻褌。時人未之許。捫蝨與誰論。

程可中一首

可中。字仲權。休甯人。有汶上集二十二卷。

四庫總目。可中詩亦七子末派。

過白溝河

白溝河水逝東奔。燕馬南來河水渾。原草百年般戰血。陰風半夜鬪遊魂。明堂又喜朝元后。率土空教哭聖孫。回首漫憐方正學。茫茫青史不堪論。

葉太叔三首

太叔。字鄭朗。更名亭立。改字介子。鄞人。有思煙集、藏山稿。

甬上書齋集。鄭朗五律。氣格高澹。轉造自然。

田按。鄭朗古詩。酷摹長吉。刻鵠不成。五律清矯不羣。布衣詩之有骨幹者。

夜過山陰

明詩紀事 庚籤 卷二十七

夜發山陰棹。翻思舊日經。雁空開鏡水。雨自溼蘭亭。孤燭帆前閣。千峯夢裏青。客懷牢落甚。黷鬢欲星星。

閒居

身外本無緣。逍遙轉自憐。養生感逝水。閱世學枯禪。道以閒能長。名因傲不傳。何妨居寂寞。遣興有詩篇。

久不出籬門

久不出籬門。唯堪對酒樽。是非吾自曉。險薄世難論。老坐青氈穩。貧居白屋尊。料無能報力。莫易受人恩。

安紹芳三首

紹芳字茂卿。無錫人。國子監生。有西林集二十卷。

田按。茂卿家席厚貴。闢園池。有西林諸勝。王弇州記之。詩調平適。時有清音。

月夜社中諸子飲。余水閣因誦唐人淮水東邊舊時月。夜深還過女牆來。遂用爲韻得時字。

六代興亡地。千秋絕妙詞。與君重對酒。懷古有餘思。恨逐寒潮盡。歡留夜月遲。不須商女唱。已是斷腸時。

舟中望金山

挂席經孤嶼。躋攀惜未能。塔喧棲嶺鳥。窗倚聽潮僧。煙澹暮一色。樹凋秋幾層。旅程應可計。遠浦見寒燈。

汪子建卓激父姜固孟葉茂長楚僧東明訪余西林分得來字

誅茆聊傍碧山隈。一徑松蘿窳窳開。溪鳥不驚高客過。嶺雲能伴野僧來。煙霞一壑容吾長。風雅千秋見

爾才擬借清輝招共隱
籃輿無那夕陽催

明詩紀事 庚籤 卷二十七

二五九九

明詩紀事卷二十八

庚籤

瞿汝稷一首

汝稷字元立。常熟人。侍郎景淳子。用蔭補官。遷刑部主事。歷郎中。出爲黃州知府。改邵武。辰州。遷長蘆鹽運使。以太僕少卿致仕。有問卿集。

四庫總目。汝稷集前有葉向高所作墓誌銘。稱汝稷最不喜溫陵李贄。以爲得罪名教。其識實出明季士大夫上。其詩文則未能凌跨流輩也。

涌泉庵

雲磴逶迤入。松蘿杳靄深。一燈燃慧室。萬綠覆慈林。野鷓馴僧定。寒泉涌梵音。可容塵世客。猶繫子牢心。

屠本峻一首

本峻字田叔。鄞人。尚書大山子。以蔭授刑部檢校。遷太常典簿。歷南禮部郎中。出爲兩淮運同。改福建。遷辰州知府。有屠田叔詩草。

筆精。屠田叔詩談云。近時崇尚甫解之乎。輒使啞啞。稍習聲偶。遽壽棗梨。人靡不握管城以摘詩。詩無不巧。玄晏而爲序。詩道崇尚無過今日。清風轍響。亦無過此時。

甬上耆舊集。田叔官太常典簿。因撰太常典錄。記國家郊祀大典。時比諸唐王涇郊祀錄。宋文彥博大饗明堂記。生平喜讀書。至老尙手一卷。人曰老矣奚自苦。田叔曰。吾于書。飢以當食。渴以當飲。欠伸以當枕席。愁寂以當鼓吹。未嘗苦也。起生壻子甬上。撰狀及表。自稱曰懋先生。一時詞家俱奉爲祭酒。

入會稽

會稽稱大郡。風壤舊京華。綠水滌南鎮。高城遶若耶。郡中輸竹箭。山上起官衙。但恐芳蓀歇。扁舟問浣紗。

費懋謙一首

懋謙字民益。鉛山人。以蔭官南都察院都事。就遷左樞參軍。

玉筍詩談。民益以貴公子折節下帷讀書。性又喜吟。青溪之社。民益實首倡之。又構籌筆軒。客星槎。淪茗焚香。山人墨客。延接無虛日。閩有王山人者。善寫梅。民益卽從作梅。金陵陳子野善墨竹。民益卽從作墨竹。晉江黃孔昭工山水。民益卽爲山水。皆得其意。

送朱秉器之渝州太守任

追隨白社六年餘。羨爾新詩獨起予。遠指雙旌臨錦水。先驅五馬向匡廬。江梅試煖離觴劇。苑柳迎人執袂初。重握春風更何許。涪江魚雁莫教疏。

吳稼澄四首

稼澄字翁晉。孝豐人。僉都御史維嶽子。以蔭除南光祿典簿。累遷雲南通判。有玄蓋副草二十一

卷。

列朝詩集。翁晉冠稱詩。爲弇州。太函所推許。長而掉鞅詞壇。勃窣苦心。自漢。魏以及三唐。無不含咀採擷。然而遊汪。王之門。風聲氣韻。多所熏染。求其超乘而上。則未能也。

靜志居詩話。翁晉樂府。如健兒騎駿馬。左右馳突。靡不如意。近體頗合西崑。

礦山謠

礦商聚中野。各各不相下。珍寶餽中官。黃金餽主者。淘沙千金得。銀百公私費用兩無益。詔書來。詔書來。中官忽變置。主者顏色如死灰。山頭血出金氣死。誰作封章報天子。

聽馬

青驄白玉鞭。綠草去翩翩。夜月隨公子。春風逐少年。驕嘶垂柳外。顧影落花前。何日征驍虜。長驅赴朔邊。

同溫長卿登金山

江勢搖坤軸。江光沒島痕。微茫窮四表。突兀見孤根。疊嶂連京口。驅濤入海門。同遊指奇絕。落日更開尊。

代寄徐仲容

秋雨蘇蘇滴井梧。風吹妾夢到東吳。生來自恨青溪近。獨處無郎似小姑。

田藝蘅一首

藝衛字子秬。錢唐人。副使汝成子。以歲貢爲休甯教諭。有田子秬集二十一卷。

四庫總目藝衛在嘉隆間猶爲博洽而詩格頗嫌允漫。

列朝詩集子秬十歲從其父過采石賦詩云白玉樓成招太白青山相對憶青蓮寥寥采石江頭月曾照仙人宮錦船。

戎政府

大將新開戎政府。門外列校如狼虎。團營十二坐指揮。此生焉能與噲伍。咸窻旗偃虜騎來。咸窻旗出虜騎回。九廟震驚本兵死。帳中歌舞方行杯。寵錫如山印如斗。君恩愈深臣愈負。兔窟深藏屠酷兒。駝韓屢納單于婦。平頭奴子腰盡黃。不獨秦宮花底狂。內家珠玉耀權室。錦衣目側咸中傷。猿雞飛去癰疽潰。病疽發時室中有物如白猿白雞飛向西北去謂是其夫婦生肖也。曾公夏公來作祟。疾革時自言見兩公來索對若漢武安侯事。西湖一莊不忍捐。帶礪山河片言墜。劈棺慘屍梟九邊。嬌妻稚子稟街懸。誓書未及傳三策。血食甯知絕九淵。郿塢空爲萬年計。落花滿地朱門閉。雞鳴狗吠散如煙。寵姬給配功臣第。就裏尤誇俞七兒。新人重事尙嬌痴。鬧裝寶束今何許。玉帶曾勞妬柳枝。七兒姓俞氏家奴洪定女也爭繫玉帶圖其嫡洪不與乃自製七寶鬧裝金束其值蓋巨萬計云。

田按子秬戎政府一篇詠咸甯侯仇鸞事也詳見舟州將軍行

袁應福一首

應福字華字貴陽人官來鳳知縣有漁磯詩草

點詩紀略華字詩亮節清音獨具風格

歸來

歸來無一事。花竹伴吟身。落日清秋暮。荒園叢菊新。病憐高興減。老愛舊書親。猶有忘言趣。停杯望可人。

潘光統二首

光統字少承。廣州順德人。以貢入國子監。除光祿署丞。有滋蘭集。

秋望

越王樓閣倚蒼巒。別苑離宮草樹殘。正朔已非秦日月。朝臺猶憶漢衣冠。風生禾黍樵歌歇。秋入關河夜柝寒。閒倚青萍時極目。不知何處是長安。

閨怨

幽人畏人知。深閨獨閉時。莫令秋月入。照見妾空幃。

林世吉一首

世吉字天迪。閩人。尚書燦子。以蔭官戶部郎中。有叢桂堂集二十卷。

挽法偉上人

杪秋經古寺。一徑掩蒼苔。說法人何在。參禪客獨來。溪雲侵講席。山月暗香臺。塔下菩提樹。猶傳手自栽。

杜開美三首

明詩紀事 庚籤 卷二十八

二六〇五

開美、字袁度。上海人。用薦除文華殿中書舍人。有秋水、遠遊、扣舷、貂裘、潤州、白門、敝帶、行藥、蝸甲、閒居諸草。

訪王延年不遇

端居寡歡。攬衣出西郭。緒風吹我衣。水田曠漠漠。眷彼中林士。埋照臥邱壑。雙扉晝不開。白雲抱幽閣。獨往不知處。青天騎野鶴。

茅山抵家有作

青雀西飛千里行。江春兩岸聽颺鶯。拾將瑤草尋仙侶。開徧山花送客程。偶去暫違黃浦月。歸來仍傍赤烏耕。入門把臂紛相問。爲說煙霞棗裏盈。

客舍苦雨

卽看春草綠。知長故園薇。爲語留晴色。征途伴客歸。

邱峻一首

峻、字惟高。桐城人。貢生。官始興教諭。

畫山水

翠滴松梢雨乍收。山光半爲白雲留。江邊可惜無人住。閒卻蘋花一段秋。

顧從義一首

從義字汝和。上海人。以善書授中書舍人。遷大理評事。有硯山山人詩稿。

田按：汝和頗稱好事。家有玉泓館。摹宋本淳化帖藏之。名重於時。多藏法書名畫。香光稱汝和所藏。以顧愷之女史。李公麟滿湘九歌。蜀江四卷爲最。入本朝。先後歸內府。爲石渠寶笈著錄。

和張長輿西園白雲塢

古巖多莓苔。修篁潤几席。往來無雜賓。白雲自朝夕。

趙士亮二首

士亮字汝寅。掖人。貢生。官東安知縣。有龍溪草。

濤音集。王賄上曰：丹澤與孫甯之。宿樊桐鼎立一時。秋輿塞上諸篇。已造境地。田按：玩秋輿一篇。似汝寅鼎革後尙存。

蓬萊閣

東望蓬萊近。十年思一遊。今知滄海大。始信九州浮。赤日波中浴。青山水上流。荒城潮汐苦。晝夜打濤頭。

秋興

王氣鍾山近。有無金陵自古帝王都。松杉猶帶前朝色。臺殿時思佩玉趨。蒼鼠晝冥翻碧瓦。荒苔秋老鎖瑯鋪。石城北地秦淮水。想像當年入霸圖。

劉繼善一首

繼善字元卿寶應人貢生除鎮江訓導有掩關集二卷

田按掩關先生爲余友震青侍講□世祖訓導鎮江砥礪士行力任名教子永澄以名行著世德清門至今稱之

白賦

白田居士老青氈四壁蕭蕭別有天
舊積圖書消日月新成詩句媚林泉
鴻賓燕侶看來往滄海桑田感
變遷荒徑客來留共醉阮生那惜杖頭錢

明詩紀事卷二十九

庚籤

邵正魁一首

正魁字長孺，休甯人。國子監生。有梁園、燕臺二集。

玉筍詩談：長孺客金陵，入青溪社。一日訪予官舍，會雨雪，余遣騎送之，因就社中作雪中借馬詩，遂爲一時佳侶。

贈朱孟震入覲

郡侯不與省郎同，倒屣猶存下士風。詩自中和稱益部，社會淪落問吳宮。時名海內千金重，世事尊前一
笑空。霄漢憐才公等在，豈堪結侶五湖東。

周才甫一首

才甫字文美，永嘉人。有雁川集。

玉筍詩談：周山人才甫，隆慶辛未入青溪社，喜作梅，每對客，酒間命筆，殊可人意，又自爲詩其上，詩才亦秀逸。

送王按察四川

憲府開西極，分符重地曹。帆前春樹遠，天上法星高。旌旆懸三峽，圖形按六韜。君才堪賦蜀，萬象待揮毫。

方問孝十二首

問孝字胥成歙縣布衣有蒼耳齋集十七卷

田按胥成與邢子愿遊子愿集中有與萬伯修書云兩年間凡託兩布衣爲郵一爲京口章廷綸一爲歙州方胥成二君畫法詩篇庶幾擅代蓋章以畫名方以詩名也胥成近體開朗雅有唐音

嚴先生祠二首

子陵恥縈爵所志在山澤長嘯歸富春一竿輕萬石雲來灘水暗月上苔磯白漢鼎今何之先生有荒宅漢室榮諫議先生懷隱情不重一時祿但釣千載名山從石瀨合江至桐廬清悠悠人間世所以稱先生晚別周丈人

征途謝送者駐馬聞寒鐘落日有離色浮雲無定蹤憂人身易老夫子道難容明發兩相望秋山深幾重之秣陵作

擊楫出京口天南望帝鄉江從瓜步闊山入秣陵長落雁下寒浦遠波吞夕陽濯纓如可適吾道亦滄浪歲暮都城送方兵憲仰之赴嶺南二首

闕辭雙鳳下城指五羊東道路還鄉遠山川過嶺雄蓋飛炎徼雨旌捲瘴江風遙識兵威肅天南百寇空借問征南路迢迢幾月中雲迎漢使節山遶尉佗宮風色旌旗變軍聲瘴癘空遙傳霜雪少不與帝京同

秋日濟北送修法師還南海

來吳今去魯。南國事金仙。雨重尋山笠。潮高泛海船。千峯投暝寺。一鉢乞寒泉。後夜青天外。虛空處處禪。

歲杪留別邊翼卿

朔風燕雁滿汀洲。千里鄉心急暝流。時序又驚殘臘至。山川不是壯年遊。雲平海樹吞淮浦。雪暗江天失潤州。長劍角巾東路遠。貧歸誰憫黑貂裘。

晚次秋浦

蘆葦蕭蕭有雁聲。夕陽旅泊最傷情。江湖到處飄萍梗。身世無人識姓名。三楚風高寒葉落。九華雲盡晚天晴。誰憐宋玉悲秋甚。一段新愁賦不成。

送人謫宦楚中

天南何處動相思。暮雨蕭蕭斑竹枝。雲夢草生歸雁盡。江潭花落逐臣悲。芳洲白芷堪爲佩。去國青山好賦詩。早晚恩波還北闕。如今不是賈生時。

長干行

帆落潯陽口。鳴箏試一彈。隔船相問訊。同是住長干。

送春詞

病酒還沽酒。傷春復送春。君看惜花客。不是少年人。

梅守箕五首

守箕字季豹宣城諸生有居諸前後集

弇州山人續稿季豹五言於漢魏時離時合而其合者并其氣度色澤得之

靜志居詩話梅氏一門羣從禹金最貴時名嘗後先過王元美元美贈之詩云從誇荆地人人玉不及梅家樹樹花季豹爲禹金從父雖譽稍遜然詠懷諸作恐小阮亦當避席也

田按季豹古詩氣駿而聲亮視質古者有上下床之別

送王博士返貴陽

驅車出北門。與君爲別離。攜手立徘徊。涕下忽交頤。涕下勉自匿。情至不能辭。嬾婉念舊歡。契闊成新悲。山海萬餘里。浮雲亦難期。縱有肅肅羽。臨風恐退飛。願爲阜下塵。從君以驅馳。

古詩

北風何蕭蕭。素雪相與期。寒氣時總至。歲月忽已違。久客在他鄉。愁寐中心乖。登高望不極。誰謂可當歸。我歌式微篇。涕下沾裳衣。

古意

自與君別者。日日臨高臺。雲天望不極。江帆安在哉。夜雨和淚積。秋風兼愁來。寒帷幽夢曉。落葉紛相催。

清溪館贈詩

郎豔解歌白石曲。懊儂故作清溪辭。心招暗託調絃思。目成自有將花時。能憐繫馬疏柳外。長恨噓烏高樹枝。獨眠無夢不易旦。雙笑有情多失期。葛根爛漫藕生孔。何處對面空相思。

破鏡詩

嫌名驚異獸。殘照委空房。不復圓光影。能窺半面粧。初弦臺上月。出匣枕邊霜。若問隋朝事。猶令人斷腸。

豐越人二首

越人字正元。鄞人主事坊孫。有天放野人集四卷。

甬上耆舊集。先生嗜學工詩。寄情蕭散。杜門散髮。翛然於修桐疏竹之下。輿到輒詩。素筆直書。破窗頽垣俱滿。客時過從。至無從覓巾襪。所深知惟沈嘉則。楊伯翼。先賓父數先生。性不喜交。蓋上人。常見一時山人行卷。輒唾之曰。詩以道性情。豈爲汝輩行乞耶。先生詩。有林泉無市朝。有懷巾無響頌。有流連無褻慢。盡洗詩家之陋。

南峯

石磴盤空翠。炎風入座涼。滄溟流日采。青壁抱霞光。野樹侵吳密。江潮過越長。從來畏登眺。霸業幾銷亡。

山居

疊嶺分遙海。重湖逼太清。地幽無過客。春盡有啼鶯。徑轉垂蘿合。雲流大壑平。綠畦風蔓引。丹嶂石泉縈。

俗朴惟傳姓。花繁不辨名。由來山水趣。長此事岩耕。

欽叔陽一首

叔陽字遇公。吳縣學生。入國子監。有集。

稅官謠

千人奮挺出。萬人夾道看。軒爾木。揭爾竿。隨我來。殺稅官。

靜志居詩話。太監孫隆以督織造駐蘇州。朝廷方起稅額。惡少年行賄充委官。乘輿張蓋。勒索商稅。民不堪命。崑山人葛成率衆二千人。分作六隊。一人搖蕉扇前行。後執挺隨之。知長洲縣事鄧雲霄見民情洶湧。愾委官頭目。械於玄妙觀。衆立毆死。裂其尸。知府朱燮元勸諭。始得解散。此萬歷二十九年事也。時葛成慷慨就獄。後得宥罪。又二十餘年。而有顏佩章等。實先啟其兆云。

吳元樂一首

元樂字振之。休甯人。

山響閣讀畫錄。振之善琴。工畫。筆法古勁。不落窠臼。每作畫。輒操琴一曲。然後揮毫。

讀劉孝標傳

辨命有深論。虛達明主前。獨比馮敬通。可爲識者憐。三同誠有之。四異有未然。患隨秋草沒。聲迹永無傳。

秦植一首

植字子培。無錫人。有清湖前後集。

和牧之廣陵遣懷

當年薄倖誤青樓。載酒重來悵昔遊。二十四橋明月滿。斷腸容易是揚州。

秦延勳一首

延勳字允元。無錫人。

送人歸梁溪

故山不可卽。遠望慰離羣。末路誰知己。臨歧更送君。歸心千樹雨。秋興五湖雲。好待東籬下。黃花醉夕曛。

吳明珍一首

明珍字季重。休甯人。

山中作

我本山中。人但識山中話。五月賣松風。人間恐無價。

吳伯敬一首

伯敬字長輿。宣城人。貢生。有綠潤園集。

贈程山人彥之

年少才名洛下聞。偶從花外挹清芬。遠遊不飲新安水。大隱還依笠澤雲。病借青山供起色。愁添征雁重離羣。卻憐寒氣侵衣袂。縞帶無能一贈君。

梅士勸一首

士勸字勉淑。宣城人有唾餘集。

柏槻

八年重一到。山色尙蒼蒼。勝地應停騎。佳遊夙裹糧。虹梁飛木杪。雲瀑冷窟光。昔日題詩處。藤蘿幾尺長。

王環一首

環字尙玉。宣城人有蠮螋集。

嶺南留別豫章夏生文煥

幾年筆硯共炎方。忽唱驪歌別五羊。荳蔻枝長方接席。菰蘆家在又還鄉。離亭曉送鷄聲月。客路秋分雁背霜。龍劍異時當合并。敢云潮不到潯陽。

袁鶴聲一首

鶴聲字汝明。宣城人有鶉居集。

翠雲菴和陳山人韻

仙剎絕紅塵。因君叩白雲。石梯緣竹上。樵徑入林分。地僻人稀到。溪深鹿自羣。支公有妙理。得向靜中聞。

鍾薇一首

薇字面溪。松江華亭人。

秋日宿塔院

水國氣先涼。地深塵鞅絕。殘經散不收。空庭舞黃葉。

馬懋勳一首

懋勳字四銘。桐城布衣。

山行

過山聞犬吠。望望有人家。遙見翠微裏。開門墜落花。

馬之瑜一首

之瑜字君璧。桐城人。有湖上草堂詩鈔。

九日書感

歲事三秋老。新悲兩鬢華。壯心銷白酒。愁眼對黃花。海內兵戈滿。江邊賦稅加。可堪驚婦子。無計守桑麻。

錢可久一首

可久字思畏桐城人。

西郭趙園

逆旅經時久。芳郊載酒頻。常因看花處。憶得故園春。筍迸籬根出。萍浮水面新。灑然逢一笑。聊爾任吾真。

齊鼎名一首

鼎名字重客桐城人。按察使之鸞孫。有蒯緱集。

登嶧山

策杖度崑巒。星辰掌上看。丹爐黃葉合。碧殿白雲寒。夏貢孤桐老。秦碑小篆殘。振衣凌絕頂。選石坐盤桓。

姚之邁一首

之邁字汝碩桐城人。有來青集。

送友人之粵東文幕

竟上越王樓。真成萬里遊。瘴雲隨地起。蠻海接天流。花放四時燠。文從五嶺收。鄉心莫易動。酒破鷓鴣愁。

朱廷佐一首

廷佐字南仲吳人。徙居金陵。有春雨堂集。

僧江靈巖登雨花臺小飲

暫快披襟願。涼風滿澗阿。好山連郭近。名士過江多。世事屢遷變。吾生惟嘯歌。登臺聊騁目。不惜醉顏酡。

卓發之一首
發之字左車。瑞安人。有渡羅堂集。

秦淮竹枝詞

楚歌湘曲未須哀。遙見燈船趁月開。長笛叫雲簫咽水。百千神女弄珠來。

汪宗孝一首

宗孝字景純。新安人。

金陵詩徵。景純江左大俠。憂時慷慨。期毀家以紓國難。卜居白門城南。築樓六朝古松下。好蓄古書畫鼎彝之屬。妾孫靈光善鑒別。王伯穀稱之。以爲今之李清照也。

和陳夫人牡丹詩

深葉繁枝庇苑牆。朱顏贏得配花王。風迴關盼筵間態。日映楊妃醉後粧。嬌豔由來稱覆錦。唐李進賢有牡丹覆以錦。
禮華應許傍沈香。也知春盡饒清賞。燒燭相看更斷腸。

許經一首

經字令則。松江華亭人。

明詩紀事 庚籤 卷二十九

田按。令則眉公弟子。詩多俳體。時能作才子語。

四印堂夜集觀姬人紫雲歌舞卽席賦贈

錦蠟屏圍淥水聲。上元時節遽聞鶯。不知杜牧才多少。直向當筵問姓名。

陸應陽二首

應陽字伯生。松江華亭人。有鳴雁、采薇、陸萍、香林、桃源、河上、荆門、白門、武夷、五茸、笏溪、問雪、懷舊等集。

露書。陸伯生作詩。首首有鴻雁字。章元禮因呼爲陸雁。

田按。伯生爲申吳門客。善書。亦自矜其詩。沈虎臣痛詆之。謂其無一致語。然詩亦時有可采。

歲暮東歸道中志感

蕭條歲云暮。獨客返寒塘。尙守青氈舊。空令白日忙。潮喧孤棹急。鵲噪野田荒。自歎飛蓬迹。羞言志四方。

鄭州旅次用壁間陸君策韻

朔風吹落九河陰。處處寒衣急暮砧。一望薊門黃葉滿。始知秋向客中深。

明詩紀事卷三十上

庚籤

吳魁一首

魁字希元。歙人。有梅臞吟稿。

春感

社信未傳燕子。春愁又逐楊花。消得幾番風雨。草塘處處鳴蛙。

吳鎮一首

鎮字時守。歙人。有柏崖稿。

元日

架上書添新日歷。瓶中梅插舊年花。幽懷一段無人會。雪水爐邊自煮茶。

王勣一首

勣字汝嘉。南通州貢生。

城北樓登望

明詩紀事 庚籤 卷三十上

騁望孤城北。春雲雉堞高。年華新白髮。草色舊青袍。樹接天邊路。山連海上濤。憑闌無限意。落日首重搔。

江一山一首

一山字子雲。海門人。貢生。有雙蓮閣集。

園居

緩步向林麓。支筇對晚山。片雲心共遠。獨鶴意俱閒。花底清尊倒。風前倦鳥還。昨非今覺是。已愧鬢毛斑。

王醒之二首

醒之字夢叟。南通州人。有仙夷草。怡雲館集。

獐婦

盤頭烏絲雲不理。丫簪貼鬢鬢生耳。短衣褶裙跣足行。手把桐花腰繫蕤。三三兩兩入城闈。賣歌賣笑不畏人。侏侏亦解作華語。自言家是納糧民。獐婦獐婦花纂纂。交州市上春風緩。谿深簞密踏唱歸。竹籬開處郎相攜。

泊銅陵見月

縣繞千山出。銅陵舊有名。江聲時鬻岸。嵐影欲過城。貰酒從村市。逢人問水程。離家秋思遠。兩見月生明。

湯有光四首

有光字慈明南通州人有慈明集

山英社詩品慈明詩如西人造神仙酒醴水既備頃刻而成可以供一時之歡笑然味則近市難饜蘭陵之口

田按慈明入范吳羽山英社近體時有警動之作

送黃華父之嵯縣

一尊江上別。江色引仙槎。夜雨錢塘樹。春風嵯縣花。山將官舍繞。柳向驛門斜。念我耽遊賞。相期過若耶。

送王少微歸吳

西風吹不斷。萬里秋冥冥。楚地一尊盡。吳天片雨青。飄零遊子計。江海少微星。回首扁舟遠。離鴻不可聽。

廣陵寒食

邗江江頭拾翠行。薄羅初試東風輕。一百五日寒食過。二十四橋春水平。夾隄新柳綠於酒。何處短簫嬌若鶯。醉歸人向娼家宿。燈火滿街聞賣錫。

靈谷寺道中

紫翠逶迤路幾重。青山面面削芙蓉。雲連內苑城邊樹。風送南朝寺裏鐘。御道人過時下馬。孝陵王氣日成龍。一尊到處俱堪醉。回首斜陽隔萬松。

葛幼元四首

幼元原名增字士修南通州人有海居集二卷浮槎集一卷行藥集一卷倚劍集二卷

陸弼正始堂集士修詩瓌詭跌宕雄視淮以南

一經堂詩話士修薄遊廣陵時南海歐植伯主竹西壇士修奉之爲師其詩專講聲調恪守師說斷斷不失尺寸

復歸江上別業

獻策適不用歸畊猶薄田狂矜吾舌在名讓衆人先野鳥窺新屋江梅發舊年畫眉原不嫵安得使人憐
自青霞館移居北屯草堂卽事

秋色澹然淨蕭蕭清客魂庭閒時度鳥樹老不遮門澤國平蕪斷殘陽遠水昏不妨蕭瑟甚幸免市嘲喧
茱萸灣遲黃使君希尹

湖上落葉盡客行今未歸青楓官舍冷華髮宦情微淮水日愁望薊鴻秋不飛浮雲那可問淚滿逐臣衣
江上送客

南去扁舟一葦輕焦公壇下暮潮生憑君莫奏箜篌曲楊柳春雲無限情

黎密一首

密字縝之番禺諸生有籟鳴集

古意

美人北窗下。含情揮素琴。上絃別鶴怨。下絃哀猿吟。一彈再三歎。悲來中輟音。帝子渺何處。瀟湘雲正深。

蘇景熙一首

景熙字汝載。廣東順德諸生。有桐柏山房稿。

空城雀

空城雀。何不飛去啄食玉山之禾穗。卻向空城拾螻蟻。螻蟻雖微。亦自愛其生。可惜城中人。闔室屠官兵。官兵殺人不殺賊。擂鼓椎牛縱劫勒。

朱完三首

完字季美。南海諸生。有清暉館稿。

廣東詩粹。歐子建云。季美居粵城北郭之虹岡。栽竹數萬竿。梅數百株。閉門自娛。而問字索書者不絕。詩清婉有致。

山岡漫興三首

繞屋桑田百畝。當門松樹千株。牆東牆西蝴蝶。山北山南鷓鴣。
石上風搖薜荔花。間雨滑蒼苔。新蟬響斷還續。暮鳥飛去復來。
石上流泉飲鹿雲中茅屋鳴雞。幽人策杖何去。採藥菖蒲寺西。

范之默二首

之默、字仲宜、寶應諸生、有我有軒集。

虎邱坐月逢雙梧禪師清話

月滿千人坐。登歌欲二更。清池搖劍影。蒼樹出鐘聲。悟石那成幻。開山此得名。因君析禪理。深自愧浮生。

乞菊

半生獨抱陶潛好。疏懶全無樹藝功。欲向君家乞名品。酒杯詩卷答秋風。

鄭爾忠一首

爾忠、字孝初、寶應人、有淮海、西遊、書柿齋、鷺音等集。

湖上

西風蓮葉渡。秋水蓼花灘。終日無塵鞅。生涯有釣竿。村醪濃似乳。溪蟹大於盤。有興聊孤酌。陶然詠考槃。

廖孔悅三首

孔悅、字傅生、上元諸生。

田按、傅生七絕、翩翩逸調。

偶集

春雨霏霏溼酒卮。滿堂紅燭對彈碁。主人先醉非無意。愁見更闌客散時。

訪道士

露草煙林斷客行。竹扉晝掩對高城。道人不受人天供。消受秋空鶴一聲。

酒家同彥先

苦說傷春還餞春。夜深鷓鴣對沾巾。綠陰村酒城南市。同是尊前白髮人。

陳鳴鶴三首

鳴鶴字汝翔。懷安人。有泡菴詩選。

東南嶠外詩話。汝翔萬歷中諸生。棄舉子業。與謝在杭及徐與公兄弟共攻聲律。凡三十年。有東越文苑六卷。閩中考一卷。著錄四庫。其詩名泡菴集。卽與公所選定也。七絕最佳。

馬崑驛

春雨梨花暗馬崑。霓裳聲斷不勝哀。烏鷓劍關空相憶。人去驪山竟不回。驛路幾時迎翠輦。佛堂千載閉蒼苔。多情惟有華清月。還照宮中歌舞臺。

沖祐觀

吸露餐霞絕世氛。石壇親見武夷君。漢家天子多煙火。卻把乾魚污白雲。

古戰場

連天殺氣壓黃雲。鬼哭啾啾叵耐聞。日暮亂鴉爭白骨。不知誰是故將軍。

陳宏己二首

宏己字振狂。閩人。有蘆中馬東諸集。

泊黃山驛示王吳二宰

古驛黃山下。孤舟綠水涯。逢人盡鄉曲。獨客似還家。

苦竹派

明月沙頭苦竹青。鷓鴣嘯罷水冥冥。嶺南行客腸休斷。不似黃陵廟裏聽。

鄧欽文一首

欽文字徵甫。江陰人。有倚竹紀遊二集。

詩數。延陵鄧欽文詩素不知名。戊辰春。余同黎惟敬諸子遊西山。歸各賦詩。鄧所作一首。特精工冠一時。

臥佛寺

佛臥何時起。空山日月低。花從開智慧。樹幾長菩提。世事浮雲夢。吾生待指迷。白毫如可卽。香象復來西。

董養斌一首

養斌字叔允。國子監生。有董叔允詩。

送人之咸陽

念君何所適。鞍馬向關中。驛路三千遠。河山百二雄。月明秦廢苑。花落漢離宮。惜別魂應斷。悠悠渭水東。

王應岳一首

應岳字重甫。侯官布衣。

送鄭景愛

淒淒風雪裏。之子欲何之。惜別一杯酒。重逢是幾時。霜寒雞唱斷。天遠雁行遲。隴上梅堪折。憑誰寄所思。

許樵一首

樵字巖長。莆田布衣。

露書巖長詩。酸楚流利。雖少含蓄。不失爲雅門鼓琴。

蘭陔詩話。巖長與同里吳元翰、張隆父、林希萬、黃漢表、盧元禮、高彥升、陳眉之、林彥式諸君結北山詩社。

社期阻雨有懷遠遊諸丈

幽期今日到清溪。白社雲深入望迷。驟雨斜風人聚散。青山綠水路東西。三春飛雁書來少。一別平原草又齊。此意蕭條鶯不解。閒關猶自隔林蹏。

劉潢一首

潢、字師藩。上元人。有檀橋集。

舟行至蘭陰

澤國蒼茫景。扁舟接遠天。江明潮帶月。山暝樹生煙。橋燕時留語。沙鷗自在眠。風餐兼水宿。旅夢動經年。

鄒景賢一首

景賢、字孟淑。上元貢生。

題宋田子濟畫雁

五國城邊白草秋。蒼茫艮嶽夕陽愁。帛書誰繫天邊雁。空向昇州憶汴州。

沈啓元一首

啓元、字端伯。六合人。國子監生。

永定寺

幽尋不憚遠。薄暮興還乘。敗葉鳴羅徑。霜花落豆棚。片雲閒對客。獨鶴懶依僧。更有東林約。今宵宿未能。

陳仲漆一首

仲漆、字惟秦。懷安人。有陳惟秦詩。

列朝詩集。惟秦詩苦求工。不愜意不止。每出其詩示人。以手按紙。手顫口吟。人或誦其詩。口喃喃與相應。其自喜如此。

蘇小小墓

渺渺江天響暮潮。西陵黃土葬妖嬈。錢塘不是高唐路。油壁青驄總寂寥。

王崑仲一首

崑仲字玉生。閩人。禮部儒士。

金陵懷古

栖霞高嶺翠煙凝。玄武湖光似鏡澄。古渡遠迎蘭槳妓。名山深閉瓦棺僧。藻蘋歲歲功臣廟。松檜葱葱太祖陵。欲問六朝何處所。都人惟解說龍興。

陳邦注一首

邦注字平夫。閩人。有釣磯集。

古意

郎住橫塘東。妾住橫塘西。相思不相見。橫塘青草齊。

康當世一首

當世字孟擔。莆田人。

夏日睡起

明詩紀事 庚籤 卷三十一

山窗無處不藤蘿。欲賦閒居奈懶何。不信昨宵春已去。起看池上落花多。

姚貞一首

貞字元亮上元人。

別業

枳籬別業結山鄰。幾几明窗絕點塵。檻竹報晴仍帶雨。瓶梅裹凍固留春。彈餘綠綺茶聲熟。臨就黃庭墨
暈新。門外一溪通釣畧。半邀酒客半詩人。

陳椿一首

椿字汝大閩人。有景于樓集八卷。

感秋

素月出東壁。涼風吹我襟。中夜不能寐。披軒彈鳴琴。物化有代謝。隙駒無停陰。勛名在盛年。卽事感何深。
燕石旣混璞。驪珠復淵沈。誰收爨下材。一以徵黃金。

洪寬一首

寬字仲章莆田人。

露書。洪仲章謂詩須弄韻。畫須弄墨。書須弄筆。亦必能弄韻。能弄墨。能弄筆。始臻佳境。

夏日同徐茂吳、臧晉叔、錢叔達遊西湖分韻。

丹嶂看疑畫。平湖望若空。層巒青靄外。古剎白雲中。水淨菰蒲綠。林幽木槿紅。風光已可樂。况復故人同。

何體性一首

體性字其容。廣州順德人。有朗吟軒稿。

有所思

浮雲西北馳。逝水東南去。有客正傷離。佳人在何處。烟消江練闊。淇淇青楓樹。日暮渺愁予。疏鐘度微雨。

王同軌一首

同軌字行父。黃岡貢生。除江甯知縣。遷南太僕主簿。有蘭香集。

列朝詩集。行父嘗從吳明卿出遊。與王弇州、李雲杜善。作詩不多。自有風格。不欲寄諸公籬下。撰前後耳談。纂述異同。亦洪氏夷堅之流也。

赤壁樓上同弟綏父陪劉維芳雨集

登樓披秀色。尊酒暫從君。檻集千峯雨。窗流滿榻雲。魚龍寒自蟄。鴻雁暮爲羣。共醉空明上。人間世界分。

徐益孫一首

益孫字孟孺。松江華亭人。國子監生。

漱六齋集孟孺申楮握筆真兩京六朝之遺

田按孟孺名列弇州四十子余從屠長卿由拳集見孟孺序文具有六朝人風致徧檢諸集無有錄孟孺詩者後於松風餘韻獲詩一篇亟登之孟孺非惟擅文藻且有至行母卒結廬墓側作文暫墓不復應舉年未五十卒惜遺集不傳

春日登潮音閣

崇閣俯滄洲。乘春獻歲遊。鳴榔魚網集。倚檻水雲流。龍藏涵虛迥。禪扉入定幽。錫飛逢惠遠。相對狎沙鷗。

周如塤一首

如塤字所諧莆田人

筆精所詣甯處士也。足迹不出戶庭。苦吟弗輟。未嘗妄與顯者遊。故其爲詩。綽有林壑之致。如風生極浦。潮常白。霜冷空林。草變衰。萬里寒山。橫積雪。半汀衰草。隱斜陽。百花潭上。漁竿在。五柳門前。鷓徑荒。因嫌城市非吾土。卻傍漁家作比鄰。牆壓花枝妨客過。泥濘苔徑喚人扶。等句全無煙火食氣。

田家吟

不識市朝車馬喧。殘蓑籬笠老田園。柴門去郭無多路。野竹臨流自一村。春雨桑麻終歲足。清時雞犬幾家存。兒孫牧畜南山下。爲道須妨猛虎繁。

梁士奇一首

士奇平陰諸生。有樂府雜詩。

山行

蒼厓老樹長千尺。挂著山精薜蘿衣。紅葉黃花惜日晚。溪風山雨送人歸。

林元協一首

元協字子彥。太平人。

聞詔起遷謫諸臣

金雞飛詔下長安。逐客逢時又拜官。投杼固知人語誤。賜環真見主恩寬。十年孤憤朱雲檻。一日清塵貢禹冠。獨倚高樓瞻魏闕。浮雲散盡露溥溥。

毛子亨一首

子亨字懷士。太平人。

貧居

昨夜風吹茅屋破。衾寒被澀不得臥。朝來縮頸怕出門。道旁老狐見人怒。山南荳苗半枯死。抱甕欲汲溪無水。咽乾喉急暮來歸。小兒索食牽我衣。

蔡鈺一首

鈺字邦奇。太平人。

歲暮粵歸

蒼陽石上花不發。歲晏他鄉歸去來。妻子嗔予淹道路。田園今日長蒿萊。不憐髣髴經時短。只訴饑寒到骨哀。喜有高松夾窮巷。柴門依舊對山開。

鄔佐卿一首

佐卿字汝翼。丹徒人。有纏頭集十卷。

筆精。汝翼性豪爽。喜遊俠邪。著述甚富。自文集外。有豔詞十卷。題曰纏頭集。皆生平贈妓之作。佳句麗情。可歌可詠。笛中舊恨。留金谷。天上新愁。問玉卮。江柳眉梢雙鎖恨。海棠春盡獨銷魂。寶鏡夜寒鸞顧影。畫梁春煖燕歸樓。妝粉曉沾蝴蝶草。囀紅春染杜鵑枝。鬢梳蟬影分雙翼。衣翦靈綃學六銖。小閣題情絨豈惹。空庭微步出蓮花。樓前彩鳳隨仙史。陌上銀箏悞使君。春回漢水思捐佩。月滿秦宮照捲衣。玉樹輕霜凝風戍。垂楊新月挂鞦韆。楊柳調翻歌扇月。柘枝香度舞裙風。明月小樓關盼盼。垂楊深院李師師。等聯。膾炙尤甚。義山無題之後。亦不多見也。

宮詞

複道傳呼御輦過。遙聞仙樂動雲和。黃金縱買長門賦。逝水終慚太液波。

顧斗英三首

斗英字仲韓。上海人。有小菴羅集六卷。

筆精。華亭莫廷韓。上洋顧仲韓。皆奕奕才情。盼倩辭麗。稱雲間二韓。廷韓文名滿天下。仲韓詩僅有存。人莫能名者。仲韓少有

雋才磊落不羈。窮服饑餓聲色。選伎徵歌。座客常滿。日費萬錢不恡。每出輒載輿。俱畫舫。旅棹盆卉圖書古尊壘畢具。竟以此傾父賞。鬱鬱貧病以死。余薄遊海上。始知有顧仲韓。而墓草宿矣。詩多憐風月狎池苑。大都流靡以自妍。傷其才而不遇也。

臥病感懷

較稽還復懶。擬庾更多愁。拙笑安蛇足。癡真類虎頭。捫胸開五嶽。搖筆吐千秋。不解干人策。文園豈倦遊。

送僧入關

西竺初傳法。東林復閉關。齋心修白業。投老寄青山。彌勒分龕坐。闍黎乞食還。自應無退轉。玄論許誰攀。

秦淮小姬

一片春山乍學描。纒頭初試紫霞綃。章臺無數青青柳。最惹東風是嫩條。

袁敬烈二首

敬烈字無競。閩人。知府表子。有臥雪齋集。

邊上送故人

送君歸故國。而我滯邊州。日落鄉心遠。猿嘯關樹愁。秋風沙磧馬。夜月海西樓。羌笛數聲起。那禁雙淚流。

紅葉怨

宮水潺湲出御溝。拭將殘淚寫新愁。誰言一葉傳情易。載得愁多卻不流。

王湛一首

湛字汝存。閩縣歲貢生。有王生詩。

楊白花

楊花不戀枝。飄蕩向南去。願得迴颿生。吹花還故處。

梁天佑一首

天佑字以德。一字龍田。浦城人。

龍臥寺步葉進卿韻

龍臥精藍別有天。尋真到此亦清緣。空山雲與客爭路。古寺鳥同僧話禪。隔代題名滋碧蘚。逼人怪石聳青蓮。老來擬此營精舍。愧乏前人布地錢。

沈翰卿一首

翰卿字子羽。江陰人。

明詩統子羽嘗游吳。一時名士多與之遊。詩名滿吳下。

輿石洲遊高座寺

檻前修竹弄晴暉。木杪層巒鳥道微。並轡遠遊紅葉寺。入山頻扣白雲扉。咄嗟世網吾將避。寂寞空門願

所依。一笑偶逢陶陸輩。遠公蓮社幸同歸。

明詩紀事 庚籤 卷三十上

二六三九

明詩紀事卷三十下

庚籤

袁崇冕一首

崇冕號西野章邱布衣

池北偶談西野以布衣終工金元詞曲與李中麓唱酬

十月始見菊

怪爾清姿消瘦盡冷風疏雨亦淒其元冬乍見真成晚白首相期亦未遲雲暗郡城愁獨坐日斜鄉國望
移時樽前摘索原因醉燭底歌吟轉更悲

王留七首

留字亦房吳人釋登子有匏葉燕載遺稿等集

列朝詩集亦房伯穀之少子也年十五游金陵作舊京篇父客皆歎異以爲文考復出伯穀沒後不得意於文戰肆力爲歌詞
曲周劉敬仲南陽馬仲良最相矜重仲良之持論欲爲調人於李何袁鍾之間以才情風調自樹赤幟而獨深推亦房以爲狎
主齊盟無兩子也仲良亦房相繼卒年皆未四十亦房之生也晚未能傳習其家學而又侵淫於時調橫從跌宕於先人之矩
矱遂將偃而去之轉入惡道中矣

送費元朗下第歸樵李

淪落雖然慣。羈愁一倍新。欲忘難遣事。但較不歸人。凍水藏河面。乾沙擁樹身。酒家經漸熟。應笑往來頻。

贈朱康侯王孫

南州王孫盛文藻。用晦云亡鬱儀老。如君繼起方少年。五言清真尤覺好。我父牛臣凌中原。君家二老相推尊。君今懷刺復相訪。直謂貧士非王孫。告我經年作游計。千里齋糧託孤詣。戒僕還須變姓名。逢人豈復誇門第。行裝羞澀氣瀟灑。三尺胡琴一羸馬。但聞朋友便交歡。每到山川卽描寫。浪傳腰玦青珊瑚。布衣蕭然何所殊。長揖那曾傲漁釣。低頭不敢爭屠沽。我亦寄游不停輟。袖裏懷書覲宮闕。瓣香慷慨拜荆高。杯酒殷勤酌毛。薛。所思廬山未得從。詩中想見香鑪峯。君行便欲躡之去。同聽東林煙寺鐘。

田按。周櫟園書影云。亦房略有才情。走入覺道。余在閩中。見其詩刻種種。無一語及其父百穀者。詩文卽不同調。何致自昧人倫。若是。今錄亦房贈朱康侯詩云。我父牛耳凌中原。君家二老相推尊。可爲亦房一解此誣矣。

送劉其奇歸豫章約予

留滯空憐客計窮。舟行未必與君同。汀蘆正密喜新雁。田草將衰愁亂蟲。獨夜有懷偏避月。長年無力但需風。遙知詩句偶成處。多在小村燈火中。

送楊修齡侍御按黔時方用兵

疏雨濃雲暗遠郊。南征慷慨誓前茅。山根野火懸孤戍。木末人烟據險巢。萬里鼓笳迎六傳。兩階干羽待三苗。應知日有千言就。記得歌名或是鏡。

初冬客懷二首

故園消息杳難憑。寄食栖栖百慮增。貧士驕人猶勝諂。庸流愛我不如憎。殊方得病醫無力。獨夜成眠醉始能。身賤敢從同學較。任他裘馬自相矜。傍澗誅茅十畝宮。主人閒卽住山中。藥苗飽雨分畦綠。楓葉酣霜合隴紅。半夜樵歌寒趁日。六時僧磬響因風。如今徒倚都門望。凍草僵沙是處同。

崑山訪王世周不遇

小築宛如江上村。階前徑尺青苔痕。偶然繫艇一相訪。惟有寒潮同到門。

卜舜年三首

舜年字孟頌。吳江人。僑寓嘉興。諸生有綠曉齋詩集。

靜志居詩話。孟頌家盛澤。幼赴嘉興童子試。時安福顏欲章知縣事。亟賞其文。拔置第一。遂補諸生。讀書東塔寺。尋游陳仲澗之門。負才傲世。恆衣茜衣入市。題其門曰。鄉人皆惡。國士無雙。惟與同里張汝培端甫結契。時相倡和。孟頌既失意。坎壞不平。仿風平楚辭作酒酒章。假帝誥河伯之文。有曰。東聯淄。汶兮。南絡沅。湘。黑者錯白兮。弱者間強。災旣淪於入坎兮。害乃基於剝。牀翹商羊之子舞兮。又安觀儀鳳之踰踰。固帝心之欣禍兮。亦今俗之好殃。又聞杜松。劉縱二將喪師。賦長謠千餘言。以詬楊

鑄平居好結客。客至必留坐。是奇窘。或三日不饜。終不乞米於人也。詩尙崛奇。間有合律者。

百城煙水。孟碩真才任誕。嘗爲詩云。誅虱等羣小。放鶴得身遊。謂橋李蔣之翹曰。此生平得意句也。客遊虎邱。值大雪。徑無人迹。忽千人石上歌聲過雲。科頭挽雙髻。一長鐵釘簪之。身穿紅布直裰。乃孟碩也。雅好點染。余友蔣洪吉述其當月明之夜。往往兀坐樹下。想像煙林。達曉不寐。故其運筆。磅礴淋漓。鬚髮有仙氣。余曾見一單幅。畫落月於叢樹藤蘿之中。光芒四映。對之爽氣拂襟。信斯言之不謬也。

鑿餘叢話。鄭諒伯新刻其鄉先輩卜孟碩綠曉齋詩集四卷見寄。卜沒於萬歷時。年僅三十二。負才佚盪。振奇好異。不屑與俗同。使老其才。或能與文長。次梗相上下耳。五律句。如沙昏秋雁落。潮滿夜漁歸。五湖新水發。一棹故人來。鶴鷗沐松露。房廊穿竹風。皆自然高勝。

宿鴛湖

鴛湖日墮波餘紫。青翰舟留白沙嘴。半夜潮生枕簟間。遙林月到篷窗裏。呼出漁郎張志和。瓦盆白酒發高歌。平明共爾升元圃。回首吳山青一螺。

山家

水滿失灘沙。雲開曳彩霞。晴來閒晒藥。雨後急收茶。鶯坐一身柳。蜂歸兩股花。人言無事得。多事最山家。

晨起湖上

紙窗清映盛湖曉。窗裏宿雲溫欲飛。湖鳥呼羣動高柳。山鷄唱闌開矮扉。春濤十里牙檣細。夜雨一園蔬。

甲肥自信直鉤長罷釣無魚不與素心遠。

邵潛二首

潛字潛夫南通州人有邵山人集。

池北偶談邵潛夫性傲僻不諧俗人多惡之所著友誼錄循吏傳諸書多可傳者年老無子客如舉城年八十餘矣予過訪之茅屋三間黝黑如漆邵筋骨如鐵白髮鬢鬢被領雙眸炯然與修禊昌氏洗鉢池尙能與予輩賦詩

田按潛夫家貧不善治生產既喪婦續娶里中小家子也庸奴其夫求去晚貧甚僅僅拾橡到薦以自給性卞急與人語稍抵牾輒設罵嘗與鍾竟陵舟中面詆其密友譚元春又嘗過虞山謁錢宗伯稍待久之卽罵鬧者而去博覽多通爲潛夫別集鳴錄循吏傳引年錄志幻錄余皆得見之詩五言有可錄者陳迦陵亟稱之不能副其言也

奉送周使君伯二

人生易超忽聚散良有時念與知己別氣結難爲詞神交義不薄出札恆見之願展嬾婉情千古與等期飄風從東來浮雲倏西馳奄然一相失悵悵使心悲貧士代失職懷瑾誰當知感激平生意淚下空漣洏月夜同王夢叟過水月閣訪周夢翁

陳元素一首

元素字古白長洲人諸生

庭空明積水坐久露華凝身寄誰非客心閒獨媿僧花間過茗盃柳外出漁燈莫漫談風雅齊滕敢代興

無聲詩史。古白以文學知名於時。書法清勁類歐率更。寫墨闌有楚畹清芬之致。

何仲先移家維亭

周親於我更芳鄰。徙宅超然遠市塵。路出東門船似馬。湖當前浦浪如銀。誰能父子相師友。豈少賢豪互主賓。潮到此亭曾有識。知君才不讓前人。

趙宦光一首

宦光字凡夫吳人有寒山雜著

百城煙水寒山別業在支硎山南。萬歷間。雲間高士趙凡夫。葬父舍元於此。遂僭元醜陸卿子家焉。自闢邱壑。鑿山琢石。如洞天桃源。前爲小宛堂。若椀几榻。超然塵表。盤陀。空空。化城。法螺。諸庵。皆其別墅也。而千尺雪尤爲諸景之最。子靈均。一傳後。改精藍。葛彌光贈凡夫詩云。松風二十里。花店野棠村。已是山深處。無嫌客到門。廬中半生住。海內一家言。雨壑看飛瀑。雲巖澗石根。鄧雲霄贈詩云。宦海嗟無岸。名山別有春。遙從棲隱處。再覓姓龐人。野鳥時窺客。幽花不笑貧。坐鄰支遁宅。今古並芳塵。馮時可同申少師飲凡夫齋中云。緬懷新築勝。丹閣俯嶙峋。閒挈山中相。幽尋世外人。瀑飛剡溪雪。花發武陵春。便欲移家住。於斯并采真。吳夢暘凡夫邀宿山居云。昏黑從君返。懸燈客入門。房廊營石骨。窗戶瀉波痕。四壁白雲靜。中庭青草繁。問余能領略。搔首自忘言。范汭贈凡夫云。無路覓君去。亂峰雲若屯。嵌空巢樹杪。鑿沼露山根。畫遣兒摹勒。詩從婦討論。墓田何太近。宿草接開門。林雲鳳春日趙家山詩云。出郭不知遠。入山轉覺幽。與樵爭嶺路。隨鶴到林邱。瀑水當門雨。松陰滿地秋。人間正多事。何日復來遊。

柴門

編荆可當門。疊石能爲牆。青山露牆上。野花牆下香。

茅維二首

維字孝若。歸安人。副使坤子。萬歷乙卯舉人。授翰林孔目。有十賚堂甲集五卷。乙集十八卷。菰園集六卷。佩觿。閩遊草一卷。

屠隆南有堂集。孝若爲漢。魏則漢。魏爲六朝。則六朝爲初唐。則初唐。其於體靡不合。問爲唐之中盛。雄雋悲壯。龍擘海而騰搏。空也。

列朝詩集。萬歷間。著之稱詩者。臧懋循。晉叔。吳稼鏡。翁晉。吳夢陽。允兆。而孝若與之抗行。爲四子。有十賚堂集。數十卷。流覽篇。帙才調斐然。以檢括爲難耳。嘗以所作雜劇屬余序。已而語人曰。虞山輕我。近舍湯臨川。而遠引關漢卿。馬東籬。是不欲以我代臨川也。其稟兀如此。

田按。孝若古詩。清真頗近宋人。

友人寄餉芥茶

坐久碧窗下。幽燈散林影。故人有芳訊。特餉一函茗。山僮見採摘。重趼歷巖頂。陽巖抽碧枝。土瘦香倍猛。澤蘭沃其根。氣韻幽以靜。量水手自煎。槍旗沸若鼎。瀉之白玉磁。乳花浮耿耿。乍傾色若無。稍貯味逾迥。七椀清風颺。一啜曾滓冷。何用金沙泉。自陋建陽餅。世以方虎邱。品置豈平等。不願封雲溪。願得芥一頃。紫筍日作供。水厄呼不醒。大笑毀茶論。空傳竟陵井。

試芥茶

夏雲鱗鱗花木霽。曉坐北窗繞花氣。阿顏攜茶至芥巔。采焙皆云親手製。裊露朝采山之陽。篝燈夜焙不盈器。香味略有數種殊。活火新泉請君試。急量雪水貯花瓷。蠶蠹槍旗鼎邊瀆。乍傾縹碧殊氤氳。亂瀉荷珠盤中墜。舌本未辨清甘迥。鼻端但覺奇香帶。洞山廟後相等夷。小芥一罌尤絕異。問之老梗抽紫芽。沙瘦崖高衆皆棄。阿顏叩頭服主人。請出諸茶盡品次。大馮開常嘆茶道嚴。玉川未解此中祕。古人品茶重花乳。細碾龍團如餅餌。今人品茶重色香。縹緲虛無第一義。松蘿如入法官廚。天池如過五都市。龍井顛渚差蘊藉。一再啜之少餘思。虎邱天然冰玉姿。藐姑仙人見者避。不如明月峽中芥。落落穆穆高韻士。隱囊揮塵支許倫。居然名理饒玄致。吳儂四月櫻筍熟。桑柘映空撲衣翠。草堂無事日讀書。自領山童課茶事。企腳呼點蟹眼湯。蕙蘭九畹澆胸臍。欲草茶志無煩言。庶惟澹者標其意。

吳拭四首

拭字去塵。自號逋道人。休甯人有武夷集百粵紀遊諸稿。

藍圍山響閣讀畫錄。逋道人翰墨各極精妙。畫師米顛。而固有潔癖。澣水殘山。今如廣陵散矣。

列朝詩集。去塵居新安之上山。宗族多富人。去塵獨好讀書鼓琴。布衣芒鞋。寥然自異。輕財結客。好遊名山水。從曹能始自楚之黔。覽勝搜奇。歸攜一編以誇示里人。里人爭自笑之。傲易水法製墨。遇通人文士。倒囊相贈。富家翁購之。輒大笑曰。無以孔方兄尊吾客卿也。坐此益大困。耳聾頭眩。爲悍婦所逐。落魄遊吳門。遇亂。死虞山舟中。毛子晉爲收葬之。去塵有不寐詩云。莫

怪故人消息斷。誰教金盡見床頭。視張謂黃金不多之句。尤爲淒切也。

晚步

步出斜陽盡。微涼竹林滿。溪迴山影空。雲斷夕光遠。引策散行蹤。隨心忒幽懶。日出夜遙遙。疏鐘到孤館。

清遠峽

雨過山氣清。兩岵望相峙。樹裏出鐘聲。烟澄滿江水。熠熠林光中。露重滴松子。

訪戈莊樂不值

經時相過又成虛。數樹支門綠有餘。在野不知三代往。入城安可一朝居。道書挂向梧桐壁。破硯行懷薜荔。誰謂古人不可及。古人當恨不君如。

小重陽日偕蘭如孟芳過訪毛子晉

秋葉風飄露有香。野籬花發小重陽。愁予酒力難通夜。喜子詩名已擅場。柳葉挂門搖夕照。池波隔檻射秋光。須知生有山僧共。歲暮心期不可忘。

寇學海四首

學海字巨源。廣濟布衣。有寇山人遺稿。

陳文燭二酉堂集。寇山人詩。才雄格老。尤長近體。如懷村居。則溪雲侵座冷。山雨入簾疏。懷謙之。有從來詞賦人多忌。莫怪江

潮我獨醒，送宵甫有帝自非熊先得光，士雖屠狗亦銜恩，人多誦之。

二餘齋初成漫賦

卜居無定業，小築似蝸廬。日夕散鄰牧，水澄窺澗魚。落花人醉後，種竹雨來初。未敢追前躅，貧哉常晏如。

長安秋日移居

羈懷不可道，秋至日堪哀。問舍鄉仍遠，登樓賦懶裁。黃金與交盡，白髮共年來。多少飛揚意，寥寥落酒杯。

秋日

生事於今不可言，西風瑟瑟滿平原。腰間七首明如雪，欲向何門說報恩。

冬夜懷人

畫角聲中更漏殘，病軀孤坐地爐寒。可憐今夜霜天月，何處愁人馬上看。

沈承一首

承字君烈，太倉州人。諸生有卽山集六卷。

田按：君烈小有才名，然誦其得意句，如鐘聲奪夢尾，晨光抹檐額，亦當時公安派之下乘也。

過趙凡夫山居

橫抱山爲枕，平邀樹作家。春風吹客至，踏破一闌花。

張大復一首

大復字元長崑山人有梅花草堂集

田按元長崑山人物傳四庫總目稱其敘述雅潔又有梅花草堂筆談遺聞瑣事頗賴以傳

霽

閒看草木生如怒戲潑湯茗味政新從此韶光知幾許風風雨雨莫愁人

朱鷺二首

鷺初名家棟字白民吳人有青浮子髯額

靜志居詩話白民負奇嘗獨遊黃山遠尋嵩華所至畫竹以自給家居撰建文書法擬思進呈請復革除紀年不果崇禎初騎驢入都上所作甘露頌不果歸結茅於郡西華山蓮子峯下躬親井臼不願見貴人年八十餘乃卒是時隱居者在公芥菴趙宦光凡夫稱吳下三高而敦古節者白民爲最文肅特誌其墓

題蓮子峰

登峰問蓮子古路出僧家石榻留雲供空池長佛花

答王芥菴

不是看梅客還爲一宿禪多君留好句相見妙高巔

李之茂一首

之茂、潞安人。見謝四溟詩話。

元日過柏塢僧舍憶謝茂秦

索居無歲事。騎馬入禪林。勝地堪逃俗。名香可淨心。偶思靈運句。暫與惠休吟。庭樹來山鳥。當春多好音。

齊菜名一首

萊名、字朱草。桐城人。諸生。有青莎館集。

懷德歌

憑欄夜候歡。望歡歡不來。安得如春風。時時入歡懷。

孫穀一首

穀、字子雙。華容人。

沅湘耆舊集。子雙著述甚富。嘗雜採舊文。分爲四部。名微書。一曰樊微。輯秦漢以前逸書。一曰緯微。輯漢晉間箋疏。一曰闕微。徵皇古七十二代之文。一曰刪微。採尙書十一種。春秋十一種。易八種。禮樂詩三種。論語四種。孝經九種。河圖十種。洛書五種。統謂之古微書。又著唐紀七十卷。以新舊唐書躋駁多。其所指摘。皆當體例。今均佚。僅存刪微一種。獨被微書之名。凡三十六卷。四庫目錄稱其書能使學者生千百年後。猶見東京以上之遺文。以資考證。其功良不可沒。朱氏經義考。盛韓一門。其所引據。出微書者十之八九。則用力亦甚勤矣。

讀史

出門生慷慨。閉戶傷幽獨。展轉閱良史。聊用舒心曲。豈知古人書。含茹多局促。金張侈漢爵。王謝糜晉祿。紛有獨行者。嘿嘿隱玄樸。文字或浪傳。傳聞多實錄。當日佚厥真。後禩曠誰續。所以繁華子。赫奕誇人目。稷、禹坐可期。何論顏、曾、跖。

明詩紀事卷一

辛籤

陳子龍三十八首

子龍字人中一字臥子青浦人崇禎丁丑進士除惠州推官改紹興遷南吏部主事擢兵科給事中福王時起原官魯王立授兵部侍郎兼侍讀學士事敗被獲投水死乾隆中賜諡忠裕有幾社稿陳李倡和集屬玉堂集平露堂集白雲草湘真閣稿三子詩稿焚餘草

吳偉業梅村詩話臥子負曠世逸才年二十與臨川艾千子論文不合面斥之其四六跨徐庾論策視二蘇詩特高華雄渾睥睨一世好推崇右丞後又摸擬太白而少陵則微有異同要亦嘔強語非由中也初與夏考功瑗公周文學勒卣徐孝廉閣公同起而李舒章特以詩故雁行號陳李詩繼得轅文又號三子詩然皆不及當是時幾社名聞天下臥子奕奕眼光意氣籠罩千人見者莫不辟易登臨贈答淋漓慷慨雖百世後猶想見其人也嘗與余宿京邸夜半謂余曰卿詩絕似李頎又誦余洛陽行一篇謂爲合作余曰卿詩固佳何首爲第一臥子曰苑內起山名萬歲閣中新戲號千秋此余中聯得意語也祠官流淞松風路回首長陵出塞年又李氏功名猶帶礪斷垣落日海雲黃此余結法可誦者也余贊歎久之晚歲與夏考功相期死國事考功先赴水死臥子爲書報考功於地下誓必相從文絕可觀而李舒章仕而北歸讀臥子王明君篇曰明妃慷慨自請行一代紅顏一擲輕則感慨流涕舒章久次諸生不遇流離世故屢勉一官反葬請急遇臥子於九峯山中門滿北發未渡江而臥

子及禍。舒章鬱鬱。道死雲間。有爲詩唁之者。曰。蘇李交情在五言。未嘗不寄慨於此兩人也。

陳李倡和集。夏允彝云。陳子之詩。蕩逸明華。攄寫雄質。徐孚遠云。陳子之詩。澹動溢麗。發言舒卷。有若明霞。宋存楠云。臥子其源出於太白。文多超逸之風。若其涼壯明秀。則龍標。右丞之流亞也。

明三十家詩選。李雯曰。臥子論詩。以爲詩貴沈壯。又須神明。能沈壯而無神明者。如大將統軍。刁斗精嚴。及其鼓角旣動。戰如風雨。而無旌旆悠揚之色。有神明而不沈壯者。如典午名士。握麈談道。望若神仙。而不可以涉山川冒險難。此英雄之分。以樂府古詩論之。曹孟德雄而不英。曹子桓英而不雄。而子建獨兼之。以唐詩論之。高逵夫雄而不英。李東川英而不雄。王右丞則英中之雄。岑嘉州則雄中之英。而子美獨兼之。此臥子之才。縱橫問出。凡此諸家。命意獨合。而獨於二子深有宗尙也。

分甘餘話。明末暨國初歌行約有三派。虞山源於杜陵。時與蘇近。大樽源於東川。參以大復。婁江源於元白。工麗時或過之。漁洋詩話。明末七言律詩有兩派。一爲陳大樽。一爲程松圓。大樽遠宗李東川。王右丞。近學大復。松圓學劉文房。韓君平。又時染指陸務觀。此其大略也。大樽警句。如左徒舊宅猶蘭圃。中散荒園尙竹林。九龍移帳春無草。萬馬窺邊夜有霜。九月星河入出塞。一城礎杵客登樓。禹陵風雨思王會。越國山川出霸才。石顯上賓居柳市。竇嬰別業在南田。四塞山河歸漢闕。二陵風雨送秦師。皆不愧古作者。

靜志居詩話。王李教哀。公安之派浸廣。竟陵之騷頓興。一時好異者。譁張爲幻。關中文太青。倡聖僞離奇之言。致刪改三百篇之章句。山陰王季重。寄譴浪笑。傲之體。幾不免綠衣蒼鶴之儀容。如帝釋既遠。修羅藥叉。交起搏戰。日輪就暝。鷓鴣母。四野羣飛。臥子張以太陰之弓。射以枉矢。腰鼓百面。破盡蒼蠅蟋蟀之聲。其功不可泯也。

龍性堂詩話。論明人詩。正大和平。折衷風雅。無如陳臥子先生。觀其答胡學博書。略云。萬曆之季。士大夫偷安逸樂。百事墜壞。而文人墨客。所爲詩歌。非祖述長慶。以繩樞甕牖之談。爲清真。則學步香奩。以殘膏賸粉之資。爲芳澤。是舉天下之人。非迂朴如老儒。則嫵媚若婦人也。鍾譚兩君者。少知掃除。極意空淡。似乎前二者之失。可少去矣。然舉古人所爲濃厚之旨。高亮之格。

虛玄沈實之分。珠聯璧合之體。感時託諷之心。援古證今之法。皆棄不道而又高自標置。以致海內不學之小生。遊聞之緇素。侈然皆自以爲能詩。何則。彼所爲詩。既無本詞。又鮮據。可不學而然也。夫居縉紳之位。而爲鄉鄙之音。立昌盛之朝。而作哀艱之語。此洪範所謂言不從。而可爲世運大憂者也。蓋臥子當啓禎之時。詩道陵夷已極。故推明正始。特表何、李、王、李諸君。爲昭代眉目。至其論古詩。則議于鱗之專擬漢。魏爲規模不廣。及自運亦時做濶。李極藻麗之致。時際滄桑。所著感事。秋懷諸什。悲歌激烈。可泣鬼神。使不遂志早歿。文章能事。起衰八代。非公而誰。

說詩時語。詩至鍾譚諸人。衰極矣。陳大樽擊鬪榛蕪。上窺正始。可云枇杷晚翠。田按。忠裕雖續何、李、王、王之緒。自爲一格。有齊、梁之麗藻。兼盛唐之格調。早歲少過浮豔。中年骨幹老成。殿殘明一代詩。當首屈一指。

善哉行

登彼修陵。有枌有檀。言藉豐草。思來無端。一杳杳者夜。纍纍者邱。瞻彼常道。能無懷憂。二獸求其羣。鳥鳴其私。各懷所歡。我將告誰。三壯士茫茫。心煩意馳。伊誰云憎。日月無期。四湛湛江水。或淺或深。君子任時。或陽或陰。五夕飲醇酒。朝撫鳴琴。古人不知憂勞。至今。六

長干曲

清淺在橫塘。相逢素舸郎。東風何太急。吹汝上潯陽。

石城樂

流鈴龍子幡。吹過石城下。疑是歡相迎。風帆如駛馬。

莫愁樂

打槳尋莫愁。莫愁不還家。當門搖淥水。豔豔芙蓉花。

三洲歌

相送巴陵口。含淚上行舟。不知三江水。何事亦分流。

韓原泣

秦兒歌。楚兒舞。高冠廣額咸陽賈。排玉闥。登金堂。九卿厠足趨道旁。解一朝入左掖門。暮出左掖門。堂前衆賓客。一一乘朱軒。十日一休沐。香藥雜上樽。麒麟上君衣。屢蹶佐君殮。解二得君歡。可君意。自謂百年長不棄。恩去何時回。情斷何由繫。昔如石在山。今如水在地。解三上君綬。爲布衣。怒未止。竭而歸。西市街。鼓鼙聲。衛軍簇簇呼擺圍。君家舍人先橫屍。解四黃紙下。門已鎖。金吾將軍夜列火。緋衣御史來上坐。出詔書。一尺組。莫躊蹰。城頭搥鼓三更餘。使者復上青驪駒。何以載君廣柳車。解五田宅盡沒官。不得名一錢。堂前衆賓客。一一歸窮邊。先爲人所畏。後爲人所憐。解六

田按。此詩爲薛國觀作也。其體仿奔州新樂府才力略不相下。

雜詩二首

勁翮有遐舉。直木無繁枝。邁往絕凡迹。端正嘗違時。世人重容悅。滑稽誰能期。疾風歎振落。橫流悲殆而。

既丁陰雨會。曷望康衢馳。履榮豈永存。執義恆在茲。炯炯烈士心。寒暑安可移。
逐時多近娛。邁古懷長憂。高節勵貞亮。芬芳耀千秋。日月逝逾疾。我生獨何求。烜赫邀世榮。傾側遞相仇。
蕨蕤丹山鳳。逍遙凌九州。一鳴簫韶奏。再鳴商爲周。顯晦隨景運。難與燕雀謀。曠哉唐虞際。念此心悠悠。

初人刻中

夙昔耽奇異。久負名山期。詎意肅于役。心賞獲在茲。高峯疊遙巘。曲徑沿迴溪。沈沈迷積翠。靄靄含清暉。
洩雲岫時沒。急雨瀨屢移。青蘿被修坂。絳樹灼陰崖。迴互見別趣。登降各異姿。碩人昔考卜。荒途恆若斯。
心迹既杳冥。衡宇亦參差。抗懷慚末代。尙志徵前規。終焉協要妙。遲暮良可悲。

陟桐巖嶺

耽憂自忘倦。遇險若貽安。尋源無盡澗。躋峻轉餘巒。千盤上風磴。百折啓雲關。丹楓媚綺麗。碧嶂竦巖岏。
含霧林樾潤。翳日藤蘿寒。迴視萬壑底。更見羣峯攢。升喬意凌越。憑虛神汗漫。術阡布霞路。閭井出人間。
懷靈豈存境。覲道託殊觀。獨立招予美。痗矣摧令顏。

題楊龍友傲襄陽雲山卷歌

巨靈驅卻剡中山。移將煙霧留人寰。滿堂雲氣動虛壁。流湍隱見聲潺湲。昨夜有人山中還。拂筇便欲相
追攀。但見千山萬山溼。不盡杳冥迷離白日閒。龍眠山人腕欲脫。襄陽漫士天機活。神姿出塵自瀟灑。筆

底空濛見雄關。自稱氣韻跨千古。俗格詎使荆關奪。泗水沈淪五百秋。雲山滿眼無人收。楊郎盤礴神遠遊。欲袖揮灑天爲愁。森然欲呼鬼神出。玄猿青咒中淹留。米家橫挂殊矜惜。新展吳綾百餘尺。米畫不過三尺今改
長陰洞虛無松檜長。深巖窈窕龍蛇坼。茅屋高寒少行跡。出門浩浩雲濤積。中有人兮歌白石。此處雲林安在哉。年年絹素生蒼苔。天姥峯頭丹欲就。若耶溪邊花正開。珊瑚爲杖玉爲履。攜手與君歸去來。

平陵東

炎精中燼妖彗紅。平陵松柏生秋風。四十萬人頌符命。巨君卻在層城宮。東郡太守建旗鼓。排山動地連關輔。五威國將紛東馳。大誥金滕亦何補。滂宮薦棘雖無成。天下始知稱漢兵。不逢時會豈失策。猶與宛雒開先聲。斗柄橫斜漸臺蹙。白水真人坐黃屋。逢萌束帛卓茂封。義公碧血無人哭。男兒何必上雲臺。千古徒悲兩黃鵠。

怨詩行

九江倒影揚素波。洞庭微風鳴白鼉。文狸赤鯉迎湘娥。翠竹泠泠蒙女蘿。重華一去不復還。愁雲萬古蒼梧山。五臣八凱竟誰在。空令帝子凋朱顏。凋朱顏。墮淥水。不見軒轅神鼎成。黃金如山映天紫。日月光華闐闐開。飛龍半負嬋娟子。玉笛杳渺流雕雲。升天入地皆隨君。小臣徒望青冥哭。天路茫茫竟不聞。

東皋草堂歌有序

東臯草堂者。給諫瞿稼軒先生別墅也。丙子冬。奸民奉權貴意。訐錢少宗伯及先生下獄。賴上明聖。越數月而事得大白。我友吳駿公太史作東臯草堂歌以記之。時予方廬居。駿公以前歌見寄。因爲屬和。辭雖不工。而悲喜之情均矣。

虞山巖水飛不息。虞山先生高臥日。黃門從此亦拂衣。東臯平田二頃微。翳然林木草堂靜。單衣白帽娛金徽。高談王霸神清竦。江風獵獵水雲動。當時有口每借人。公業傾家非自奉。應是清流同調多。豈關失職交相重。江湖何與中書堂。當門厭爾多芬芳。田蚡久欲更廷辨。朱竝居然來上章。十年放逐念京雒。可憐入國雙銀鑄。豈惟松桂無顏色。長安城中煙霧塞。金吾更向閣門歸。告密人從丞相揖。但令深文一獄成。何難鉤黨千家及。君王神聖揮太阿。此曹深計空蹉跎。左掖門邊十步地。那知一往如流波。舊疾雖痊留不得。七月秋風下潞河。道旁小兒戟手罵。掩耳莫聽吳人歌。大街陳屍誰氏子。相公殺爾可奈何。嗚呼男兒全身良不易。自稱騎虎終難事。可憐數載黃扉人。未識千秋青史字。何如草堂突兀山之陽。七檜偃蹇雲蒼茫。飛觴樂聖凌滄浪。吾聞檻車開一匡。胥靡霖雨與殷商。生平報國殊未央。草堂何得常徜徉。

月夜獨坐

攬衣隨杳冥。雲霧共清深。明月常相見。幽人愁至今。梧桐搖暮景。蟋蟀斷秋心。屢夢姮娥冷。天高何處尋。

燕中諸詩錄一

玉泉流不極。野老說宣宗。看象臺邊臥。牽牛水上逢。屬車驚雁鶩。御幄冷芙蓉。欲望景陵樹。雲山暝萬重。

秋歸涉黃河

秋水下龍門。黃河九曲渾。西來浮日月。南徙劃乾坤。羣燕盤渦掠。千帆折溜奔。茫然思禹迹。何處是崑崙。

寄青田令楊龍友

小郡分千嶂。卑官共一州。秋雲通畫幔。春水遇蘭舟。游女湖爲鏡。仙人石作樓。羨君郎宿位。乃傍少微留。

處州上應處
土星故號

壬午除夕二首

輝輝芳景逼。冉冉壯心懸。日月商歌裏。山川越望前。春風經晚歲。朝氣動經年。愁絕蓬萊殿。傳烽夜未眠。

滿目愁無賴。偏生此夕中。亂燈懸夜雨。急管候春風。國事幾投袂。鄉心任轉蓬。明當就詹尹。何計學冥鴻。

避地示勝時

故物經時盡。殊方逐態新。恨無千日酒。真負百年身。芝草終榮漢。桃花解避秦。寥寥湖海外。天地一遺民。

上元

雕雲遙映火城姿。窈窕湘簾萬戶垂。玉樹吐花千箇蕊。虹橋結綵九長離。遺香宛轉吳歌細。墮珥玲瓏羯鼓遲。最憶燕臺繁麗地。內家裝束畫樓時。

春感

春來花信杳難憑。風雨高歌酒不勝。消息龍鸞仙事遠。飄零鷹犬少年憎。文章綺豔羞江左。蹤迹淹留似茂陵。終日掩書廣武歎。雄心深夜有飛騰。

潤州

縹緲樓臺柳尚濃。女兒江上障輕容。嚴城晴帶三秋雁。孤嶼寒吟五夜龍。若見餘霞憐謝朓。正當初月想王恭。揚州十二珠簾捲。隔得煙波第幾重。

望射陽湖志云陳琳墓在其側

古墓依稀見寂寥。平湖十里怨迢迢。是時才士多書佐。此後文人屬霸朝。水冷漳臺餘繡瓦。草荒淮浦對寒潮。子桓便有當年痛。魂共應劉未可招。

至後

至後玄風朔氣凝。天街繞繞意誰憑。東來戍火連三輔。北望寒雲滿十陵。倦擲黃金隨駿馬。時聞綠幘縱蒼鷹。夜深不信悲歌俗。惟有嚴霜動玉繩。

長安雜詩

瓊壺薇帳侍宸遊。十部龜茲在殿頭。禁苑起山名萬歲。複宮新戲號千秋。明馳宣賜朝陽閣。紫燕傳封井

幹樓上壽後庭齊致語。增成箋奏是誰收。

八月大風雨中遊柳塢。運夕同遊者宋子建。尙木陸子玄張子慧。

獨上層霄極紫庭。空濛天外出雲屏。一羣秋雁幾時盡。數點海山何處青。珠樹有風通弱水。芙蓉細雨失湘靈。虛疑芳草人無限。夜半揚舲問杳冥。

燕中秋感

紫塞逶迤鎖八陁。薊門天險負滄溟。山何中竦開黃屋。日月虛迴挂翠屏。三輔金戈秋簇簇。五陵銀海夜溟溟。本朝尙德興王業。指點無勞論地形。

遼事雜詩

昔年遊俠滿遼陽。吹角鳴鞭七寶裝。帳下紫貂多上客。樓前白馬度名倡。椎牛屬國開新市。射虎將軍獵大荒。李氏家聲猶帶礪。斷垣落日海雲黃。

重遊弇園

放艇春寒島嶼深。弇山花木正蕭森。左徒舊宅猶蘭圃。中散荒園尙竹林。十二敦槃誰狎主。三千賓客半知音。風流搖落無人繼。獨立蒼茫異代心。

錢塘東望有感

清溪東下大江迴。立馬層崖極望哀。曉日四明霞氣重。春潮三浙浪雲開。禹陵風雨思王會。越國山川出霸才。依舊謝公攜伎處。紅泉碧樹待人來。

庚辰除夕大雪時在越署

積雪層陰禹甸中。蒼茫雲海度飛鴻。上才授簡思梁苑。侍女藏鉤憶漢宮。地遠金門慚月俸。年過騎省畏春風。西清玉樹垂垂發。滿眼瓊瑤路不通。

天台萬年寺

迴合千峯嘉樹林。蒼崖碧殿晝陰陰。雲生薜荔虛巖動。日隱松杉絕澗深。僧賜紫衣壇卓錫。經傳白馬字函金。更從閣道凌飛磴。悵望諸天清磬音。

秋日雜感二首

金闕珠樓瑞靄中。天門端拱萬方同。鳳城南鎖黃河隘。鳥道西迴紫塞通。三市銅駝愁夜月。五陵石馬慟秋風。玉泉不識朝宗意。依舊東流入漢宮。

雙闕三山六代看。龍蟠虎踞舊長安。江陵文武牙籤盡。建業風流玉樹殘。青蓋血飛天日暗。黃旗氣掩斗牛寒。翩翩入雒羣公在。剩有孤臣淚未乾。

采蓮女

明知女伴情。欲問誰能說。對采芙蓉花。相看各愁絕。

上谷邊詞

期門小隊出回中。帥府旌旗動地紅。武帝神遊應汗漫。黃榆夜夜起秋風。

曹學佺三十二首

學佺字能始。侯官人。萬曆乙未進士。除戶部主事。調南大理寺正。就遷戶部郎中。出爲四川參政。進按察使。中察典議調歸。起廣西參議。遷陝西副使。留任桂平道。以私撰野史削籍。崇禎初復官。不赴。唐王立授太常卿。遷禮部侍郎。進尙書。加太子太保。事敗。走入山中。投繯死。乾隆中。賜諡忠節。有金陵集、挂劍篇、海色篇、遊房山稿、藤山看梅詩、續遊藤山詩、玉華篇、茗上篇、錢塘看春詩、遊太湖詩、芝社集、天柱篇、春別篇、豫章稿、江上篇、潞河集、武林草、巴草、蜀草、雪桂軒草、湘西紀行、浮山堂稿、福廬遊稿、聽泉閣稿、夜光堂稿、森軒詩、林亭軒詩、桂林集、更生篇、賜環篇、西峯集、西峯六四草等集。

鍾惺隱秀軒集。能始清深之才。惜近日詩有淺率之弊。

葉向高蒼霞草。大理詩刻意三百篇。取材漢魏。下乃及王右丞。章蘇州。

筆精。圖中近製墨紗燈。精巧異常。海內爭重之。曹能始曾於杭州逢元夕。人家有張此燈者。乃邀友人同詠。能始詩云。質裂橫凝水。光生薄似苔。憑將彩筆畫。認作翦刀裁。鳥向空中度。花從鏡裏開。細看若無力。不畏曉風吹。諸子罷唱。

列朝詩集萬曆中年閩人曹能始迴翔棘寺遊宴冶城賓朋過從名勝延眺摺紳則臧晉叔爲眉目布衣則吳非熊吳允兆柳陳父盛太古爲領袖壘城懷古爰爲憑弔之篇新亭送客亦有傷離之作筆墨橫飛驚帆騰湧此金陵之極盛也戊子中秋予以銀鐙隙日采詩舊京得金陵社集一編蓋曹氏門客所撰集也

閩小紀謝在杭云曹能始詩以淺淡情至爲工不甚學盛唐然其送西安太守云長安西望路漫漫秦華峯陰日色寒長樂宮中秦輦絕未央前殿漢鐘殘月明渭水浮三輔花滿驪山繡七盤京兆風流誰不羨時從閨閣畫眉看大歷以來罕見斯語予謂此詩尙非石倉極境在杭學七子者故獨醉心於此耳

池北偶談能始官四川參政與監司謁撫按必於館中別設一几隸人置書几上對衆一揖卽就几披閱不交一言其孤亢如此

古夫子亭雜錄陳大樽明詩選於萬曆以下如湯養仍曹能始不愧作者構置之鄙下無譏之列此則大謬

龍性堂詩話曹能始先生云作詩如畫者畫者奔者謳者擊劍者必藉師承指教而後當家若自作聰明雖極奇別終是外道旨哉言乎

○子菴雜錄有俗僧欲遊鷓湖以卷子徧求諸貴人贈詩閩中曹能始歷一絕云性內本無文字障縱馳山水亦支離我曾一宿鷓湖寺峯頂禪師不要詩

東南嶠外詩話忠節五七律佳句美不勝收如過木瀆云夕陽湖正滿春草岸俱遙遊楊氏園云積翠沈波底斜陽到岸西泊大湘云遠峯銜月淺隔水度盤孤別喻宣仲云明月看時別清霜夢後知集南樓云秋老幾人猶白社月明無主自青山別吳子修云回首故山俱惜別出門新月便相思上巳城樓卽事云三月風光臨上巳兩條消息隔中華皆當時膾炙人口者明三十家詩選忠節詩秀骨清聲霞標玉映其辭麗以則其思深以遠才氣少讓陳忠裕而溫婉過之田按忠節詩不矜才氣音在絃外其興到之作有羚羊挂角香象渡河之妙

登石竺山

息徒改俗轍。尋仙聘雲轂。谿路綿以紆。山形拔而矗。入初狀條呈。披奧境徐蓄。千岩若層累。萬樹信攢獨。數帷固甚密。爲宇何其複。卽此乘虹飛。因之類鯉伏。朱鳥現毛質。玄猿衍類族。託命於仙靈。詎爲人所畜。我來一叩之。入門展欽肅。耳目懾靈異。烏敢恣云欲。

游匡廬詩

嘗聞歸宗寺。舊宅爲羲之。往往嘉樹陰。亦能得清池。古人雖已沒。佳韻良在茲。繼此代不乏。始荆靡因資。巍巍金輪峯。下映石鏡溪。湖水入我懷。盈盈曲如規。

西山紀遊

山遊已足佳。況以湖爲逕。復聞燕昭池。懷古動清興。潭泊非一源。中流匯諸勝。大隄修且治。方軌路猶剩。士女同時遊。絳綵亦相稱。顧彼芙蓉花。采采誰爲贈。祇恐易凋落。秋期不堪訂。眷予留戀懷。遲遲此川暝。丹榴行有序。

賞溪被難時。榴樹忽僵。復爵仍活。則榮瘁關之矣。故作。

君不見信州丞相第。十二高樓稱綺麗。雕臺共倚黃金堂。繡柱遙連白玉砌。瓊恩寶澤錫嘉名。容藻宸題照日明。方圓法式頒儀部。多少金錢給水衡。複道文窗開扇扇。極目欲窮西楚甸。靈山黛色稠疊來。彭蠡

湖光微渺見山川如故人事非。聖主元施不測威。胥江已見浮鷗去。華表空聞化鶴歸。魂招歸來上不得。寂寂高樓徒歎息。火燒崇墉落劫灰。塵飛綺棟無顏色。可憐歿後見精忠。青史相傳貫白虹。欲知血淚何時滅。秋老榴花開尙紅。

黃龍洞看太湖歌

君不見黃龍洞其深下無極。視之但似蒼蒼色。令人憂疑直相逼。既有異香縹緲從風吹。又何以白骨倒挂枯樹枝。我聞老龍在此藏其軀。至今千年知有無。其靈既能興雲雨。磔犬祀之無乃誣。龍乎好睡亦太懶。我欲擲石破汝眼。爾胡不翻大海波。亦不潛深山裏。在此區區一勺之湖水。湖光雖有千百里。吾爲爾謀應未已。但見日自西沒。風從東來。舉酒酌水。飲我一杯。遠者七十二峯以羅列。其近大雷而小雷。有如雲屏錦障蕩漾於水晶之宮。盈盈進我雙金壘。具區形勝盡於此。吳王霸圖安在哉。但聞別館離宮滅。不見牙檣錦席開。湖水暮兮悠悠。蒼煙橫兮上浮。羣峯杳兮乍收。客亦去兮不可以留。我更呼龍夢中爲我語。使我空山一夜愁風雨。

田按忠節此詩。騷情古意。合太白東坡爲一手。選家從未見錄。余讀石倉全集。獲此一奇爲之一快。

西溪看梅短歌

春雲忽渡西溪水。溪畔梅花從此始。殘僧寂寂時掩扉。微滅禪燈山雨裏。山雨透池沈暮鐘。梅林此去幾

千重渡頭客問餘。杭酒衣上雲來天。日峯數年夢想遊天目。誰云路接梅花屋。今宵鷺嶺無他夢。祇向龍池看飛瀑。

雞鳴寺

雞籠山色翠。遙接落星岡。校獵臺成阜。栖玄寺近塘。園林生蔓草。陵寢閉殘陽。幾代高僧住。猶存說法堂。

盧龍觀

丹梯登涉處。高興在秋宵。月下盧龍塞。河邊靈鵲橋。遂聲江步遠。劍氣冶城銷。王謝留遺迹。風流亦可招。

秦淮秋怨

四序皆蓄意。秋來殊可憐。疏籬豆花雨。遠水荻蘆煙。忽弄月中蘂。欲開江上船。不知夫婿去。仍會在何年。

池北偶談。徐禎卿洞庭葉未下。瀟湘秋欲生一篇。非太白不能作。千古絕調也。曹學佺亦有秦淮一篇。情致殆不減徐。

晚發罨畫溪次日登烏瞻山成宿

野酌戒揚舲。溪昏去復停。淺沙催月白。密樹誤峯青。鐘出城中寺。燈懸畫裏屏。時聞清籟發。風急水泠泠。

圓證寺

我聞圓證寺。卽在碧崑隈。積雪一峯阻。看雲十里來。僧廚流水曲。香氣講經臺。最喜茲幽徑。松陰寂不開。

絕塵菴僧溈中人

一瓢營此地。萬里住孤僧。花竹疏如許。峯巒險最能。月來動清磬。雨過閉殘燈。試向禪心說。誰當比上乘。
與飛熊方叔茂之再到楊園

野人來不速。地主展相酬。春餘幾許色。日須百過遊。石移澗水開。林缺斲山樓。若使王程緩。山中定可留。
過胡彭舉賦答

昔時惟視友。今日乍過君。野色貧家積。山情隱士分。玄言浚秋壑。古思入寒雲。坐久不能去。應和勝所聞。
立春日過雲居菴訪非熊茂之益公

虎林爲客日。鷺嶺復春風。山色一朝隔。梅花兩歲同。世情紛翦綵。禪思合真空。應識松扉掩。冷然清磬中。
春日西湖臨眺

清曉正佳色。春煙開幾層。漸黃知柳細。逾碧見湖澄。此際獨嘯鳥。來時同梵僧。平隄不覺盡。還問有山登。
白沙舊驛

委蛇窺地脈。俛仰託山靈。土著無三戶。溪光在一庭。少時供客憩。終日是雲扃。更有前峯路。貪幽未許停。
月下放泉

山泉久蓄聲。一決衆山鳴。松籟起相和。荷香濯更清。夜深聞不寐。月白看尤明。爲問枕流者。何如孫子荆。
石牌菴卽事

一雨懸秋意。孤燈接夜談。道糧資茗筍。僧爨雜煙嵐。法叱山神護。禪容石丈參。開堂人已老。休念學瞿曇。

戊辰二日夜光堂及來江亭少憩

山堂稱稍僻。轉入草堂賒。梅晚枝猶健。江春色漸華。鶴糧資拾橡。僧菜學燒畬。林籀看初改。檐前萬筍遮。

題元翰蘆溪精舍

家在南山南。山光映一潭。夢多臨水闕。足豈向城諳。夜月懸高壁。秋雲補舊庵。主人耽佛理。枯坐閉崑龕。

和徐興公春日閒居

茅屋春雲鎖。幾重朝昏兩度破。山鐘詩無宿債輕。酬客筆不停耕可代農。社日遠來滄海燕。花時喧動隔林蜂。杖藜閒入階前思。草碧苔青較甚濃。

華林寺看梅有桃花甚開

路迴城北思淒淒。寺倚屏山信杖藜。疏雨不曾辟客入。閒雲元自任僧棲。參差蘭若香分徑。高下松根翠作梯。祇惜梅花飛欲盡。不知春色在桃谿。

孟秋二日遊宴半隱園

青雀舟乘杏鷁飛。曲池偏傍列城圍。荷間珠露移尊滿。竹裏金風入管微。山氣半疑沈夜燭。水紋全欲上秋衣。和歌已是知名士。方外于今到者稀。

贈周比部座主

秀出丰神瓊樹枝。清曹無事興逶迤。爲歌六代停杯起。欲賦三都載筆隨。湖上日浮青玉案。山邊秋映白雲司。應憐身是侯芭者。得向門前獨問奇。

送戚山人之內黃兼簡鄧遠遊明府

三月鶯花別故山。萋萋芳草照離顏。春光白下無多日。夜月黃河第幾灣。置驛正當賓客盛。弄琴遙識使君閒。閨中易作刀頭夢。珍重休過博望關。

漁洋詩話律句有神韻天然。不可湊泊者。如高季迪白下有山皆遶郭。清明無客不思家。曹能始春光白下無多日。夜月黃河第幾灣。李太虛節過白露猶餘熱。秋到黃州始解涼。程孟陽瓜步江空微有樹。秣陵天遠不宜秋。是也。

太白讀書處在西巖

萬縣對山有大湖在頂上。

石島湖水片雲端。落日輕風生碧瀾。祠對江山千古絕。酒酣棋局幾時殘。相傳白詩云。大涪陵渡去名猶在。涪州有李白渡。蜀道行來信是難。一自金陵問消息。無人指向萬州看。

徐興公鄭汝交鄭孟麀直社平遠臺避暑分得五微韻臺傍亭榭時盡修復

法界清涼暑氣微。招尋無恙芰荷衣。層層粉堞穿林出。面面青山對雨飛。江海迴環成匹練。亭臺錯落似珠璣。酒酣臥向仙床上。消息應同靜者機。

歸下山送施靈修之武夷

已盡長城勝。雪中時返棹。諸峯試回首。一半在瑤華。蒼弁人將別。烏程酒耐賒。臺應過釣瀨。關必度仙霞。到處可爲醉。此生甯論家。武夷拾彩翠。羽客飯胡麻。折筍松梯直。虹橋鳥道斜。得予同去好。其奈阻天涯。

九日石倉移舟登高

雲邊澗水落淙淙。攜手煙霞物外蹤。欲覓秋光何處是。一層崑壑一層松。

遇無窮上人因憶去年雪浪之遊

錢塘門外來尋見。雪浪山中記得曾。欲問春光誰負卻。年年花發對殘僧。

新林浦

來岸人家映柳條。元暉遺蹟草蕭蕭。曾爲一夜青山客。未得無情過板橋。

池北偶談。徐顯卿五集中有一絕云。渺渺太湖秋水闊。扁舟搖動碧琉璃。松陵不隔東南望。楓落寒塘露酒旗。曹能始新林浦一絕。可以相敵。

明詩紀事卷二

辛籤

孫承宗十三首

承宗字稚繩。高陽人。萬曆甲辰第二人及第。授修撰。進中允。歷諭德。洗馬。庶子。少詹事。遷禮部侍郎。拜兵部尚書。兼東閣大學士。入直辦事。自請督師。以原官加太子太保。督山海關及薊遼天津。登萊諸處軍務。屢加少傅。太子太傅。太子太師。少師。左柱國。進中極殿大學士。求去。加特進。光祿大夫。罷歸。崇禎初。以原官兵部尚書守通州。移鎮關門。引疾歸。大兵攻高陽。城陷被執。投繯死。福王時。贈太師。諡文忠。乾隆中。賜諡忠定。有高陽集。

國史唯疑。解經邦推經略。抵死不赴。而孫承宗甯舍綸閣之重。慨請行邊。人意量相越至此。其云。目前可代督師者。實難其人。臣請自往。卽此肝腸。九廟神靈鑒之矣。時詞林共賦送樞輔行邊詩。稱盛事。一洗趙文肅宿談。

列朝詩集。公鐵面劍眉。鬚髯戟張。聲如鼓鐘。殷動牆壁。方嚴果毅。疑如斷山。開誠坦中。譚笑風發。望而知其人爲偉人。長德年三十餘。爲舉子。仗劍游塞下。歷亭障。窮阨塞。訪問老將退卒。通知邊事要害。凡史官在禁近者。皆媿媿殊殊。俯躬低聲。涵養相體。謂之女兒官。公獨不然。講筵獻替。務爲激切剴直。以聳動人主。講罷。有軍國大事。大瑋傳語問難。閣臣相顧失色。公拂衣奮袖。矯尾厲角。指畫其是非。可否。中人各有所挾持。無以奪也。東事日亟。舉朝請以東事累公。遂用是大拜。單車行邊。破七里築。

城之議遂自請視師。天子御門臨送。詔書鄭重。以漢諸葛亮、唐裴度爲比。出鎮之初。關門三十里外。圻嶽不設。經營四年。闢地四百里。徙壽踰七百里。樓船鐵騎。東巡至暨無閭。將與師大舉。馮牙有日矣。逆關竊柄。長公與晉陽之甲。垂成而告罷。已已再起。朝受詔而夕引道。東便門之役。以十八騎橫穿萬壘。抵危關。收悍將。手復還。永四城。以安畿輔。先帝深知公能辦東事。公亦謝絕款議。以恢復爲己任。羣小居中用事。掣其肘。絆其足。然後噪而逐之。上亦不能自主也。高陽失守。入城南老營中。用葦席藉地。望闕叩頭。叱持環者趨縊我。乃絕。子孫凡十九人。皆力戰從死。事聞。先帝震悼。薛國觀猶斬其卹典。弗肯予。久之。用宏光詔書。追贈太傅。定諡曰文正。公生長北方。游學都下。鍾崆峒。斗之氣。負燕趙悲歌之節。爲文章。伸紙屬筆。蛟龍屈蟠。江河競注。奏疏書檄。搖筆數千言。灑瀟演延。幕下書記。多鴻生魁士。莫得而窺其涯涘也。爲詩不問聲病。不事粉澤。卓犖沈塞。元氣鬱盤。說者以爲高陽之詩信矣。

靜志居詩話。先生自任天下之重。盡粹師中。司馬之檄方馳。樂羊之篋已滿。見危授命。無媿全人。集中三十五忠詩。蓋亦有感於瑤禍而作。三十五忠者。趙尙書南星。高總憲攀龍。周侍郎炳謨。楊副院璉。馮副院從吾。何總督士晉。左僉院光斗。李御史應昇。夏御史之令。周中丞起元。繆宮諭昌期。蘇考工繼歐。張尙書問達。汪侍郎輝。丁檢討乾學。鄧中丞漢。袁御史化中。吳總督用先。顧憲副大章。王尙書紀。魏給事大中。鄭總憲元標。王侍郎之榮。周主事順昌。夏文選嘉遇。周御史宗建。周閣少朝瑞。黃御史尊素。劉知府鐸。萬郎中燦。吳御史裕中。張都事汶。趙宗伯秉忠。公侍郎戴。孟參軍淑孔也。東林之君子。已得十八九焉。先生之言曰。起三十五人於九京。未必人人大有助烈。而有助烈者。必此三十五人。痛惜人才之至矣。

田按。孫公侍經筵。進講。熹宗云。這講官予甚善其說。是時大璫王安。高時明在帝左右。舊東宮伴讀也。故公進講時。得畢陳其說。洎魏忠賢得志。而帝先後判若兩人矣。公之督師。雖由衆臣推薦。亦自福清主之。故得行其志。福清去而公亦相繼罷歸矣。福清。公國子師也。先是福清庇其門生王化貞。東事覆。遣化貞。公請並熊廷弼下詔獄。此事不無附和。不爲國家惜此邊才。公近體絕句。摹仿唐人。特有風調。奏疏皆一時碩畫。坐言起行。有此偉才。旋用旋罷。國欲不亡。不可得矣。

謁楊太常椒山祠

楊公負奇穎。舞象成奇調。孝友自天植。義烈爲譚笑。兩疏志竟酬。一泓血未耗。代隔名逾尊。祚薄神復耀。我來採芳芷。灑泣一憑弔。

雜詠

汾陽亦麤官。而動合至理。君寵恩自渥。寵去恩未已。部曲卽散落。國難忍不弭。單騎豈忘身。胸中早定矣。其處觀軍容。乃成大君子。相州九節度。誰咎公無紀。

入澱

渡口官河狹。風波不肯前。遠灘急倦鳥。野宿傍漁船。枕簟饒秋意。笙簫破暝煙。停杯一以望。孤棹月清圓。

張太宰問達

三十五忠詩錄二

予登朝。與太宰同官七品也。又十年。太宰躋大列。予猶七品。太宰道廣。而雅不早予。每爲予言相州韓稚圭。以予相州人。而乃翁曾官相州。萬泰間。憑幾諸大政。予頗參大議。則當事從予。而太宰契予特深。予行塞。太宰尋罷去。無何以璫破其家而歿。其門人黃閣老爲言罷其述。

太宰清通手。登朝四十年。弄丸一玩世。夾袋幾掄賢。家以殘方破。身從死更憐。慙勸黃閣老。一語報重泉。

鄧中丞漢

中丞初備潞河兵。予屬也。擢薊撫。相得驩甚。然非知兵也。而精敏有幹局。能以意繼岳中丞治。悉意革虛冒。補戚帥廢缺。矯然有後勁之思。人故習江右風節。每言南樂胸中黑。以書來不辨遵薊也。其接何太僕實以氣意。而遭貶削卒。後來者遂從中要議。

按薊論脩守。能名戚繼光。中丞來訓練。我武頓維揚。揮羽習鵝鶴。投鞭驅虎狼。如君凋落盡。誰復念封疆。

王華亭明府過舟中

歇側葛巾曳薜蘿。那堪車騎漫相過。蟠空鳧鷖驚雲鳥。徹底魚龍避玉珂。馬踏橫塘芳草膩。舟維野渡落花多。人憐茂宰崔秋浦。白袷紅顏映碧波。

楊柳枝

古來折楊柳。多緣離別時。春風知客意。先長最長枝。

聞笛

高樓當月夜。遠思聚重檐。玉笛誰家弄。翻來昔昔鹽。

宮詞

珠簾不斷春風度。又報麟麟翠輦過。三十六宮渾見月。知他清影向誰多。

悼鸚鵡

雪白梨花薛荔牆。一聲初落曉風香。別來故國三千里。羞伴烏衣語畫梁。

小凌河

小山曲曲小凌河。錦水成文總不波。偶憶蓮花泊裏月。一帆風色伴漁蓑。

朱大將軍罷鎮歸中前投函問我爲詩羨之二首

小隊曾遊白塔峪。元戎初試黑庄窠。道旁一啜千人廢。八部降王未敢過。朝恩一拜觀軍容。胡騎千羣錦水東。最是甯山餘勇在。滿城齊唱黑王公。

孫傳庭四首

傳庭字伯雅。代州振武衛人。萬曆己未進士。除永城知縣。改商邱。徵授吏部主事。歷員外郎中。擢順天府丞。以右僉都御史巡撫陝西。擢兵部侍郎。總督保定、山東、河南軍務。以忤楊嗣昌。劾其託疾斥爲民。下詔獄。就獄中起兵部侍郎。總督陝西、兼督河南、四川軍務。進兵部尙書。兼督山西、湖廣、貴州、江南北軍務。軍敗沒於陣。乾隆中。賜諡忠靖。有白谷集六卷。

四庫總目傳庭有鑿勞錄。已著錄。史載崇禎十一年。李自成自蜀還走陝西。傳庭詭譎澄城。分兵五道擊之。降其驍將混天星等。朝廷特以爲屏蔽。十六年出師潼關。降其僞將四天王李養純。擒其果毅將軍謝君友。自成懼。謀降賊。賊盡滅。乃以中旨督戰。值霖雨七日。餉絕軍亂。致敗。遂沒於陣。今謹以集中澄城報捷諸奏疏。一一相符。惟史載崇禎十二年正月戊辰。劉宇亮孫傳庭會師十八萬於晉州。不敢進。考集中官軍苦戰疏內。稱解真定之圍。救濟南之陷。出口之役。又率所統鎮將官兵。戮力合

戰事皆在正月戊辰之後。又恭聽處分兼瀝血忱疏內。歷舉正月二十七日。臣勉欲先發兵馳東甌擊。而督察不從。二十九日。臣勉發曹變蛟。楊國柱等兵先往。次早。復約督察同往。或臣獨往。而督察又力阻云云。督察乃劉宇亮也。據此則兵集不敢進。其責全在宇亮。傳庭特爲所牽掣耳。

田按孫公蒞秦。身係明之安危。乃一阨於武陵。再阨於秦之士大夫。秦旣失矣。明自此亡。思陵號察主。公至國門。不得一見。其情事無異閻主之所爲。臨亂之君。自賢其臣。悲夫。

園居

不是耽玄寂。吾生合隱淪。煙霞支病骨。山水愛閒身。草閣全無暑。花田別有春。祇應成獨往。魚鳥自相親。

西溪舟泛

星漢仙槎杳。扁舟樂意關。自能專一壑。何用訪三山。萬事無過酒。浮名好是閒。漁鷗堪作侶。竟日每忘還。

送友人還里

梁園十月共清嬉。愛爾人如玉樹枝。四海論心惟我輩。一時分手又天涯。黃河水接龍門下。大麓雲連雁塞垂。極目關山情共遠。與君重醉定何期。

秋興

西風一雁下河洲。客思悠悠獨倚樓。窮塞不堪逢九月。美人何事隔三秋。看萸把酒情何限。對菊吟詩意未休。欲向中原舒望眼。南雲北樹總關愁。

高名衡五首

名衡字平仲。沂水人。崇禎辛未進士。除如皋知縣。改興化。徵授御史。巡按河南。就擢右僉都御史。巡撫其地。李自成三寇開封。堅守不拔。決河灌城。泛舟出。鉞勞加兵部侍郎。以疾歸。大清兵破沂州。死之。乾隆中。賜諡忠節。有更生吟。

題書衣寄內五首

對月偏成憶。臨風更有思。鄉心無可寄。聊寫最嬌枝。
花枝嬌且妍。置之在懷袖。好記花枝新。憐取衣裳舊。
輕襦畫折枝。悠悠感我思。畫時腸已斷。著時心自知。
霧縠偏宜暑。冰綃迴出塵。著時憐百朵。應憶畫眉人。

客邸長安一世無。書長人靜影形孤。閒將一段鵝溪絹。寫作名花百種圖。

張貞渠邸耳夢錄。余家舊藏畫衣一。沂水高中丞筆也。蓋寫折枝黑卉於白練上。霧以青紗而成之者。凡花卉二十五種。作三十二叢。衣之前後。及左右袂。題五七言斷句。先侍御與先生同年相好。過其邸舍。衣適成。將以遺張夫人。侍御公一見。欣然輒自持去。先生亦無難色。致先生夫婦伏節。同日并命。可謂與日月爭光矣。而其平日風流自命。柔翰關情如此。毋亦靖節賦閒情故事耶。

張銓一首

明詩紀事 辛誠 卷二

銓字字衡沁水人萬曆甲辰進士除保定推官擢浙江道御史巡按遼東陣亡贈大理少卿加贈兵部尚書諡忠烈有集

棗林雜俎萬曆甲辰科兩張銓一大名人官參政一沁水人以御史殉遂難俱乙亥正月二十八日生科第子女皆同亦一奇也參政前守兗州有登岱詩後姜士望使君重沁水勒詩於石不知其說

山居

懶散厭逢迎屏居謝塵鞅卜築綠脩澗軒窗豁虛敞衆山爭向背閒雲互來往月印石潭清鳥鳴岩淙響迴颿松濤亂過雨藥苗長貪奇事幽尋卽景得孤賞境遠淡物情機息斷紛想身世遠寂寞終焉遂偃仰

傅梅二首

梅字元鼎邢臺人萬曆辛卯舉人除登封知縣擢刑部主事以爭挺擊案罷官起台州知州解職家居大兵下順德抗節死贈太常少卿乾隆中賜諡忠節有簡翁詩集

田按元鼎官登封時作嵩書前此盧元明嵩高記吳錫嵩嶽纒跡皆略而不詳嵩書十三篇號爲賅備建存古書院凡二室殘碑斷礎但有文字可識悉出荆榛瓦礫中嵌於堂壁可謂好事又移戒壇石幢於衙齋之前穆光胤贈詩云古壇缺側石無數慧日茫茫起煙霧石幢壁立幾千秋苔碧土花空朝暮令君好奇未可儔移來獨置小齋頭雕文篆刻重磨洗金界靈光燭斗牛紀其事也

遇聖峯

仙人垂大耳。石上採菖蒲。漢主無仙骨。重逢更有無。

檀香峯

林是旂檀林。外更無雜樹。可怪卓錫人。不在此峯住。

鹿善繼三首

善繼字伯順。定興人。萬歷癸丑進士。授戶部主事。以事謫官。起兵部軍前贊畫。歷員外郎。中告歸。崇禎初。起尙寶卿。進太常少卿。再請歸。大清兵下。定興死之。贈大理卿。諡忠節。有無欲齋詩鈔。

孫承宗高陽集。范陽鹿伯順。以進士高第。主計曹政。輒發金花餉。遂神皇帝震怒。索金花急。伯順得謫。歷光熹兩朝。起官遷司馬曹。主職方政。予兼樞務。伯順管章奏。照覆從予行邊。予後當居東。則伯順推銓司矣。伯順辭銓居樞。辭京畿居邊。僅敘遷副郎。遭瑞患從予歸。口不言功。功亦不及。今皇帝起太常管光祿事。請告其居東。拓地四百里。無一不出伯順經畫。而光祿細大兼營。無一不似發金花也。旋里居江村。遠近及門之士。無不服鹿夫子教。今年秋。敵犯畿南。范陽令謁公爲守。實無一備。伯順以太翁命入城。方走尺牘。索礮手高陽。而不餉之兵。不聯之衆。心張空拳。訓練而敵已薄城。伯順禦之東。而西偏有逾垣進者。敵遂登陣。伯順撓白刃不避。噫。伯順死矣。世人利害之屬。有窮通得喪。有毀譽成虧。至死生而極。予向固覘伯順之一窮通。齊得喪。忘毀譽。渾成虧。今乃親覘其不二死生乎。悲夫。

孫奇逢日語。伯順先生生平有三變。爲諸生時。有嗜書之癖。飯不呼之常不應。初登第。一介必巖。萬人必往。故到處能循職掌。人人驚爲破格。事榆關三年。功名之念已灰。生之闕亦破。每以朝聞夕死爲談柄。故能從容就義而神不亂。

李光地榕村集。忠節鹿公詩。如操筆直吐者。而宛轉曲至。使讀之者。若親見聞其義形之色。憤慨之聲。深情遠概。足以敦澆振

儒於無窮。

田按天啓間魏忠節周忠介縶騎赴獄道出定興鹿太公周旋營救無微不至義聲俠氣驚動一世暨忠節以退老之神守黑子彈丸之邑城亡與亡是父是子江村一片地遂爲節義之鄉煌矣哉。

和人日抵甯遠有作示同行幕僚

舊雨寒銷臘。新正日屬人。三年從患難。一意爲君親。戎馬肥邊草。征袍積塞塵。甘泉烽火息。紫氣滿彤宸。謁楊忠愍祠。

此地拜先生。昂然氣不平。鬚眉常颯爽。風雨益淒清。想見埋輪意。猶聞請劍聲。丈夫存本色。千古藐榮名。隨督師行邊和韻。

錦繖瑠弓小隊分。歷憑沙塞指黃雲。迤南平野排魚麗。直北危峯過雁羣。腴肉暗從鞍上盡。雞聲誰共夜中聞。朝廷不吝通侯賞。幕府何人第一勳。

南居益一首

居益字思受。渭南人。萬曆辛丑進士。授刑部主事。歷員外郎中。出爲廣平知府。歷山西副使。參政。按察使。布政使。入爲太僕卿。以右副都御史巡撫福建。遷工部侍郎。總督河道。以忤魏忠賢削籍。崇禎初起戶部侍郎。總督倉場。遷工部尚書。以事削籍歸。李自成陷渭南。不屈死。

田按思受不爲賊屈。加以炮烙。絕食七日死。大節炳然。官福建時。捐俸刊徐興公鼇峯集。蓋亦留心風雅者也。

從花源川入靈臺望玄象山簡家太史

夙齡慕遐蹈，栖志在名山。豈謂塵內蹤，聊復事遊盤。伊余攜同好，展眺緣清川。花迷樵客路，泉韻幽人絃。雲端矚遙嶽，林表披晴煙。蒼麝戲蘭薄，玄鶴下芝田。耳目極昭曠，眞賞契冥筌。升危戒顛躓，撫已慙貞堅。安得瑤華音，一寄瓊臺仙。

尹伸四首

仲字子求，宜賓人。萬歷戊戌進士，除承天推官，遷南兵部主事，歷員外郎中，出爲西安知府，歷陝西副使，蘇松兵備，參政，投劾歸。天啓中，起貴州參政，解職去。崇禎中，起河南布政使，罷歸。福王時，起太常卿，未赴。張獻忠寇四川，被執死之。乾隆中，賜諡忠節。有康樂堂集。

田按：子求以邊才起貴州參政，其得黔報奇示兩子云：仕宦通黔籍，時比於放流，頃者因戎馬反名才見收，袁年履瘴鄉，病軀親戈矛，中子不樂聞，況使老妻愛，其出黔城途次漫興云：舊著歸田賦，今成不職歸，蓋子求分守威清道，貴陽圍解，巡撫王三善將深入，子求頗贊之，監軍西征，三善敗沒，子求突圍歸，坐奪官，戴罪辦賊，後頗有功，猶貶一秩視事，旋罷去，所謂今成不職歸也。張獻忠陷敘州，得子求，重其名不殺，子求罵益厲，遂擯殺之，死事甚烈。

病後田園雜詠

荒俗無筆畊，仁義買寒饑。曠論薄田舍，英雄亦我欺。糞車卻走馬，堯舜在一犁。附郭多膏腴，甲族所必規。百里就壤塿，豈徒峯壑奇。智力所不到，其塗乃坦夷。農惰自積習，薄取給冬炊。百窘博一閒，乘除敢自私。

人生滿意難。尙恐過其涯。

出黔城途次漫興二首

舊著歸田賦。今成不職歸。貪趨王儉府。愧息漢陰機。用舍從時論。馳驅與願違。生還差可喜。風日駛驂騑。
出郭三十里。雲峯便不同。村樓紅葉雨。山磬碧溪風。耕鑿甘長賤。琴書守固窮。青山懸望眼。沽酒問鄆筒。

小覺

秋蟲唧唧夜初長。斗帳猶疑燈燭光。二豎苦爭閒日月。百年誰共好林塘。松濤挾雨瓦聲冷。瓶水儲花幽
夢香。此際關心竟何事。五經全未入巾箱。

傅宗龍一首

宗龍字仲綸。昆明人。萬歷庚戌進士。除銅梁知縣。改巴縣。徵授戶部主事。遷御史。監貴州軍。加太
僕少卿。以右僉都御史巡撫順天。拜兵部侍郎。總督薊遼保定軍務。以事奪官。起四川巡撫。召拜
兵部尙書。以事繫獄。起兵部侍郎。兼右僉都御史。總督陝西三邊軍務。兵敗死之。贈兵部尙書。加
太子少保。諡忠壯。

宿邊城望軍營

獨上邊城憑曲欄。戎旌獵獵背人看。月華千里夜笳動。星彩一天秋帳寒。只恐驚鳥棲不定。其如旅雁度

猶難愁來顧影頻搔首燈暗軍門漏漸殘

畢拱辰三首

拱辰字星伯掖人萬歷丙辰進士除朝邑知縣改鹽城累遷淮徐兵備僉事改山西李自成寇山西城陷死之乾隆中賜諡烈愍有珠船齋詩鳧溪存稿旅詠瓊餘系曜近草

濟音集王西樵曰僉憲博綜鴻祕不減曹君鄴架萊乘一編文獻所資爲詩無恢詭驚豔之才而好摹青藤謹菴諸公不無邯鄲之恨然刈其榛蕪擷其苕秀亦復矯矯不凡其句如千峯低雁影十里辨龍腥讀魏瑤始末云紙上忠魂餘血淚人間羽黨尙鬚眉示內云精薄祇堪添鷄料局寒仍欲泣牛衣贈友云六朝恨草賔相負八米新吟賽自嗟又鮑成島佛金千笏夢到江花筆幾床皆有別趣

贈都昌吳尉

萬里服微官鳴琴一署寒口碑酬衆易手板向人難公事花間出故園天際看翩翩雙鷓鳥幾日下金灘

遊武宮觀道經雙鳳山

雙鳳何年峙荒祠高下憑蝸涎粘斷磬燐火續幽燈村吠龍疑豹堂空虎是僧靈虛自注劉長生宮名方有待
轡不成登

贈李揮使造船瓜州

烽高海國已頻年舟楫何人問濟川北地雄風推李廣南人長技數樓船曲江濤色千帆出浮玉鐘聲一

水懸憶爾揚舲東首日。淮流三月碧於天。

蔡道憲三首

道憲字元白。晉江人。崇禎丁丑進士。除大理推官。未赴。改長沙。癸未八月。秦賊張獻忠攻長沙。城陷。被執。磔死。事聞。贈太僕少卿。諡忠烈。有悔後集。

靜志居詩話。江門自序悔後集云。悔後者。何前日妄作詩。今日之作。且輯之。以俟後日之再悔也。其虛懷可見。詩雖音節未諧。而清婉越俗。如移竹已抽三尺筍。種桃爭發一庭花。又湘水清紫藤。花落魚子生。皆不失爲佳句。

田按。公死時。年僅二十九。其平日捕盜安甯之方。臨難備禦戰守之策。偉然碩畫。不幸寇衆兵單。城陷被執。多方說降。罵賊不出。至寸磔以死。何其烈也。集中詩。瀟灑出塵。不得以尋常聲律繩之。

偕元謨諸昆過東汝兄迎台閣晚挑燈小桃源分韻

南北相過莫厭頻。秋衾夢繞白雲新。何如小閣一尊酒。迭作名山兩主人。醇醴只爲公瑾醉。寒花應著阮郎春。殷勤石上栖霞火。數尺溪亭環幾巡。

送同寅周石拙之攸

爾我交情與古期。碁敲燈地夜深時。一天月好人方去。滿地秋清愁可知。無以別君惟有酒。若還憶我但看詩。宮齋此夜仍須掩。羶鶴一雙臥北籬。

留別諸葛士倫叔

欲別未應別。愛君愁語君。青山知送客。容易起秋雲。

宋玫二首

玫字文玉。一字九青。萊陽人。天啓乙丑進士。除虞城知縣。改杞縣。擢吏科給事中。遷刑科都給事中。歷太常少卿。大理卿。擢工部侍郎。以廷推下獄。除名家居。大清兵下萊陽。死之。乾隆中。賜諡忠節。

梅村詩話。九青少穎異。爲詩學少陵。愛蒼渾而斥婉麗。然不無躋駁。當其合處。不減古人。嘗與余同使楚楚。嘉魚熊魚山。竟陵鄭澹石俱九青同年。到武昌相訪。鄭詩亦清逸。其贈什曰。剖斗折衡爲文章。天下婁東與萊陽。謂我兩人也。九青登黃鶴樓。過小孤。皆有詩。今失記。惟憶其獄中言懷一聯云。朋友誰與生死間。朝廷今作是非看。時上方切治苞苴。而金吾徵卒乘之。反行其姦利。貪吏放手無罰。而寸蹠尺縑。輒加速治。九青之語。蓋實錄也。過南中有云。草迷三國樹。水改六朝山。九青曰。天下之山。未有不由水改者。其用意精刻如此。

晚秋窮居

養齋宜茲地。多閒慮自輕。菊耽十月色。梧領一秋聲。散病歡移坐。思家遇送行。憂來只遠望。無計出春明。

悼舊

畫閣紅樓第一家。曾將玉珮向人誇。祇今風雨清明後。燕啄香泥葬落花。

盧安世一首

明詩紀事 辛籤 卷二

二六八九

安世字環水赤水衛人萬歷壬子舉人除富順教諭超擢僉事遷貴州參議歷四川副使進參政請告歸起四川參議張獻忠寇四川被執不屈死福王時贈布政使乾隆中賜諡節愍

田按環水殉節史傳不載其監軍遵義也卽水西之沙崖古樓鎮南底水中澤烏江茶山羊崖版角黎民吳馬口等十三隘置兵守險總督朱燾元成功以環水守隘之功爲多史亦不詳余當爲環水作列傳以補史闕

奢夫人

都督持威太自輕翻令順德據聲名君看九驛奢香路豈直宜娘解用兵

朱萬年一首

萬年字鶴南黎平人萬歷己酉舉人除定陶知縣改中城兵馬司指揮遷戶部主事歷員外郎中出爲萊州知府叛將孔有德圍萊詭乞降出城招撫被執不屈死之贈太常少卿乾隆中賜諡烈愍

田按朱公守萊以慈惠得民心崇禎四年援大凌河遊擊孔有德李九成等叛於吳橋連陷郡邑公聞變卽召同城官紳士民條約二十四事城中戢守具倉卒悉辦嚴士民逃城之禁權豪貴人寓居一齊以法無得闖出於是危城中人人有固志賊百計來攻隨方抵禦六閱月城中食盡和藪乾以餌捍圍者至啖井泥公巡行撫摩士卒強起譟呼終無畔志時本兵熊明遇主撫議文武大吏多和之賊知公得民心伴禮講撫者且曰必得朱公出要我爲信公曰叛兵殘郡邑殺命吏自知不赦必無降理同事者強以行公歎曰知府食祿爲王臣此身固不敢惜偕巡撫謝迺出有德并執之猝攻城公給之曰徒執我無益速以精銳從我呼守門者出降賊果以精騎五百擁至城下公大呼曰我被賊欺誓必死彼精騎盡在此可發礮急擊之無顧我城

上人以公在。不忍發。公復頓足大呼。賊怒。亂刺刃。公大罵不絕而死。城上乃發礮。賊精兵死過半。後援兵至。圍乃解。衆人念公死甚烈。且先後有全城功。以七月七日爲公忌辰。歌舞牲醴。士女拜祈者日萬計。訖二百餘年弗衰。

與友人論皮林事兼悼閔千戶有序

永從縣皮林蠻。當播逆發難時。糾諸苗反佐逆。攻陷縣城。焚五開衛。播滅。沉撫江公鐸會師。命總兵陳公璘等七道進討平之。時萬歷辛丑三月也。方皮賊初起。新化守禦所千戶閔公宗騫字繩武者。奉檄以屯兵三百進討。孤軍深入。直搗賊巢。殺傷過當。賊悉衆圍之。糧盡援絕。力戰死。賊四裂其尸。三百人唯郝姓一人走免。先是公整隊出門時。所乘馬仰首長鳴。反走不前者三。公厲聲策之曰。爾知此行兇耶。丈夫得死疆場。幸矣。旣遇害。馬縱橫蹶齧。賊莫敢近。破圍疾奔至家。公妻辭見而號曰。馬獨歸。夫子死矣。夜。馬亦悲鳴不食死。璘等尋奏功。亦公先剄其銳。故易爲力。而公死事猶未上聞也。

播酋數十世。其地千餘里。一朝萌逆節。誅滅因之始。蠢爾皮林蠻。怒蛙居井底。爾之所據險。與衆復有幾。持而與播較。未及身一指。助逆已無功。而尙不自揣。居然破城邑。浪欲謀不軌。懸知一旅來。定作刀下鬼。銅關鐵爲砦。一笑豈能恃。獨傷千戶公。全軍沒於此。鬼馬獨歸來。悲鳴亦同死。旌忠猶有待。誰聒當路耳。

張秉文一首

秉文字含之。桐城人。萬歷庚戌進士。授戶部主事。歷員外郎中。出爲撫州知府。歷福建參政。廣東按察使。遷山東布政使。大兵臨濟南。城潰死之。贈太常卿。乾隆中。賜諡忠節。有楚草、閩草。

茶洋夜泊

荒驛停孤棹。遙村接暮煙。湖寬全受月。窗小半窺天。溷酒蠅無賴。欺燈蛾可憐。清光盈一水。流恨此年年。

楚煙二首

煙字非煙。曹州人。天啓乙丑進士。官戶部主事。告歸。大兵下曹州。抗節死。有紫芝堂集。

寄友人

今日飛鳧客。眞成采藥行。山民供赤葛。野客獻黃精。從政兼求道。緯眞豈累名。自茲方去穀。官舍未嫌清。

秋日雨後有賦呈成穉元

煙斂青林豁。風含碧竹新。遙知孟處士。孤賞對秋旻。

黎弘業一首

弘業字孟擴。增城人。天啓辛酉舉人。官和州知州。流寇陷城。死之。贈太僕少卿。

歷陽遺音。黎公弘業守和州。崇禎乙亥春。賊破巢縣。郡戒嚴。未幾賊退。賦詩以勞郡士。冬。賊復至。陷和州。公殉焉。賊退賦詩勞郡士。

狂寇游氛漸釋騷。忠肝在在切同袍。微臣守土真吾分。多士登陴亦太勞。燭影暗搖山月淡。劍光寒拂曉霜高。囊韃此日清宵永。攜錦窗前醉彩毫。

馬如蛟一首

如蛟字騰仲。和州人。天啓壬戌進士。除山陰知縣。徵授御史。以事落職。尋復官。家居未赴。流賊陷和州。戰死。贈太僕少卿。有訥齋集。

一百五日同周六建魯過鶴嶼分得清字

尋春赴林壑。芒屨覺身輕。問酒樂同志。聞鶯懷友生。花飛新樹密。雨過亂流清。聯袂穿桃隴。人疑到赤城。

周而淳一首

而淳字還之。掖人。崇禎丁丑進士。授兵科給事中。督畿輔諸郡城守。大清兵下河間。死之。贈太常少卿。乾隆中。賜諡節愍。

計偕寄諸兄弟

珍重開封字。離情紙上看。春風吹馬首。昨日到長安。

馮一第一首

一第字櫻公。長沙人。天啓丁丑舉人。張獻忠陷長沙。被執不屈。死之。有代古詩一卷。賁閣吟譜二

卷。

沈湘耆舊集。樞公先生以詩文雄湖湘間。崇禎癸未。張獻忠陷長沙。先生走湘鄉。將乞師他所。賊下總檄徵求甚急。先生作書卻之。又作自弔文。避亂改姓文。以自悼。賊檄再下。度先生終不至。乃擊其母與兄。招之。不得已就縛。賊反復喻降。不屈。將斬之。一老僧從旁伏地哭。請免。賊乃斫其兩手。置營中。一夕死。母兄獲免。先生清修介節。廉頑立懦。著述甚富。尤精史學。以所論著。形爲歌詠。作代古詩。斷自虞初。迄隋季。得入詩者四十九人。謂李唐而下。變詩爲律。稱近體。無古詩。遂止不作。嘗與竟陵交。竟陵招先生讀書寒河。入詩社。不赴。古詩嚴冷幽峭。不能盡脫鍾譚習氣。

秋夜同陶仲調宿嶽麓

明月發深樹。山氣窺淳古。躡子松間影。徘徊快所吐。秋天曠人思。茲游結四五。以子客中心。憩我廬邊塢。皎皎鐘聲內。霜光如亭午。菊風生露香。澹然吟篆縷。戀此終夜清。憑樓俯江渚。

盧象昇一首

象昇。字建斗。宜興人。天啓壬戌進士。授戶部主事。歷員外。出爲大名知府。進參政。副使。按察使。以右僉都御史巡撫鄖陽。擢右副都御史。改撫湖廣。總理江北。河南。山東。湖廣。四川軍務。進兵部侍郎。解巡撫任。加督山西。陝西軍務。改督宣大。丁外艱。乞奔喪。不允。候代。進兵部尚書。大清兵入牆子嶺。賜尙方劍。督天下援兵。尋奪尙書。以待郎視事。爲楊嗣昌。高起潛所撓。兵敗賈莊。力戰死。贈太子少師。兵部尙書。廕錦衣千戶。福王時。追諡忠烈。乾隆中。賜諡忠肅。有集十二卷。

勝朝殉節諸臣錄。象昇有勇略。先後治兵十餘年。身經百數十戰。親冒矢石。未嘗挫衄。爲揚嗣昌輩所尼。屢起屢蹶。崇禎十一年。大兵臨蒿水橋。象昇督戰。以孤軍無援。礮盡矢竭。徒手格鬪。身被四矢三刃而死。

失題

池邊雨細花落。簾外風清日長。呼童採藥蘿徑。對客攤書石床。

呂維祺五首

維祺字介孺。河南新安人。萬曆癸丑進士。除兗州推官。入爲吏部主事。歷員外郎中。告歸。崇禎初。起尙寶卿。改太常少卿。進本寺卿。提督四夷館。擢南戶部侍郎。兼都察院右僉都御史。總督糧儲。進兵部尙書。兵潰。奪職歸。流賊陷洛陽。被執。不屈死。贈太子太保。諡忠節。追贈太傅。乾隆中。賜諡忠敬。有明德先生集二十六卷。

田按。呂公以講學名。臨難大節炳然。詩頗風華。亦如宋廣平之賦梅花也。

米家園

爲園亦有米顛風。想在城隅煙水中。關向西山收拾紫。花從內苑借將紅。人常走馬邀詩客。自說調鷗署海翁。任許清吟窮此趣。難窮吾亦不能窮。

米家童

明詩紀事 辛籤 卷二

閉門不惹九衢塵。但向蕭齋問主人。行處須教詩在握。愁來莫厭酒沾唇。幽谿尋藥輸麋友。隔嶺傳書勝雁臣。除卻爐香同茗椀。居然無事一閒身。

遊雙瓦官寺

逐日趨公至午殘。多尋幽勝暫傳餐。三山地老唐供奉。雙寺僧爭晉瓦官。亂竹臺荒遊鳳趾。寒楓洲冷放魚灘。蕭騷意思無人識。自解囊琴對水彈。

午睡

楊柳青青春去否。上林花事竟如何。小窗睡起無人語。那得當年春夢婆。

落花

舞罷香魂不可招。滿庭紅雨意蕭蕭。夕陽枝上堆濃綠。猶是新妝簇翠翹。

謝璉一首

璉字君寔。監利人。萬歷□□進士。歷御史。僉都御史。巡撫登萊。叛將李九成等圍萊州。出城撫賊。爲所害。贈兵部侍郎。乾隆中。賜諡節愍。有夢草堂集。

許昌弔魏武

竊據雄圖勢凜然。老奸末路亦堪憐。才名父子無軒輊。算局君臣止後先。橫槊氣消原上草。分香花冷路

旁煙黃昏車馬牽愁處。烏鵲還飛月滿天。

李士標二首

士標字霞舉嘉興人。博士應徵子。國子生。除上林苑署丞。遷甯海州同。崇禎十五年。冷口兵入山左。所過州縣。望風而潰。州城陷。死之。贈尙寶司丞。有蒼雪齋集。

勝朝殉節諸臣錄。山東甯海州同李士標。崇禎十五年。州城被圍。力疾守城。死。妻沈氏。一門二十三人同殉。

木瀆道中

宿雨飛花路。煙光漏午曦。江暄衣乍減。春去客先知。新水始濡棹。亂山層繞籬。雲歸滿西澗。沽酒繫船時。

秋日偕卞潤父移棹虎邱

沿隄一舸逐秋風。都載清尊二客同。帘影乍移山店晚。楓梢初著水亭紅。虎嘯北距通關路。鶴市西來盡佛宮。新月半江人倚櫂。同聽歌吹白雲中。

明詩紀事卷三

辛籤

范景文五首

景文字夢章。吳橋人。萬曆癸丑進士。除東昌推官。擢吏部主事。歷員外郎中。移疾歸。崇禎初起。太常少卿。以右僉都御史巡撫河南。擢兵部添注侍郎。以憂歸。起南右都御史。就拜兵部尙書。參贊機務。以救黃道周等。觸帝怒。削籍爲民。起原官。未上。改刑部。復改工部。兼東閣大學士。入參機務。京城陷。投井死。福王立。贈太傅。諡文貞。順治中。賜諡文忠。有集十二卷。

列朝詩集。夢章秀羸文弱。身不勝衣。啜茶品香。論詩顧曲。每以江左風流自命。一旦持大議。抗大節。屹然與高陽。定興並峙。嗚戴斗爲之生色。

靜志居詩話。啓禎之際。秦聲變而至文天瑞。楚調變而至尹宣子。越吟變而至王季重。正音墮地矣。吳橋博綜舊章。領袖羣雅。其詩發揚而不厲。新警而不佻。獨自成家。不飲狂泉之水。

田按。公以救石齋削籍。攷集中譏論當存人材可惜一疏。可見牧齋云。武陵起復。夢章自南率九驛論劾。竹垞云。坐劾時相除名。非其實也。又集中有論熊文燦撫賊未可輕信一疏云。皇上銳意蕩平。以撻伐之柄。屬於熊文燦。十二萬之兵。二百餘萬之餉。不惜竭海內民力。九邊兵力。供其指揮。原欲摧陷廓清。洗而空之。非令一撫豢彼苞孽爲苟且計也。從來治盜之法。曰勦。曰

撫權可兼行，勢難偏廢。剿而後撫，求撫在彼而權在我，不剿而撫，求撫在我而權在彼。權在我可操縱自如，權在彼則叛服不常，且撫之不效，已非一日。此撫彼叛，朝撫暮叛，外撫中叛，今楚賊張獻忠人不散隊，械不去身，分食於地，資貨於商，據陸而復問水，市馬而復造舟，此其逆萌叵測，伺隙狂逞，饑養靡一潰，破浪乘風，加以江北旱蝗，流亡載道，飢寒之徒，易於響應，噉臍豈有及乎？論剿撫之局，洞若觀火。明史本傳不載，故詳錄之。公論詩云：余嘗笑文人多事，壇坫相高，莫不欲盡易昔人所爲，獨雄千古，不知矯枉有過，指摘適滋。往者代生，數人相繼以起，其議如波，如吳下之正用脩，近代之麟王、李，後必非先，沿爲故事，擬古造新，入途非一。尊吳右楚，我法堅持，彼此紛囂，莫辨誰是，持論可謂平允。故作詩不主張派別，秀穎清新，秉鉞中原，榮樞江左，輕裘緩帶，可想見風流人豪。公甲申殉難，詩云：孤臣空灑淚，天步遂如斯。妖蝕三光暗，心盟九廟知。翠華迷草路，淮水漲煙澌。故國千年恨，忠魂遶玉墀。蓋不知帝已殉國，猶冀蒙塵南巡也。

石頭城

荒荒憑故壘，傳是石頭城。返照三川影，江流六代聲。露華臨夜白，天氣入秋清。俯仰悲人代，還看古月明。

秋夜偶成

小立虛亭內，遠香靜可聞。伴惟邀冷月，影欲殢涼雲。傷晚憐秋老，含情坐夜分。深心何所寄，酌酒取微醺。客有詢近狀者，書此以答。

君問歸來事，閒時手一編。飢臨乞米帖，貧乏買山錢。鶴性如人傲，花枝近水妍。猶容吳客至，語帶五湖煙。和友人閒居之作。

夜裏刪詩日，看山縱然忙。殺也清閒，從教花落休開徑。除却僧來，卽閉關。性好積書，終是癖。身無小病，怕

成頌幽棲未盡聲。聞累鶴舞翻翻鳥語聲。

戲贈同波上人

雲心已冷氣如虹。坐聽鳴泉說苦空。脫下袈裟調駿馬。教人錯認是支公。

倪元璐二首

元璐字玉汝。上虞人。天啓壬戌進士。改庶吉士。授編修。進司業。遷中允。歷諭德。庶子。進祭酒。落職。閒住。起兵部侍郎。超拜戶部尚書。都城陷。自縊死。福王立。贈太保。吏部尚書。諡文正。順治中。賜諡文貞。有文集十七卷。奏疏十二卷。詩集二卷。

陳子龍忠裕集。鴻寶先生。以英明天挺之才。宏遠多識之學。奏對則樸實。董掌制則追典謨。圍經則並游。夏執簡則儷南。狐應酬之文。辨離所至。已絕攀躡。無溢美。無虛譽。與世之作者殊矣。

靜志居詩話。尙書晚築室於紹興府城南隅。櫨檻法式。皆手自繪畫。巧匠見之束手。既成。始歎其精工。時方患目疾。取程君房方于魯所製墨塗壁。默坐其中。堂東飛閣三層。扁曰衣雲。凭闌則萬壑千巖。皆在寫下。適石齋黃公至。越施以錦帷。張燈四照。黃公不怡。謂國步多艱。吾輩不宜宴樂。尙書笑曰。會與公訣爾。既北行。遂殉寇難。順治初。尙存。亂嘗攜舍弟千里。暇輒登焉。今已鞠爲荒草矣。

無聲詩史。鴻寶詩文。爲世所重。行草書如番錦離奇。另一機軸。間寫文石。以水墨生暈。蒼潤古雅。頗具別致。文心之餘緒也。陶元藻越畫見聞。鴻寶畫幅。山皆峻嶒兀界。林木則蒼莽鬱蔥。皴法喜用大小劈斧。不屑描頭畫角。取媚於人。王香泉云。吾生平頗愛天池書法。脫盡俗塵。及置倪公行草之旁。便如小巫見大巫。無坐立處。余謂倪徐二家畫亦然。蓋倪以雄深高渾見魄。

力。徐以蕭疏古淡見精神。況倪有忠義之氣。流露毫端。去人自遠。

田按。公始釋褐。不輕造謁。首輔福清嘗曰。三年無片刺及吾門者。只一倪君也。思陵登極。誅鋤閣寺。朝端水火。未盡廓清。公戊辰三疏雪東林。焚要典。石齋謂公每一疏出。如撞朝鐘。上震廊庑。駭駭震用。一扼於烏程。再扼於井研。偉抱碩畫。訖不得展。卒抱日與虞淵同隕。哀哉。公詩頗近公安一派。余擇其詞旨雋雅者錄二首。嘗鼎一臠。可知其味矣。

御河新柳色

天孫春懶散機絲。挂向章溝縷縷垂。淺黛依微宜綴露。柔枝飄裊不勝鷗。殢人掌上千回舞。臨本宮中十樣眉。清蹕欲來須整態。何如張緒少年時。

丙寅春日湖上偶成

歸來萬喜脫嵌纏。不是頑仙卽醉仙。縱酒何曾虛酉日。簡糧剛不少寅年。但愁蝴蝶夢難熟。真信鷓鴣行復旋。畢竟湖中風雨細。菟裘吾老志和船。

王家彥一首

家彥字開美。莆田人。天啓壬戌進士。除開化知縣。改蘭溪。擢刑科給事中。屢遷戶科都給事中。改吏科。擢大理丞。進本寺少卿。遷太僕卿。拜戶部侍郎。協理戎政。都城陷。自縊死。福王立。贈太子太保。兵部尙書。諡忠端。順治中。賜諡忠毅。有集五卷。奏議五卷。

蘭陔詩話。公之死。昭忠錄諸書皆云。守德勝門。城陷。自投城下死。惟甲申傳信錄云。寇僞王公坐安定門。歎曰。我總督國寶。今

日城破萬死難隨。且義不可污賊刃。遂自縊於城樓。未幾。賊發城樓覆。後出其尸於瓦礫中。其甥楊負而殮之。按蔣公德瓌誌。公墓云。初守阜城門。久之。移安定門。張公肯堂請郵疏云。三月初一日。守安定門。至十九日。賊從別門入。公望闕叩頭。遂自縊死。是傳信錄之言。爲有據。惟收公尸者。爲義士鄭而泉名。詮教諭開之父。三山高兆記其事甚悉。非楊甥也。

城頭秋感

漠漠寒雲起暮笳。煙塵猶未退戎車。壁門明月臨青海。朔野霜風捲白沙。幕府夜闌蛩復切。嚴城秋老菊無花。可憐關塞淒涼甚。荒塚纍纍數萬家。

吳麟徵一首

麟徵字聖生。海鹽人。天啓壬戌進士。除建昌推官。改興化。徵拜吏科給事中。改刑科。以憂去。起吏科都給事中。進太常少卿。都城陷。自縊死。福王立。贈兵部侍郎。諡忠節。順治中。賜諡忠肅。有集。

攜李詩繫崇禎時。言官章正宸。莊鰲獻以建言下獄。磊齋疏救。庚辰大計。與祁彪佳矢志澄清。時論快之。時盜賊猖獗。民生凋瘵。糜乞身任危疆。不許。又請整飭江南。爲京師援應。假南司馬以權。爲羣議所阻。賊既陷秦。前後屯失守。甯遠孤懸二百里外。三面皆絕。城守禦甚難。督撫鎮臣。請撤甯遠兵守關門。廷議不決。磊齋獨言撤宜。又爲議數百言。約六科共陳之。諸人不肯署名。遂獨疏其事。疏留中。遂寢。甲申三月十五日。磊齋奉命守西直門。十七日。賊至城下。攻甚急。爲衝棚撞城。解舍皆壞。磊齋引門爲楯。門被三矢。矢貫木。磊齋屹然不少卻。是夜。天微雨。賊發大礮。碎几案。端坐自若。十八日。賊僞樹勤王旗。叩門。中官欲納之。磊齋麾卒堆石塞門。俄而兵部騎士持幟請出。亦拒之。復以重賞購健兒。緝城殺賊百餘人。賊大至。磊齋至午門。遇相魏藻德。告曰。事去矣。願見天子。德曰。入宮。誰爲趣起。姑還守所。明日。司馬門議之。磊齋望闕叩頭。號泣而去。十九日。賊從德勝門。

入。磊齋徒步歸邱。邱已爲賊據。因入道左三元祠。欲自經。家人請待。祝孝廉至一訣。許之。二十日。祝淵至。磊齋酌酒慷慨與別。曰。昔吾登第。夢一褐衣人。咏文丞相零丁洋詩。曰。此劉宗周也。數實爲之。今老矣。山河破碎。不死何爲。相對泣下。因揭祠壁。敗。褚箬燈作書付家人。命視服以單衾殮。遂縵而絕。夫當寇躡中原。潰陷相望。關外所存。止五六城。其輕重緩急。不待智者辨。此時果從磊齋議。急撤重兵。誠救時之良策。而庸臣不知釋疆場之憂。救堂奧之急。迨賊勢壓京。始言遠撤。措手不及。而國以亡矣。悲夫。

鵜鷓行

山林畏豺虎。川澤畏鵜鷓。鵜鷓大身嘴。項有百石壺。挈壺赴春波。杼水如轆轤。鼓翅風雨驟。所集無渟汙。巨魚擲千尺。力絕僵泥塗。小魚濡沫乾。駢首安就屠。羶腴飽饑吻。狼藉沾諸雛。果腹坐磐石。睥目思江湖。方笑揭竿勞。終覺網罟愚。瞥然雙屬玉。儂佯意何殊。喙微毛領單。頗似有道壻。飢虛緩行躅。鞠躬俯寒蕪。翻遭鵜鷓噴。碎嗑聲氣麤。鵜鷓亦有云。其云多矯誣。一云丹穴王。竹實供天廚。再云隨陽使。稻粱事踣躄。茲爾瑣尾臣。致身在菰蒲。鱸鮪方發發。鯢鮓正于于。颺爾頭上絲。保爾一捻驅。在梁幸可託。殄物干天誅。佞哉老鵜舌。凜若操戈父。神鷺不吞鯉。况乃受擲揄。高蹕謝饕餮。杏向青冥呼。始信百族中。具有穿窬徒。除惡務其本。敢用誛司虞。

馬世奇五首

世奇字君常。無錫人。崇禎辛未進士。選庶吉士。授編修。歷諭德。進庶子。都城陷。自經死。福王立。贈

禮部侍郎諡文忠。順治中賜諡文肅。乾隆中改諡忠肅。有文集五卷。詩集三卷。

啓禎兩朝遺詩。公詩容穠麗。居然唐人風格。

靜志居詩話。馬公清德。奉使諸藩。餽贈一無所受。比還朝。夢中吟文信國詩。從今到卻江南日。化作鸞鷗帶血歸。蓋殉國之志已素定。故先兆於夢云。

梁溪詩鈔。公及門中殉甲申乙酉之難者。前後五十餘人。

送文正之歸晉絳

晉水吳山一短篷。雙柑斗酒語匆匆。浮名久已干時忌。莫更逢人說馬融。

寄贈姚孟長吉士

廿載青雲捧日心。夜分蓮燭對沈吟。治安策就還流涕。不爲君王賦上林。

贈項仲展守雅州

分得銅魚萬里懸。黎風雅雨舊謠傳。借君五色媧皇石。爲補梁州小漏天。

送劉吉侯侍御按貴州

山環羅甸峯皆拱。江引牂牁水正朝。但得尺書賢十部。漢家誰許夜郎驕。

孟嘗君養士處

俠氣千年大海東。猶將鄒魯薄齊風。卽今飽食官廚者。幾似雞鳴狗盜雄。

凌義渠四首

義渠字駿甫烏程人天啓乙丑進士除行人遷禮科給事中三遷兵科都給事中出爲福建參政歷湖廣按察使山東布政使拜南光祿卿入爲大理卿都城陷自經死福王時贈刑部尙書諡忠清順治中賜諡忠介有集六卷

四庫總目義渠服官以清操直節受知莊烈帝文集六卷乃其友徐汧門人姜孩所校定中間不載奏疏一門故平生建白如爲給事中時請原三河知縣劉夢煒賈償餉銀疏論亂民焚掠巨室疏論大臣箝制言路疏論中樞不職疏論策江東叛亂及請陽撫陰剿諸疏皆其風采之卓卓者今並不見其本集則編次時亦不免有所脫遺然如兵餉議清慎勤論諸篇剛毅自立之象凜然猶可概見其崇化論有云能爲逢比者視碎首濺血仍無異於退食委蛇能爲申生伯奇者視抱石維經仍無異於問安視膳蓋生平立志如此卒之見危受命克踐其言固與口孔孟而行躡阨者區以別矣

啓禎兩朝遺詩公詩深覲幽潔如其人

靜志居詩話凌公詩義見者解頤嘗與閔文學元京共排纒香煙錄董上舍斯張稱其冷豔畢臚比之吳均入東詔及官禮垣封事四十餘上皆切中時弊溫輔以吏才稱之轉外溫既謝政入爲大理臨難之頃從容就義惟悉取生平撰述焚之爲可惜也公清介特甚田廬一無所遺身後二十餘年猶未并梓江都吳綺園次守吳與時夫人閔尙存園次齋拜堂下秋深矣尙衣葛衣練裙退而歎息以鹽鼓魚藏遺之且卜地葬公於驥邨之北爲文祭之

微雨

一雨飄何向因風不盡同幽涼起暮色迷漫結秋空冷鋪投鞍入荒山覓路通隔溪煙縷縷愁望是湘中

河行卽目

撼地殷天勢欲吞。蕭蕭竹笠繫何門。荒祠古像隨流塌。茅屋窮黎逐水奔。涼簷不堪裝更薄。縱橫怪爾盜猶存。風波咫尺艱如許。竟日沿洄只遶村。

潛山旅舍

滿酌聊將濁酒沽。行行轉復怯前途。四圍草樹兼風猛。一帶茅茨照月孤。飢鼠欲來燈已暗。曉蟬不止夢全無。可知一夜寒侵骨。纔說經秋意蚤枯。

重過茶池亭

驅車往復此山鄉。列障參差亞短牆。一掬冰棱添茗苦。半凹石路帶楓香。誰同遺老銜碑冷。好續前遊引夢長。墨瀋重尋俄八載。暗中星火照人忙。

周鳳翔一首

鳳翔字儀伯。紹興山陰人。崇禎戊辰進士。改庶吉士。授編修。歷南司業。進諭德。都城陷。自經死。福王立。贈禮部侍郎。諡文節。順治中。賜諡文介。有集。

啓禎兩朝遺詩。公詩清灑。無館閣稷重之習。

靜志居詩話。甲申三月之變。文介授命獨遲。十九日城陷。語吳莊介云。臣子義在必死。然必一視大行殯宮。縞素痛哭。方可無

懣爾二十一日赴東華門茶棚下舉哀復匍匐至邸自經絕命詩云碧血九原依聖主白頭二老哭忠魂時親猶具慶也於時大學士宜城邱公瑜集議朝房俄而賊入亟走民家自縊爲旁人所持不死次日賊蹤跡得之挾入窩鋪求死不得賊帥劉宗敏刑辱備加猶罵不屈伺守者稍懈乃就縊論者責其瀆忍至受羣盜之侮不得與忠臣之列文介東華之哭旣不受賊帥之拘而萬舌一辭免腐儒吹疵之論是天之所以成公大節而公之素行交孚於鄉國故也不其難哉

欲遊惠山因雨不果

眇眇子懷繫青山思不禁溼雲籠野塔疏雨作溪陰花徑柴門迴泉源石竇深夢中好識路清夜亦相尋

吳甘來一首

甘來字節之一字和受瑞州新昌人崇禎戊辰進士授中書舍人擢刑科給事中改吏科兵科進戶科都給事中都城陷自經死福王立贈太常卿諡忠節順治中賜諡莊介

西江詩話甲申逆亂犯闕和受義不屈具冠帶從容自經死先一日賦絕命詞云君臣義命乾坤晚狐鼠干戈風雨秋

卽事

霽色開遙浦雲蹤寄水萍流深魚穩穴樹密鳥窺人橫笛吹江閣開樽覓野鄰高原濃翠染隨意拾芳春

許直一首

直字若魯如皋人崇禎甲戌進士除義烏知縣改惠來擢吏部主事遷員外都城陷自經死福王立贈太僕卿諡忠節順治中賜諡忠愍

楊廷撰一經堂詩話舊志載忠愍公墓在如皋縣南三里馬塘河高家橋東撰按忠愍死後并未歸葬故里今吏部文選司署有許公祠祠內函骨木匣尙存大學士程景伊郎中李調元碑文可證

田按流賊薄都城公約同官爲死守計貸金饗士亡何城陷人莫知帝所在有傳帝南遷者公急變服往甫出門見賊衆縱橫卽返曰事勢至此出將安之今上英明肯隱忍播越以貽國羞乎俄聞帝崩自誓曰國亂不匡君危不濟吾惟一死而已北向拜君南向拜父秉燭作絕命詩六章其卒章曰擲筆翻然辭世行老親幼子隔幽明丹心未雪生前恨青簡空留死後名局戶自經死

贈辟疆有序

歲庚辰江南北蝗飛蔽天赤旱千里吾邑斗米千錢僵尸載道辟疆盡廢百口之糧捐金破產躬自倡率開賑日待哺者四千餘人而撫軍道鄰史公兵憲禎臻黃公司李佐平湯公咸傾心倚重各有捐助下檄邑令資辟疆以佐其乏余冬自都門返見之感且愧力貸多金始終明夏爲期之議殘臘凌冰復偕予勸賑四鄉辟疆之心力苦且竭矣余不嫺詩作五古紀事代覓瘠爲仁人致頌焉

皇天蔽視聽。虐此無辜民。旱魃吐赤燄。螟螽飛紅塵。平疇一望枯。溝瘠化青燐。爲富鮮憫恤。閉糴封高困。吾黨有義府。冒子志嶙峋。傾糧周缺陷。鬻產繼宏仁。哀鴻數千百。飽煖生陽春。當事洵喬嶽。倚君如其身。帑發恣出入。節慎見經綸。鄰邑望風至。廣賚飭苦辛。甯止麥舟助。圖繪鄭公倫。余亦切同體。胡爲徒撫膺。

稱貸佐毫末。杯水聊相因。君復廣同善。四郊履層冰。頓使窮鄉遠。亦得起殘生。鴻慈裕經術。真誠貫鬼神。短言代口碑。他年擬勒銘。

申佳胤一首

佳胤字孔嘉。永年人。崇禎辛未進士。除儀封知縣。改杞縣。擢吏部主事。遷員外。降南國子博士。歷大理評事。遷太僕寺丞。都城陷。投井死。福王時。諡節愍。順治中。賜諡端愍。有集六卷。

四庫總目。佳胤集爲其子涵光所編。卷首有家傳。稱其於詩好稱李夢陽。何景明。今觀所作。與何李頗不相似。大抵直抒胸臆。如其爲人。但體格尙未成就。且不免浸淫明末纖仄之習。然凜然剛正之氣。足使後人起敬。不敢復以詩格繩之。言以人重。烏可沒也。

靜志居詩話。申公治最中州。及考牧近畿。聞寇逼居庸。郡縣望風奔潰。或勸毋入都。慷慨流涕曰。固知京師不支。如天子孤立。何疾馳以入。時三月十二日也。徧謁大臣。畫戰守策。皆不省。城陷。自投王恭廠井中。其詩娟秀。不羃不浮。近劉半舫一派。

咏古

花敷宮院不知秋。曲曲清歌夜夜遊。安得阿麼頭顱穩。始知天子果無愁。

陳良謨一首

良謨字士亮。鄞人。崇禎辛未進士。除大理推官。擢四川道御史。都城陷。自縊死。福王立。贈太僕卿。諡恭愍。順治中。賜諡恭潔。有滇中集。

全祖望甬上耆舊集。公爲人木訥。當廣座辨論鋒起。獨默然。然其居官循分盡職。於世間所謂黨部門戶流品之說。漠然不曉也。時流寇鷓鴣張。天子倚督相楊嗣昌以平賊。嗣昌初負時望。大用後。日以舛謬。自其用熊文燦大壞國事。不得已親出。嗣昌楚人不欲流寇塗炭鄉里。縱之入蜀。公以巡按甫至。蜀猶以前此人望。謂嗣昌才可倚。亦不知其將以蜀爲壑也。初公奉勅專任城守。以衛蜀王。已而有監軍之命。行間功罪無所不豫。獨剿撫進止機宜。聽之撫鎮。又受督相節制。蜀撫邵捷春亦良吏。顧嗣昌不之喜。欲譏其事而陷之。公時時調兵食以佐捷春。賊遷延東去。復自巴。巫入楚。嗣昌始終思撫賊。公謂捷春當仍調兵合東北一鎮以堵賊。又言川中間道最多。宜防詭計。又極言賊之不可撫。捷春詭嗣昌不能盡行公言。而賊果乘虛自巴。巫渡開。新公恐其薄成都。晝夜講守禦之法。賊偵知有備。不復至。嗣昌委開。新之罪於捷春。有詔逮問。並奪公職。令殺賊自贖。公之受事也。嘗奏言。督師寬心辦賊。其功可就。識者知公樸誠。將爲嗣昌所賣。至是而驗。及秦兵報瀘州之捷。斬首千三百餘級。嗣昌夸爲大捷。公覆按有瀘州殉難官民無首一疏。極言秦將之欺罔。乃知嗣昌之誤國。而賊已自蜀入楚。襄王被害。嗣昌聞自戕。天子爲之旰食。命公留蜀以任後事。再踰年。始代還。以乞假者親歸。公之歸也。同里林大行繭菴迎質之曰。聞公前此有樊武陵之疏。然否。公歎息曰。良有之。不知其方寸一至此也。大行哭曰。公從西塞出。獨不知排黃石齋。殺盧九台。陷楊機部。引陳新甲。熊文燦耶。公謝曰。是吾罪也。蓋公之醇愿有如此者。

陸涼道中

盡日崎嶇路。前征又若何。枯藤鞭瘦馬。朽筏渡危波。山暗堆雲樹。途迷叢石坡。披荆次荒野。停午暫相過。

汪偉一首

偉字叔度。休甯人。寄籍上元。崇禎戊辰進士。除慈谿知縣。以治行卓絕。徵授翰林檢討。都城陷。自

縊死。福王立。贈詹事。諡文烈。順治中。賜諡文毅。

金陵詩徵。孟進士章明。顧錢塘咸建。劉南昌曙皆公癸未同考禮闈所得士。同死節。

桃花潭茗詩

高根撐石罅。破壁產雲英。活火瓶笙沸。清香肺腑生。

金鉉一首

鉉字伯玉。留守前衛籍。武進人。崇禎戊辰進士。除揚州教授。入爲國子博士。遷工部主事。改兵部。都城陷。投御河死。福王立。諡忠節。順治中。賜諡忠潔。有集。

靜志居詩話。思陵之去闍黨。無異拔山。曾不數年。命張彝憲總理戶工二部錢糧。出帑金別建公廨。俾諸司以屬吏之禮見。金公再疏陳其不可。謂以陛下迪簡之臣。而令其罄折僇僕於刑餘之子。不亦羞朝廷而辱當世之士耶。思陵卒不允也。中官借驗火器効公落職。公笑曰。吾去官遠。此輩如脫蟻蝨垢賦之衣。豈不愉快。遂與諸弟講古文辭。尤精研易理。壬午七月晦。讀邵氏書。題其後曰。甲申之春。定我進退。進雖退時。外而弗內。退若苦衷。遠而弗滯。外止三時。遠不卒歲。優哉游哉。庶畢吾世。又語其弟曰。吾平生寡所好。視弃官如揮涕唾。今以巡城。每過御河。輒留連不能去。何也。卒沈於是。從彭咸之所居。公志蓋已先定矣。

自悼

出門瘁我形。我心實少息。入門心勞勞。誰云一室血。妻子安糲草。忍厭高堂食。春風迺栗烈。毀我東籬棘。

劉理順一首

理順字復禮。一字湛六。杞人。崇禎甲戌第一人及第。授修撰。遷中允。京城陷。自縊死。福王立。贈詹事。諡文正。順治中。賜諡文烈。有集十二卷。

啓禎兩朝遺詩。考宋元以來。狀元及第死者。於宋得三人。何異。文天祥。陳文龍。於元得三人。李輔。秦不華。李齊。而明有五人。靖難之時。則有黃侍中觀。土木之禍。則有曹文忠。北京之變。則有劉公。而浙東有余庶子煌。江右有劉中允。同升。先後皆死國事。此亦科名人物之盛。軼於前代者也。

自靖錄。山陰劉宗周。謂京師甲申殉難者。以詩而言。倪元璐第一。以事而言。劉理順第一。蓋以臣殉君。妻殉夫。子殉父。僕殉主也。

田按。劉公甲戌廷對策。謂明之失策。一壞於四路之輕入。而開鐵陷。再壞於經撫之易局。而遼瀋危。三壞於戰守之爭執。而廣甯棄。洞若觀火。思陵親拔第一甲申殉節。可以答思陵之知遇矣。

次林可任韻

乘間訪素契。虛室窅陰陰。于世無奢好。惟書不憚淫。任真雲出岫。適興鳥歸林。一笑天機在。悠然共此襟。

明詩紀事卷四

辛籤

劉宗周三首

宗周字啓東。紹興山陰人。萬曆辛丑進士。授行人。請告歸。天啓初。起禮部主事。擢光祿寺丞。未赴。進尙寶少卿。改太僕少卿。移疾歸。起右通政。以忤魏忠賢削籍。崇禎初。起順天府尹。移疾歸。廷推授工部侍郎。以劾溫體仁斥爲民。起吏部侍郎。未至。擢左都御史。再以論事忤旨。斥爲民。福王立。起故官。疏論馬阮不聽。告歸。杭州陷。絕食死。唐王贈少師。大學士兼吏部尙書。諡忠正。乾隆中。賜諡忠介。有葢山集二十四卷。

四庫總目。宗周立朝之日雖少。所陳皆切中當時利弊。一阨於魏忠賢。再阨於溫體仁。終阨於馬士英。而葢桂之性。介然不改。卒以首陽一餓。日月爭光。在有明末葉。可稱傲傲完人。非依草附木之流。所可同日語矣。

自靖錄。崇禎壬午。廷臣會推吏部侍郎。未當上意。上臨朝而歎。謂大臣如劉宗周。清正敢言。廷臣莫及。遣文書官諭吏部用之。起爲吏部侍郎。未至。適左都御史王道直病歸。擢宗周以代。掌都察院。僅六十日而褫職。宗周歸至通州。和友人韻志。慨曰。策蹇何所之。遭時亦云厄。一步一回首。四郊營壘迫。大道直如矢。青天萬古闕。從此遂已。而身後令人惜。

西河詩話。海鹽吳磊齋太常。未第時。夢一隱者來。謂口誦文文山山河破碎。風飄絮。身世浮沈。雨打萍之句。詢其名。曰。我劉宗

周也。時磊齋尚未知公名。心記之。及壬戌既第。適劉公以儀曹郎知貢舉。見之訝然。又二十年。磊齋與公皆先後赴召。每相見。京邸甚親。及癸未。以都察院見放。磊齋始流涕。使友道所夢於公。公亦訝然。次年。磊齋由吏曹擢太常殉國。慨然曰。吾不可負劉公公。後作甲申慟哭。凡十人。以磊齋爲首。其詩有云。何人死後骨先寒。二十年前夢底酸。謂此也。

田按。劉公蕞山與黃公石齋。以道德直節名海內。仰之如泰山北斗。劉公以忤魏闈削籍歸。舉證人社於塔山旁。執經門下者常數百人。黃公以劾周延儒。溫體仁削籍。退而講學於浙之大滌山。閩之榕壇。執經者至千人。卒之社屋國墟。二公皆致命遂志。明季道德完人。二公爲稱首焉。

過張灣張從壽甯得名。新有李尙書宅。

張家渡口灣如織。綠水朱門望不極。夾岸枝枝楊柳垂。春煙猶帶五侯色。畫船簫鼓日紛紛。得意歸來休論貧。回首張灣何處是。不堪新說李家邨。

陽穀道中辭春二首

病客傷春歸便休。滄浪一曲棹扁舟。抽簪及早甯非計。不趁東風歎白頭。
野水荒郊屢問津。浮雲孤寄一閒身。可憐陽穀城西柳。不是青青帝里春。

黃道周十八首

道周字幼玄。一字螭若。漳州鎮海衛人。天啓壬戌進士。改庶吉士。授編修。遷中允。以救錢龍錫降調。復疏陳時政。斥爲民。用薦起故官。進諭德。遷少詹事。劾楊嗣昌等。謫江西布政使。司都事。旋逮。

下獄。永戍辰陽。尋復故官。福王立。召拜吏部侍郎。進禮部尚書。唐王時。進少傅。兼太子太師。武英殿大學士。改吏部尚書。督師被執。死於市。贈太師。文明伯。諡忠烈。改諡文忠。乾隆中。賜諡忠端。道光五年。從祀孔廟。有漳浦集五十卷。

靜志居詩話。詞臣無言責。居无咎无譽之地。需次待選而已。迨石齋先生入翰苑。與上虞同年倪文貞公俱自任天下之重。崇正去邪。盡忠補過。引裾折檻。九死不回。先生詩所云。親從霹靂推車過。又得滂沱自在春。蓋實錄也。及退而講學於杭。則大滌洞天。於閩。則蓬萊峽。少長咸集。遐邇具來。監史主賓。琴瑟鐘磬。庶幾濂洛之遺風焉。先生瓊象之學。辭義深奧。後生或昧指歸。詩才亦未免蹉駁。要其光燄。不啻萬丈也。曲周路皓。月過銅山。弔先生詩云。道德公自重。文章公自深。若夫軍旅事。似非公所任。用違其才。此百世所惋惜者。

蔡世遠二希堂集。石齋詩歌。不步漢魏唐宋。而博奧黝深。雕鏤古健。風骨成一家矣。

居易錄。黃石齋先生蔡夫人名澗。石字玉卿。工書法。與先生逼似。康熙庚辰春。得其楷書律詩一卷。楷法稍雜分隸。題云。偶寄夏太守。時山中聞警。崇禎丙子秋八月。蔡氏玉卿書於石養山中。詩多崇禎中覓道語。蓋先生作也。

陳壽祺左海文集。石齋黃公。德性似朱紫陽。氣節似文信國。經術似劉子政。經濟似李忠定。文章似賈太傅。陸宣公。詩則嘔奇獨造。不施鞞勒。所謂天人之才。獨立無儔。

五石瓠。黃石齋善畫。人初不知也。臨難前。作水墨大畫二幅。長松怪石。極磊落。

田按。石齋先生通籍二十載。歷俸未三年。其疏救機山。回逆黨將翻之案。劾武陵。燭樞輔。覆餗之凶。一削仕籍。再沈牢獄。思陵既無英主之精鑑。復蹈猜主之寡恩。牽連善類。囚繫纍纍。欲不覆亡得乎。武陵既敗。先生聞之。愀然曰。毒瘡去。元氣削矣。弘光立。以禮尙徵。先生與楊機部書曰。吾輩頑石。搗骨合藥。無補於天。猶冀後人。嗅此藥氣耳。蓋逆知事之無濟。麾戈回日。不得不

出此途耳。先生論詩不薄李、王，而時蹈竟陵之習，有明末派。如文太青、倪鴻寶皆墮落此趣，豪傑亦不免。余抉擇集中合作，英詞浩氣，當引星辰而上，不僅凌躡魏晉而合轍盛唐也。

王文成廟迎送神曲

折瑤枝兮擣瓊糜。思君兮中阻，飢播靈鬮兮揚靈旗。矯欲來兮何期，大江橫兮大嶺絕。射朝曦兮馬當發，招余弓兮雲中。遺余珮兮木末，雖無德兮心所知。曾昔來兮安足辭，露所生兮雨膏之。菊有風兮蘭與吹，追鄴車兮抗嶧馬。上天兮下土，時不同兮安得游。登君堂兮不得語，耿徘徊兮中夜。

續招魂

禮魂第三

陰以風兮天晦晦，將靈車兮不得屆。波生兮江中，路斷兮山外。靈約詞兮曷從再，雲披披兮雨下來。棘變變兮生車衣，濡足兮創飢。予從靈兮方何期，靈之來兮日蓋暮。陰不開兮天益下，蟲號兮啾啾。逕嘈嘈兮不得語，裂余衣兮江上棧。渡深兮涉淺，望夫君兮不一反。靈語兮均堂，兼草生兮雜以菑。遡微風兮聲不揚，靈迴車兮迅前速。峻臨淵兮不得度，君思余兮粟以飄。余思君兮然疑作，施者固兮往者輕。冰高兮水薄，靈來重兮耿余思。汰以哀兮吹參差，魚鱗鱗兮鳥下舞。寥薜蘿兮葺君所，靈不安兮脩焉離。余亦將兮離居，山嵒嵒兮泉漭漭。白石生兮闕余室，靈從左兮間余右。路差池兮曷同宿，衝風至兮百草衰。蛟龍藏

兮君焉依。來長楸兮顧余馬。靈襄襄兮擊余鼓。佩不同兮締則均。思不一兮各及春。桑庚飛兮鳴鴟。冰
洩洩兮水渙渙。柏檝兮蘭舟。與君期兮河中流。靈之來兮前颺颺。余從駕兮乘文鷲。荷生兮蕙穗。不及衣
兮猶得佩。靈中疑兮邇則阻。日皓皓兮間微雨。語雖曠兮猶所親。室雖曠兮猶匪野。折芳草兮搴辛夷。思
繁兮草稀。蔓子生兮何萋萋。猿狖哀兮日昧昧。霜未降兮露先戒。陳琴瑟兮離以歌。靈不來兮傷如何。

寤言二首

昆臺初息鬪。投策方嬉遊。四方生蠶心。一旦叛數州。絕轡始再頓。解冕爲兜鍪。中身五十載。甫有留諸侯。
至治安可常。至道安可求。刈芻逃爪牙。玄珠如浮漚。所重天明功。未寒先庀裘。大君無吉凶。日月靡所詎。
靜正持乾綱。四海生春柔。

崇邱多曾薪。洄川多曾鱗。君子秉虛沖。四顧多瑋人。重華爲魚販。七友皆鱗峒。尙有州支公。及於石蒲民。
貧窮無禮樂。討論何所陳。日月自週天。眼耳生其身。救世非庸流。歷艱苦不親。華貫十六賢。聊爲鸞與麟。
負輓登長途。胼胝知苦辛。

責躬二首

天地何高深。日月相循環。星宿陳其顛。動靜恆無端。舉翼不能翔。而作醯蟻觀。大命一以至。不復能研鑽。
鬼神欲告之。翕吸近若難。傷哉草木類。不得留朱顏。

好道不入微。閱物不至細。影響自相答。杳然無所繫。大易重存身。春秋本大義。詩人多微思。委婉出至意。草草一世間。遂爲稊與秕。江漢下明河。忽已失所恃。

寄別臥子兼懷鴻寶

紹興使君萬斛珠。隨風飛灑千流蘇。文章經濟各大雅。出之我口甯爲諛。雲門蘭亭坐親切。鶴子下堂啄碧雪。客棹不敢閒移遊。猶請老翁看五洩。天下水無匡廬奇。雁蕩無聲差勝之。五洩壯險不可及。安能過於倪公詩。倪公與余最相契。一字動有千峯勢。每頌使君明且清。董賈蘇韓失位置。我行當過三閩江。若耶溪情橫相縱。迂回二千三百里。不願白璧黃金雙。使君偶來再夜坐。刻舟如鞋載白墮。不知身在智井中。恍惚槎從銀漢渡。倪公抱我如抱雞。五年兩過靈峯西。一夕折杖各分去。無情潮到難爲嘯。聽君微談動四壁。倪公新詩在小冊。匡廬水瀑雁蕩澌。五洩奇觀走辟易。只今天下多風塵。明州山水清絕倫。褰帷帶星亦閒暇。蘭槳挂幟搖青春。老翁西去洞庭水。不著些涎弔屈子。不死還來此中遊。櫻團竹杖報知己。

偶成

人情貴逸豫。物外卽滄洲。其奈人間世。難從物外遊。鶴歸松子老。雲澹琪花秋。惟有畫梁燕。呢喃春序留。入都知敵在灤。永援師星散未集。京營挑選不具。諸帥顧望無建斷。後之策者再疏將上。輟而稱詩。白馬烏桓道。令支突騎來。書生非不武。債帥安能材。乘障狄山恥。誓書張孟哀。誰當千里骨。愧殺築金臺。

將發石城而楊機部適至

何嘗忘世事。初不負君恩。薇蕨青山路。菰蒲白板門。貧窮生覺好。放浪老難論。彭蠡舊相送。蓑裳涕尙存。

西庫西北數間爲二周諸公畢命之處

昭代多君子。清流此再清。豈關門戶事。動使鬼神驚。迸命扶中葉。同游璨九京。傳看芝草蹟。鐘鼎羽毛輕。

夏五大滌山中觀雨

此間唯竹葉。不復辨松聲。人下琅玕榻。天圍翡翠城。茶鑪新火改。研閣輭雲平。談詠無多事。西鄰鐘磬鳴。

張鯢淵中丞漳南凱還餞於鄴山

帝眷東南宵旰勞。素書先此展龍韜。一匡江左歸微管。八翼天門試夢陶。戲下旌旗新變色。帳前風雨舊投醪。坐教赤子還牛犢。半部鐃笳靖海廳。

武陵歎用方孩未韻

綸閣軍容動絳墀。出車天子自題詩。殿中舞馬看推轂。日下交龍覆畫旗。信有皇威收撻楚。可無彤矢告平夷。繡墩玉饌尋常事。不數蘧楊將相時。

焦山寺中七中二銅像

落草故自佳。溷世共荒穢。寄愁與埋憂。忽忽五百歲。

山居

舊事華陽清異天。世間今有冷神仙。空山木石私名號。盡在尊盧太古前。

送張紹和

中身不任九州長。垂老能爲十畝翁。欲向君家乞桃竹。小山亦有百株櫻。

思在華山頂

蒼龍嶺下少人來。鐵鎖春深滑碧苔。欲上嶺頭吹玉笛。長安不見使人哀。

明詩紀事卷五

辛籤

徐石麒十首

石麒字寶摩。青浦籍。嘉興人。天啟壬戌進士。除工部主事。以忤魏忠賢削籍。崇禎初起。南禮部主事。就遷吏部郎中。歷尙寶卿。應天府丞。召拜左通政。遷光祿卿。通政使。擢刑部侍郎。進尙書。落職。閒住。福王立。召拜右都御史。未任。改吏部尙書。馳驛歸。加太子太保。嘉興城破。朝服自縊死。魯王監國。贈太傅。諡忠襄。乾隆中。賜諡忠懿。有可經堂集十二卷。

南甯文定崇禎末大臣爲海內所屬望以其進退卜天下之安危者劉蕺山黃漳海范吳橋李吉水倪始甯徐雋李風指六人北都之變范李倪三公攀龍髯上升則君亡與亡蕺山漳海雋李在林下不與其難而次第致命蕺山以餓死漳海以兵死雋李以自斃死則國亡與亡所謂一代之斗極也

自靖錄刑部尙書徐石麒以輕擬行人司副熊開元禮科給事中姜埰兩諫臣罪忤上意冠帶閒住臨出都修撰劉理順賦詩贈行石麒答以詩云予曾過大梁臨風懷伊摯乘耒耕莘嘯遽抱唐虞志一民不時雍內溝發深思此道久已陳夫子願躬試文行動至辱龍頭親簡置既窮太乙奇復發鴻寶祕早晚宜相廡天下乃得治麒也苦慮人所受盈其器承乏白雲省爰書失聖意投荒分所宜而況僅播棄譬如疊碁者疊高勢自墜烽火滿近郊逐臣正遷次感君懷芍藥題扇以相遺頓令松柏心白

首欲自刺。乙酉閏六月。嘉興城陷。石麒公服蕭拜。自縊於可經堂。袖有遺筆曰。我生不辰。會當陽九。流氛陡發。龍馭上賓。邊燧旋揚。鑾輿遽遜。去歲含哀。忍死赴召。乘銓。自謂盡忠。後皇即是。仰報先帝。豈圖歸田不久。國難頻仍。于野未安。王畿再破。慨都會之顛覆。痛士女之傷殘。精力銷亡。既不得單騎傳呼。至敵營而盟誓。年華衰暮。又不能肅清宮禁。致宗社之奠安。惟有決志殲身。見危授命。若乃魂騎箕尾。安問魄滯溝塗。下達黃泉。見父無慙於教育。上遊碧落。覲帝不愧於生成。期無忤乎君親。庶有辭乎忠孝。以吾郡完毀。卜此身存亡。片語旌心。預書表志。緘留數則。用視後人。

靜志居詩話。冢宰歸田之日。築堂於郡旁。榜曰可經。人不解其故。及乙酉城被圍。公度必不能守。步自東門入。城破。自經於堂。始信公之就義。立志已久。蓋與昔贊止水之意。殆合焉。公古今詩俱新警。不作規撫蹈襲之語。鍾爍詩品。以落花依草喻邱遲公實似之。

田按。徐公事思陵。開誠善導。戊寅。自南京入賀元旦。鄭司寇三俊以輕比。失帝意。下獄。黃少詹道周。黃庶子景昉言之於經筵。帝怒未回。公言。皇上御極以來。麗丹書者。多大臣朝士。即使盡皆情法允協。已是幽陰景色。而威嚴之下。株連蔓引。九死一生。今皇上以輕擬之。故深督三俊。恐將來必有承順風旨。以斷鍊爲能事。以鉤棘爲精神。非復皇上慎獄之本意矣。疏上三日。帝御門口傳出三俊論者。以爲非公忠誠悟主。何以有此。而亦卒以輕擬熊開元。姜採之獄。落職閒住。則善者亦無如之何也。公詩新穎不染輕塵。與范吳橋畧同。而力較厚。

贈恆亮顧山歸

吾師踏杯還。短褐雲未卸。時來叩重門。話我碧霞下。言言了大乘。不以聲聞借。如珠落玉盤。如泉流石罅。空明無漏因。然燈照長夜。余亦佛弟子。六欲苦禁架。鉤引入迷津。毒逾含沙射。聞言豁幽理。撫膺起悲怆。華山劉鍊師。朝萊間關抵吳。求諸公書道德經。攜歸鏤石。藏之雲壑。詩以送之。

蓮峯煙雲甲天下。吳會煙雲長紙價。日日激雲太華巔。欲來吳會求書玄。五千字字蓮花簇。香霧溼煙生尺幅。只恐秋風挾字飛。撥雲墜石鏤翠微。芒鞋綠杖千山壑。出關入關一隻鶴。曾飲明星玉女漿。只乞名書不乞糧。祇今秦關滿寇甲。狺狺豹虎不可狎。自云劉根道炁高。靈符半寸皆奔逃。余家舊住杜陽左。聞君西歸鼻出火。予家系秦中

贈無幻上人

譜蔬爲佛事。清課與時忘。浮碧渲生菜。餘紅帶子薑。酒因元亮設。茶與趙州嘗。時或隱几坐。嗒焉不可量。

桃花寺

獨行恣幽討。入寺恍棲真。犬吠雲中豹。僧歸天際人。石壇天雨舊。松磻白鷗新。我亦忘機者。彌清習靜心。

登密因關

深徑鎖平橋。危樓倚碧霄。水痕晴帶霧。松籟晚兼潮。隔嶺雙峯出。穿雲孤磬飄。密因微結果。怪石總相朝。

答王太史覺斯木末亭

攜尊過寺背。逐勝選松柯。石氣溼林莽。江光漏薜蘿。難恆此日聚。易逝若春何。不飲恐非計。來朝風雨多。

登北固

峻嶒高閣俯重關。人語雞聲杳靄間。水落江城高一甕。潮迴海勢下雙山。愁看直北浮雲黑。欲羨歸南去

雁閒滿眼糧艘來更早。誰憐逃屋議招還。

送俞明所之任惠州

路指龍川飛蓋斜。腰間寶劍掣青蛇。到來荔子丹迎幟。此去楊花雪滿車。蠻瘴變雲成五色。海風吹雨淨千家。幽情最喜聽鸚鵡。長日垂簾到晚衙。

次文供奉啓美扇頭韻

窄窄柴門淺淺苔。碧煙深鎖待君開。借來月色能留客。賒得山居好種梅。薊北烽煙頻入夢。江南雲氣好登臺。明年此日俱無恙。再向山根醉幾迴。

橋頭

經行十九年前地。一樣冬風吹鬢枯。勒馬徘徊尋舊迹。石橋楊柳幾株株。

徐爾穀一首

爾穀字似之。嘉興人。石麒麟子。國子監生。坐事被逮。死白門。有畫水草堂詩稿。

楊陸榮殷頑絲。順治丁亥。爾穀率衆持糧。依吳勝光於松江。事敗死。妻孫氏聞爾穀死。自投於河。死而不仆。

丙戌夜坐

萬籟劃然起。淒淒中夜聲。鐘鳴秋在寺。月出雁橫城。簫鼓當年夢。琴書此夕情。莫嫌山鬼泣。白首盡佳兵。

夏允彝一首

允彝字彝仲。松江華亭人。崇禎丁丑進士。除長樂知縣。福王立。起吏部主事。南都失守。自投池水死。唐王時。贈右中允。諡文忠。乾隆中。賜諡忠節。

自靖錄。彝仲聞國變。賦絕命詞云。少承父訓。長荷國恩。盡心報國。矢以忠貞。南都既覆。猶望中興。中興杳然。何忍長存。卓哉吾友。虞求廣成。勿齋。容如子才。蘊生。願言從之。握手九京。人孰無死。不泯此心。修身俟命。欲勵後人。

靜志居詩話。幾社六子。瑗公以經義見長。詩非專尙。然其撰長樂志。境有孝子節婦。必賦詩以旌之。集中樂府。未嘗不合古人也。野史述瑗公授命在乙酉五月。第集有練川五哀詩。練川城潰。乃是年七月五日。瑗公尙存。則止水之投。當是松江失守之日爾。

練川五哀詩錄一

侯京兆峒曾

烈烈侯夫子。負節本奇特。十載罷郎官。抗志衆莫測。西江富文彥。衡鑒饒奇識。三復陟屺詩。解組依親側。砂礫揚中天。青霾暗無色。壘壘榮陽城。糾糾墨翟力。環塹方及泉。子魚殉社稷。公語兩子前。生死義各得。兩子泣相從。之死矢靡慝。外絕晉衛旅。內竭鼠雀食。重關泣漣瀉。屠毀填荆棘。壯哉一門士。九京同羽翼。所惜蘭蕙摧。沈寃成罔極。

夏完淳十一首

明詩紀事 辛籤 卷五

完淳字存古。松江華亭人。主事允彝子。諸生。唐王遙授中書舍人。事洩。被執不屈死。乾隆中。賜諡節愍。有玉樊堂集、南冠草。

李廷是南吳舊語。夏存古十餘歲。陳臥子適訪其父。存古出拜。案頭有世說。臥子閱之。問曰。諸葛靚逃於廟中。終不見晉世祖。而嵇紹竟死蕩陰之役。何以忠孝殊途。存古拱手對曰。此時當計出處。苟憶顧日影而彈琴。自當與諸葛爲侶。臥子歎曰。君言先得吾心者。

明詩綜。鍾廣漢云。陳大樽選明詩。存古年纔十餘爾。而宋轅文援其論詩以作序。此時已許其作後進領袖矣。迨十五從軍。十授命。磨盾草檄。不異老生宿儒。信異粟矣。

靜志居詩話。存古南陽知二。江夏無雙。束髮從軍。死爲毅魄。其大哀一賦。足敵闔成。昔終童未聞善賦。汪錡不見能文。方之古人。殆難其匹。

關氏成仁錄。夏完淳年十六。從師陳子龍起兵太湖。遵父遺命。盡以家產餉軍。子龍戰敗。完淳走吳淞軍爲參謀。被執至留都。經畧洪承疇欲寬釋之。謬曰。童子何知。豈能稱兵叛逆。誤墮賊中耳。歸順當不失官。完淳厲聲曰。我嘗聞亭九先生。本朝人傑。松山。香山之戰。血濺章渠。先皇帝震悼。孽虜感動華夷。吾常慕其忠烈。年雖少。殺身報國。豈可以讓之。左右曰。上座者卽洪經畧。完淳叱之曰。亭九先生死。王事已久。天下莫不聞之。曾經御祭七壇。天子親臨。淚滿龍顏。羣臣嗚咽。汝何等逆徒。敢僞託其名。以污忠魄。因躍起奮罵不已。承疇色沮。無以應。時完淳婦翁職方司主事錢旂同在訊。氣稍不振。完淳厲聲曰。當日者。公與督師陳公子龍及完淳三人。同時歃血。上啓國主。爲江南舉義之倡。江南人莫不踴躍。今與公慷慨同死。以見陳公於地下。豈不亦奇偉大丈夫哉。旂遂不屈。與完淳同死。

明詩別裁。存古詩高古罕匹。

田按：存古詩趨步陳黃門，年僅十七，當其合作，與黃門並難高下。赴義之時，語氣縱橫淋漓，讀之令人悲歌起舞。

哀侯納言嗣曾

忠烈簡邁姿，淡然青雲志。三鳳齊離鳴，脩羽拂雲際。孤城戰苦時，日落鼓聲死。始知朝陽禽，亦復秋颯厲。六翮鍛不垂，靈風滿天地。興懷募義旅，言灑西州淚。

贈廣武中大孚孟

君家漳水邊，意氣冠河朔。英爽殊不倫，酒酣高歌作。易水白日寒，千秋事蕭索。慷慨希古人，璠璣隱藜藿。棄家游江干，裘馬盛揮霍。天紀闕不章，棲棲靡有托。行行東南征，舒此伯王略。出門成侯王，閉戶死溝壑。視茲乘風便，始信無家樂。

故宮作

朝登建康城，暮宿丹陽道。黃塵落日大江流，紫陌微寒故宮草。故宮煙雨動新愁，華屋參差成古邱。當時羅綺三千戶，何處鶯花十二樓。六代繁華如在眼，真龍不動河山轉。春光縹緲景陽宮，月色徘徊芳樂苑。細雨深宮花落遲，輕風合殿香飄遠。花香十里到平康，莫愁歌舞冶遊郎。俠少盡騎青絡馬，交遊爭繫紫羅囊。鴛鴦兩兩芙蓉沼，鸚鵡雙雙玳瑁梁。一朝景物如反掌，富貴風流竟長往。元武池邊暮雨來，朱雀門前春草長。美女琵琶塞上行，綺構連雲空復情。行人夜雨烏衣巷，歸雁秋風白下城。登臨千載空回首，陳

井梁宮竟誰有，遊鹿爭銜上苑花。流鶯自囀臺城柳，臺城下接孝陵西。無限枝頭烏夜啼，楊花風起過江去。薄暮如煙滿大堤。

放歌贈吳錦雯兼訊武林諸同志

天風一吹海波立，錢塘東去錦湍急。片片春帆細雨中，西冷曉發西興入。憶昔當年遊武林，布帆絲纜清江深。畫船簫鼓臥涼月，朱樓煙霧生秋陰。此時年纔五六許，但覓梨棗未解語。便知天下有吳生，西陵花月風騷主。先公風表漢三君，朱履三千畫埽門。逢人便下南州榻，滿座還開北海尊。吳生此時席中見，十載神交空半面。援筆千言凌紫霞，元龍湖海人人羨。那知一別三年來，閭閻不知生塵埃。荆榛古殿銅駝臥，弓劍荒陵金雁哀。抱石千秋葬魚腹，王褒泣血羊曇哭。屠簫猶解問夷門，衣冠半亡更胡服。風塵相遇客爲家，齊拂雙龍劍上花。埋名同隱屠羊肆，忍死須臾博浪沙。華堂明燭良宵會，金樽斗酒離人醉。醉裏論心敢放歌，夢中分手還流淚。幾回憑弔舊山河，形勝蕭條可奈何。伍胥祠前暮湖滿，蘇小墓邊秋草多。嗚呼陸郎玉樹埋黃土，小陸風流隱屠買。柴生賣藥不二價，徐子披裘鬻五羖。君歸有語幸相傳，忘憂長向酒家眠。今年白社相招處，回首黃壚竟惘然。悲歌卻話先朝事，抗眉休負生平志。乘風一尋倉海君，歸來訪汝吳門市。

得漱廣訃

忽得胥塘訃。傷心自白頭。龍蛇千古夜。猿鶴萬山秋。閔亂劉琨恥。招魂宋玉愁。無情天目水。不解向西流。

寶帶稿

連天青草青。極浦獨揚舲。歸雁舟前落。愁人夢裏聽。花光明曉霧。波影亂春星。欲訪威靈穴。孤帆入洞庭。

秋夜感懷

登樓送北望。沙草沒寒汀。月湧長江白。雲連大海青。征鴻非故國。橫笛起新亭。無限悲歌意。茫茫帝子靈。

元日大霧

漠漠蒼龍闕。黃雲迴不收。去年今日事。此地昔人愁。烏雀朝三殿。風塵辨九州。扶桑新氣象。玉冕拜通侯。

春興同錢大作

上苑東風試早鶯。故宮依舊百花明。江帆入鏡移瓜步。敵馬如雲走石城。金鼓平陵憐霍義。旌旗滄海葬田橫。傷心半夜看牛斗。醉把吳鉤萬里行。

四月七日寄研德武功叔姪。去年此夕。與二子步月新堤。得屈平卜宅之句。不意竟成先文忠之讖。園林入夏雨模糊。寂寞青門恨早孤。雲水相從新白社。河山如隔舊黃墟。亡秦猶有張公子。哀郢誰憐屈大夫。重到竹林尋二阮。風流還似去年無。

寒食同錢二不識賦

親朋亂後幾人存。湖海交情酒後論。今古文章多薄命。江關詞賦半招魂。王孫一飯誰知己。漂母千金敢報恩。曾作信陵珠履客。幾回慟哭大梁門。

眭明永一首

明永字嵩年。丹陽人。崇禎壬午舉人。除華亭教諭。城陷被執。不屈死。有世經堂集。

自靖錄。乙酉八月。大清兵至。明永集諸生申說大義。歎曰。吾儒臣也。老而無能。世受國恩。有死而已。移家人於郊外。而獨居學宮。作書貽子諸生。本曰。我本小臣。可以無死。然我不能生者。平日以節義自命。兼之賦性耿直。觸境輒動。且我之命名。實先人深意。今豈能委父命於草莽。變生平爲兩截人乎。殺身成仁。乃所至願。雖父子之情。不能顧也。城陷。處分家事畢。服朝服拜廟。題絕命詞於明倫堂。自縊繩斷。投泮池。復救起。被執不屈死。

曲阿詩綜。嵩年先生書具體鍾繇草書。尤獨步一代。

七夕

機械紛紛可奈何。憑誰隻手挽江河。無人不向天孫乞。莫與人間巧太多。

眭本一首

本字允立。丹陽人。教諭明永子。諸生。坐事死。有務菴集。

曲阿詩綜。允立。永歷時。以中書召。事發。自題絕命詞云。父既死。忠子當死。孝子當死。孝。千載而下。不愧名教。與同邑賀王盛同殉節。

病中作

殘暑侵深病。蛩螿惻惻鳴。月臨書榻影。風裂紙窗聲。酒爲多愁減。詩因無寐成。此時身不有。何物可關情。

黃淳耀十九首

淳耀初名金耀。字蘊生。蘇州嘉定人。崇禎癸未進士。家居城陷。自縊於清涼菴。乾隆中。賜諡忠節。有陶菴集二十二卷。

四庫總目。淳耀湛深經術。刻意學古。能以躬行實踐爲務。毅然不爲榮利所撓。如吾師。自監諸錄。皆其早年所訂論學之語。趨向極其醇正。而平易可近。絕無黨同伐異之風。足以見其所得之遠。文章和平溫厚。短纒先民。詩亦渾雅天成。絕無儒響。於王李鍾譚餘派。去之惟恐若浼。可謂矯然拔俗。卒之致命成仁。垂芳百世。卓然不愧其生平。可以知其立言之有本矣。

自監錄。近之爲詩者。承李何七子之弊。或變而之郊。島。或變而之宋。元。險怪誕穢。無所不至。而竟陵二子起而矯之。學之者復將至於爲擊爲俚。如唐之沈千運。孟雲卿其人。已不可得。況進而之李杜耶。

自靖錄。嘉定縣鄉紳黃淳耀。破家結客。同侯峒曾。侯岐曾。等率縣民守城。城破。慷慨大呼曰。結髮讀書有年矣。死無以報高皇帝。烈皇帝。偕其弟邑諸生淵耀。字偉恭者。至西清涼菴。淳耀墻壁題曰。宏光元年七月初四日。遺臣黃淳耀自裁於西城僧舍。嗚呼。進不能宣力皇朝。退不能潔身草野。讀書寡益。學道無成。耿耿不寐。此心而已。僧亟止之曰。公未仕。可勿死也。淳耀曰。城亡與亡。此儒臣分內事耳。同弟自經死。

詩觀三集。陶菴先生生理學史論。皆據上流。詩諸體成精。風格獨老。運際滄桑。身騎箕尾。高風峻節。尤堪俎豆千秋。靜志居詩話。陶菴詩。堅厚無儒響。由不惑於楚人之喙然也。

田按。歸季思以陶菴名集。黃公亦以陶菴名集。二人古詩皆擬陶。然歸詩真率。黃詩俊爽。又各不同。大抵歸有忘世之意。黃有

用世之意。遭時多難。殉節成仁。豈徒以詩人自命耶。

和陶九日閒居癸未九日寓京邸和寄偉恭及諸親舊

羈心如秋草。方枯已旋生。良辰過我前。端憂乃無名。厲厲驚颿嚴。皚皚山雪明。朔雁流寒影。邊鞞動悲聲。古之豪俊人。感此多促齡。我獨胡爲爾。樽開且徐傾。平吟懷惠連。默對思公榮。知音不在側。何以訴中情。願爲雙飛鴻。羽翼不可成。

和陶詠貧士

落花墜茵席。其半隨飛蓬。繫豈賦命殊。無心成化工。絳灌排賈生。何侯薦兩龔。得失自在彼。屈伸將無同。默思塞翁旨。固窮亦有通。逃富豈情歟。執鞭未可從。

和陶雜詩

劫風吹南山。化作海底塵。四大互騰轉。忽然有吾身。狂馳百年中。擾擾分怨親。豈知冰炭懷。靜與虛空鄰。有生會歸盡。有夜會嚮晨。星燈兩翳幻。吾將問化人。

夸者爭榮名。幾人能至老。孔翠傷其尾。明膏不自保。中台星未坼。金谷酒將燥。此時褰裳去。豈非見幾早。咄哉彼蜚蜚。丸糞死猶抱。相牽入禍門。歎息復何道。

高人夏仲御。木石隱會稽。兒撫賈太尉。拂衣歸蒼崖。阮公稱曠達。奇志寓詠懷。竟造九錫文。此穢天可彌。

君子終日行。不使輜重離。應龍潛玄關。曷識翦與羈。窳乎飄風旋。不消還不虧。

詠史三首

鸞鷲常特棲。驥褭辭服箱。古來俊傑人。不在亡主堂。六國昔崩分。豈無賢與良。青蠅飛竿旌。讒妾踞瑤房。屈原既放逐。楚事以徃攘。信陵見猜疑。蛙黽遊大梁。悠悠狡童心。仁義愁我腸。逝言空國都。啖食恣虎狼。往車有折軸。後駕宜周防。願迴目睫智。一爲辨圓方。

季子過洛陽。買臣懷會稽。當時路人心。盡是嫂與妻。勢利散瀉源。陰權生禍梯。達心亮先見。寡識至今迷。上蔡犬可牽。牽之若龍驪。華亭鶴可聽。聽之若天鷄。

猛虎踐機牙。刳屠在鸞刀。須臾決躡去。百夫不敢要。伯慎固名士。義真亦人豪。持節臨中州。奮劍清黃妖。仲穎小豎子。殺之如燎毛。時來生猶豫。事往空鬱陶。一變萬歲隴。再變當塗高。

次韻和東坡岐亭詩并引 錄三

坡公岐亭詩五首。其二首爲陳季常戒殺而作。近代和者頗多。友兄張子灝語余曰。子姑現老齋公身而爲說法。余勉應其意。如坡公之數。

罟師貪得魚。不惜魚化汁。屠伯怙殺牛。不見牛眼濕。嗟彼殺業多。所以遭汝得。彼債既已償。汝憂差獨急。微性憐朱朱。愚仁赦鴨鴨。三品戒庖廚。百籩謝巾冪。獸炭與松明。入爐平等赤。象髓與菲菹。入喉平等白。

深坐不橫參。大歡不洩憤。敢邀天公憐。庶免佛子泣。靜念古賢人。飢驅食常缺。今我餘草蔬。猶堪餉嘉客。推此告同心。暴殄非雅集。

昔有愚小兒。垂死思肉汁。世人與彼同。談食口常溼。大罰方後隨。無肴汝猶得。胡然一响甘。易此八難急。列柵囚雞豚。排籤戮鵝鴨。驅驅黑業中。何由發其羸。我喜周生廚。推盤葵蓼赤。我念隋帝庖。剖蛤毫光白。爲生雖有累。如僧但加憤。爲帝苟推心。何異下車泣。所嗟願力微。不救世界缺。鸞刀啓蒸嘗。折俎供賓客。大哉食時觀。觀彼諸苦集。

嘗酌醍醐漿。不食鮮甕汁。嘗挹朝夕池。不戀滌躡溼。五戒空外空。十善得無得。放者尙云非。殺者獨何急。惜蟲翻搏雞。絞狸因飯鴨。顛倒生愛憎。何異蟹行羸。今人遇勞瞪。目眩成紫赤。及其視根還。惟餘鼻端白。悟茲空萬緣。如風墮輕幘。無生自無殺。無笑自無泣。大明懸三光。下照諸陷缺。殺心如一塵。衆塵合爲客。暴然冰釋時。酒肆許汝集。

偕子宣、子灝、啓霖、德符入西山看梅。

巖洞有嘉名。躋攀生崎嶇。相顧儔侶間。清冰夏眉鬚。樂幽未云遠。歷險良已愚。稽首告山英。留我雲一區。

夜泛鴛湖

積水月涓涓。月斜舟稍前。歸漁搖艇火。宿鷺定湖天。遙指塔相對。暗尋花滿煙。峯巒無一點。吾醉獨陶然。

渡錢塘江

伍相鷗夷去。錢王畫錦空。英雄如昨日。陵谷自春風。白鳥沈煙外。蒼山立雨中。布帆輕轉怒。長嘯對魚龍。

泊舟

單舸時時泊。浮雲故故長。浪兼鳧拍岸。風引燕迴檣。穀雨罷收艾。田歌閒插秧。江南好風景。留眼看吾鄉。

白日

白日公然瘦。青天不復高。頽垣無鼠立。廢壘有狐嗥。亂過民生賤。兵殘賊勢牢。遺黎相對語。毛髮尙騷騷。

歲暮閒居

風破林垌野望長。故人小隱在寒塘。貧來蹤迹如溪友。老去詩篇似漫郎。大布每縫諸弟被。天吳近坼小兒裳。何時買宅成鄰並。十畝春陰共課桑。

送張子石再遊江右

江介鶯花自接連。峭帆何處認歸船。瀧分上下元同歷。月照悲歡已再圓。孤舫雨聲溫昔夢。高樓春思入新篇。憑君莫憶離羣者。慚負匡廬又一年。

京邸送龔智淵南歸

書劍借君客上京。還憐客裏送君行。臯廬得失元無據。雨雪雩涼共有情。關出穆陵黃葉暗。驛逢清口白

波明新詩好爲題茅店。我到應知隔幾程。

黃淵耀二首

淵耀字偉恭。進士淳耀弟。諸生與淳耀同殉節。有詩一卷。

秋水

交秋溪水清。歷歷見其底。木葉何紛紛。白石復齒齒。靜言尋其幽。蕭蕭雜葭葦。水鳥衝人飛。遊魚銜藻起。遙聞漁者歌。前溪暮霞紫。

春閨

春炙繡簾花氣滿。暗風梳草綠。短短。唬鶯破曉驚妾心。金鴨香沈晝衣煖。侍妾勻脂催曉粧。鏡中煙柳鞦眉黃。描罷雙蛾爲誰好。碎破銅片打鴛鴦。

侯峒曾二首

峒曾字豫瞻。蘇州嘉定人。天啓乙丑進士。除南兵部主事。改吏部。歷郎中。出爲江西副使。進廣東參政。改浙江。遷順天府丞。福王立。除左通政。家居起兵。城陷赴水死。唐王時。贈禮部尙書。諡文忠。

乾隆中。賜諡忠節。有內言公集。

自靖遠崇禎甲申。峒曾擢順天府丞。未赴。留都再造。除左通政。乙酉。方屏跡深鄉。邑人推其起兵入城。同諸大家集義勇。固守。

孤城散家財以給軍。屢戰勝。外援絕。勢不支。城將陷。急辭家廟赴池水死。幼妹適太學生金德開者。適歸甯。偕兄死於池。第三子元滄。五子元潔俱同。六子元靜亡。命爲僧。弟岐曾。太學生。踰年復爲松江陳子龍亡命。疑岐曾匿之。執至松江。不屈死。母嬰太恭人。贈太常少卿。震陽妻也。前謂子嗣曾曰。汝父子受國恩。當以身許國。勿以我爲念。及岐曾被執。母語之曰。我昔欲爲卜。壺母。今甯不能爲孔融母乎。從容赴池水死。岐曾妾劉氏。次子元洵。妻夏氏。考功。尤彝女也。元演妻姚氏。元潔妻嬰氏。元靜聘妻盛氏。龜真。共築歲寒亭以居。並守節三十餘年。先後卒。

宿濠梁驛

淮南殘暑退。連夕起秋風。崗嶺青霄上。邨墟黃葉中。未晡投古驛。無寐聽疏鐘。塵境心逾寂。吾將蒙叟同。

陶菴柱和除夕詩疊韻再呈

顧此茫茫集百端。水窮山盡又年殘。枯蝸祇合終黏壁。威鳳何當亦斂翰。此夜送窮文字懶。常年餞臘酒杯寬。天公亟報陽和轉。預有東風散曉寒。

侯岐曾一首

岐曾字雍瞻。通政岐曾弟。嘉定縣學生。以陳子龍事被執。不屈死。門人私諡文節先生。

自靖錄。岐曾丙戌十月十三日有追哭亡兄嗣曾殉節詩云。吾兄志氣古人追。萬旅雲從建義旗。赤手銀河非易事。丹心碧血豈求知。玉音競說從天降。金版應憐出地悲。莫向春風夢春草。江家池豈謝家池。

九日寓鹿城登山和蘊生

蕭瑟塵中鬢。崢嶸物外心。人煙知令節。吾意足幽尋。碧澗爭穿石。朱霞漸織林。歸披雲月晚。餘興若爲深。

侯玄演二首

玄演字幾道。通政峒曾子。與峒會同死。

樓雨

暮雨南樓獨聽鐘。綠窗無事掩燈紅。身如燕壘能安土。情似花幡欲受風。試煖衣篝香熨帖。待晴衙鼓響。瞳瞳。何心更說江南樂。眼底煙林似夢中。

六月十四夜

蹈海何嘗學魯連。奉親儻許託山田。飜飛風景驚烏鵲。感激心情泣杜鵑。一代文章傷節義。百年鄉井愧生全。誰知此夜青天好。鬼出殤號月正圓。

王與胤二首

與胤字永錫。一字百斯。濟南新城人。崇禎戊辰進士。選庶吉士。改湖廣道御史。以言事左遷光祿寺署正。告歸。甲申。聞京師陷。暨妻子登樓自經死。乾隆中。賜諡節愍。有隴首集。

靜志居詩話。新城王氏。科第最盛。盡節死者亦最多。崇禎五年。吳橋兵變。南趨。時則保定同知象復暨其子與。薨死。十五年。城再破。時則貢生與明暨其子。舉人士熊。生員士雅死焉。至是侍御暨妻子氏。子士和又死焉。王氏之門。才甲一世矣。

漁洋詩話。先世父侍御府君與胤。崇禎中以勅總兵官鄧珉忤時相罷歸。甲申。開國難。闔門自經。南城陳瓊錄其詩。與雁門孫白谷。簫曲黃海岸。鈴岡袁臨侯合刻之。爲四忠詩。錢忠伯贊之曰。遺音危苦。孤桐玉律。吟龍戛石。楚撥嗽月。浩歌悲嘯。雷風交加。蟲豸不蟄。象華其牙。

分廿餘話。先伯父侍御公詠梅云。丹英任似火。冰稜自如石。南枝與北枝。不作春風格。陳伯瓊云。公忠烈之性。已見於此。

詠懷二首

咸陽多古蹟。徒供騷人歌。漢宮與秦闕。曾不一瞬過。紫閣有仙人。欲從嘆蹉跎。長嘯以詠懷。泛槎渡洪河。見聞不可恃。日月去已多。輞川在終南。太息空煙蘿。

阮公有密識。神在酒之外。越禮故遺俗。疑心別有會。鐘鼓不足歡。戈矛豈能害。惜彼餐霞人。頤性終昧昧。

王士和一首

士和字允協。御史與胤子。諸生甲申聞變。隨父自經死。

靜志居詩話。允協死不違親。與孟忠僖比烈。其妻於崇禎壬戌城破時。先自經。忠臣孝子烈婦。萃於一門。尤難得也。

絕命詞

痛余生之不辰兮。天滅我之立王。我父母一聞兮。涕滂沱以彷徨。以身殉國難兮。維千古之臣綱。嗟反面而事讎兮。方臣妾之未遑。哀世溷濁兮。四維不張。大地無容身之隙兮。願隨我父母兮。歸於帝鄉。

